

# মাসিকপত্র ও সমালোচন।

( তৃতীয় বর্ষ—বৈশাখ ও জ্যৈষ্ঠ )

মাসিকপত্র-১।

বিষয়	ক।	পৃষ্ঠা।	পৃষ্ঠা
আহিরি	শ্রীশচন্দ্র মজুমদার	১	১
দেশ ভ্রম	জলধর সেন	৪	১৫৩
স্বদেশে	শ্রীমতী কৃষ্ণভামিনী দাস	১০	২৩৪
প্রেম-বৈচিত্র্য	শ্রীযুক্ত শৈলেশচন্দ্র মজুমদার	১৬	২৭
প্রলয়ের ধুমকেতু	শ্রীযুক্ত জগদানন্দ রায়	২৩	৩১
চৌ-ঘাট	শ্রীযুক্ত হরিসাধন মুখোপাধ্যায়	২৭	১৩৮
খুকুমণির ছড়া ( সমালোচনা )	শ্রীযুক্ত অক্ষয়কুমার মৈত্রেয়, বি, এল	৩১	২৭
রাজা রামানন্দ রায়	শ্রীযুক্ত রাধেশচন্দ্র শেঠ, বি, এল	৪০	১২২
কবিতাকুঞ্জ	শ্রীযুক্ত নিত্যকৃষ্ণ বসু, এম, এ প্রভৃতি	৪৫	৪৫

( ঘোড়ামারা রাজসাহী, উৎসাহ-কার্যালয় হইতে সম্পাদক কর্তৃক প্রকাশিত । )

১৩০৬।

হিন্দু প্রেস,

৬১ নং আহীরীটোলা স্ট্রীট, কলিকাতা।

শ্রীপ্রিয়নাথ ঘোষ দ্বারা মুদ্রিত।

অগ্রিম বার্ষিক মূল্য ১।০ টাকা।

এই সংখ্যার নগদ মূল্য ১০ আনা।

## আগামী সংখ্যার সূচীপত্র ।

আজ (কবিতা)	শ্রীযুক্ত অক্ষয়কুমার বড়াল ।
বঙ্গবালিকার প্রাণ (গৃহ-চিত্র)	শ্রীযুক্ত চন্দ্রশেখর কর, বি, এ ।
বিশ্ব-রচনা (বিজ্ঞান)	শ্রীযুক্ত মাধবচন্দ্র চট্টোপাধ্যায় ।
শাহ আলম (ঐতিহাসিক চিত্র)	শ্রীযুক্ত অক্ষয়কুমার মৈত্রেয় বি, এল ।
প্রেম-বৈচিত্র্য (উপন্যাস)	শ্রীযুক্ত শৈলেশচন্দ্র মজুমদার ।
শ্রীশ্রীরামকৃষ্ণ কথামৃত (ডায়ারী)	শ্রীযুক্ত মহেন্দ্রনাথ গুপ্ত, এম, এ ।
দেশ ভ্রমণ (ভ্রমণ কাহিনী)	শ্রীযুক্ত জলধর সেন ।
সৌন্দর্য (সাহিত্য)	শ্রীযুক্ত যোগীন্দ্রচন্দ্র চক্রবর্তী, এম, এ, বি, এল ।
কবিতাকুঞ্জ,	মাসিক সাহিত্য-সমালোচনা ও অগ্রাণ্ড ।

## কৃতজ্ঞতা স্বীকার ।


আমরা গত বৎসরের উৎসাহের বিনিময়ে নিম্নলিখিত পত্রিকাগুলি পাইয়াছি ;—সাহিত্য, ভারতী, নব্যভারত, মুকুল, অনুসন্ধান, বঙ্গবাসী, হিতবাদী, এডুকেশন গেজেট, Amrita Bazar, Half yearly gradison list, প্রয়াস, দারোগার দপ্তর, সাবিত্রী, হিন্দুপত্রিকা, হিন্দুরঞ্জিকা, তত্ত্বমঞ্জরী, ব্রহ্মতত্ত্ব, বরিশাল হিতৈষী, পূর্ণিমা, প্রদীপ, পুণ্য, সূধাকর, মিহির, অঞ্জলি, বিষ্ণুপ্রিয়া আনন্দ-বাজার, মাসিক, বামাবোধিনী, বিহোদয়, প্রতিবাসী, কোহিনূর, নির্ম্মালা, সংসঙ্গ, বীণাপাণি, ঐতিহাসিক চিত্র ও চিকিৎসক ।

সাহিত্য ভারতী, এডুকেশন গেজেট, Indian Mirror, প্রয়াস, হিন্দুরঞ্জিকা, বরিশাল হিতৈষী, পূর্ণিমা, পুণ্য প্রভৃতির সম্পাদকগণ স্ব স্ব পত্রিকায় হৃদয় উৎসাহের সম্মেলোচনাদি-কল্পিত সাধারণের মধ্যে উৎসাহের প্রসার লাভের স্বযোগ্য করিয়া দিয়াছেন । সেজন্য তাঁহাদিগকে ধন্যবাদ প্রদান করিতেছি ।

রবীন্দ্রনাথ-সম্পাদিত ভারতী, অক্ষয়চন্দ্র-পরিচালিত পূর্ণিমা এবং ভূদেব-প্রবর্তিত এডুকেশন গেজেট উৎসাহের প্রবন্ধ বিশেষ উদ্ধৃত করিয়া আমাদের গৌরব বর্ধন করিয়াছেন ।

বর্ষ-সূচী ।

( ১৩০৬ )



বিষয়	লেখক	পৃষ্ঠা
অর্জুনোর্বশী	শ্রীযুক্ত প্রমথনাথ রায় চৌধুরী	১৮৫
আজ	অক্ষয়কুমার বড়াল	৩৮
আবাহন	বিমলাচরণ মৈত্রেয়	২০২
আমার কাপুরুষতার কল	কুমার মনমথকৃষ্ণ দেব B. A. I. C. S.	১৮৭
আলেখ্য	প্রবোধচন্দ্র মজুমদার	৪৬
আহিরিণী	শ্রীশচন্দ্র মজুমদার	২
ইংরাজী বিবাহ	শ্রীযুক্তা কৃষ্ণভাবিনী দাস	১৫০
কণিকা	...	২৩৪
কলা-লক্ষ্মী	শ্রীযুক্ত প্রমথনাথ রায় চৌধুরী	৯৭
খুকুমণির ছড়া	অক্ষয়কুমার মৈত্রেয় B. L.	৩১
টাদের হাসি	শ্রীযুক্তা নগেন্দ্রবালা মুস্তোফী	১৩৮
চৌ-ঘাট	শ্রীযুক্ত হরিসাধন মুখোপাধ্যায়	২৭
জাহাঙ্গীরের অনুশাসন	রামপ্রাণ গুপ্ত	১২৯
তুটী তারা	নিত্যকৃষ্ণ বসু M. A.	৪৫
দেশ ভ্রমণ	শ্রীযুক্ত জলধর সেন	৪, ৮৫
পরিত্যক্তা	কুমার মনমথকৃষ্ণ দেব B. A. I. C. S.	১৯৫
পুল্ক্রোড়ে নারী	চারুচন্দ্র বন্দ্যোপাধ্যায়	৪৮
পৌরাণিক গল্প	পণ্ডিত রজনী কান্ত চক্রবর্তী	২৯
প্রবাস চিত্র	লোকনাথ চক্রবর্তী B. A.	১৫৭
প্রলয়ের ধুমকেতু	জগদানন্দ ঝার	২৩
প্রার্থনাভীত দান	রবীন্দ্রনাথ ঠাকুর	৪৯

বিষয়	লেখক	পৃষ্ঠা
প্রেম-বৈচিত্র্য ...	শ্রীযুক্ত শৈলেশচন্দ্র মজুমদার	১৬, ১৪০, ২১১
ফলিত জ্যোতিষ-প্রসঙ্গ	„ যত্ননাথ চক্রবর্তী B. A.	... ১১৬
বৃঙ্গবালিকার প্রাণ ...	„ চন্দ্রশেখর কর B. A.	... ৬৫
বর্তমান সাহিত্য ও মানসিক ব্যাধি...	শ্রীযুক্তা নগেন্দ্রবালা মুস্তোফী	... ২০৫
বাজার দেনা ...	শ্রীযুক্ত হেমেন্দ্রপ্রসাদ বোস B. A.	... ৬০
বিশ্ব-রচনা ...	„ মাধবচন্দ্র চট্টোপাধ্যায়	... ৬২
ভাণ ...	শ্রীযুক্তা সরলাবালা সরকার	... ৮৪
মকর-সংক্রান্তি ...	শ্রীযুক্ত যত্ননাথ চক্রবর্তী B. A.	... ১২৬
মোগল সাম্রাজ্যের রাজস্ব	„ রামপ্রাণ গুপ্ত	... ১২১
রাজা রামানন্দ রায় ...	„ রাধেশচন্দ্র শেঠ B. L.	... ৪০, ১৩২
রাসলীলা ...	„ শ্রীশচন্দ্র মজুমদার	... ৫৭
শাহ আলম ...	„ অক্ষয়কুমার মৈত্রেয় B. L.	... ৫০
শ্রীকৃষ্ণদাস কবিরাজের কথা	„ অচ্যুতচরণ চৌধুরী তত্ত্বনিধি	... ৮২
শ্রীশ্রীরামকৃষ্ণ-কথামৃত	„ মহেন্দ্রনাথ গুপ্ত B. A.	... ৭৪
সমাজের ছবি ...	„ শ্রীশচন্দ্র চট্টোপাধ্যায়	... ১৭৩
সৌন্দর্য্য ...	„ যোগীন্দ্রচন্দ্র চক্রবর্তী M. A. B. L.	... ১২১
স্ট্রীকবি-কুঞ্জ ...	শ্রীযুক্তা রাইকিশোরী দেবী প্রভৃতি	... ২৪৬
স্বদেশে ইংরাজ ...	শ্রীযুক্তা কৃষ্ণভাবিনী দাস	... ১০
হাসির গান ...	শ্রীযুক্ত রজনীকান্ত সেন B. L.	... ১০০


## উৎসাহ।

প্রতিবাসী বিপত্রীক আহীর যুবক  
 চাহে বরিবারে এই বিধবা যুবতী;  
 অন্ধ মাতা আগ্রহেতে করে অনুরোধ,—  
 তরুণী না মানে কোন মিনতি যুক্তি!  
 পরিণয়ে মাতৃসেবা-বিল্ব হবে তার—  
 তার চেয়ে ধর্ম-হানি কিবা আছে আর ?

দিন যায়, মাস যায়, বর্ষ চলি যায়,  
 ছুগ্ন যোগাবার বেলা নিত্য যায় চলি;  
 গোপন মাঠের ধারে, নদীর সৈকতে  
 মুগ্ধ-আধি ছায় যুবা পরাণ ব্যাকুলি,  
 দৃকপাতো নাহি করি আসে যায় বালি;  
 পাষাণে খোদিতা যেন লতিকা সরলা।

আষাঢ়ের নবমেঘ করিল পলকে  
 স্ননীল শিখরে ঘন কালিমা সঞ্চার;  
 গোপিনীনা প্রবেশিতে মন্দির-প্রাঙ্গণ  
 মেঘমন্ড্রে, অন্ধকারে ভরিল সংসার!  
 তমাল ক্রমের ছায়ে, তামসী দিবায়,  
 গোবিন্দের অভিসার মনে পড়ি যায়!

ঘন বর্ষণের মাঝে ফিরিল যুবতী  
 সিক্ত বস্ত্রে আলু থালু কবরী-বন্ধন;  
 ধায় বেগে নদীতীরে, যেতে হবে পারে  
 গৈরিক প্রবাহ ধারা না হ'তে পতন।  
 কি হবে উপায় হায়, আসে যদি বাণ!  
 অনশনে জননী বাহিরিবে প্রাণ!



## আহিরিণী ।

আষাঢ়ের নব ঘন করী-শিশু প্রায়  
ক্ষুদ্র শুণ্ডে গিরিদেহ করিছে চূষন ;  
নব বরষার স্নিগ্ধ নীলিম শোভায়  
জননী করিণী ভ্রমে আদর্শ-কেহন !  
পদতলে আঁকি বাঁকি সিত সিকতায়  
নদীরেখা ধীরে গ্রামপ্রান্তে বহি যায় !

নদীপারে প্রসারিত নবছাঁদলে  
বিস্তৃত প্রান্তর শেষে গ্রাম দেখা যায় ;  
তাল খজুরের কুঞ্জ, শীর্ষ ভেদি তার  
উন্নত মন্দির-চূড়া নিজ মহিমায় !  
ক্রত লঘু চরণেতে সে দেউল পানে  
ছুঁক-ভাণ্ড শিরে বালা ধায় এক মনে ।

সে বাল-বিধবা, পিতৃহীনা আহিরিণী  
যোগায় সেবার ছুঁক নিত্য সে মন্দিরে ;  
গৃহে অন্ধ মাতার সে যষ্টি-স্বরূপিণী,  
সেবে তাঁরে আর ছুঁক সবৎসা গাভীরে ।  
সেই ব্রতে ভোর তার ক্ষুদ্র প্রাণ মন,—  
আপন অজ্ঞাতসারে আত্মবিসর্জন !

## আহিরিণী ।

ক্রিস্ত আসিয়াছে বহা । ভরিয়া ছুকুল  
মহা কোলাহলে ছুঁক চলে প্রবাহিণী ;  
তীরলগ্ন শিলাতলে ঘূর্ণিত সলিলে  
শত জলদের রবে জাগে প্রতিধ্বনি !  
কে শুনিবে অভাগীর কঙ্কণ-রোদন,  
মাতৃ-বৎসলার তীব্র হৃদয়-বেদন !

এই ভাবে কাটে দিন । শান্ত গোপাঙ্গনা  
করলগ্ন কপোলেতে বসি শিলাতলে ;  
সন্ধ্যার তরল ছায়া আসিছে ঘনায়ে  
স্তিমিত প্রকৃতি মুখ-আবরণে ছলে !  
কদাচিত্ত কেকারব পশিছে শ্রবণে,  
মত্ত দাহুরীর রোল উঠিছে সঘনে !

হেনকালে ভেলা লয়ে কে আসিল পারে ?  
মাথালিতে ঢাকা তার নয়ন বদন ;  
বিকৃত অথচ ক্ষীণ কণ্ঠে সে কাণ্ডারী  
ডাকে—“কে গো পারে-যাবি মায়ের সদন ?”  
চমকি উঠিল বালা,—নাহিক সংশয়  
নিজৈ গোপীনাথ আসি দিলেন অভয় !

বিনা বাক্যে, বিনা দানে কে করিল পার ?  
সমভ্রমে গোপকন্ডা করে প্রণিপাত ।  
“অবলা অনাথা প্রভু, কি বুঝিবে ছলা,  
কি দানে তুষিতে পারে জগতের নাথ ।”  
কাণ্ডারী কহিছে—“ধনি, এক দান চাই,  
পার যদি বলি, নহে ঘরে ফিরি যাই ।”

কহে বাল্য—“প্রভু তুমি বাঁচাইলে জাজি  
অনশন-মৃত্যু হতে জননী-জীবন ;  
কি অদেয় আছে মোর,—আমি কাঙ্গালিনী ?”  
হাসিয়া যুবক কহে “কর পাণিদান।”  
লাজে অবনতসুখী, মৌনেতে সম্মতি !  
পরে তারা হ'য়েছিল স্নেহের দম্পতী !

শ্রী শ্রীশচন্দ্র মজুমদার ।

## দেশ ভ্রমণ ।

একবার একজন খাঁটি কলিকাতাবাসী নব্যযুবক পূর্ববঙ্গ ভ্রমণ করিবার জন্ত বিশেষ আয়োজন করিয়াছিলেন। তাঁহার তেইশ বৎসরব্যাপী দীর্ঘ অভিজ্ঞতার তিনি ওদিকে হাবড়ার ষ্টেশন, এদিকে বেলিয়াঘাটা ; আর সে-দিকে কালিঘাট এবং এদিকে চিৎপুরের খাল দেখিয়াছিলেন। এত বৃহৎ দীর্ঘ-প্রস্থ চৌহদ্দি-বিশিষ্ট মহাভূভাগ তাঁহার দৃষ্টতঃ পৃথিবী ; অবশিষ্টটা Geography নামক মহাভীতিজনক শাস্ত্র বিশেষের অন্তর্গত ; এবং প্রবেশিকা পরীক্ষারূপ কাঁটার বেড়া ডিঙ্গাইয়াই তিনি উপরোক্ত মহাশাস্ত্রখানি পুরাতন পুস্তকের দোকানে দাখিল করিয়া দিয়াছিলেন। এ হেন অভিজ্ঞ ব্যক্তি-প্রবরের দেশভ্রমণে বাহির হওয়া ভারত-ইতিহাসের না হউক, বঙ্গদেশের ইতিহাসের একটা অতি স্মরণীয় ঘটনা হওয়া উচিত ছিল, কিন্তু ছুঃখের বিষয় এই যে, আমার গায় একজন ক্ষুদ্রব্যক্তি ব্যতীত কোন ঐতিহাসিকই এই মহাব্যাপারের একটা নোট পর্য্যন্তও রাখেন নাই। অতএব সাধারণের অবগতির জন্ত, এবং ভবিষ্যৎ ইতিহাস লেখকগণের স্মৃতিশক্তির উন্মেষের জন্ত আমি এই অভূতপূর্ব দেশভ্রমণ কাহিনী যথাযথ লিপিবদ্ধ করিলাম।

যে দিন কলিকাতা ত্যাগ স্থির হইল, তাহার ১৫ দিন পূর্ব হইতেই বন্ধুবর ভাবিয়া অস্থির। কি কি দ্রব্য সঙ্গে লইতে হইবে, কয়খানি কাপড়

চাই, বিছানা কতগুলি লইতে হইবে, সঙ্গে খাবার জিনিস, কি কি লইয়া যাওয়া দরকার, এই সব অত্যাবশ্যকীয় প্রশ্ন এবং সুগভীর ভাবে অনতিদীর্ঘ নোটবুকে সেগুলি যথাযথ লিখিয়া রাখা হইতে লাগিল। দিন নাই, রাত্রি নাই, সময় নাই, অসময় নাই, যখন আমার সঙ্গে তাঁহার সাক্ষাৎ হইয়াছে, তখনই সেই নোটবুক বাহির হইয়াছে এবং প্রায় এক ঘণ্টা, কোন কোন দিন তাহা অপেক্ষাও অধিক সময় ধরিয়া তাহার সমস্ত প্রশ্নের জবাব লিখিয়া দিতে হইয়াছে। আর সেই সমস্ত প্রশ্নের উপর আবার জেরা ; আমি ত একেবারে হয়রান হইয়া গিয়াছিলাম। তবুও যাহা হউক মনে একটা বিশ্বাস ছিল যে, বন্ধুবর পূর্ববঙ্গে ভ্রমণ করিয়া গৃহে প্রত্যাগত হইয়াই প্রকাণ্ড এক খানি ভ্রমণ-বৃত্তান্ত লিখিবেন, এবং তাহাতে পাঠক সাধারণের না হউক কাগজওয়ালী, প্রেসের স্বত্বাধিকারী ও দপ্তরী মুহাশয়ের কিছু লাভ নিশ্চয়ই হইবে ; এবং সংবাদপত্রের সম্পাদক মহোদয়গণ ছুই এক মাস ক্রমাগত অনেক তোষামোদ শুনিতে পাইবেন।

সে কথা থাক, বহুকষ্টে অনেক পরিশ্রমে, বড়বাজার, চিনেবাজার, রাখাবাজার, চাঁদনী, বহুবাজার প্রভৃতি স্থান ঘুরিয়া বন্ধুবর তাঁহার ভ্রমণের সমস্ত সরঞ্জাম সংগ্রহ করিলেন। আমি কিন্তু তাঁহাকে বলিয়াছিলাম যে, আমাকে যদি পশ্চিম কি দক্ষিণ ভারতে যাইবার জন্ত এই দণ্ডে অনুরোধ আসে, তাহা হইলে আমি মণিব্যাগে কয়েকটা টাকা লইয়া এবং আলনা হইতে ঐ উজ্জী চাদর এবং একখানি পিচের ছড়ি লইয়া এখনই বাহির হইতে পারি ; এবং নিরাপদে অক্লেশে সমস্ত ভারতবর্ষ ভ্রমণ করিয়া যথাসময়ে ঘরের ছেলে ঘরে ফিরিতে পারি। বন্ধুবর একথা মোটেই বিশ্বাস করিতে চান না, বিছুই বিদেশে কোন জিনিসের দরকার হইলে, মনে কর একখানি সাবান দরকার, তখন কোথায় তাহা পাওয়া যায় ? বলিতে চাহিয়াছিলাম, এত যার জঞ্জাল, যার এতগুলি উনকুটি চৌষটি দরকার, তাহার পক্ষে ক্ষুদ্র গৃহকোণ এবং আফিসের চেয়ারই প্রশস্ত স্থান। কিন্তু বন্ধুবরকে সে কথা বলা তখন উচিত মনে করি নাই। যাহা হউক, নির্দিষ্ট দিনে তাঁহাকে লইয়া শিয়ালদহে গোয়ালন্দ মেলের সময়ে গেলাম। তাঁহার সঙ্গে লটবহর দেখিলে সহসাই মনে হয়, যেন তিনি বৎসর ছুই তিনের জন্ত কলিকাতা ত্যাগ করিয়া যাইতে-

ছেন। সঙ্গে পুরাতন ভৃত্য রামকৃষ্ণ। আমি জানিতাম বন্ধুবর একাকীই যাইবেন, কিন্তু ষ্টেশনে রামকৃষ্ণের বেশভূষা দেখিয়াই বুঝিলাম, রামকৃষ্ণ তাঁহার সঙ্গী।

নিজের জন্ত একখানি দ্বিতীয়শ্রেণীর এবং রামকৃষ্ণের একখানি মধ্যম শ্রেণীর রিটার্ন টিকিট কিনিয়া তাঁহার ষ্টেশনের প্ল্যাটফরমে গেলেন। বিশেষ প্রয়োজন আছে, বলিয়া আমি একটু পিছাইয়া পড়িলাম, এবং ঢাকার একখানি দ্বিতীয় শ্রেণীর রিটার্ন টিকিট কিনিয়া বন্ধুবর যে গাড়ীতে জিনিস পত্র উঠাইয়া বসিয়াছেন, ধীরে ধীরে যাইয়া আমিও সেই গাড়ীতে বসিলাম। তিনি তখনও জানেন না যে, আমিও তাঁহার সঙ্গী, তিনি মনে করিলেন প্ল্যাটফরমে দাঁড়াইয়া থাকা কষ্টকর মনে করিয়াই আমি গাড়ীতে উঠিয়া বসিয়াছি। পাঁচ মিনিটের ঘণ্টা পড়িল, আমি তখনও স্থিরভাবে গাড়ীতে বাসিয়া। এমন সময়ে একটা বাবু একজন স্ত্রীলোক সঙ্গে তাড়াতাড়ি আসিয়া আমাদের গাড়ীতে প্রবেশ করিলেন। এতক্ষণ পর্যন্ত এ গাড়ীতে অপুর কেহই উঠেন নাই। বাবুটির সঙ্গেও জিনিসপত্র নিতান্ত কম ছিল না; কুলীরা তাড়াতাড়ি সেগুলি গাড়ীর মধ্যে তুলিয়া দিল, এবং শেষে বাবুর সঙ্গে পয়সা লইয়া মহা গণ্ডগোল বাধাইয়া দিল। বাবুও প্রত্যেককে ছই পয়সার বেশী কিছুতেই দিবেন না, তাহারিও ছই আনার কম ছাড়িবে না। একবার মনে হইল মধ্যস্থতা করিয়া গোলমাল মিটাইয়া দিই, কিন্তু আবার নানা কথা ভাবিয়া নিরস্ত হইলাম। আমাদিগকে আর মধ্যস্থতা করিতে হইল না; বাবুর সঙ্গিনী স্ত্রীলোকটীই অতি অল্প আয়াসে গোলমাল নিষ্পত্তি করিয়া দিলেন। বাবুর মণিবন্ধগণ কাড়িয়া লইয়া স্ত্রীলোকটী তাহার মধ্য হইতে একটা টাকা লইয়া বাহিরে ফেলিয়া দিলেন। কুলীগণ সন্তুষ্ট হইয়া চলিয়া গেল। বাবু যেন কি বলিতে যাইতেছিলেন, কিন্তু রমণী তাঁহাকে বাধা দিয়া পূর্ববঙ্গের ভাষায় বাবুকে বলিলেন “কুলী মজুরের সাথে ছইটা পয়সা লইয়া বগরা করিতে লজ্জা হৈল না?” বাবু আমাদের দিকে চাহিয়া রমণীর নিকট পরাজয় স্বীকার করিলেন।

শেষ ঘণ্টা বাজিতে দেখিয়া বন্ধুবর আমাকে শীঘ্র নামিতে বলিলেন। আমি বলিলাম “বাঃ! তুমি ত বেশ লোক। ঢাকায় যাইব বলিয়া দ্বিতীয় শ্রেণীর রিটার্ন টিকিট কিনিয়াছি, তুমি বল কি না নামিয়া যাও।” বন্ধু ত

আমার কথা শুনিয়া অবাক! সঙ্গে জিনিসপত্র নাই, দ্বিতীয় শ্রেণীর পর্যন্ত নাই, অথচ আমি তাঁহার সঙ্গে ঢাকা যাইতেছি, একথা তিনি মোটেই বিশ্বাস করিতে পারিলেন না; মনে করিলেন আমি তামাসা করিতেছি, এখনই নামিয়া যাইব। কিন্তু গাড়ী ছাড়িল, তবুও আমি বসিয়া রহিলাম। তখন বন্ধু বুঝিলেন আমি সত্যসত্যই তাঁহার সঙ্গী। তিনি ত ভাবিয়া অস্থির; আমার নানাপ্রকার অসুবিধা হইবে মনে ভাবিয়াই তিনি বিশেষ চিন্তিত হইলেন। আমি তাঁহাকে বুঝাইয়া দিলাম যে, তাঁহার ছইটা ষ্টীলট্রাকে যে কাপড়-চোপড় আছে, তাহাতে ঢাকা কেন, আমাদের ছইটা প্রাণীর ভূ-প্রদক্ষিণ চলিতে পারে। বিছানার বিশেষ দরকার নাই। বিনা বিছানায়, ভূমিশয়্যায়, অনাবৃত মস্তকে, অনন্ত বিস্তৃত নক্ষত্রখচিত নীলচন্দ্রাতপতলে অনেক বিনিদ্র রজনী আমার অতিবাহিত হইয়াছে। তরুমূলে আশ্রয় পাইলেই সুখশয্যা মনে করিত, রেলগাড়ীর দ্বিতীয় শ্রেণীর গদিমোড়া আসন তাহার নিকট সম্রাটের শয়ন শয্যা। তাহার পক্ষ পকেট হইতে ব্যাগটী বাহির করিয়া তাহার মধ্যে দশটা টাকা আছে দেখাইয়া বলিলাম, ‘অবশিষ্ট অসুবিধা এই কয়েকখণ্ড রৌপ্যের সাহায্যে দূর হইবে।’

আমি তাহার সঙ্গী হইব একথা পূর্বে বলিলে, তিনি তাহার বন্দোবস্ত করিতেন, অর্থাৎ আরও ছই তিনটা লগেজ বাড়িত, বিশেষ উৎকর্ষার সহিত তিনি এই কথাই বারম্বার বলিতে লাগিলেন; যাহা হউক, গতশ্র শোচনা নাস্তি, এই ঋষিবাক্যে নির্ভর করিয়া তিনি নিরস্ত হইলেন।

এতক্ষণ আর গাড়ীর মধ্যস্থ তৃতীয় ভ্রলোকটী ও তাঁহার সঙ্গিনীর দিকে চাহিবার আমাদের অবকাশ ছিল না, তাহাদেরও ছিল না। তাঁহার ছইজনে জিনিসপত্র সমস্ত বেঞ্চের নীচে ও অন্তঃস্থ স্থানে গোছাইয়া রাখিতেই এতক্ষণ ব্যস্ত ছিলেন। গাড়ী যখন সিয়ালদহ ছাড়িয়া খানিকদূর গিয়াছে, তখন তাহার কাজকর্ম শেষ করিয়া উপবেশন করিলেন। তাঁহার কোথায় যাইবেন, কি বৃত্তান্ত প্রভৃতি জানিবার জন্ত আমাদের বিশেষ আগ্রহ হইল। কিন্তু বর্তমানক্ষেত্রে তাঁহারই জিজ্ঞাসা করা উচিত; কারণ তাঁহার সঙ্গে রমণী; আমরা ছইটা অপরিচিত যুবক তাহাদের সঙ্গে এক প্রকোষ্ঠের আরোহী; এ অবস্থায় আমাদের সঙ্গে আলাপ করা তাঁহারই কর্তব্য ছিল। কিন্তু তাঁহার

সে প্রকার আগ্রহ দেখিলাম না, রমণীও এতক্ষণ গাড়ীর জানালাতে মুখ দিয়া প্রকৃতির শোভা বা তেমনি কিছু দেখিতেছিলেন।

আমরা সকলেই নির্বাক! বোধ হয় রমণীর এ ভাব ভাল লাগিল না, তাই তিনি একটু বড় গলায় তাঁহার সঙ্গীকে বলিলেন, “তুমি কেমন বেটা ছেলে; বাবুদের সঙ্গে পরিচয় কর না? তোমার মত মেয়েমুখো ত দেখি নাই?” এমন মধুর বচন শুনিয়া আমাদের মনে খটকা লাগিল। শয়নকক্ষে স্বামীস্নীতে এরকম কথাবার্তা মন্দ নহে, বোধ হয় অনেকের হইয়াও থাকে। কিন্তু গাড়ীর মধ্যে, দুইজন অপরিচিত ভদ্রলোকের সম্মুখে একজন ভদ্র-গৃহস্থের বধু—এমন ভাবে, এমন ঢঙ্গে কথা বলিতে পারেন, তাহা বিশ্বাস করিতে প্রবৃত্তি হইল না। আমার মনে হইল রমণী কুলবধু নহেন, বন্ধুবরের কণ-মূলে আমার এই সন্দেহ অল্পক্ষণে প্রবেশ করাইয়া দিলাম। তিনিও তাহাই স্থির করিয়াছেন। সুতরাং আমাদের কথাবার্তা বধিবীর স্পৃহা একেবারেই কমিয়া গেল। পূর্ববঙ্গ ভ্রমণে সঙ্গী ভালই জুটিল!

এদিকে রমণীর উপদেশে বাবুটি আমাদের নিকটে আসিয়া বসিলেন, এবং আমরা কোথায় যাইব জিজ্ঞাসা করিলেন। তাঁহার পূর্ববঙ্গের রীতি অনুসারে “নিবাস” “আপনারা” প্রভৃতি প্রশ্ন হইল। বন্ধুবধু এ প্রকার প্রশ্নের অর্থই বুঝিতে পারিলেন না, আমি তাঁহার সকল কথারই জবাব দিলাম। এবং অতি সংক্ষেপে তাঁহার পরিচয় লইলাম। বাবুটি ঢাকাজেলার অন্তর্গত একটা পল্লীগ্রামের জমিদার, বিষয় কার্য উপলক্ষে কলিকাতায় আসিয়াছিলেন, এখন ঢাকায় যাইতেছেন, ঢাকায় তাঁহার বাসা আছে। আমরা ঢাকায় বেড়াইতে যাইতেছি শুনিয়া তিনি খুব আনন্দিত হইলেন এবং সেখানে আমাদের সঙ্গে সাক্ষাৎ করিবেন, এ কথাও জানাইয়া দিলেন।

বোধ হয়, পুরুষপুঙ্গব আলীপটা ভাল করিয়া জমাইতে পারিলেন না দেখিয়া তাঁহার সঙ্গিনী আর একটু অগ্রসর হইয়া বসিলেন, এবং “বাবুরা ইতিপূর্বে বুঝি আর ঢাকায় আইসেন নাই” বলিয়া আমাদের উপর প্রশ্ন-বর্ষণ করিলেন। বন্ধুবর জবাব দিতে যাইতেছিলেন, কিন্তু আমি গা টিপিয়া নিষেধ করায় তিনি চাপিয়া গেলেন; রমণীর প্রশ্নের কোন উত্তর দেওয়া হইল না। কিন্তু তিনিও ছাড়িবার পাত্র নন, “শোনুছেন নি” বলিয়া আবার

প্রশ্ন করিলেন। তখন, ঈষৎ বিরক্তির স্বরে আমি একটা “উঁহু” দিয়াই সারিয়া দিলাম। রমণীও বৈচিত্র্য দেখিয়া রণে ভূঙ্গ দিলেন। স্ত্রীলোকের অশেষ গুণের মধ্যে একটা প্রধান গুণ এই যে, তাহারা পুরুষের কথার ভাবেই তাহাদের মন অনায়াসে বুঝিতে পারে।

কথাবার্তার সুবিধা হইল না দেখিয়া, তাঁহারা উভয়েই বিছানা পাতিয়া শয়নের ব্যবস্থা করিলেন। আমরা সেরাত্রে নিদ্রা যাইব না স্থির করিলাম; দুইজনে গল্প করিয়াই রাত্রি কাটাইব। মনে করিয়াছিলাম, আজ রাত্রে আর এ গাড়ীতে অপর কেহ উঠিবে না। কিন্তু আমাদের সে আশা বৃথা হইল। বগুলাষ্টেশন হইতে গুটিতিনেক ভদ্রলোক আমাদের গাড়ীতে উঠিলেন, এবং একটা প্রকাণ্ড হৈ চৈ বাধাইয়া দিলেন। তাঁহাদের চৈচ-মেটিতে নিদ্রিত বাবু ও বাবুর সহচরীর ঘুম ভাঙ্গিয়া গেল; তাঁহারা উভয়েই উঠিয়া বসিলেন।

নবাগত বাবুর খুব চালাক চতুর; কথাবার্তায়ও খুব সাকুব বলিয়া বোধ হইল। তাঁহারা বঙ্গদেশীয় বাবুটির পরিচয় লইতে বসিলেন, এবং ভাব-গতিক বুঝিতে পারিলেন যে, সঙ্গিনী গৃহিণী নহেন; সুতরাং তাঁহারা ধীরে ধীরে রসিকতা আরম্ভ করিলেন। সকল দ্রব্যেরই—সকল কন্ঠেরই—একটা সময় অসময় আছে। দুই এক সময় আছে, যখন একটু আধটু রসিকতা বেশ মিষ্ট বোধ হয়। কিন্তু রাত্রি একটা দুইটা সময়ে কতকগুলি ভদ্র-লোকের সম্মুখে কুলটার সঙ্গে রসিকতা নিতান্তই যেন অভদ্রোচিত বলিয়া বোধ হইল। কিন্তু আমাদের ভদ্রাভদ্রে কি যায় আসে। বাবুর বেশ ঠাট্টা তামাসা আরম্ভ করিয়া দিলেন। এদিকে দেখি রমণীও নিতান্ত কম নহেন; তিনিও বেশ দুই একটা উত্তর দিতে লাগিলেন; কাজেই তাঁহাদের কথা-বার্তা বেশ জমিয়া আসিল; এমন কি দুই একস্থানে শীলতার সীমাও অতিক্রম করিতে লাগিল। আমার সঙ্গী বন্ধু ত লজ্জায় অধোবদন হইলেন। রেলের গাড়ীতে এ প্রকার অভদ্র-ব্যবহার দর্শন আমার পক্ষে এই নূতন নহে, সুতরাং আমি এমন দুই দশটা ব্যাপার উপেক্ষা করিতে শিখিয়া-ছিলাম। কিন্তু বন্ধু ত তাহা নহেন; তিনি কখনও বিদেশে যান নাই; কলিকাতার গৃহকোণে পিতা মাতা ভগিনীর স্নেহাদরে প্রতিপালিত, বিশ্ব-

বিদ্যালয়ের উদার ছায়াতলে শিক্ষিত, পুষ্ট; তাঁহার মধ্যে নাগরিক উশ্জ্বলতার কোন চিহ্নই ছিল না; তাঁহার হৃদয়ে অসংভাবের বিকাশই হইতে পায় নাই। তিনি এই সব দেখিয়া বড়ই চটয়া গেলেন, এবং যদি সুবিধা হয়, তাহা হইলে অর্থা গাড়ীতে যাইতেও প্রস্তুত। কিন্তু তাহা এক প্রকার অসম্ভব, এত জিনিস পত্র টানিয়া লইয়া দ্বিতীয় গাড়ীতে যাওয়া কম ব্যাপার নহে। বন্ধুবর অগত্যা চুপ করিয়া বসিয়া রহিলেন, কিন্তু তাঁহার মুখে যেন কেমন একটা বিষণ্ণতার ছায়া দেখিলাম। এ উপলক্ষে নহে, কলিকাতা হইতে গাড়ী ছাড়িবার পর হইতেই যেন তাঁহার দেশভ্রমণের স্মৃতি একটু একটু করিয়া কমিয়া আসিতেছিল। নির্জমা অন্ধকার প্রান্তরের ভিতর দিয়া যখন আমাদের লৌহশকট শশকে ধূম উদ্গীরণ করিতে করিতে অগ্রসর হইতেছিল, তখন অনভ্যস্ত ভ্রমণকারীর মনে যে কেমন একটা ভাবের উদয় হইবে, তাহা আশ্চর্য্য নহে। চির-পরিচিত গৃহপ্ৰকোষ্ঠ, কুসুমকোমল শয্যা, পিতা মাতার শত সহস্র আদর যত্নের চিহ্নে পরিপূর্ণ শয্যাগৃহের কথা মনে হইয়াই সঙ্গী বোধ হয় প্রথম বিষণ্ণ হইতেছিলেন।

এবার এইস্থানেই শেষ। বারান্তরে অবশিষ্ট বলা যাইবে।

শ্রীজলধর সেন।

## স্বদেশে ইংরেজ ।

আজকাল ইংলণ্ড ও ভারতবর্ষের সম্বন্ধ যেরূপ ঘনিষ্ঠ হইয়া পড়িতেছে, আর ভারতবাসী ও ব্রিটনবাসীর অবস্থা পরস্পরের নিকট যে প্রকার সাহায্য-স্বাপেক্ষ্য—তাহাতে ইংরেজজাতির গুণাগুণ উত্তমরূপে অবগত হওয়া আমাদের একান্ত আবশ্যিক। কিন্তু ভারত ও বিলাতের মধ্যে যেমন অসীম প্রভেদ, আর বাঙ্গালী ও ইংরেজদের মধ্যে যে রকম সম্বন্ধ, তাহাতে স্থিরচিত্তে ব্রিটিষ জাতির দোষ গুণ পর্যালোচনা করা আমাদের পক্ষে কতদূর কঠিন ব্যাপার, তাহা পাঠকমাত্রেরই বুঝিতে পারেন।

তবে ডাক্তার কবিরাজেরা যেমন চিরেতা, সিঙ্কোনা থেকে জ্বরারি সংগ্রহ করেন, আফিম ক্লোরোফরম হতে ঔষধ বাহির করেন—আমিও সেইরূপ অনেক দোষ-গুণযুক্ত ইংরেজ চরিত্র হতে আমাদের এ মৃতপ্রায় জীবনের জন্ত সঞ্জীবনী আহরণে প্রবৃত্ত হইলাম। আমরা প্রায় দেড় শ বৎসর ইংরেজ-শাসনে রহিয়াছি; যথা, যথ্যা, অনেক কারণে ইংরেজ ও ভারতীয়দের মধ্যে সম্বন্ধ ক্রমশঃই বিরোধী হইয়া দাঁড়াইতেছে। আর অধিকাংশ ইংরেজ নিজদেশ ছাড়িয়া বিদেশে আসিবার সময় নিজেদের অনেক সদগুণ পশ্চাতে রাখিয়া আসে। স্বার্থই তখন উহাদের প্রধান উদ্দেশ্য, সুতরাং বিদেশে উহাদের স্বার্থপর প্রবৃত্তিগুলি অধিক প্রখর হইয়া উঠে। বিশেষ, পরাধীন ভারতের বাতাসে উহাদের ভয়ানক রূপান্তর ঘটিয়া থাকে। সেজন্ত আমরা এদেশে যে সব অ্যাংগ্লো ইণ্ডিয়ানদের কেবল মন্দদিকটা দেখিয়া সমস্ত ব্রিটিষ জাতিকে মন্দ মনে করি।

আবার বহুদিন পরাধীন আছি বলিয়া অনেক সময় আমরা স্বাধীন জাতিদের সদগুণসমূহ দেখিতে পাই না বা বুঝিতে পারি না। স্বাধীন জাতি কেন, আমরা নিজেদের মধ্যেই লোকের ভাল গুণের দিকে একেবারে অন্ধ হইয়া থাকি। কিন্তু কোন স্বদেশবাসীর চরিত্রে একটু খুৎ দেখিতে পাইলে দশজনে যেন শতমুখে তাহার আন্দোলন করিয়া বেড়াই। কোন লোকের বা জাতির ভাল বৃত্তিগুলি উপেক্ষা করিয়া কেবল দোষের চর্চা করা সাধুর কাজ নয়। দয়ার মাহাত্ম্য যেমন, যিনি দান করেন তিনিও আশীর্বাদ পান, যে দান গ্রহণ করে সেও আশীর্বাদ প্রাপ্ত হয়। পরনিন্দা দোষ সেই রকম, যে উহা করে সেও নিজের অপকার করে, অল্প যার করা যায় তারও মহা অপকার হয়। সেজন্ত ইংরেজজাতির উর্দাদিকটা একেবারেই ঢাকিয়া ভাল দিকটাই দেখা যাক।

অনেকেই জানেন, ইংরেজজাতির অনেক সদগুণ আছে বলিয়াই ইহারা এত বড় হইয়া দাঁড়াইয়াছে। কিন্তু সেই ভাল বৃত্তিগুলি কি তাহা আমরা উত্তমরূপে জ্ঞাত নহি। কেন না, “যার সঙ্গে ঘর করিনি, সে বড় ঘরণী”—ইংরেজদের সঙ্গে ভারতবাসীদের পৃথক বাসই সেই অজ্ঞতার কারণ। আর যত দিন আমাদের মধ্যে জাতিভেদ ও ইংরেজদের মধ্যে বর্ণভেদ থাকিবে,



ভতদিন এ অজ্ঞতা সম্যক্ দূর হ'বারও আশা নাই। তাই বহুদিন তাদের দেশে থাকিয়া তাঁদের সঙ্গে মিশিয়া ইংরেজজাতি সম্বন্ধে যাহা দেখিয়াছি ও বুঝিয়াছি, তাহাই পাঠকদের জন্ত লিখিতেছি।

ইংরেজদের প্রধান গুণ কার্যক্ষমতা। কর্ম ইংরেজজীবনের সঙ্গী মত; জল বায়ুর গুণেই হউক, অথবা স্বাভাবিক গুণেই হউক, ইহারা অতিশয় কর্মপ্রিয়। ইহারা কোন কঠিন পরিশ্রম করিতে ভয় পায় না বা শীঘ্র উহাতে কাতর হয় না। আমাদের এদেশে গ্রীষ্মের জন্ত বা অলসতা বশতঃ লোকে দুই তিন ঘণ্টা কাজ করিয়াই একেবারে ক্লান্ত হ'য়ে পড়ে, কিন্তু ইংরেজরা পাঁচ ছয় ঘণ্টার মধ্যে বিশ্রাম লয় না। রাস্তা-খনন, বাড়ী-নির্মাণ প্রভৃতি কাজে দুই চারদিন মনোযোগ দিয়া দেখিলেই জানিতে পারা যায়, উহারা প্রথম ঘণ্টাতে যতখানি কাজ করে, দিনের শেষ দশম-ঘণ্টাতেও সেইরূপ অধ্যবসায়ের সহিত ততখানি কর্ম করে। ইহারা কর্মে যেমন পটু, কথাতে ও কাজের নিয়মে সেইরূপ ঠিকঠাক। ইংরেজরা নিজের সময় নষ্ট করিতে লাল বাসে না, সেইজন্ত বৃথা বাকব্যয় করিয়া অশ্রেরও সময় নষ্ট করে না। কাহাকে কোন বিষয়ে বিরক্ত করিতে বা কাহার দ্বারা নানা বিষয়ে জিজ্ঞাসিত হইতে ইচ্ছা করে না। এই সব কারণে ইহাদের সঙ্গে কাজকর্ম করিতে সুখ আছে।

উত্তম ইংরেজদিগের আর একটা শ্রেষ্ঠ গুণ। এই উত্তম ও কার্যক্ষমতার বলেই বাণিজ্যে ব্রিটনবাসীরা পৃথিবীতে অদ্বিতীয় হইয়াছে। বাণিজ্য-প্রভাবেই ইহারা এত ধনশালী ও ইহাদের রাজ্য জগতের চতুর্দিক ব্যাপিয়া রহিয়াছে। ইহারা সর্বদা চারিদিকে চক্ষু রাখিয়া চলে, কোথাও বাণিজ্য কিম্বা শিল্পের সূত্র দেখিলে সকলে তৎক্ষণাত্ উৎসাহের সঙ্গে তাহাতে যোগ দেয়। ইহারা প্রতি বৎসর-কত নূতন কল আবিষ্কার করে, এবং সদা সর্বদাই শিল্প ও কারুকর্মের কত উন্নতি সাধিতেছে। আবার বিদেশে কোন নূতন দ্রব্যের আবিষ্কার বা শিল্পকর্মের কোন উন্নতি হ'লে তাহার সমস্ত সংবাদ রাখে ও উহা স্বদেশে প্রচলিত না করিয়া ক্ষান্ত হয় না। সাহস ও পরাক্রমেও ইংরেজরা ইউরোপের অন্যান্য জাতি অপেক্ষা নিকৃষ্ট নহে। ইহারা জীবনের প্রথম পদ হ'তে শেষ পদ পর্যন্ত সাহসে নির্ভর করিয়া কাজ করে।

ইংরেজদের বল, তেজ ও সাহসের কথা অধিক লেখা অনাবশ্যক; কেন না ইতিহাসের প্রতি অধ্যায়েই তাহার প্রচুর প্রমাণ পাওয়া যায়।

একদিকে ইংরেজরা যেমন স্বার্থপর, অতৃদিকে সেইরূপ আত্মমর্যাদা বুঝে ও আত্মনির্ভর করিতে জানে। নিজে কোন কর্ম সাধিতে পারিলে প্রাণ থাকিতে কখন অশ্রের সাহায্যের অপেক্ষা করে না, ও পরের সাহায্য লইতে লজ্জা বোধ করে। তাহারা বেশী যেমন পরের সহায়তা করে না, তেমনি পরের সহায়তা চাহেও না। কোন ইংরেজের নিকট কিছু জিজ্ঞাসিলে তিনি—নিজের সাহায্য নিজেই কর—এই উপদেশ দেন। সেজন্ত বিলাতে ছোট বড় সকলেই নিজ নিজ সংস্থান দেখে। সেদেশে একান্নবর্তী পরিবারের ব্যয় নাই। পুত্রেরা কি ভ্রাতার বয়সপ্রাপ্ত হইলেই নিজেদের জীবিকা উপার্জনের পথ খোঁজে। অবিবাহিতা কন্যারা পর্যন্ত নিষ্কর্মা হ'য়ে পিতৃগৃহে বাস করিতে নিজেদের হীন বোধ করে, এবং আত্মীয় কুটুম্বেরা কাহারও গলগ্রহ হইয়া অলসভাবে থাকিতে লজ্জা পায়। অতি বাল্যকাল থেকে ইহারা আত্মনির্ভর করিতে শিখে। আমি রাস্তায় কি বাগানে বেড়াইতে বেড়াইতে অনেক সময় দেখিয়াছি, ছোট ছেলেদের মধ্যে চলিতে চলিতে কেহ পড়িয়া গেলে, সে তার মার দিকে চাহিয়া না কাঁদিয়া, যতদূর পারে নিজে উঠিতে চেষ্টা করে, আর সে ইহাতে কৃতকার্য হ'লে তার সঙ্গীরা ওমা বাপ তাহাকে বাহবা দেয়।

ইংরেজদের মধ্যে চমৎকার একতা দেখিতে পাওয়া যায়। এই জাতীয় একতার বলে বিলাতে বহুসংখ্যক বড় বড় কোম্পানী, ব্যবসায়, শিল্পকার্য ও যৌথকারবার স্থাপিত হইয়াছে। এই একতা না থাকিলে উহাদের সমস্ত রাজ্য ও বাণিজ্য একদণ্ডে ধ্বংস হইয়া যাইত। একতার বলে এই ক্ষুদ্র দ্বীপবাসীরা কি না করিতেছে, আর এই জাতীয় একতার অভাবে আমরা কোন বড় কাজই করিতে পারিতেছি না। পৃথিবীতে অনেক কর্ম একাকী সম্পন্ন করা যায় না; একজন লোক সমস্ত দেশকে উন্নত বা কোন দেশ জয় করিতে পারে না। একগাছা ছড়ি কেই অন্যাসে ভাঙিতে পারে, কিন্তু দশগাছা পাঠি একসঙ্গে করিলে তাহা ভাঙা দুঃসাধ্য হয়—এ প্রাচীন বাক্য আমরা সকলেই জানি। কিন্তু জানিলে কি হবে, ইংরেজরাই এ বাক্যের সার্থকতা দেখায়। ইংরেজজাতি এক সঙ্গে মিলিয়া সামান্য ধোবার দোকান

(Washing Company) হ'তে এই বিস্তৃত ব্রিটিশ সাম্রাজ্যের শাসন পর্যন্ত—সকলেই করিতেছে।

ইংরেজদের মধ্যে যেমন জাতীয় একতা, সেইরূপ স্বদেশ ও স্বজাতির প্রতি দৃঢ় অনুরাগ আছে। এই দেশভক্তি ও স্বজাতিপ্রিয়তার দরুণ উহারা জন্মভূমির কোন অমঙ্গল দেখিতে বা স্বদেশবাসীদের অপমান সহিতে পারে না। ইহারা যেমন আত্মমর্যাদা রাখিতে ব্যস্ত, সেইরূপ স্বজাতির নাম রক্ষা করিতে সর্বদা যত্নবান। স্বাধীন জাতি, স্বাধীন দেশ বলিয়া ইহাদের মনে আত্মাভিমান আছে, সেই জাতীয় অভিমান বশতঃ ইহারা স্বদেশ ও স্বজাতির প্রতি কোন কু-ব্যবহার করিতে প্রবৃত্ত হয় না। স্বদেশীয় কোন লোকের প্রতি কেহ অত্যাচার করিলে নিজের অপমান মনে করিয়া সকলে মিলিয়া তৎক্ষণাতঃ তার প্রতিশোধ দিবার চেষ্টা পায়। আমি স্বচক্ষে দেখিয়াছি, কোন বিদেশীয় রাস্তার কোন লোককে মারিলে প্রায় কুড়িজন ইংরেজ দৌড়িয়া এসে স্বদেশীয়ের পক্ষ লইবে ও বিদেশীয়কে মারিতে উত্তত হ'বে। বিদেশে গেলেও ইংরেজরা এই স্বজাতিপ্রিয়তা ভুলিয়া যায় না। এদেশেও আমরা দেখিতে পাই, তাহারা সকলেই একত্র বাস করে ও পরস্পরের সাহায্য করে। বিজাতীয় অপেক্ষা স্বজাতীয়ের উপর তাহাদের অধিক বিশ্বাস। ইংরেজরা স্বদেশীকে ফেলিয়া কখন বিদেশীকে কোন কর্মে নিযুক্ত করে না। আর স্বজাতি মধ্যে শঠতা, প্রবঞ্চনা, মিথ্যাকথা প্রভৃতি দুর্ব্যবহার করিতে লজ্জিত হয়। ইহারা বরং অগ্র জাতির নিকট জুরাচুরি করিবে, তথাপি স্বদেশী লোকদের সঙ্গে নীচ ব্যবহার করিবে না। তা ছাড়া, ইহাদের পরস্পরের মধ্যে বিদ্বেষ ও পরশ্রীকাতরতা প্রায়ই দেখা যায় না। আর ইহারা কখন স্বজাতিকে হেয়জ্ঞান করে না ও অগ্রের কাছে অবনতশির হইয়া চলে না।

কর্তব্যকর্মের জ্ঞান ইংরেজজাতির আর একটি অতি উৎকৃষ্ট গুণ। প্রধান মন্ত্রী হইতে সামান্য মজুর পর্যন্ত সকলেই একাগ্রচিত্তে নিজ নিজ কর্তব্যকর্ম সাধন করিয়া থাকে। একজন উচ্চ পদবীর রাজকর্মচারী নিজের নির্দিষ্ট কাজ যেরূপ মনোযোগের সহিত সম্পন্ন করেন; একজন সামান্য কেরানীও নিজের কাজ সেইরূপ মন দিয়া করে। একটা ছুতার মিস্ত্রী ডাকিয়া কোন কাজ করিতে দাও, সে নির্দিষ্ট সময়ের মধ্যে কাজটা সূচার-

রূপে শেষ করিয়া দিবে। একজন চাকর বা চাকরাণী নিযুক্ত কর, সে প্রতিদিন নিয়মিত সময়ে ঠিকঠাক কাজগুলি করিয়া রাখিবে। এ বিষয়ে ইংরেজ মনিবকে আমাদের মত দিক্ হ'তে হয় না। আমি ইহাদের এই কর্তব্যের জ্ঞান দেখিয়া অনেক সময় আশ্চর্য হইয়াছি। কি ঝড়, কি বৃষ্টি, কি তুষারপাত—কোন কালেই ইংরেজরা উচিত কর্ম অবহেলা করে না। আবার ইহারা যেমন অধিক কথা কহে না, তেমনি কোন কাজের জন্ত ইহাদের সঙ্গে বকিয়া সময় নষ্ট করিতে হয় না। ইহারা গালাপালি বা তিরস্কারকে অতিশয় ঘৃণা করে; এবং কি বড়, কি ছোট, কেহই ভৎসনা খাইতে চায় না, বা খাইবার কাজও করে না।

বিদেশীয়দের প্রতি স্নেহশীল না হ'লেও বিন্দু কারণে ইংরেজরা কাহারও উৎপীড়ন বা অনিষ্ট করিতে অগ্রসর হয় না। কত বিদেশী লোক ধর্মসম্বন্ধে বা অগ্র কোন কারণে স্বদেশে উৎপীড়িত হ'য়ে ইংলণ্ডে আসিয়া আশ্রয় লইয়াছে। উহারা অনেক সময় ঐ সব লোকদের প্রতি সদাশয়তা দেখাইয়া থাকে। সেদেশে যেমন ভয়ানক স্বার্থপর ও ছুরাকাজ্জ লোক আছে, সেই রকম অতি অমায়িক ও উদারব্যক্তিও বিরল নহে। অনেক ধনী সর্বদা পরহিতে রত থাকেন ও পরোপকারের জন্ত রাশি রাশি অর্থ দান করেন। ইংরেজ বড়মানুষদের বদাচর্যতা জগৎপ্রসিদ্ধ। ইহারা অহরহঃ নিজদেশে নানা কারণে প্রভূত অর্থ বিতরণ করেন, আর সময়ে সময়ে অতি দূরদেশেও বিপদকালে প্রচুর দান পাঠাইয়া থাকেন।

সচরাচর ইংরেজ বিনয়ী না হ'লেও রক্ষ নহে; আর নির্মম হ'লেও ইহাদের মনে 'নীচ' প্রবৃত্তি অতি বিরল। ইংরেজদের সংস্ক বস্তু স্থাপন করা অতি কঠিন, কিন্তু একবার মিত্রতা হইলে, ইংরেজবন্ধুর মত বিশ্বাসী, উপকারী ও চিরজীবনস্থায়ী বন্ধু পৃথিবীতে অতি অল্পই দেখা যায়। অশিক্ষিত ইংরেজদের মধ্যে অধিকাংশ অতিশয় ভদ্র; ইহাদের সঙ্গে আলাপ করিলে, ইংরেজ জাতির সমস্ত দোষ ভুলিয়া তাদের প্রতি ভক্তিভাবের উদয় হয়। ইহারা ইংলণ্ডের প্রধান অবলম্বন এবং ইহারাই ব্রিটনের গরিমা ও মাহাত্ম্য বর্দ্ধন করেন।

শ্রীকৃষ্ণভাবিনী দাস।

## প্রেম-বৈচিত্র্য ।\*

### প্রথম পরিচ্ছেদ ।

১ম। “কিলো আজ তোরা ঘাটে ঘাবিনে? তোরদের যে আর বার হয় না!”

২য়। কি করি বোন, এই তোর সইয়ের জন্তইত যত দেবী!

১ম। সইয়ের জন্ত দেবী কেন?

২য়। ওঁর আর আজ চুল বাঁধা মনস্তর হচ্ছে না!

১ম। কেন লো সই?

৩য়। দূর,—তুইও যেমন, বোয়ের কথা শুনিম্ কেন? বউ, তুদি কিন্তু ভাই ভারি মিচ্‌কতারি!

বৌ মূছ মূছ হাসিলেন, হাসিয়া বলিলেন “তা সত্যি কথাইত বল্‌চি ঠাকুরঝি, তোর যে ভাই পেটে থিখে মুখে লজ্জা! তা সইকে আর অত লজ্জা কেন?”

১ম। কি লা সই?

৩য়। বোয়ের মাথা!

২য়। আমার মাথাই হোক আর মুণ্ডুই হোক, কথাটা কেন সইফে খুলেই বল না? ওলো, আজ রাতে আমার এই ঠাকুরঝি ঠাকুরাণীর পূজা হবে, তাই আমি প্রতিমাখানিকে যত্ন কোরে সাজাচ্চি!

সম্বন্ধে মনদ ভাজ তবু উভয়ে বড় ভাব। ঠাকুরঝির সই বলিয়া, কুসুমের সঙ্গেও বোয়ের বেশ প্রণয়; তিনজনেই সমবয়স্কা, তিনজনেই যুবতী!

\* সম্পাদক মহাশয়ের অনুরোধ, এক বৎসরের মধ্যেই উপন্যাস খানি শেষ হয়, সেজন্য বিজ্ঞাপিত “ভিখারিণীর” দীর্ঘকাহিনী উৎসাহে প্রকাশ করিতে সাহসী না হইয়া একখানি অপেক্ষাকৃত ক্ষুদ্র উপন্যাসের অবতারণা করা হইল। আশা করি, “ভিখারিণীর” ভার বহন করিতে হইল না বলিয়া, স্বয়ং উৎসাহ সম্পাদক মহাশয়ের এবং ভিখারিণীকে দ্বারস্থ না দেখিয়া পাঠক মহোদয়গণেরও কোন আক্ষেপের কারণ ঘটবে না।

লেখক।

## প্রেম-বৈচিত্র্য ।

১৭

কুসুম। পূজো কি লা? নে ভাই ওসব হেঁয়ালি, মেয়ালি রাখ! কথাটা কি সত্যি বল না?

বৌ। আ, আমার কপাল, এটা বুঝলিনে? আজ যে ঠাকুর জামাই আসবেন?

কুসুম। মাইরি? হ্যালা, সই, কই, তুইওত ওবেলা আমাকে কিছু বল্লিনে? ধনি মেয়ে যাহোক কিন্তু! আমার সঙ্গেও লুকোচুরী!

সই সইয়ের কথার উত্তর দিতে না দিতে, বৌ বলিয়া উঠিল, তা ভাই, বলেনি কি সাথে? কতদিনের পর আজ ঠাকুরজামাই আস্‌চেন, পাছে আবার তোরা এসে রাতে সময় নষ্ট করিস্! তা, আজ আর তোদিকে ভাগ দেবে না, কাল হ'তে যা হয় করিস্! ঠাকুরঝি একটু হাসিয়া বৌকে চিমটা কাটিয়া বলিল—“মরণ আর কি?”

বৌ। মলে বুঝি নিষ্‌গট্‌ক হস্?

কুসুম। নে এখন রঙ্গ রাখ! প্রভাতবাবু কখন আসবে, বলনা ভাই? এ খবরটা কি আমাকে বলতেও নেই? এই বলিয়া কুসুম সইয়ের দিকে চাহিল। মধুর অধরখানি অভিমানে একটু ফুলিয়া উঠিল!

সই সিন্ধু এতক্ষণ বোয়ের সঙ্গে সইয়ের রঙ্গ দেখিতেছিলেন, আর টিপিটিপি হাসিতেছিলেন, কিন্তু সইয়ের অভিমান বুঝিয়া, তাঁর আসন টলিল। ব্যাপারখানা সইকে জানাইবার জন্ত সিন্ধুর হৃদয়টুকু আকুল হইয়া উঠিতেছিল, কিন্তু মুহূর্ত্তে বৌ ঠাকুরাণী, এই বিপদ হইতে সিন্ধুকে মুক্ত করিলেন। বৌ আসলে লোকটা মন্দ নন!

বৌ। তা কুসুম তুই ভাই রাগ করিসনে, প্রভাতবাবু আজ রাত আটটার গাড়ীতে আসবেন। তোকে বলবে কি, আমরাই একটু আগে খবর পেলাম। তবে ভাই তোমার সইয়ের মনের খবর রাখিনে, যদি তিনি, মনে মনে অশ্বে জেনে থাকেন, তা এখন তোমাদের সইয়ে সুইয়ে বুঝা পাড়া!

কুসুম আবার সইয়ের দিকে চাহিল, এ চাহনি, হাসি আছাদে ভরা ভরা। চারি চক্ষে মিলিল! চোখে চোখে কি কথা হইল জানি না, কিন্তু উভয়ে উভয়ের মনোভাব বুঝিলেন! সহস্র কথায় যাহা প্রকাশ পায় না,

সময়ে, একটু হাসি, একটু অপাঙ্গের দৃষ্টি, তাহা বুঝিয়া দেয়। চুল বাধা শেষ হইল। এবার পরস্পরে সিন্দূর দেওয়ার পালা। সিন্দূর পরান শেষ হইলে, তিন জনে, গামছা কাঁধে, কাপড় কাঁচিতে বাহির হইলেন।

পথের আশে পাশে ছোট ছোট আম কাঁটালের বাগান। মাঝে মাঝে ছুই চারিটা বাঁশ ঝাড়। জ্যৈষ্ঠ মাস, বেলা অপরাহ্ন। পাখীর দল গাছে বসিয়া, কাকলি করিতেছে। দূরে কোকিল পাঁপিয়ার উচ্ছ্বাস পরদায় পরদায় উঠিতেছে। যেন তপনের আসন্নবিরহে কাতর হইয়া, দিবারাণী প্রকৃতির কোলে বসিয়া উচ্ছ্বাসে আপনার মর্ম্ম-গান গাহিতেছে। ঘাটে যাইতে যাইতে এই কোকিল পাঁপিয়ার ডাক উপলক্ষ করিয়া বৌ ও কুমুম মাঝে মাঝে সিন্দূকে লইয়া, নানা রঙ্গ করিতেছিলেন। পথে তাঁহাদের সঙ্গে বামা, রানা, শ্রামি অনেকেরই দেখা হইল। স্কুলেই এক তীর্থের যাত্রী।

### দ্বিতীয় পরিচ্ছেদ।

প্লামপুর ক্ষুদ্র গ্রাম। গ্রামের প্রান্তরে, 'তালপুকুর' নামে একটা পুকুরিণী। পুকুরিণীর ঘাট বাধান। ঘাটের উপর ছুই পাশে ছুইটা অশ্বখ ও বটের গাছ। অনেক তালপুকুরের কথা শুনা যায়, কিন্তু সে সব পুকুরিণীর চারি ধারে তালগাছের নাম গন্ধও নাই। মানুষ যায় নাম থাকে, স্মৃতি থাকে, এই সব পুকুরিণী বুঝি তাহারই উদাহরণ স্থল। কিন্তু আমাদের এই পুকুরিণীর নামের মূলে, কোন ঐতিহাসিক তত্ত্ব নিহিত ছিল না। ইহার চারি ধারে বড় বড় তালগাছের সারি, পুকুরিণীটা কিছু বৃহৎ, জল বড় পরিষ্কার।

অপরাহ্নে কয়টা রমণী গা ধুইতে ঘাটে নামিলেন। জল যেন শিহরিয়া উঠিল। পুকুরিণীতে পদ্মবন নাই, কিন্তু জলাশয়ের সৌভাগ্যগুণে, ছুটা বেলায় অনেকগুলি কমল ইহার বক্ষে ফুটিয়া উঠে! সত্ত্বপ্রক্ষুটিতা এই পদ্মিনী-কুলের বর্ণনা লইয়া আমরা একটু গোলে পড়িতে হইয়াছে। ইহার মধ্যে কাহারও বয়স পনের বৎসরের অধিক নহে। তবে ইহাদের যুবতী, কি

কিশোরী কি বলিব? কবিগণ ষোড়শীকেই যুবতী বলিয়া বর্ণনা করিয়া আসিতেছেন। কিন্তু কালের স্রোতে সে দিনকাল ভাসিয়া গিয়াছে। বঙ্গ-ললনার যৌবনের নিতান্তই 'অকালবোধন'। এখন যুবতীর বর্ণনা করিতে গেলে, দ্বাদশী, ত্রয়োদশী, চতুর্দশী বলিয়াই করিতে হয়। তারপর যেন অমাবস্তার দিকে চলিয়া পড়ে।

আজ অনেকদিনের পর, সিন্দুবালার স্বামী আসিতেছেন, তাই তার সমবয়সী মহলে একটা হুলস্থূল বাধিয়াছে। তামাসার সময় সিন্দু কাঁহাকেও ছাড়ে না, তাই আজ সিন্দুকে কেন্দ্রীভূত করিয়া এই যুবতীর দল, হাসি তামাসা, রঙ্গরসে পুষ্করিণীর আসর গুলজার করিয়া তুলিয়াছেন। সিন্দু যে ইহাতে আনন্দ অনুভব না করিতেছে, তা নয়; তবে সে সহসা ধরা দিতে রাজি নহে। কিন্তু মনের এ উচ্ছ্বাস চাপিয়া রাখা সরলা বালিকার কাজ নয়। তার প্রতি কথার, প্রতি হাসিতে সে আনন্দহিলোল খেলিতেছিল।

সিন্দুর অমায়িকতার সবাই তাকে বড় ভাল বাসে। আজ তামাসার বেলায় কিন্তু কেহই তাকে ছাড়িতেছে না। সই যে সই, সেও আজ থাকিয়া থাকিয়া চোরাবাণ মারিতেছে। সিন্দু, মাঝে মাঝে সইকে ভ্রান্ত কুরিতেছিল, আর কুন্দদন্তে বিশ্বাধরখানি টিপিয়া ক্ষুদ্র হস্তে ক্ষুদ্র কিল দেখাইতেছিল। কিন্তু সইত আর পুরুষমানুষ নয়! এসব সে হাসিয়া উড়াইয়া দিতেছিল।

এইরূপে স্নন্দরীগণের কাপড়কাচা শেষ হইল। তখন বাঁহাদের জল লইবার প্রয়োজন, তাঁহারা কলসী লইয়া জল পূরিতে লাগিলেন। পুরিবার সময় চারিধার হইতে ছুটিয়া ছুটিয়া নাচিয়া নাচিয়া জল আসিতে লাগিল। তারপর পূর্ণকলসী কক্ষে যুবতীর দল, যখন ধীরে ধীরে গজেন্দ্রগমনে চলিতে আরম্ভ করিলেন, কলসীর জল তখন আনন্দে তালে তালে নাচিতে লাগিল। জল কি সৌন্দর্য্য ভাল বাসে? শুনিয়াছি, শতযোজন দূরে, চন্দ্র দেখিয়া সমুদ্র উথলিয়া উঠে, ইহার সত্যাসত্য প্রত্যক্ষ করি নাই, কিন্তু রমণীর মুখ-চন্দ্র দেখিয়া কক্ষস্থ কলসীর জল যে উছলিয়া উঠে, তাহা নিতান্ত কবি-কল্পনা নহে।

সহসা এই যুবতীদলের গতিরোধ হইল। বিপরীত দিক হইতে আর একদল রমণী, তাঁহাদের সম্মুখীন হইলেন। ইহাদের অধিকাংশই যৌবনের

শেষসীমায় পা দিয়াছেন। উভয়দলে ছুই চারিটা কথার পর, বয়স্কার দল অগ্রসর হইলেন। কিন্তু “ডাক্তারগিনি” তখনও নবীনাদের সহিত কথা কহিতে রত! ডাক্তারগিনি—ডাক্তার হরকালী বন্দ্যোপাধ্যায়ের দ্বিতীয়পক্ষের স্ত্রী। সমবয়সী মহলে তিনি ডাক্তারগী বলিয়া পরিচিতা। ডাক্তারগিনির বিলম্ব দেখিয়া তাঁর দলের একজন, তাঁকে ডাকিয়া বলিলেন, “বলি, ও ডাক্তারগী তুই যে দেখি, সিং ভেঙ্গে বাছুরের দলে মিশলি?” ডাক্তারগিনি তখন নাতনীদের সঙ্গে রঙ্গরসে মগ্না, হাসিতে হাসিতে উত্তর দিলেন, “সিং ভাঙতে হবে কেন লো, আমি যে নেড়ি, তা, তোরা না হয় একটু এগো, আমি যাচ্ছি।” এইখানে ডাক্তারগিনির আর একটু পরিচয় দিয়া রাখি। তিনি নিঃসন্তান, কিন্তু সেজন্ত তাঁর কোন অশান্তি নাই। সেই স্বামিসোহাগিনী,—সদাই হাস্যময়ী, সদাই প্রফুল্ল! লেখা পড়াও তাঁর মোটামুটি জানা আছে। রামায়ণ, মহাভারত, অন্নদামঙ্গল, চণ্ডীদাস প্রভৃতি তাঁর একরূপ কণ্ঠস্থ বলিলেই হয়! নবীনাদের অধিকাংশই তাঁহার নাতনী বা নাতবৌ। ঠাকুরাণীদিদি কিন্তু বেবল এই সম্বন্ধেই সন্তুষ্ট নন, নাতনী ও নাতবৌদের সঙ্গে তিনি কত রকমের কত নূতন নূতন সম্বন্ধ পাতাইতেন। সিন্ধু তাঁর “সাধের বাগান” আর সিন্ধুর সেই কুসুম হচ্চেন তাঁর “আতরদানি।” তা ছাড়া কেহ “দেখন হাসি” কেহ “মাইডিয়ার” কেহ “লেবেন্ডার” কেহ বা “ওডিকলম!” নাতীর দলে বিশেষতঃ নাতজামাই মহলেও তাঁর কম পসার নয়! ডাক্তারগিনি সিন্ধুকে সম্বোধন করিয়া কহিলেন, কি লো সাধের বাগান! আজ নাকি মালী আস্চে? আমি ত ভাই ভাবছিলাম—“ফুটিয়ে কলি, পড়ছে চলি, কইত অলি এলানা?” তা এতদিনে বুঝি তার মনে পড়েছে। কাল গিয়ে মালীগিরি ঘুচিয়ে দিয়ে আস্বে। সিন্ধু নতমুখে একটু হাসিল, সেই কিন্তু ছাড়িবার পাত্র নয়। সে ঠাকুরাণীদিদির কথার ছল ধরিল, “সইয়ের মালীগিরি ঘুচিয়ে দিয়ে নিজের মালী ক’রে নেবে বুঝি আতরদানি? তা হ’লে যে ডাক্তার ঠাকুরদাদাতে আর প্রভাতে চুসোচুলি বেধে যাবে গো?” ডাক্তারগিনিও বড় সোজা নন, বলিলেন, দূর নেকী, তোরা ঠাকুরদাদার ত ভাই হ’লে ভালই হবে। পুরান বাগান গিয়ে তাঁর আবার নূতন বাগান হবে, সঙ্গে সঙ্গে ফুটন্ত কুসুমকলিটাও পাবে।

কুসুম। না গো না, আতরদানি! সাজান বাগান ছেড়ে দিয়ে কেউ কি আর নূতন বাগান চায়?

ডাক্তারগিনি। আ নর! ঐ দেখ,—“রোগী মেরে, ঘোড়ায় চড়ে, আস্চে আমার বর।”

বাস্তবিক, দূরে ডাক্তারবাবু ঘোড়া ছুটাইয়া আসিতেছিলেন। তাঁহাকে দেখিয়া নবীনার দল তাড়াতাড়ি চলিয়া গেল! ডাক্তার ঠাকুরদাদার সামনে পলেই ত সর্বনাশ! এখনি কি না কি বলে বস্বে। ঠাকুরাণীদিদিটাও হাসিতে হাসিতে, মরালগতিতে চলিয়া গেলেন। যাইতে যাইতে একবার একটু ফিরিয়া বলিলেন,—“কাল ছপুরবেলায় যাব লো বাগান। তোরা তো ভাই, এখন পাথরে পাঁচ কিল!”

এইরূপে আমোদে-আহ্লাদে কাটাইয়া সকলে আপন আপন গৃহে ফিরিলেন। পল্লিগ্রামের রমণীগণ বিশেষতঃ যুবতীর দল এই উপলক্ষে দিনান্তে একবার একত্রিত হন। এসময় তাঁহাদের বড় স্থখে কাটে, প্রণয়ী যেমন প্রণয়িনীর মিলনের আশাপথ চাহিয়া থাকেন, চিরপ্রবাসী বাঙ্গালী যেমন শারদীয়া পূজার ছুটির অপেক্ষা করেন, বালিকা বধু যেমন পিত্রালয় যাইবার দিন গণিতে থাকেন, ইহারাও বুঝি সেইরূপ সতৃষ্ণনয়নে, একাগ্রমনে এই সময়টুকুর প্রতীক্ষা করেন।

ক্রমে সন্ধ্যা অতীত হইল, গৃহে গৃহে দীপ জলিল, সিন্ধুর হৃদয়েরও আশার দীপ জলিয়া উঠিল। সারাটা বৎসর ধরিয়া, সিন্ধু স্বামীর আশাপথ চাহিয়া আছে। এর পূর্বে সে স্বামীর সহিত ভাল করিয়া কথা কহিতে পারিত না, আজ কি পারিবে?

### তৃতীয় পরিচ্ছেদ।

ঠিন্ ঠিন্ ঠিন্ শব্দে সহসা সিন্ধুর ঘুম ভাঙ্গিয়া গেল। কিন্তু ঘুমের ঘোরে সে শব্দটা যে কিসের, তা বড় ‘ঠাওর’ করিয়া উঠিতে পারিল না। তাড়াতাড়ি স্বামীর শিথিল বাহুপাশ হইতে আপনাকে মুক্ত করিয়া, উঠিয়া বসিল। অসংযত বেশ, আলুথালু কেশ একটু সংযত করিয়া লইল। তখন

নিদ্রালস চক্ষু মুছিতে মুছিতে মুক্ত বাতায়ন পথে দেখিল, সবেমাত্র ভোর হইয়াছে। তবু রক্ষে! সে ত ভেবেছিল, না জানি কত বেলাই বা হ'য়েছে। সঙ্গে সঙ্গে ঠাকুরাণীদিদিদের বিক্রপের দারুণ বিভীষিকাও বুঝি তার মনে জাগিয়া উঠিয়াছিল। ঘর হইতে যাইবার পূর্বে, এই সুযোগে নিদ্রিত স্বামীকে একবার ভাল করিয়া দেখিবার লোভটুকু সিন্ধু সম্বরণ করিতে পারিল না। রাত্রে লজ্জায়, সে ভাল করিয়া স্বামীর মুখের দিকে চাহিতে পারে নাই। এখন স্বামীর অজ্ঞাতে সিন্ধু অনির্মেঘে সে মূর্ত্তি দেখিতেছিল। দেখিতে দেখিতে দেখিল, কপালে তাঁর বিন্দু বিন্দু স্বেদ ঝরিতেছে। সিন্ধুর বড় সাধ হইল, বাম মুছাইয়া একটু বাতাস করে, কিন্তু কেমন বাধ বাধ ঠেকিতেছিল, “কি জানি যদি ঘুম ভেঙ্গে যায়, তবে ত ধরা পড়ব, সে যে বড় লজ্জার কথা!” এইরূপ ভাবিতে ভাবিতে যেন কতকটা আপনার অজ্ঞাতেই সিন্ধু ধীরে ধীরে স্বামীর কপাল মুছাইতে লাগিল। বাঁ হাতে, পাখাখানিও তুলিয়া লইল। কোমল অঙ্গুলীর কোমল স্পর্শে, প্রভাতের ঘুম ভাঙ্গিয়া গেল, অমনি চারি চক্ষে মিলিল। সিন্ধুর হাত হইতে পাখা পড়িয়া গেল। সে তখন লজ্জায় জড়সড় হইয়া মুখখানি নীচু করিল। প্রভাত সেই ব্রীড়ানত মুখখানি দেখিবার জন্ত আদরে সিন্ধুর চিবুক ধরিলেন,—ঠিক সেই মুহূর্ত্তে কে যেন আবার ঠিন্ ঠিন্ ঠিন শব্দে বাহিরে শিকল নাড়িল। সিন্ধু লজ্জাবনত নয়ন-পল্লবহুটী স্বামীর পানে একটু তুলিয়া বলিল,—“এখন তবে যাই।” \* \* \* \* \*

কপাট খুলিয়া সিন্ধু দেখিল, সে যাহা ভাবিয়াছে ঠিক তাহাই বটে! সম্মুখে হাসিমুখে দাঁড়াইয়া সই! পোড়ারমুখী সই নইলে, রাত পোয়াতে না পোয়াতে এত কাথাব্যথা আর কার? সিন্ধু বাহিরে আসিলে সই একমুখ হাসিয়া বলিল “কি লো!” তখন ছই সইয়ে হাত ধরাধরি করিয়া নিভূতে চলিল।

দেখিতে দেখিতে বৌ এবং আর আর সমবয়সীরা জুটিতে লাগিল, ক্রমে—

“শ্রামলা বিমলা, মঙ্গলা অবলা,

আইলা সিন্ধুর পাশে।

যদি স্বতন্তরে, তথাপি সিন্ধুরে,

পরাণ অধিক বাসে ॥

সিন্ধু মুখ দেখি, হৈয়া মহাসুখী,  
কহয়ে কোতুক কথা।  
রজনী-বিলাস, শুনিতে উল্লাস,  
অমিয় অধিক গাঁথা ॥  
হাস পুরিহাসে, রসের আবেশে,  
মগন হইল সিন্ধু।  
সে নিশি-কাহিনী, রস-নির্ঝরিণী,  
কবি মাগে এক বিন্দু ॥

শ্রীশৈলেশচন্দ্র মজুমদার ।

## প্রলয়ের ধুমকেতু ।

অনেকদিন হইল বঙ্গের সুসন্তান কবি হেমচন্দ্র ধুমকেতুর সংঘর্ষণে পৃথিবীর আকস্মিক ধ্বংসের কথা শুনিয়া লিখিয়াছেন :—

“আসিছে অনল ব্রহ্মাণ্ড উজলি,  
( দেখেছে শূণ্ডেতে পণ্ডিতমণ্ডলী )

জগত ব্রহ্মাণ্ড করিবে গ্রাস।

একি ভয়ঙ্কর—বিশ্ব চরাচর

সৌম, শুক্র, বুধ, মহীশনৈশচর,—

বিহ্যৎ অনলে হবে বিনাশ!”

আবার শুনিতোছি, অষ্ট্রিয়াদেশীয় জ্যৈষ্ঠিক জ্যোতির্বিদ গণনা করিয়া দেখিয়াছেন, আগামী ১৩ই নভেম্বর ধরার আয়ুঃ শেষ হইবে। পৃথিবীর কোণ্টার লিখিত এইপ্রকার মৃত্যুযোগের আবিষ্কার বড় নূতন নয়;—ঊনবিংশ শতাব্দীর প্রারম্ভ হইতেই নানাদেশীয় জ্যোতিষিগণ তাঁহাদের গণনার এইপ্রকার অদ্ভুত ফলপ্রচার করিয়া, মধ্যে মধ্যে জগৎকে শঙ্কিত করিবার চেষ্টা করিয়া আসিতেছেন। জ্যোতিষশাস্ত্রের শৈশবাবস্থায় এইপ্রকার আজগবি

সংবাদ প্রচার করিয়া, তৎকালে জ্যোতিষিগণ কুসংস্কারাক্রম জনসাধারণ মধ্যে তুমুল আন্দোলন-স্রোত উত্থিত করিতেন, কিন্তু একাধিকবার পণ্ডিতগণের ভবিষ্যৎ বাণীগুলি ব্যর্থ হইতে দেখিয়া, এখন এই শ্রেণীর উক্তিগুলিতে ক্রমেই সাধারণের অনাস্থা দেখা যাইতেছে। এতদ্ব্যতীত আজকাল জ্যোতির্বিদগণ মূল বিষয়গুলি সাধারণের নিকট পরিষ্কার থাকায়, উক্তপ্রকার বাক্যের অর্থার্থতা শিক্ষিত ব্যক্তিমাতেই স্পষ্ট বুদ্ধিতে পারিতেছেন। বোধ হয়, এই সকল কারণে, উল্লিখিত অষ্ট্রিয়ান জ্যোতিষী ফাল্ভ (Falb) সাহেবের গণনার ফল বহুকাল প্রচারিত হওয়া স্বত্বেও,—অত্য়াপি জনসাধারণের মধ্যে বিশেষ কোন চঞ্চলতার লক্ষণ দেখা যাইতেছে না,—সংসারের ক্ষুদ্র বৃহৎ খুঁটিনাটি কাজকর্ম ঠিক পূর্ববৎ চলিয়া আসিতেছে।

ফাল্ভ সাহেব তাঁহার গণনার বিবরণ অল্পদিন হইল প্রকাশ করিয়াছেন। তাঁহার মতে,—সুপ্রসিদ্ধ বয়েলার ধূমকেতু ( Biela's Comet ) আগামী নভেম্বর মাসে পৃথিবীর ভ্রমণপথ রোধ করিয়া, মহাপ্রলয় উৎপন্ন করিবে; এবং এই জ্যোতিষ্কদ্বয়ের সংঘর্ষে এত তাপ উৎপন্ন হইবে যে, সমাগরা ধরা তাহা সহ করিয়া স্থায়ী অস্তিত্ব অক্ষুণ্ণ রাখিতে পারিবে না,—মুহূর্ত্তে সকলই ভস্মরাশিতে পরিণত হইবে। এই অদ্ভুত উক্তি প্রচারিত হইবামাত্র নানাদেশীয় বিখ্যাত জ্যোতিষিগণ স্বাধীনভাবে গণনা করিয়া, ফাল্ভ সাহেবের ভ্রম ও তাঁহার গণনালক্ষণ ফলের অসারতা প্রতিপাদন করিয়াছেন এবং এই ভীতিজনক সংবাদপ্রচারের জগৎ তাঁহাকে তিরস্কৃত করিতেও ছাড়েন নাই। পৃথিবীর ধ্বংস ব্যাপারে বয়েলার ধূমকেতুর কথা আজ নূতন নয়,—প্রায় সত্তর বৎসর পূর্বে অল্‌হার (Olber) নামক জনৈক পণ্ডিত গণনা করিয়া দেখিয়াছিলেন, ১৮৩২ খৃষ্টাব্দে ২৯ অক্টোবর উক্ত ধূমকেতুর সংঘর্ষে পৃথিবী চূর্ণীভূত হইয়া যাইবে। এই সংবাদে ইউরোপের জনসাধারণ এত উদ্বেগ হইয়া পড়িয়াছিল, যে অনেকগুলি নগরের অধিবাসিগণের মধ্যে শান্তিরক্ষা করাও বিশেষ দুঃসং হইয়া দাঁড়াইয়াছিল। অল্‌হার এই প্রলয়কাল গণনায় একটা বড় ভুল করিয়া ছিলেন,—বয়েলার ভ্রমণপথ স্থির করিবার সময়, পূর্বোক্ত বৎসরের ২৮ অক্টোবর ধূমকেতুটা ধরাকক্ষে উপনীত হইবে দেখিয়াই, তিনি অশুভ সংঘটনের আশঙ্কা করিয়াছিলেন,—উক্ত দিবসে পৃথিবী তাহার

কক্ষের কোনস্থানে অবস্থান করিবে, তাহা গণনা করিয়া দেখেন নাই। ফ্লামারিয়ন্ (Flammarion) নামক জনৈক পণ্ডিত অল্‌হারের গণনার এই ভ্রম প্রত্যক্ষ করিয়া স্বাধীনভাবে গণনা আরম্ভ করিয়াছিলেন, এবং শেষে তাঁহার গণনায় ধূমকেতুর ধরাকক্ষ স্পর্শকালে পৃথিবী, কক্ষের ঠিক বিপরীত দিকে অবস্থান করিবে বলিয়া সিদ্ধান্ত হওয়ায়,—জনসাধারণ আশু বিপদপাতের উদ্বেগ হইতে কতকটা রক্ষা পাইয়াছিল। ঊনবিংশ শতাব্দীর প্রথমাংশে এপ্রকার ভ্রান্তিজনক সংবাদ প্রচার কিঞ্চিৎ সত্ত্বেও এবং সেজন্য গণক জ্যোতিষীকে বিশেষ দোষ দেওয়া যায় না,—কিন্তু আধুনিক বৈজ্ঞানিকযুগে তথাকথিত জ্যোতিষী ফাল্ভ সাহেব কর্তৃক পূর্বোক্ত প্রকার উদ্বেগজনক সংবাদপ্রচার বড়ই অদ্ভুত!

আধুনিক বিজ্ঞানবিদগণের মধ্যে অনেকেই ফাল্ভের ভবিষ্যৎবাণীর বিরুদ্ধে নানা যুক্তি প্রয়োগ করিয়াছেন। তন্মধ্যে প্রধান যুক্তি এই যে,—ফাল্ভ সাহেব যে ধূমকেতুটার সংঘর্ষে পৃথিবীর আশু ধ্বংস কল্পনা করিতেছেন, সেই বয়েলার ধূমকেতুই বহুকাল হইল, কোনও অপরিষ্কার কারণে ধ্বংসপ্রাপ্ত হইয়াছে,—এই যুক্তি জ্যোতিষ্ক দ্বারা কোন প্রকারে পৃথিবীর ধ্বংসসাধন হইতে পারে না। বয়েলার ধূমকেতু প্রাচীন ও আধুনিক জ্যোতিষীদিগের নিকট চিরপরিচিত,—বহুকাল হইতে এই ধূমকেতুটা সর্দে ছয় বৎসরে সূর্য্যপ্রদক্ষিণ করিয়া ঠিক নির্দিষ্ট সময়ে পৃথিবীকে দর্শন দিয়া জ্বাবার অন্তর্হিত হইতেছিল। গত ১৮৩৯ খৃষ্টাব্দ পর্য্যন্ত ইহার এই প্রকার নিয়মিত গতি ও আকারাদি প্রত্যক্ষ হইয়াছিল,—কিন্তু ১৮৪৬ অব্দে যথাসময়ে ইহার উদয় পর্য্যবেক্ষণ-কালীন চিরপরিচিত বয়েলার ধূমকেতুর পরিবর্তে, ছইটী নিহারিকাময় জ্যোতিষ্কের উদয় দেখিয়া দর্শকমাতেই বিস্মিত হইয়াছিলেন। জ্যোতির্বিদগণ প্রায় চারিমােস ধরিয়া জ্যোতিষ্কগুলি পর্য্যবেক্ষণ করিয়াছিলেন এবং এই অল্পসময় মধ্যে ইহাদের পরস্পর ব্যবধান ক্রমেই বৃদ্ধি হইতে দেখিয়া তাঁহাদের বিস্ময়ও ক্রমে বৃদ্ধি হইয়া পড়িয়াছিল। ইহার পর জ্যোতিষ্কগুলি দৃষ্টি বহির্ভূত হইয়া পড়ায়, তখন আর কোনও নূতন পর্য্যবেক্ষণের সুযোগ হইয়া উঠে নাই,—কিন্তু ধূমকেতুটা যে কোনও আভ্যন্তরীণ বা বাহ্যিক কারণে দ্বিধা খণ্ডিত হইয়া জ্যোতিষ্কযুগ্মে পরিণত হইয়াছে, তাহাতে

আর কাহারও সন্দেহ ছিল না। এই অদৃষ্টপূর্ব ব্যাপারে বিস্মিত হইয়া জ্যোতিষমাত্রেরই ১৮৫২ অব্দের ধূমকেতুর উদয়/পরিদর্শন করিবার জন্ম উৎসুক ছিলেন,—নির্দারিত সময় উপস্থিত হইল; এবারও বয়েলার ধূমকেতু যুগ্মজ্যোতিষাকারে আকাশপ্রান্তে উদ্ভিত হইল। পণ্ডিতগণ গণনা করিয়া দেখিলেন, ইতিপূর্বে জ্যোতিষিক খণ্ডস্থলের মধ্যে যে ব্যবধান দেখা গিয়াছিল,—এই কয়েক বৎসর মধ্যে তাহার আটগুণ বৃদ্ধি প্রাপ্ত হইয়াছে। তারপর আবার যথাসময়ে জ্যোতিষযুগল অন্তর্মিত হইল; জ্যোতিষিগণ ভাবিলেন, নির্দিষ্ট সময়ান্তে তাহাদের আবার পুনঃ উদয় হইবে,—কিন্তু ইহাই বয়েলার শেষ অন্ত হইয়া গেল। ১৮৫২ অব্দের পর পাঁচ ছয় বার উদয়কাল অতীত হইয়া গিয়াছে,—জ্যোতিষবিদগণ স্ববৃহৎ, দূরবীক্ষণ সাহায্যে ও বহুত্বের বয়েলার-ধ্বংসাবশেষ সেই জ্যোতিষযুগের আর দর্শনলাভ করিতে পারেন নাই!

স্ববিখ্যাত বয়েলার ধূমকেতুর এই বিস্ময়কর পরিণাম আধুনিক জ্যোতিষশাস্ত্রের একটা সুপ্রসিদ্ধ ঘটনা। ছোট বড় জ্যোতিষমাত্রেরই এই স্মরণীয় ব্যাপারটির সহিত বিশেষ পরিচিতি,—ফাল্গু সাহেব, লোকপ্রসিদ্ধ সেই বাস্তব ঘটনার অস্তিত্ব ফুৎকারে উড়াইয়া, কি প্রকারে লুপ্ত জ্যোতিষটির পুনরাবির্ভাবের কল্পনা করিলেন, তাহা জ্যোতিষজ্ঞ ব্যক্তিমাত্রেরই নিকট প্রহেলিকাভাব বোধ হইতেছে।

কোন একটা নূতন অদ্ভুত তত্ত্ব প্রচারিত হইলে, আজকাল তাহার প্রতিপোষক যুক্তির বড় একটা অভাব দেখা যায় না। বিষয়টা যতই অসম্ভব হউক না কেন,—পণ্ডিতসম্প্রদায় দ্বিধা বিভক্ত হইয়া তদাবলম্বনে হাশ্বকর কৃত্রিম যুক্তির অবতারণা করিয়া থাকেন। ফাল্গু সাহেবের সিদ্ধান্তও প্রচারিত হইলে, তৎপোষক যুক্তির অভাব হয় নাই,—ইহার উক্তির সত্যতা অক্ষুণ্ণ রাখিবার জন্ম শুনা যাইতেছে, কয়েকজন পণ্ডিতও নাকি অত্যাধি নানা যুক্তি উল্লেখ করিতেছেন। এই পণ্ডিতগণের প্রধান যুক্তি এই যে,—বয়েলার ধূমকেতু কোন অপরিজ্ঞাত কারণে আকারান্তর পরিগ্রহ করিয়াছে বটে, কিন্তু ইহার উপাদান সামগ্রী লয়প্রাপ্ত হয় নাই,—সেগুলি উল্কাপিণ্ডাকার ধারণ করিয়া সেই ধূমকেতুর গতিতে যথানিয়মে সূর্য্যপ্রদক্ষিণ করিতেছে;—আগামী নভেম্বর মাসে পৃথিবী সেই উল্কাশ্রোতের সংঘাতে ধ্বংসপ্রাপ্ত হইবে। বয়েলার উল্কাকার-

প্রাপ্তির কথা কতকটা সত্য,—গত ১৮৭২ ও ১৮৮৫ সালে ২৭শে নভেম্বর বয়েলার উদয়কাল নির্দিষ্ট ছিল, এই উভয় দিবসেই ধূমকেতুর পরিবর্তে বহুসংখ্যক উল্কাপাত পর্যবেক্ষকদিগের নয়নগোচর হইয়াছিল,—ইহাতে অনেক পণ্ডিত অনুমান করিতেছেন, সম্ভবতঃ সেই বয়েলার ধ্বংসাবশেষ ও তাহার উপাদানসামগ্রী অধুনা উল্কাপিণ্ডাকার ধারণ করিয়া সূর্য্য পরিভ্রমণ করিতেছে। কিন্তু এই উল্কারাশির সংঘর্ষে পৃথিবীর ধ্বংস সম্ভবপর কি? উল্কাপিণ্ডমাত্রেরই আকার অতীব ক্ষুদ্র, এজন্য ইহাদের মধ্যে অনেকগুলিই পৃথিবীতে পতিত হইবার সময় বায়ুসংঘর্ষজাত তাপ দ্বারা বাষ্পীভূত হইয়া যায়, তাহাদের অতি ক্ষুদ্র অংশও প্রায়ই ভূপৃষ্ঠে পতিত হয় না। ফাল্গুর সহযোগী পণ্ডিতগণ এই প্রকার উল্কাপিণ্ড দ্বারা কি প্রকারে পৃথিবীর ধ্বংস কল্পনা করিতেছেন,—তাহা কিছুতেই বুঝা যায় না। পৃথিবীর সুদীর্ঘ জীবনের ইতিহাসে ভয়ানক উল্কাঘনী রজনীর বিবরণ নিতান্ত বিরল নয়,—গত ১৮৩৩, ১৮৬৬ এবং ১৮৮৫ অব্দের নভেম্বর মাসে জ্যোতিষবিদগণ আকাশের সর্বাংশ হইতে অজস্র উল্কাবর্ষণ প্রত্যক্ষ করিয়াছিলেন,—১৮৬৬ অব্দের বর্ষে প্রীতি মুহূর্ত্তে লক্ষাধিক উল্কাপাত দৃষ্ট হইয়াছিল, কিন্তু এই সকল বর্ষণদ্বারা পৃথিবীর অণুমাত্র ক্ষতি হয় নাই, বরং উল্কাপিণ্ড সকল পৃথিবীকে আক্রমণ করিতে আসিয়া আপনারাই পথিমধ্যে ভস্মীভূত হইয়াছিল। উল্কাপাত দ্বারা পৃথিবীর ধ্বংস কতদূর সম্ভব, এখন পাঠকপাঠিকাগণ বিবেচনা করুন।

শ্রীজগদানন্দ রায়।

## চৌ-ঘাট।

সূর্য্যদেব মাথার উপর। স্থির আকাশের নীচে চঞ্চল মেঘগুলা সেই মধ্যাহ্নের উত্তপ্ত রৌদ্রে জ্বালাতন হইয়া ইতস্ততঃ ছুটাছুটি করিতেছিল। আমরা পাহাড়ের এক নিভৃত উপত্যকায় দাঁড়াইয়া কোনদিকে যাইব কিছুই স্থির করিতে পারিলাম না। আমার সঙ্গী বন্ধু বলিলেন “দেখ! সাহেবরা রাশি রাশি



Adventure সম্বন্ধে বই লিখিতে পারে—কত অজানিত, বিপদসঙ্কুল জনপদ বেড়াইয়া আসিয়া, তাহার মনোরম বৃত্তান্ত লিখিতে পারে, আমরা বাঙ্গালী পাঠককে দুই চারিটা ছোট গোছের “এ্যাডভেঞ্চার” এর নমুনা দিতে পারিব না।”

আমি বলিলাম “বেলা হইয়াছে, সূর্য্যদেব আকাশের মধ্যস্থানে। পাহাড় ক্রমশঃ তাতিয়া উঠিতেছে, চল আজ নামিয়া পড়ি, কাল যা হয় হইবে। খুব প্রাতে পাহাড়ে উঠিয়া তোমার ইচ্ছানুযায়ী কাজ করিব।” আমার যুক্তি টিকিল না। সেই নাছোড়বান্দা বন্ধুর অনুরোধে পড়িয়া আবার উপত্যকার মধ্যে অগ্রসর হইতে হইল।

সেই নন্দ্যদাতী—সেই প্রচণ্ড মধ্যাহ্নে, সেই বৃক্ষলতা-গুন্ডাদি-পরিপূর্ণ পাহাড়ের উপত্যকার তপ্ত কঙ্করশাশির উপর দিয়া আবার চলিতে লাগিলাম। শরীর বাহিয়া বর্ষার ধারার ছায় ঘনপ্রবাহ। বন্ধুটি আমা অপেক্ষা স্থূলকায়—তাঁহারই কষ্ট বেশী, কিন্তু তবুও তিনি নিরস্ত হইবার পাত্র নহেন। উত্তম ও একগুঁয়েমির মধ্যে নিশ্চয়ই একটা পার্থক্য আছে। মনোবিজ্ঞানের সত্যমতে বিশেষ পার্থক্য না পাইলেও আমি বলিব পার্থক্য বড় অল্প নহে। তাহা না হইলে—এই প্রচণ্ড মধ্যাহ্নে ঘনাপ্লুত কলেবরে, চড়াই ওৎরাই ঠেলিয়া এই অধমের শারীরিক নিগ্রহের জন্ত বন্ধুর এই Adventure এর চেষ্টা কেন? আমার পাহাড়ী পথপ্রদর্শক ইতিপূর্বেই তাহার পত্রময় ছাতিটি আমার ব্যবহারের জন্ত দিয়া, বেচারী তাহার পাগড়ীর অন্তরালে থাকিয়া মাথাটাকে সূর্য্যের রোষবহি হইতে রক্ষা করিতেছিল। আমি বন্ধুকে বলিলাম “তুমি ছাতিটি লও।” তিনি তাহাতেও নারাজ। তিনি বলিলেন, “ছাতি লইয়া উর্দ্ধ প্রকৃতিতে, ও আশপাশের দৃশ্যকে নয়নের অন্তরাল করিতে পাহাড়ে উঠি নাই। প্রাকৃতিক দৃশ্যের ক্রমঃ পরিবর্তন দেখিব বলিয়াই এ রোদ্দে এত কষ্ট করিতেছি।” আমায় বরঞ্চ এ পাহাড়ীগাইডের লাঠীগাছটা দাও, অনেক কাজে লাগিবে।” গাইডবেচারি নিজের লাঠি তাহাকে দিয়া তৎক্ষণাৎ একটা শক্তগাছের ডাল ভাঙ্গিয়া লইল। ডালটা খুব ঘন পল্লবাবৃত। তাহাতে সে ছাতার কাজ করিতে লাগিল।

বন্ধুর মনের ইচ্ছা কি তাহা জানিতাম। তিনি চান—তিনি যত অগ্রসর হইবেন, দুই ধারে প্রস্রবণ, বনফুল অজস্র দেখিতে পাইবেন। তাঁহার

ভ্রমণপথের আশেপাশে তড়াগতটিনী অনেক থাকিবে। হ্রদের জলে ক্রৌঞ্চ, ক্রৌঞ্চী, সারস, বক প্রভৃতি কবিবর্ণিত পাখীগুলি খেলা করিবে। সরোবরে বায়ুভরে পদ্মফুল হেলিতে জুলিতে থাকিবে, ভ্রমর মধুপান করিবার জন্ত দোহুল্যমান পদ্মরাশির চারিদিকে গুন্ গুন্ শব্দ করিবে। সন্ধ্যা সমাগমে নদীর এপারে চক্রবাকু—আর ওপারে চক্রবাকী দু’জনে পরস্পরের মুখ চাহিয়া নীরবে বসিয়া থাকিবে। দল্ল দলে ময়ূর উপত্যকায় ছুটিয়া যাইবে। দলে দলে হরিণগুলা সিং ঘুরাইয়া লাফাইয়া লাফাইয়া দৌড়িবে—কিন্তু তাঁহার বড়ই আপশোষ, তিনি এসবের কিছুই দেখিতে পাইলেন না।

আমি ত আর হাঁটিতে পারিতেছিলাম না। ক্ষুধার উদ্বেগ যথেষ্ট হইয়াছিল, নিকটেই একটা ক্ষুদ্র প্রস্রবণের জল ধিকি ধিকি বহিয়া একটা নাতিদীর্ঘ নাতিক্ষুদ্র গর্তে সঞ্চিত হইয়াছিল, তাহাই অঞ্জলি ভরিয়া পান করিলাম! মাঝে মাঝে পাহাড়ীয়া আমলকী গাছ। গুচ্ছ গুচ্ছ ফল তাহাতে ঝুলিতেছে, যেন আঙ্গুরগুলা রসে পূর্ণ হইয়া প্রলুদ্ধ পুথিককে আহ্বান করিতেছে। দুই চারিটা আমলকী মুখে ফেলিয়া দিলাম—প্রাণ যেন ঠাণ্ডা হইয়া গেল।

বন্ধু আমার আগে আগে। একরশি দূরে বাঁকপথে চলিয়াছেন। সহসা দেখিলাম তাঁহার গতিরোধ! তিনি চন্মাখানির সহিত মুখখানি বাঁকাইয়া উৎকোশ দৃষ্টিতে চারিদিক দেখিতেছেন। আবু পথ নাই। এবার প্রকাণ্ড প্রস্তরস্তূপে পথ আবদ্ধ! তিনি আনন্দে বলিয়া উঠিলেন—“এইবার হইয়াছে।”

আমি মনে মনে ভাবিলাম, হয়ত তিনি একটা স্বর্ণখনি না হয় হীরকখনি আবিষ্কার করিয়াছেন। তাঁহার মুখে তখন, খুব হাসির রেখা ফুটিয়া উঠিয়াছিল। আমি বলিলাম “কি হইয়াছে।”

তিনি বলিলেন—“বাহা চাই—তাহাই পাইয়াছি, দেখিতেছ না সন্মুখে পথ বন্ধ। এইবার পাহাড়ের উপর উঠিব।”

আমি এবার বড় ত্যক্ত হইলাম। দ্বিপ্রহর অতীত, ক্ষুৎপিপাসায় মরিতেছি—এখন কিনা তাঁহার পাহাড়ে উঠিবার সখ হইল। আমি বলিলাম, “তুমি পাগল হইলে নাকি? ঐ অমসৃণ প্রস্তরখণ্ডের উপর উঠিলেই পা পিছলিয়া যাইবে। তখন কোথায় পড়িবে ভাবিয়াছ কি?”

কে কাহার কথা শুনে? তিনি স-বুট তাহার উপর উঠিলেন। এই প্রকাণ্ড প্রস্তুতস্বপ্ন পাহাড়ের এক কর্তৃত্ব অংশ। খুব মিশ্ কালো পাথর, উচ্চ প্রায় আমাদের দেশের একতারা বাড়ীর মত। তাহার গায়ে কতকগুলো বহুলতা বুলিতেছিল, বন্ধু তাহাই ধরিয়৷ এক টান দিলেন—কিন্তু অব্যবহিত পরেই “বাপরে” বলিয়া নীচে পড়িয়া গেলেন।

আমার বড় ভয় হইল। সাপে কামড়াইল কিনা—এই ভাবনায় অস্থির। তাহা ছাড়া মনে হইল—পাহাড়ে ভীমরুলগুলো বড়ই দুর্দান্ত, হয়ত বন্ধুবর তাহাদেরই পাল্লায় পড়িয়াছেন। তিনি যে গুহার মধ্যে নিদ্রিত ব্যাঘ্র কি সিংহ কিম্বা কুণ্ডলিত অজাগর দেখেন নাই, তাহা আগে হইতেই জানিতাম।

আমি যাহা ভাবিয়াছিলাম, হইলও তাই। সত্য সত্যই একটা ভীমরুল তাঁহার হাতে হল ফুটাইয়াছে। মুহূর্তমধ্যে সেস্থান এত ফুলিয়াছে যে দেখিয়া আশ্চর্য হইলাম। আমার সঙ্গী পাহাড়ী বলিল—“বাবুসাহেব! বাঁক ফিরিয়া, দূরে গিয়া বসুন, নিকটে নিশ্চয়ই চাক আছে, এখনি বাঁকে বাঁকে ভীমরুল বাক্‌হির হইয়া পড়িলে, কাহারও নিস্তার নাই। পাহাড়ীয়া ভীমরুল অতি ভয়ানক।”

পাহাড়ী এই কথা বলিয়া একটু দূরে গেল। একটা গাছের পাতা লইয়া প্রায় দশমিনিট পরে আসিল। তাহার রস নিষিক্ত করিয়া সেই দৃষ্ট-স্থানের উপর লাগাইল। বন্ধুকে জিজ্ঞাসা করিলাম—“কেমন কিছু উপকার বোধ করিতেছ কি?”

“হাঁ জ্বালাটা অনেক কম। চল আর Adventure এ কাজ নাই। প্রাণে বাঁচিলে অনেক দেখিব।”

আমি মনে মনে বলিলাম—পথে এস। দুর্বল উত্তমহীন ভীমরুল যাহা পাহাড়ে উঠিলেই কষ্টসহিষ্ণু হয় না তাহা বেশ বুঝিলাম। ইচ্ছা করিলেই সহজাত প্রকৃতির পরিবর্তন করিতে পারা যায় না। এই জগৎই অনেক বিলাত ফেরত বাঙ্গালী পুরা সাহেব সাজিতে পারে নাই। এক ভীমরুলের জ্বালায় শ্রোতে বন্ধুর Adventure এর অত বড় একটা কল্পনা ও তাহার আনুসঙ্গিক উত্তমটা ভাসিয়া গেল, ইহাতে অধিকতর আশ্চর্য হইবার কারণ ছিল না। ঈশ্বর তাঁহার স্মৃতি দিয়াছেন

দেখিয়া আমি বলিলাম—“এইবার আশার ত অর্ধেক ফল হাতেই পাইলে। এখন ফিরিয়া চল।”

বন্ধুবর অপ্রস্তুত হইয়া প্রত্যাবর্তন করিলেন। আবার যে পথে আসিয়াছিলাম, সেই পথে ফিরিতে লাগিলাম। তখনও নন্দ্যদা-প্রপাতের দূর-শ্রুত অক্ষুট নিনাদ আমাদের কাণে বাজিতেছিল।

পাহাড়ী বলিল—“বাবুসাহেব! নিকটে চৌঘাট, চলুন স্থান করিয়া আসি।”

বাস্তবিক তখন স্থানের জগৎ বড় একটা আকাজকা হইয়াছে। আমরা তাহার সঙ্গে সঙ্গে চৌঘাটে পৌঁছিলাম। অবগাহন স্থানে একটা বড়ই মনে তৃপ্তি জন্মিল। টাঙ্গার মধ্যে খাবার ছিল, স্থানান্ত্রে তাহাতেই যথাসম্ভব উদর-পূর্তি করিলাম।

“চৌঘাট” নাম হইল কেন, তাহা পাহাড়ী গাইড বলিতে পারিল না। কেবল বলিল—এইখানে মালবদেশীয় কোন রাজা তাঁহার আজীবন অনুচর চারিটা কণ্ঠার স্থানের জগৎ চারিটা ঘাট তৈয়ারি করিয়া দিয়াছিলেন। কোথায় বা সেই রাজা, আর কোথায় বা সেই ঘাটের চিহ্ন। নিকটে একটা ঝোপের আশেপাশে কতকগুলি ভাঙ্গা সিঁড়ি দেখিলাম। বোধ হইল এই-খানেই সেই ঘাট ছিল, নন্দ্যদা এখন শ্রোত পরিবর্তন করিয়া ঘাট ছাড়িয়া অনেক দূরে পড়িয়াছে।

শ্রীহরিসাধন মুখোপাধ্যায়।

খুকুমণির ছড়া।

“এই ক্ষুদ্র পুস্তকখানি বঙ্গ-সাহিত্যে বোধ করি একটা নূতন উত্তম ইহার একটা ভূমিকা আবশ্যিক।”—সেইজগৎ বঙ্গসাহিত্য-সমাজে সুপরিচিত শ্রীযুক্ত রামেন্দ্রসুন্দর ত্রিবেদী মহাশয় একটা সুদীর্ঘ ভূমিকা লিখিয়া প্রকাশক মহাশয়ের উত্তমের ও অধ্যবসায়ের যথাযোগ্য সাধুবাদ করিতে গিয়া প্রসঙ্গ ক্রমে পুস্তক সম্বন্ধেও কিছু কিছু সমালোচনা লিপিবদ্ধ করিয়াছেন।

সমালোচনার জন্ত সচরাচর যে সকল পুস্তক প্রেরিত হইয়া থাকে, ইহা সে শ্রেণীর নহে। আকারে, প্রকারে, ছাপায় ছবিতে সকল বিষয়েই নূতনত্ব আছে। সর্বাপেক্ষা নূতনত্ব এই যে, যাহাদের জন্ত এই পুস্তক মুদ্রিত হইয়াছে, তাহারা কেহই হয়ত ভাল করিয়া ইহা পড়িতে শিখে নাই। ইহার নাম খুকুমণির ছড়া—কিন্তু ইহাতে খুকুমণি, খোকাবাবু, খুকুখোকাকার মা, বাপ, ভাই, ভোন, শ্বশুর, শ্বাশুড়ী, নন্দ, ভাইজ, জামাতা এবং বধুর কথাও সন্নিবিষ্ট হইয়াছে।

খুকুমণির ছড়ায় যে সকল কবিতা সন্নিবিষ্ট হইয়াছে, তাহা এতকাল বাঙ্গালীর বাল্যজীবনের অলিখিত কাব্যভাণ্ডারে লুক্কায়িত ছিল—অনেকেই তাহা একসময়ে কণ্ঠস্থ করিয়াছিলেন, অনেকেই তাহা প্রতিনিয়ত বালক বালিকার মুখে শ্রবণ করিয়া থাকেন, কিন্তু অল্পলোকেই তাহার তত্ত্ব প্রদান করিতে সক্ষম। এই সকল ছড়ায় যে কাব্যরস নাই তাহা নয়; কিন্তু ইহাতে সর্বত্র ছন্দ নাই, নিল নাই, নিয়ম নাই, অথচ যথেষ্ট পরিমাণে চিত্তাকর্ষণ করিবার উপযোগী কোতূহলের সঙ্গে বিস্ময় মিলিত হইয়া রহিয়াছে।

ইংরাজিভাষায় এরূপ গ্রন্থের অভাব নাই। বাঙ্গালায় ইহার যে অভাব ছিল, তাহা এই ক্ষুদ্র পুস্তক কিয়দংশ দূর করিতে সক্ষম হইবে। কিন্তু অনেকেই জিজ্ঞাসা করিবেন—খুকুমণির ছড়া লইয়া ছেলেমী করিবার প্রয়োজন কি? যাহা এতকাল মুখে মুখে চলিয়া আসিয়াছে, তাহাকে ছাপার অক্ষরে মুদ্রানিবদ্ধ করিবার জন্ত এত প্রয়াস কেন? ইহাতে বঙ্গসাহিত্যেরই বা এমন উপকার কি?

ত্রিবেদী মহাশয় তদন্তরে লিখিয়াছেন,—“যাহাতে কোন আধ্যাত্মিক তত্ত্বের সমাবেশ নাই, এমন কোন কথা আমাদের পণ্ডিত সম্প্রদায়ের অনুরাগ আকর্ষণে সমর্থ হয়না, কিন্তু শিশুজনপ্রিয় সাহিত্যের ভিতর হইতে সেরূপ কোন আধ্যাত্মিক তত্ত্ব নিষ্কাশনে আমি একান্ত অক্ষম। তবে প্রসঙ্গক্রমে এ কথা বলিয়া রাখিতে পারি যে, এই সাহিত্যে কোন আধ্যাত্মিক তত্ত্ব, নিহিত না থাকিলেও, হয়ত হুই একটা ঐতিহাসিক তত্ত্ব, হুই একটা সামাজিক তত্ত্ব সঙ্গোপনে লুক্কায়িত থাকিতে না পারে, এমন নহে। ভূতত্ব-

বিদেরা একখানা দাঁত বা একখানা হাড় অবলম্বন করিয়া পৃথিবীর অতীত ইতিহাসের এক একটা নূতন পরিচ্ছেদ উদ্ঘাটিত করিয়া ফেলেন। সেইরূপ ভবিষ্যতের কোন গ্রিম্ বা মোক্ষমোলর এই বাঙ্গালীর ছেলের ছেলেমি-ভাণ্ডারের মধ্য হইতে হুই একটা নাম বা শব্দ বা বাক্য অবলম্বন করিয়া বাঙ্গালীর জাতীয় জীবনের অতীত ইতিহাসের কোন বিস্তৃত অধ্যায় আবিষ্কারে সমর্থ হইবেন কি না, জানি না।”

মানুষ আশৈশব কাব্যমোদী। সে যখন বয়ঃপ্রাপ্ত হয়, তখনই যে কেবল তাহার সৌন্দর্য্য-তৃষ্ণা তাহাকে কাব্যজগতের দিকে আকর্ষণ করে, তাহা নয়। বরং সৌন্দর্য্যই আবালা মানুষকে মানুষ করিয়া তুলে,—মাতৃ-মুখে যে সৌন্দর্য্যের ছবি ফুটিয়া রহিয়াছে, তাহা দেখিতে দেখিতেই শিশুর দেখিবার অভ্যাস, দৃষ্টির সংযোগ, সংকোচ, সম্প্রসারণ ইত্যাদির শিক্ষা হইতে থাকে। শিশুমাত্রেই কোতূহলপ্রিয়, নিয়ত কার্য্যের কারণ আবিষ্কারার্থ যত্ন-শীল; এবং সেই বৈজ্ঞানিক কার্য্যসম্পাদনের জন্ত পুতুল ভাঙ্গিয়া তাহার অভ্যন্তরস্থ গঠনকৌশল অবলোকন করিতে গিয়া লাঞ্চিত, তাড়িত অথবা অযথা প্রহারিত হয়! এ সকলের মূলে যে সৌন্দর্য্যপিপাসা বর্তমান, শিশু তাহাকে কথায় বুঝাইয়া দিতে পারে না; কার্য্যে প্রকাশ করিয়া থাকে। তাহার কাব্যমোদী সরল হৃদয় মিল চাহে না, ছন্দ চাহে না, সঙ্গতি চাহে না, অনেক সময়ে কোন অর্থ বা ভাবও চাহে না;—কেবল স্বরের ধ্বনি, কণ্ঠের কম্পন, তাহার সহিত পরিচিত বা অপরিচিত কতকগুলি বিষয়ের বর্ণনা থাকিলেই শিশুকাব্য পূর্ণাঙ্গ হইয়া উঠে। যখন হইতে মানব পিতা মাতা শিশুপালন আরম্ভ করিয়াছেন, বোধ হয় তখন হইতেই শিশুকে শান্ত করিবার জন্ত, আমোদ দিবার জন্ত, আদর করিবার জন্ত, বুকে ধরিবার, চুম্বা খাইবার, মাথায় তুলিবার উপলক্ষে এই শ্রেণীর কাব্য রচনা করিয়া আসিয়াছেন। কবির হৃদয় মনও সংস্পর্শগুণে কতকটা শিশুভাবাপন্ন ও কতকটা আত্মবিস্মৃত মন্ত্রমুগ্ধবৎ না হইয়া যায় নাই—তাই আবল তাবল বাহির হইয়া পড়িয়াছে। যদি পুরাকাল হইতে এই সকল কবিতা লিপিবদ্ধ হইয়া আসিত, তবে তাহার মধ্যে রচনাকাল, তৎকাল প্রচলিত চিন্তাপ্রবাহ, সামাজিক আচার ব্যবহার ও ভাষাতত্ত্বসম্বন্ধে অনেক কথাই প্রাপ্ত হইবার আশা থাকিত। যথা-

কালে লিপিবদ্ধ হয় নাই বলিয়া মুখে মুখে বহুকথা পরিবর্তিত হইয়া গিয়াছে, এখনও ক্রমশঃ কত না পরিবর্তিত হইতেছে! একবার ছাপার কাগজে তুলিলে তাহার গতিরোধ হইতে পারে—কেবল এই উদ্দেশ্যে ছড়াগুলি মুদ্রিত করিলেও সে উত্তমকে নিন্দা করা চলিত না।

তাহা ছাড়া একরূপ ছেলেমীর আরও সাফল্য আছে। ইহাতে বাঙ্গালীর প্রাথমিক শিক্ষার আত্মকর দেখিতে পাওয়া যায়; তৎপ্রতি পিতা মাতার দৃষ্টি বিশেষভাবে আকৃষ্ট হইবার অবসর ঘটে। যে সকল ছড়া প্রচলিত আছে, তাহা কেহ আইন করিয়া রদ করিতে পারিবেন না। শিশু কোন শিক্ষা পাইবার পূর্বেই এই সকল ছড়ায় জুজুর ভয় শিখিবে, ভাবী বিবাহ বাসনের আনন্দলহরীতে সন্তরণ দিবে, ভাল এবং মন্দ অনেকগুলি শৈশবস্মৃতি লইয়া জীবনপথে দণ্ডায়মান হইবে। পাঠ্য পুস্তকের গায় এই সকল ছড়াও লোক শিক্ষার উপাদান বলিয়া ইহাকে ক্রমশঃ একটু আধটু করিয়া সংশোধন করা কর্তব্য। মুদ্রিত পুস্তক হাতে পাইলে কেহ আর কষ্ট করিয়া প্রোচার নিষ্কট গুনিয়া শিখিবে না;—এক টাকায় একখানি এমন ছাপা, এমন ছবি এবং এমন ছড়া পাইলে অনেকেই ইহা হস্তগত করিয়া পড়িয়া লইবে। সুতরাং “খুকুমণির ছড়া” হইতে যাহা বাদ পড়িয়া যাইবে, বা যাহা পরিবর্তিত হইবে, তাহা ক্রমে বিস্মৃতিগর্ভে ডুবিয়া পড়িবে।

এ হিসাবে সমালোচ্য গ্রন্থের অম্লক কবিতা পরিত্যক্ত বা পরিবর্তিত হইলে ভাল হইত। প্রকাশক মহাশয় ঐতিহাসিক অনুরাগে যথাক্রম সমস্তই মুদ্রিত করিয়াছেন, কিন্তু তাহা না করিলেও খুকুমণির তাহার ভুল ধরিতে চাহিত না।

এই ক্ষুদ্র পুস্তকে শর্তাধিক ছবি এবং ২৪৪টি কবিতা আছে। কবিতাগুলি বাঙ্গালীর নিকট অপরিচিত নহে, সুতরাং উদ্ধৃত করিয়া নমুনা দেখাইবার প্রয়োজন নাই। তবে ছবির নমুনা দেখাইবার জন্ত এবং ছবি বুঝাইবার জন্ত দুই চারিটা ছড়ার নমুনা দিতে হইল।

বাঙ্গালীর খুকুর কাণে বুঝি আজন্মই বিয়ার কথা ধ্বনিত হইয়া আসিতেছে! পিতা মাতা দাস দাসী আত্মীয় অন্তরঙ্গ কেহই খুকুকে দেখিবার

সময়ে মন হইতে খুকুর বিয়াকে দূরে রাখিয়া খুকুর কথা ভাবিতে পারে না। তাই খুকুমণির ছড়ায় নানা স্থানে স্থান পাইয়াছে:—



খুকুর বিয়ে!

খুকুমণির বিয়ে কাল  
আধখানি মসুরির ডাল!  
বর থাকে বরষাত্রী থাকে,—  
পাড়াপড়শী এলে যাবে!  
নর্দমা দিয়ে ভেসে যাবে!!

আমরা খুকুমণি ও খোকাবাবুদিগকে লইয়া সচরাচর যাহা করিয়া থাকি, প্রকাশক মহাশয়ও বোধ হয় অজ্ঞাতসারে তাহারই অনুসরণ করিয়া ছড়াগুলি পর্যায়ক্রমে সাজাইয়াছেন। কোলে লইয়া চুমা,—ইহাই আদর করিবার সনাতন প্রথা।



ঝাঁপিয়ে কোলে আয় দেখি মা,  
গাল ভরে দিই হাজার চুমা!

খুকু অনেক সময়ে এতটা জ্বরদস্তি সহ করিতে পারে না। কবিতার না হইয়া, কার্যে খুকুর মা হাজার চুমা দিতে বসিলে মা ও মেয়ে উভয়ের পক্ষেই যে সাংঘাতিক হইতে পারে, খুকু ততটা বৈজ্ঞানিকত্বের সন্ধান রাখে না; সে হয়ত স্বাধীনতার বাধা পাইয়া বা অজ্ঞাতরোগে পীড়িত হইয়া বা অনর্থক আদর আব্দারে জ্বালাতন হইয়া কাঁদিয়া উঠে। আমরা তখনই তাহাকে শুনাইতে বসি :—

এক যে আছে একা নোড়ে  
সে থাকে তালগাছে চড়ে।

\* \* \* \*

যে ছেলের কাঁদে,

তারে ঝুলির ভেতর বাধে;

গাছের উপর চড়ে,

আর তুলে, আছাড় মারে!

প্রকাশক মহাশয় সেই একানোড়ের একটা স্মৃতি সংযুক্ত করিয়া দিয়াছেন।

যাহ ঘুমোরে ঘুমো;

শান্তিপূরে বাঘ এসেছে

দারুণ হমো!

ইহাও সেই শ্রেণীর ছড়া হয়ত বিষবৃক্ষ পিড়িবার অবসর ঘটিতেছেন, কিম্বা এইরূপ আর কোনও অনিবার্য কারণে বঙ্গীয়মাতা কোলের যাত্নকে হমোর ভয় দেখাইয়া তাড়াতাড়ি কোনরূপে ঘুম পাড়াইবার চেষ্টা করিতেছেন! একটু ক্লোরোফরম শোঁকাইলেও চলিত, তবে ফলটা কিছু তাড়াতাড়ি ফলিত—ছড়ার ঝাঁক শীঘ্র ধরে না, কিন্তু আজন্ম ছুটিতে যায় না। খুকুমণির পিতা মাতা এখনও বোধ হয়, অস্থিমজ্জার মধ্যে তাহা অনুভব করিয়া থাকেন!

খুকুমণির ছড়া বাঙ্গালীর বাল্যজীবনের ছবি। ভাল হউক বা মন্দ হউক—ছবিখানি নিখুঁত হইয়াছে। যেখানে, যতটুকু গুণ, যেখানে, মতখানি দোষ,—বাঙ্গালী জীবনের সে সমস্তই এই ছবিতে অবিকল বিচিত্র রহিয়াছে। এই শৈশবচিত্র যে কেবল শিশুগণেরই কোঁতুকবর্ধন করিবে তাহা নয়, অনেক বর্ষীয়ান বর্ষীয়সীও ইহা হইতে প্রচুর আমোদের সঙ্গে শিক্ষালাভ করিতে পারিবেন। আমরা বাহা করিয়া যাই, অনেক সময়ে তাহার ভাল মন্দ দেখিতে পাই না—তাহার মধ্যে কত অসঙ্গতি, কত প্রহসনের চিত্র, কত অশ্রয় ও অবিচার থাকিয়া যায়, তাহা যখন কেহ চক্ষে অঙ্গুলি দিয়া দেখাইয়া দেয়, তখনই জ্ঞানোদয় হয়। আমরা দশজনে মিলিয়া যুগযুগান্তর ধরিয়া খুকুমণির জন্ত যে সকল ছড়া গাঁথিয়া আসিয়াছি, গাঁথিবার সময় তাহার ভাল মন্দের বিচার করি নাই—এখন পুস্তকাকারে সফলিত হইয়াছে বলিয়া বুঝিতেছি, ইহার সকলগুলি সমান সরস হয় নাই, অনেকগুলি আদৌ শিশু কর্ণ কলুষিত না করিলেই ভাল হইত। দুই চারিটা স্থল এমনও রহিয়া গিয়াছে, যাহার অর্থ জিজ্ঞাসার জন্ত খুকুমণি পীড়াপীড়ি করিলে মুষ্কিলে ঠেকিতে হইবে!

এই সকল ছড়া এক সময়ের রচিত নহে; কিন্তু কালক্রমে পরি-  
বর্তিত হইতেছে বলিয়া প্রাচীন পদাবলী নিয়ত নবভাবে রূপান্তরিত হইতেছে।  
পুরাতনের মধ্যে কেবল দুই চারিটা মানুষ বা স্থানের নাম পাওয়া যায়,—  
তাহাতেও কোন ঐতিহাসিক বিশেষত্ব নাই।

না থাকুক, তথাপি খুকুমণির ছড়ায় যে আনন্দ ও আবেগ আছে,  
তাহা পাঠ্যগ্রন্থভারগ্রস্ত বঙ্গ-বালক-বালিকার বিমর্ষ মুখমণ্ডলে স্বাস্থ্যসুখের উৎ-  
ফুলতা আনিয়া দিতে পারিবে। শিশু যাহা পড়িবে তাহাই তাহার শিক্ষার  
বস্তু; তাহাকে নিয়ত পাঠ্যগ্রন্থে সীমাবদ্ধ করিয়া রাখায় পাঠের স্পৃহা ক্ষীণ  
হইয়া পড়ে। এই সকল গ্রন্থে পাঠের আকাঙ্ক্ষা প্রবুদ্ধ হইবে; হাতে পাইলে  
বালক বালিকারা কাড়াকাড়ি করিয়া পড়িবে, পড়িতে পড়িতে (আর কিছু  
না হউক) পড়ার অভ্যাস জন্মিতে পারে।

ছড়ার সঙ্গে ছবি মিলিত হইয়া শিশুগণের আমোদ কিছু সরস  
করিয়া তুলিয়াছে। চিত্রবিদ্যায় আমরা এখনও তেমন পারদর্শী হই নাই;  
তথাপি ছবিগুলি বিলাতী ছবির মতই হইয়াছে।



খুকু যাবে খুকুমণির সঙ্গে বাবে কে?

বাড়ীতে আছে কটা\* বেরাল কোমর বেঁধেছে।

এই ছড়ার সঙ্গে ছবি মিলিয়া খুকুমণির বিবাহবাসরকে প্রচুর পরিমাণে  
রসময় করিয়া তুলিয়াছে। অতঃপর আর খুকুমণির ছুঃখ কি'?

ছুঃখ এই বে, এমন সরস সুন্দর পুস্তকখানি পড়িতে না পড়িতে  
শীঘ্রই ফুরাইয়া গেল; সুতরাং প্রকাশকের সঙ্গে সমালোচককেও খুকুমণির  
মুখ দিয়া বলাইতে হইবে।



আমার কথাটি ফুরালো,

নটে গাছটি মুড়ালো।

শ্রী অক্ষয়কুমার মৈত্রেয় ।

\* কটা শব্দ মূলে নাই। কিন্তু যাহা আছে তাহার স্থলে কটাশব্দ বসাইয়া  
দিলে, খুকুমণির আমোদের কিছুমাত্র ব্যাঘাত হইবার কথা নাই, অথচ মূল কবিতার  
দোষটুকু কালক্রমে দূর হইবার সম্ভাবনা আছে। কিরূপ স্থলে পরিবর্তন প্রার্থনীয় তাহা  
বুঝাইবার জন্য এই দৃষ্টান্ত প্রদত্ত হইল। সেকালের পিতা মাতা যে সকল কথা তুলিয়া  
পুত্র কন্যার সঙ্গে হাস্য পরিহাস করিতেন, একালের আমরা যখন সে সকল ত্যাগ করিতে  
পারিয়াছি, তখন খুকুমণির ছড়া হইতেও কিছু কিঞ্চিৎ ত্যাগ বা পরিবর্তন করিলে তেমন  
অস্বাভাব হইবে না। প্রকাশক মহাশয় ইহার দিকে দৃষ্টিপাত করিলে সমালোচনা লিখিবার  
শ্রম সফল বোধ করিব।

## রাজা রামানন্দ রায় ।

রাজা রামানন্দের ভণিতায়ুক্ত কতকগুলি পদ প্রাচীন পদকল্পতরু প্রভৃতি সংগ্রহ গ্রন্থমাত্রেই দৃষ্ট হয়। এই সকল পদের একটি ভিন্ন সকল-গুলিই সংস্কৃতভাষায় রচিত। এই সংস্কৃত পদগুলির অধিকাংশই তাঁহার জগন্নাথবল্লভ নামক সংস্কৃত নাটক হইতে সঙ্কলিত। রামানন্দ রচিত দুইটি সংস্কৃত শ্লোক কৃষ্ণদাস কবিরাজ আপন গ্রন্থে উদ্ধৃত করিয়াছেন। এই দুইটি শ্লোক জগন্নাথবল্লভ নাটকে দৃষ্ট হয় না। ইহা হইতে প্রতীত হয় যে, রাজা রামানন্দ রায় অবসর মত সংস্কৃত কবিতা, সঙ্গীত, বাঙ্গলাপদ এবং সংস্কৃত জগন্নাথবল্লভ নাটক রচনা করিয়াছিলেন। প্রথমাবধি দায়িত্বপূর্ণ রাজকীয় পদে নিযুক্ত থাকায় সম্ভবতঃ তিনি বিস্তরপদ বা বহুগ্রন্থ রচনা দ্বারা স্বীয় প্রতিভা ও কবিত্ব প্রকাশের সুবিধা পান নাই। বিশেষতঃ রসিকশ্রেষ্ঠ শ্রীকৃষ্ণের ভজনানন্দ বৈষ্ণব বলিয়া গ্রন্থরচনা দ্বারা কীর্তি অর্জন সম্ভবতঃ তিনি আদৌ আবশ্যিক মনে করিতেন না।

রাজা রামানন্দের জগন্নাথবল্লভ নাটক বৈষ্ণবসমাজে খুব সমাদৃত। রাগানুরাগভক্তি, পরিপুষ্ট সাধন এবং রসমাধুর্য আশ্বাদন পক্ষে রায় রামানন্দের জগন্নাথবল্লভ নাটক প্রেমিক বৈষ্ণবগণের পরম সহায়। স্বয়ং শ্রীকৃষ্ণচৈতন্য মহাপ্রভু রায়ের নাটক শ্রবণে পরমানন্দ লাভ করিতেন। কৃষ্ণদাস কবিরাজ লিখিয়াছেন :—

“চণ্ডীদাস, বিছাপতি,                      রায়ের নাটক গীতি,  
কর্ণামৃত শ্রীগীতগোবিন্দ ।  
স্বরূপ রামানন্দ সনে,                      মহাপ্রভু রাত্রিদিনে,  
গায় গুনে পরম আনন্দ ॥

চৈ, চ, মধ্যলীলা, ২৩ পরিচ্ছেদ ।

রামানন্দ যে নাট্যশাস্ত্রের গুণরস-বিচারে মহাপণ্ডিত ছিলেন, তাহা কৃষ্ণদাস কবিরাজ সুপ্রসিদ্ধ ষষ্ঠ্যনাটক-রুচয়িতা সনাতনানুজ শ্রীরূপ গোস্বামীর মুখে ব্যক্ত করিয়াছেন (১)। জগন্নাথবল্লভ নাটক পাঠ করিলেও প্রতীত

(১) চৈ, চ অন্ত্যলীলা, ১ম পরিচ্ছেদ ।

হইবে যে, রামানন্দ জগন্নাথবল্লভ নাটক প্রণয়নে সংস্কৃত অলঙ্কারশাস্ত্রের মর্যাদা কোথাও লঙ্ঘন করেন নাই।

জগন্নাথবল্লভ নাটকের নায়ক স্বয়ং বৃন্দাবনবিহারী শ্রীকৃষ্ণ, নায়িকা শ্রীমতী রাধিকা, ইহার পুষ্টি আদিগণে। ব্রজগোপীগণের ঐকান্তিক চেষ্টায় বিরহব্যথিত রাধাকৃষ্ণের সন্মিলন বর্ণনাবসরে কবি বিশেষ নিপুণতাসহবশরে পূর্বরাগাদি প্রণয়নভাবের ক্রমিক বিকাশের সুন্দর স্বাভাবিক চিত্র পাঠকের সম্মুখে উপস্থিত করিয়াছেন। বৈষ্ণব কবি আবার নাটকমধ্যে স্থলে স্থলে অতীব চতুরতার সহিত ছাত্ররসের অবতারণেও কম নিপুণতা প্রদর্শন করেন নাই। এস্থলে একটি স্থল উদ্ধৃত করিতেছি :—

“কৃষ্ণ। সখে, অতি মধুরোহয়ং কোকিলানাং রবঃ ।  
বিদূষক। ভো বয়স্ তুজ্জ বংশীএ রও, ইদো বি মহরো। তদোবি অক্ষাণং  
কণ্ঠরও তা তুএ বংশী বাদিঅছ, মশ্রবি কণ্ঠরও কাদকো।  
কৃষ্ণ। যদভিরুচিতং বয়স্ (ইতি বংশীবাদয়তে) ।  
বিদূষক। ভো স্তদোদে বংশীরও মমাবি কণ্ঠরও স্তনীঅছ।

(ইতি মুখবৈকৃত্য) পরুষং নাদতি ॥

(তরুশিখরানবলোক্য) ভো জিদং অক্ষোহিং তুজ্জ বংশীএ রএ হিং এদে দাসীএ পুত্তআ কোইলা নিহদং চিদা। মহ উণ কণ্ঠরএ হিং কুহিং বি পলাইদা। তা বয়স্ মা গকো দে হোছ।”

(অনুবাদ।)

কৃষ্ণ। এই সকল কোকিলের রব অতি মধুর !  
বিদূষক। তোমার বংশীরব তদপেক্ষা মধুর, আবার আমার কণ্ঠস্বর আরও মধুর।  
অতএব তুমি বংশী বাজাও, আমিও কণ্ঠরব করি।

কৃষ্ণ। সখে! তোমার যেরূপ অভিরুচি। (কৃষ্ণের বংশীবাদন)।  
বিদূষক। তোমার বংশীধ্বনি শুনলাম। আমারও কণ্ঠস্বর শুন। (বিকট টীংকার করতঃ বৃক্ষশিখর দেখিয়া)। সখে! দেখ, দেখ, আমাদেরই জয় হইল। দাসীপুত্র কোকিল তোমার বংশীধ্বনি শ্রবণে পরাজিত মানিয়া নীরব ছিল, তাহারাই আবার আমার কণ্ঠরব শুনিয়া কে কোথায় পলাইল! তবেই দেখ, তোমার গর্ব মিথ্যা।

সালঙ্কারা ভাষা ও মনোহর ভাবরাজি রাজা রামানন্দ রায়ের মধুর লেখনীর কতদূর নিকটবর্তী থাকিত, তাহা দেখাইবার জন্ত জগন্নাথবল্লভ নাটকের দুইটীমাত্র সঙ্গীত এস্থলে উদ্ধৃত করিতেছি :—

( ১ )

হীনং পতিমপি ভজতে রমণী ।  
কেশরিণং কিমু কলয়তি হরিণী ॥  
রাধিকে পরিহর মাধব রাগময়ে ॥ ৬ ॥

ক্ষীণে শশিনিচ কুমুদবনীয়ং ।  
ভজতি ন ভাবং কিমুরমণীয়ং ॥  
সুখয়তি গজপতি রুদ্রনরেশং ।  
রামানন্দ রাগ্ন গীত মনিসং ॥

( ২ )

মুঞ্জতর গুঞ্জদলি কুঞ্জমতিভীষণং ।  
মন্দমরুদগুরগ গন্ধকৃতদূষণং ॥  
সকলমেতদীরিতং ।  
কিঞ্চগুরু পঞ্চশর চঞ্চলং মম জীবিতং ॥  
মত্তপিক দত্তরুজ মুত্তমাধিকরং বনং ।  
সঙ্গসুখমঙ্গমপি ভুঙ্গতয়ভাজনং ॥  
রুদ্র নৃপমাত্ত বিদধাতু সুখসঙ্কুলং ।  
রামপদধাম কবি রায়কৃতমুঞ্জলং ॥ ( ১ )

\* \* \* \* \*

( ১ ) বৈষ্ণব কবি লোচনদাস এই দুইটী সংস্কৃতপদের ভাবানুবাদ নিম্ন-  
লিখিত স্মমধুর পদদ্বয়ে প্রদান করিয়াছেন :—

( ১ )

আর মঝুবালী গুনহ রাই ।  
মাধব রাগ পরিহর ঘর যাই ॥ ৬ ॥

জগন্নাথবল্লভ নাটক চারি অঙ্কে সমাপ্ত । নাটকের প্রথমাঙ্কে শ্রীকৃষ্ণ ও শ্রীমতী রাধিকার পরস্পরের সন্দর্শনে পরস্পরের হৃদয়ে পূর্বানুরাগের উদ্রেক, দ্বিতীয়াঙ্কে সখিগণকর্তৃক নায়ক-নায়িকার মনোভাব পরীক্ষা, তৃতীয়াঙ্কে শ্রীমতীর অভিসার ও চতুর্থাঙ্কে নায়ক-নায়িকার সম্মিলন বর্ণিত হইয়াছে ।

জগন্নাথবল্লভ নাটক সম্ভবতঃ পুরীতে রচিত হয় । চৈতন্যদেব সঙ্গীত-প্রিয় ছিলেন ও তাঁহার স্বরূপাদি ভক্তগণ চণ্ডীদাসাদির সঙ্গীত দ্বারা নীলাচলে

অকৃতি পতি যদি হয় গুণহীন ।  
তবু কুলকামিনী তাক অধীন ॥  
কেশরী অলখি না ভুলত হরিণী ।  
সুশীতল চাঁদ না ভজত নলিনী ॥  
কুল-বনিতাগণ এমত বেভার ।  
পর পুরুষাধিগমন ছুরাচার ॥  
এত গুনি নাগরী হওল উদাস ।  
আশ্বাস করত দীন লোচনদাস ॥

( ২ )

গুঞ্জ অলি মুঞ্জবহু কুঞ্জ মন মাতিয়া ।  
মত্তপিক দত্ত রবে ফাটে মধু ছাতিয়া ॥  
বল্লীযুক্ত মল্লীফুল গন্ধ সহ মারুতা ।  
কুন্দকলি শৃঙ্গ অলিবৃন্দ কাঁছ নৃত্যতা ॥  
সখি মন্দ মঝু ভাগিয়া ।  
কান্ত বিলু ভাস্ত প্রাণ কাহে রহ বাঁচিয়া ॥ ৬ ॥  
ভস্মতনু পুষ্পধনু সঙ্গে রঙ্গ পুরিয়া ।  
অঙ্গমঝু ভঙ্গ করু প্রাণ যাকু ফাটিয়া ॥  
পশুমঝু হুঃখ হেরি রোষে পশুপাথিরে ।  
বল্লী নব কুঞ্জ ভেল তুঙ্গ ভয় ভাজিরে ॥  
গচ্ছসখি পুচ্ছ কিবা আনি দেহনা হরে ।  
স্পর্শসুখ দর্শ লাগি লোচনক আশরে ॥



অবস্থান কালে, তাঁহার ভাবাবেশাপনোদন করিতেন। চৈতন্যদেবের এইরূপ ভাবাবেশাপনোদনে রাজা রামানন্দেরও চেষ্টি করিতে হইত। রামানন্দ রায় সম্ভবতঃ এই কারণেই চৈতন্যদেবের প্রীত্যর্থ জগন্নাথবল্লভ নাটক প্রণয়ন করেন।

রাজা রামানন্দ রায় দেবদাসীগণকে যে অভিনয় শিক্ষা দিতেন, তদ্বিষয় ইতিপূর্বে উল্লেখ করিয়াছি। পুরীতে জগন্নাথবল্লভ নামে একখানি সুন্দর স্মশোভন উদ্যান ছিল এবং চৈতন্যদেব ভক্তগণ সহ তথায় গমন করিয়া নৃত্যগীতাদি সুখানুভব করিতেন, তাহার উল্লেখ চৈতন্যচরিতামৃতে পরিদৃষ্ট হয়। ইহা হইতে অনুমান হয় যে, জগন্নাথবল্লভ উদ্যানে এই নাটক অভিনীত হইয়াছিল এবং তৎকারণেই ইহা জগন্নাথবল্লভ নাটক নামে অভিহিত হইয়াছে। রামানন্দ রায় গ্রন্থমধ্যে এই নাটককে রামানন্দ সঙ্গীত নামে আখ্যাত করিয়াছেন।

জগন্নাথবল্লভ নাটকের একটা শ্লোকে রাজা প্রতাপরুদ্রের প্রতাপ ণ্ডনিয়া সেকন্দর নামক জনৈক নৃপতির কন্দরাশ্রয় গ্রহণের উল্লেখ আছে। প্রতাপরুদ্রের সময় দিল্লীর বাদশাহীতন্ত্রে লোদীবংশীয় দ্বিতীয় নৃপতি সেকন্দর সমাদীন ছিলেন এবং ইনিই ১৪৯৪ খৃষ্টাব্দে বেহার আক্রমণ করতঃ তাহা স্বীয় শাসনাধীনে আনয়ন করেন। সম্ভবতঃ রামানন্দ এই সেকন্দরকেই উক্ত শ্লোকে লক্ষ্য করিয়াছেন। যদি এই অনুমান সঙ্গত হয়, তবে সেকন্দর ও প্রতাপরুদ্রের শাসনকালে জগন্নাথবল্লভ নাটক রচিত হইয়াছিল, ইহা নিশ্চিতরূপে বলা যাইতে পারে। প্রতাপরুদ্র শ্রীক্ষেত্রে রক্ষিত মাদলাপঞ্জী মতে ১৪২৬—১৪৫৪ শকাব্দায় বা ১৫০৪—১৫৩২ খৃষ্টাব্দে এবং সেকন্দরলোদী ১৪৯১—১৫১৬ খৃষ্টাব্দে রাজত্ব চালনা করিয়াছিলেন। তাহা হইলে জগন্নাথবল্লভ নাটক ১৫০৪ খৃষ্টাব্দের পর এবং ১৫১৬ খৃষ্টাব্দের পূর্বে রচিত হইয়াছে, ইহা নিঃসংশয়িতরূপে নির্দেশ করা যাইতে পারে। আবার চৈতন্যদেব বা রামানন্দের নীলাচলে একত্রাবস্থান কালে উক্ত নাটক রচিত বলিয়া স্থির করিতে গেলে, বিদ্যানগর হইতে রামানন্দের শ্রীক্ষেত্রে গমন-বৎসরের অর্থাৎ ১৪৩৩ শকাব্দা বা ১৫১১ খৃষ্টাব্দের পর তাহা রচিত হইয়াছে, বসিতে হইবে। সুতরাং ১৫১৪ খৃষ্টাব্দে জগন্নাথবল্লভ নাটক রচিত হইয়াছে, এরূপ নির্ণয় করিলে উক্ত নাটকের রচনাকাল নির্ণয়ে অধিক ভুল হইবে না।

রামানন্দ রায় বাঙ্গালা “পহিলহি” পদ ১৪৩১ শকাব্দায় চৈতন্যদেবের নিকট কীর্তন করেন। সম্ভবতঃ গোদাবরী তীরে “পহিলহি” পদে ভিন্ন গোড়ীয় কবিতার ইতিপূর্বে এতাবৎ আর কখনও স্ফূর্তি হয় নাই। এই পদটি রামানন্দ রায় সম্ভবতঃ ইহার পূর্বেই রচনা করিয়াছিলেন।

“রামানন্দ” ভণিতায়ুক্ত কতকগুলি বাঙ্গলাপদ পদসংগ্রহ গ্রন্থসমূহে দৃষ্ট হয়। কিন্তু ঐ সকল পদের ভাষা ও ভাবে রায় রামানন্দের কোন কৃতিত্ব অনুভূত হয় না। এইজষ্ঠ এই পদে উক্ত পদগুলির সম্বন্ধে কোনরূপ আলোচনা করা গেল না।

শ্রীরাধেশচন্দ্র শেঠ।

## কবিতা-কুঞ্জ।

ছ’টি তারা।

(১)

সন্ধ্যার অঁধার ভেদি’ আকাশের কোলে উঠি’  
নিরখিলু ছ’টি তারা নীরবে রয়েছে ফুটি।

দৌঁহে ছ’জনার পানে  
চাহিয়া আকুল প্রাণে

নীরবে কহিছে কত প্রেমের রহস্ত-কথা,—  
নীরবেতে পাশরিছে দিনের বিরহ-ব্যথা।

মাঝে মেঘ-শিশুগুলি

গৃহ-গোকালয় ভুলি’

চঞ্চল বায়ুর সাথে করে লুকোচুরী খেলা;—  
পূর্বে হাসিছে শশী, পশ্চিমে গোধূলি-বালা।

( ২ )

ভাবিছ,—হ'তাম যদি ওই তারাটির মত,—  
প্রাণের সে প্রিয় মোর যদি রে ওইটি হ'ত !  
দূর দূরান্তরে থাকি,  
নয়নে নয়ন রাখি,

ওরূপে পেতাম যদি করিবারে দরশন,—  
ইন্দ্রিয়-সম্পর্কশূন্য হৃদয়ের আলিঙ্গন !

নাথিতে প্রণয়-রণ

বন্ধদেহ মুক্তমন

ওইরূপে ওইখানে যদি বা হ'তাম, হায় !  
ও ছ'টি তারার মত ছ'টি তারা ছ'জনায় !

শ্রীমিত্যক্রমঃ বসু ।

আলেখ্য ।

নিখর যামিনী, নিখর মেদিনী,  
নীলিম গগনে নিখর তারা ;  
এই বাতায়নে, বসিয়া ছ'জনে,  
হেরিয়া হতাম আপনা হারা !

তাহার বিহনে, আজি রে নয়নে,  
হেরি যেন শুধু আঁধারময় ;  
জগৎ আঁধার, হৃদয় আঁধার,  
আঁধারে সকলি ডুবিয়া রয় ।

আজিও যামিনী, নিখর তেমনি,  
তারকা মেদিনী সবই সেই ।  
হায় ! যার সনে, বসিয়া এখানে,  
হেরিছ এসব সে শুধু নাই !

টাঁদিনী নিশায়, বসিয়া হেথায়,  
হেরিতাম যবে গগনশ্রোতা,  
সে চারুবদন, উজলি তখন,  
পড়িত তাঁদের মধুর বিভা ।

সে প্রেম মুরতি, সেই রূপজ্যোতি,  
এখনও যেন নয়নে মোর,  
স্বপনের প্রায়, ভাসিতেছি হায় !  
গত স্মৃথে হৃদি করিয়া ভোর ।

এই সে শয়নে, কত পড়ে মনে,  
মনে পড়ে সেই ঘুমন্ত-ছবি ;  
কল্পিত অধর, সে করুণ-স্বর,  
এখনও সে সব সতত ভাবি ।

বহিত এখানে, এই বাতায়নে,  
মৃদুল মধুর মলয় বায় ;  
সে মৃদু পরশে, প্রেমের আবেশে,  
পড়িত সে ঢলে আমার গায় ।

চমকি স্বপনে, করুণ বচনে—  
বলেছিল মোরে “ভুলনা নাথ—  
মৃগালিনী যায়, লইয়া বিদায়,  
হইল না দেখা তোমার সাথ !”

পরম যতনে, সে চারু রতনে,  
লইতাম আমি হৃদয়ে ধরে ;  
হাসিয়া হাসিয়া, বাছ প্রসারিয়া,  
বেড়িত সে মোরে সোহাগভরে ।

অতি ব্যস্ত হয়ে, বলিলাম প্রিয়ে ;  
একি কুস্বপন দেখিলে হায় !  
আজি তব কাছে, তবে কেন মিছে,  
বিদায়ের অশ্রু নয়নে বয় ?

তুষিত পরাণে, প্রেম আলাপনে,  
করিতাম কত যামিনী ভোর !  
তুষা মিটিত না, কথা ছুরাত না,  
সে কথার বুঝি নাহিরে ওর !

সে মিথ্যা স্বপন, কে জানে তখন,  
সত্যে পরিণত অচিরে হবে ?  
সময় না হ'তে, দেখিতে দেখিতে,  
অশ্রু ফোটা ফুল শুকায়ে যাবে ?

এতদিন ধরে, নিরখি তাহারে,  
দরশন সাধ মিটিল কই !  
কি জানি কেমন, সে রূপ মোহন,  
বিধাতার বুঝি আদর্শ সেই ।

ওহো মরি ! মরি ! ওই যে তাহারি,  
সেই প্রতিমূর্ত্তি জীবন্ত যেন ;  
ওই মৃতু হাসি, অধরেতে মিশি,  
তেমনি মাধুরী করিছে দান ।

বটুল নয়ন,            তেমনিই যেন,            সব আছে সেই,            ভাষা শুধু নেই,  
 হানিছে হৃদয়ে কৃষ্ণ শর;            যা শুনে সংসার যেতাম ভুলে;  
 ভুজলতা যেন,            যাচে আলিঙ্গন,            না-না-কই তাই,            কিছুই ত নাই,  
 ধরিতে আমারে হৃদয়োপর।            এষে ছবি শুধু,            শূণ্যই মূলে।

শ্রীপ্রবোধচন্দ্র মজুমদার ।

### পুত্রকোড়ে নারী ।

যেন কোন অভিশপ্ত দেববালা হায়  
 অভিশাপ অন্তে তার—মন্দাকিনী নীরে  
 স্নান করি—শুচিস্নিত হয়ে পুনরায়  
 দাঁড়ায় পৃথিবী পারে—স্বরগের তীরে ।  
 সাগর-মস্থনে যেন চির-আকাজ্জিত  
 সুধার কলসী কক্ষে লক্ষ্মী যে সমুখে;  
 কি মাধুরী বিলসিত—মহিমামণ্ডিত  
 অমর দানব ছই আত্মহারা দেখে ।  
 শারদশিশিরস্নাত—শুভ্র কলেবর  
 মায়ের চরণোৎসৃষ্ট—ভক্তির প্রসাদ—  
 যেন শ্বেত শতদল—পবিত্র সুন্দর  
 ধন ধাত্ত সুসম্পূর্ণ—শুভ্র আশীর্বাদ ।  
 শত জন্ম তপস্যার পুঞ্জ পুণ্যফল  
 দৃষ্টিমাত্রে পাপক্ষয়—জনম সফল ।

শ্রীচারুচন্দ্র বন্দ্যোপাধ্যায় ।



## মাসিকপত্র 'শু' সমালোচন ।

( আষাঢ়—মাঘ, ১৩০৬ । )

### সূচীপত্র ।

বিষয়	পৃষ্ঠা	বিষয়	পৃষ্ঠা
প্রার্থনাভীত দান	৪৯	কলা-লক্ষ্মী	৯৭
শাহ আলম	৫০	পৌরাণিক গল্প	৯৯
রাসলীলা	৫৭	রাজা রামানন্দ রায়	১০২
বাজার দেনা	৬৩	হাসির গান	১১০
বঙ্গবালিকার প্রাণ	৬৫	ফলিত জ্যোতিষ-প্রসঙ্গ	১১৬
আজ	৬৮	সৌন্দর্য	১২১
বিশ্ব-রচনা	৬৯	জাহাঙ্গীরের অনুশাসন	১২৯
শ্রীশ্রীরামকৃষ্ণ কথামৃত	৭৪	চাঁদের হাসি	১৩৮
ভাগ	৮৪	প্রেম-বৈচিত্র্য	১৪০
দেশভ্রমণ	৮৫	ইংরেজী বিবাহ	১৫৩
শ্রীকৃষ্ণদাস কবিরাজের কথা	৮৯	প্রবাসচিত্র ( সমালোচনা )	১৫৭
		সমাজের ছবি	১৭৩

( ঘোড়ামারা, রাজসাহী, উৎসাহ কার্যালয় হইতে সম্পাদক কর্তৃক প্রকাশিত । )

হিন্দুপ্রেস,

৩ নং আহীরীটোলা ষ্ট্রীট,—কলিকাতা ।

শ্রীপ্রিয়নাথ ঘোষ দ্বারা মুদ্রিত ।

বার্ষিক মূল্য ১।।০ টাকা ।

এই সংখ্যার নগদ মূল্য ১। টাকা ।

## এই সংখ্যার লেখকগণের নাম।

শ্রীযুক্ত রবীন্দ্রনাথ ঠাকুর ; শ্রীযুক্ত অক্ষয়কুমার মৈত্রেয় বি, এল ;  
 শ্রীশচন্দ্র মজুমদার ; শ্রীযুক্ত হেমেন্দ্রপ্রসাদ ঘোষ বি, এ ; শ্রীযুক্ত চন্দ্রশে  
 বি, এ ; শ্রীযুক্ত অক্ষয়কুমার বড়াল ; শ্রীযুক্ত মাধবচন্দ্র চট্টোপাধ্যায় ; শ্রীযুক্ত  
 মহেন্দ্রনাথ গুপ্ত বি, এ ; শ্রীযুক্তা সরলা সরকার ; শ্রীযুক্ত জলধর সেন ;  
 শ্রীযুক্ত অচ্যুতচরণ চৌধুরী তর্কনিধি ; শ্রীযুক্ত প্রমথনাথ রায় চৌধুরী ; শ্রীযুক্ত  
 রজনীকান্ত চক্রবর্তী ; শ্রীযুক্ত রাধেশচন্দ্র শেঠ বি, এল ; শ্রীযুক্ত রজনীকান্ত  
 সেন বি, এল ; শ্রীযুক্ত যজ্ঞনাথ চক্রবর্তী বি, এ ; শ্রীযুক্ত যোগীন্দ্রচন্দ্র চক্রবর্তী  
 এম, এ, বি, এল ; শ্রীযুক্ত রামপ্রাণ গুপ্ত ; শ্রীযুক্তা নগেন্দ্রবালা মুস্তোফী ;  
 শ্রীযুক্ত শৈলেশচন্দ্র মজুমদার ; শ্রীযুক্তা কৃষ্ণভাবিনী দাস ; শ্রীযুক্ত লোকনাথ  
 চক্রবর্তী বি, এ ; শ্রীযুক্ত শ্রীশচন্দ্র চট্টোপাধ্যায় ।

## আমাদের নিবেদন ।

৮ মাসের বাকী “উৎসাহ” একসঙ্গে প্রকাশিত হইল। নানাকারণে  
 বাধ্য হইয়া এবারও আমরা আপনাদের গ্রাহকগণের প্রাপ্য ফর্মার কতকাংশ আত্মসাৎ  
 করিতে হইয়াছে। ইহার প্রধান কারণ—প্রেসের গোলযোগ! ঘরের টাকা  
 দিয়া ও প্রেস-কর্তৃপক্ষকে তোষামোদ করিয়াও রীতিমত কাজ পাওয়া যায় না।  
 এই সকল অসুবিধা দূর করিবার জন্য আমরা অতি শীঘ্রই “উৎসাহের”  
 জন্য একটা প্রেস আনয়ন করিতেছি। নিজের প্রেস হইলে ক্রমে  
 গ্রাহকদিগের প্রাপ্য ফর্মারগুলি নির্বিবাদে পূরণ করিতে সক্ষম হইব। এই  
 সংখ্যা হস্তগত হওয়ামাত্র গ্রাহকগণ অন্তর্গত পূর্বক স্ব স্ব মূল্য মণিঅর্ডারযোগে  
 প্রেরণ করিয়া বাধিত করিবেন। যাহারা এই সংখ্যা পাইয়াও মূল্য পাঠাইতে  
 বিস্মৃত হইবেন, তাহাদিগকে আগামী সংখ্যা ভিঃ পিঃ পাঠাইয়া মূল্য আদায়  
 করিব। যে সকল মহাত্মাগণ রীতিমত কাগজ লইয়াও অসকোচে ভিঃ পিঃ  
 ফেরত দিয়া থাকেন,—তাহারা দয়া করিয়া পূর্বেই পত্র দ্বারা ভিঃ পিঃ  
 পাঠাইতে নিষেধ করিয়া পাঠাইবেন। অথবা ডাকমাণ্ডল বহন করিয়া যেন  
 আমরা আপনাদের ক্ষতিগ্রস্ত না হইতে হয়।

## প্রার্থনাজীত দান।\*

পাঠানের যবে বাধিয়া আনিল  
 বন্দী শিখের দল—  
 সুহৃদগঞ্জ রক্তবরণ  
 হইল ধরনীতল।  
 নবাব কহিল শুন তরুসিং  
 তোমারে ক্ষমিতে চাই।—  
 তরুসিং কহে মোরে কেন তব  
 এত অবহেলা ভাই!—  
 নবাব কহিল—মহাবীর তুমি  
 তোমারে না করি ক্রোধ,  
 বেণীটি কাটিয়া দিবে যাও মোরে  
 এই শুধু অনুরোধ!  
 তরুসিং কহে—করণী তোমার  
 হৃদয়ে রহিল গাঁথা—  
 যা চেয়েছ তার কিছু বেশী দিব,  
 হৃদয়ের সঙ্গে মাথা!

শ্রীরবীন্দ্রনাথ ঠাকুর ।

\* শিখের পক্ষে বেণীচ্ছেদন ধর্ম-পরিত্যাগের আয় দৃশ্যীয়।

## শাহ আলম ।

### উপক্রমণিকা ।

Shah Aulum had improved a very good education by study and reflection ; he was a complete master of the languages of the East, and as a writer, attained an eminence seldom acquired by persons in his high position.—*Captain Francklin,*

মোগল সাম্রাজ্যের অভ্যুদয় যেমন নিরতিশয় বিশ্বয়ের ব্যাপার, তাহার অধঃপতনও সেইরূপ। সে বিষাদকাহিনী অভিব্যক্ত করিবার জন্য ভারত-বর্ষের সর্বশেষ মোগল বাদশাহ শাহ আলম যে মর্শ্বগাঁথা রচনা করিয়াছিলেন, তাহার অক্ষরে অক্ষরে আজিও যেন অশ্রুধারা ফাটিয়া বাহির হইতেছে! মূল কবিতাটি পারশুভাষায় রচিত; সেকালের ইংরাজলেখক তাহার একটি ইংরাজী অনুবাদ রাখিয়া গিয়াছেন; কিন্তু কালক্রমে মূল এবং অনুবাদ দুপ্রাপ্য হইয়া উঠিয়াছে।

মোগল-শাসন চলিয়া গিয়াছে; তাহার ধ্বংস-কাহিনীও বিশ্বতিগর্ভে বিলীন হইতেছে! মোগলের বীরবাহু ভারতবর্ষে যে মহাসাম্রাজ্যের প্রতিষ্ঠা করিয়াছিল, একদিন তাহার সৌভাগ্যগর্ভ ইউরোপকেও বিস্মিত করিয়া তুলিয়াছিল;—এখন কেবল যমুনাটাত্তমিলিত তাজমহলের সৌধশোভা অতীত গৌরবের সাক্ষিরূপে, দণ্ডায়মান; আর যাহা কিছু স্ফুলিঙ্গ অল্পাধিক মাত্রায় জরাজীর্ণ হইয়া পড়িয়াছে!

যত্নপতির মথুরাপুত্রী বা রঘুপতির উত্তরকোশলার কথা এখন কথা-মাত্রে পর্য্যবসিত হইয়াছে; কাব্যাদিতে যাহা কিছু বর্ণনা পাঠ করা যায় তাহাও কবিজন-স্বলভ অতিরঞ্জিত কাহিনী বলিয়া পরিত্যক্ত হইয়া থাকে! মোগল সাম্রাজ্য এখনও সেরূপ অবস্থা প্রাপ্ত হয় নাই; এখনও তাহার অভ্যুদয় ও অধঃপতনের ইতিহাস সঙ্কলন করিবার উপযোগী উপাদানগুলি সম্পূর্ণরূপে বিলুপ্ত হইতে পারে নাই।

বাদশাহদিগের চরিত্রহীনতাই মোগল-সাম্রাজ্যের অধঃপতনের মূল কারণ; অথবা সত্য হউক আর মিথ্যা হউক,—তাহাই ঐতিহাসিক সিদ্ধান্ত বলিয়া পরিচিত। সচরাচর প্রচলিত ঐতিহাসের সিদ্ধান্ত যাহাই হউক,—মোগল বাদশাহেরা নিতান্ত অপদার্থ ছিলেন বলিয়া বোধ হয় না। ঐতিহাসিক তত্ত্বানুসন্ধান করিলে বরং ইহাই প্রতিপন্ন হইবে যে, মোগল-সাম্রাজ্যের গঠনপ্রণালীর মধ্যেই অবশুস্তাবী অধঃপতনের মূল বর্তমান ছিল;—বাদশাহেরা তাহার গতিরোধ করিতে পারেন নাই।

মোগল বাদশাহেরা নিতান্ত মূর্খ বা অশিক্ষিত ছিলেন না। অনেকে বিদ্যোৎসাহের জন্য খ্যাতিলাভ করিয়াছিলেন, এবং কেহ কেহ স্বয়ং বিবিধ বিদ্যায় বিভূষিত হইয়া বিদ্বৎসমাজেও সমাদরলাভ করিয়াছিলেন।

শেষ সম্রাট শাহ আলম শিক্ষায়, চরিত্রগৌরবে, অভিজ্ঞতায় এবং ব্যবহারগুণে সমসাময়িক সজ্জনসমাজে সর্বিশেষ শ্রদ্ধাভাজন হইয়াছিলেন। তৎকালে ভারতবর্ষে যে সকল ভাষা প্রচলিত ছিল, তিনি তাহাতে শিক্ষা-লাভ করিয়া পণ্ডিতসমাজে খ্যাতিলাভ করিয়াছিলেন, এবং লিপিক্রোশল মহিমায় সুরকবি বলিয়া পরিচিত হইয়াছিলেন। কিন্তু তাঁহার শাসন সময়েই মোগল-গৌরব-রবি চিরদিনের মত অস্তগত হইল!

তরবারির সহায়তায় রাজ্যবিস্তার করা সহজ, কিন্তু শাসন-গৌরবেই মহাসাম্রাজ্য স্থায়িত্বলাভ করে। যতদিন মোগলের শাসন-গৌরব অক্ষুণ্ণ ছিল, ততদিন মোগলের উত্তরোত্তর পদোন্নতি হইয়াছিল; যেদিন শাসন-গৌরব অবসন্ন হইল, সেইদিন হইতে মোগলের অধঃপতন খরবেগ ধারণ করিতে লাগিল। বাদশাহ শাহ আলম তাহার গতিরোধ করিতে পারিলেন না;—তাঁহার সিংহাসনারোহণের বহুপূর্বেই মোগল-সাম্রাজ্যের ধ্বংসকাল সমুপস্থিত হইয়াছিল!

সিংহাসনচ্যুত কারারুদ্ধ জরাজীর্ণ অন্ধ শাহ আলম মোগলের অধঃপতন-কাহিনী কীর্তন করিবার সময়ে স্বরচিত কবিতার মুখবন্ধে বাষ্প-গদগদ কণ্ঠে গাহিয়াছেন:—

“Lo, the dire tempest gathering from afar,  
In dreadful clouds has dimm'd the Imperial star ;

Has to the winds, and broad expanse of Heaven,  
My state, my royalty, my kingdom given ;  
Time was, O King, when clothed in power supreme,  
Thy voice was heard, and nations hailed the theme ;  
Now sad reverse,—for sordid lust of gold,  
By traiterous wiles, thy throne and Empire sold !”

এই করুণ-কবিতায় ইঙ্গিতে মোগল-সাম্রাজ্যের ধ্বংস-কাহিনী যেরূপ ভাবে অভিব্যক্ত হইয়াছে, তাহা বৃত্তিতে হইলে “শাহ আলমের জীবনকাহিনী ও তৎসাময়িক প্রধান প্রধান ঐতিহাসিক ঘটনার আলোচনা করা আবশ্যিক। আমরা সংক্ষেপে তাহার আলোচনা করিয়া শাহ আলমের আত্মকথায় তাঁহার বিষাদকাহিনীর উপসংহার করিব।

### প্রথম পরিচ্ছেদ ।

গৃহ কলহ ।

“The affairs of the Empire were in this state, when the Abdalli invaded it. The Marhattas were masters of the greatest part of Hindoostan; a nominal King sat on the throne; the administration was usurped by a man who derived his influence and establishment entirely from a foreign power; the Chiefs of the Empire had already declared their resolution of joining the invader; and Lahore, the key of Hindoostan, was governed by a woman.”——*Captain Francklin.*

একটি মাত্র ঐতিহাসিক ঘটনায় একদিনে মোগল-সাম্রাজ্যের অধঃপতন সংঘটিত হয় নাই। আরঙ্গজীবের জীবনসম্বন্ধে যে অরাজকতার অগ্নিশিখা প্রজ্বলিত হইয়া উঠিয়াছিল, উত্তরকালে তাহাতেই মোগল রাজসিংহাসন ভস্মীভূত হয়;—পরবর্তী মোগল বাদশাহগণ কেহই তাহার গতিরোধ করিতে পারেন নাই।

যাহারা মোগল-সাম্রাজ্যের রক্ষাকর্তা—আমীর ওমরাহ ও প্রধানতম রাজকর্মচারী—তাঁহাদের বিশ্বাসঘাতকতার, গৃহবিবাদে এবং স্বার্থপরতায় মোগল-

গৌরবপতাকা ভূপতিত হইতেছিল। দাক্ষিণাত্যে নিজাম এবং অযোধ্যায় উজীর স্বাধীন রাজ্য সংস্থাপন করিয়া মোগল বাদশাহের শাসনক্ষমতা শিথিল করিয়া তুলিয়াছিলেন; বিজয়োন্নত মহারাষ্ট্র-সেনা অরাজক রাজ্যের সর্বত্র দস্যুবৃত্তি করিয়া অভিনব হিন্দুসাম্রাজ্য সংস্থাপনের আয়োজন করিতে প্রস্তুত হইয়াছিল। এই সকল কারণে মোগলসাম্রাজ্য ছত্রভঙ্গ হইয়া পড়িতেছিল; মোগলের শাসনক্ষমতার ছায়ামাত্রই বর্তমান ছিল, নাদির শাহ দিল্লী অবিকার করায় সে ছায়া পর্যন্তও তিরোহিত হইয়া গেল।

দিল্লীর নামসর্বস্ব মোগল বাদশাহ মহম্মদ শাহ কোনরূপে নাদির শাহার গতিরোধ করিতে না পারিয়া, তাঁহার সহিত নিতান্ত অকীর্তিকর সন্ধি সংস্থাপন করিতে বাধ্য হইলেন। এই সন্ধিসূত্রে আটক নদীর পশ্চিম তীরবর্তী সম্পন্ন জনপদ নাদির শাহার রাজ্যভুক্ত হইল;—লাহোর, গুজরাট, মুলতান ও কাবুল রাজ্য মহম্মদ শাহার অবিকারে থাকিলেও তাহার সমস্ত রাজকর নাদির শাহার প্রাপ্য বলিয়া নির্দিষ্ট হইল। দক্ষিণভারতে মহারাষ্ট্র-সেনা ও নিজাম স্বাধীনতা লাভ করিয়াছেন, বঙ্গবিহার উড়িষ্যার স্বরাদার রাজকর প্রদান করিতে অসম্মত হইয়াছেন, অযোধ্যায় উজীর স্বতন্ত্র রাজ্য-গঠনে নিযুক্ত রহিয়াছেন,—এরূপ সময়ে পশ্চিমভারত নাদির শাহাকে উৎসর্গ করিয়া দিয়া দিল্লীস্থ মহম্মদ শাহ হতসর্বস্ব রূপাপাত্র কাঙ্গালের ছায় ধ্বংসাবশিষ্ট দিল্লীনগরীতে কায়ক্বেশে দিনযাপন করিতে লাগিলেন।

নাদির শাহের দেহাবসানে অল্পদিনের জন্ত মহম্মদ শাহ আপনুভূত হইয়াছিলেন এবং পুনরায় মোগল-সাম্রাজ্যের প্রাণপ্রতিষ্ঠার আশায় পশ্চিম-ভারতে আত্মশক্তির বিস্তার করিতে আরম্ভ করিয়াছিলেন। কিন্তু তাঁহার রাজত্বের শেষ বৎসরে (১৭৪৭ খৃষ্টাব্দে) নাদির শাহের উত্তরাধিকারী আহম্মদ শাহ আব্দালী “শাহেন শাহ” অর্থাৎ রাজাধিরাজ উপাধি গ্রহণ করিয়া সসৈন্তে লাহোর প্রদেশে উপনীত হইলেন।

এবার বাহুবলে আত্মরক্ষা করিবার আশায় দিল্লীস্থ মহম্মদ শাহ সেনাসংগ্রহে প্রস্তুত হইলেন। শাহজাদা আহম্মদ শাহ, প্রধানামাত্য কমরুদ্দীন খাঁ ও তৎপুত্র মহিমলুমোল্ক সেনাপতিপদে অভিষিক্ত হইয়া আব্দালীর গতিরোধার্থ অগ্রসর হইলেন। ইহাদের রণপাণ্ডিত্যে আব্দালী পরাভূত হইয়া

স্বদেশে প্রত্যাবর্তন করিতে বাধ্য হইলেন; কিন্তু কমরুদ্দীন যুদ্ধে নিহত হওয়ায় তৎপুত্র মহিমুল্‌মোল্‌ককে লাহোরের স্বেচ্ছাস্বাক্ষরপদে নিযুক্ত করিয়া শাহজাদাকে একাকী রাজধানী অভিযুক্ত প্রত্যাবর্তন করিতে হইল।

শাহজাদা বিজয়োৎসব হৃদয়ে সসৈন্য প্রত্যাগমন করিবার সময়ে পশ্চিম-মধ্যে পাণিপথের নিকটে বুদ্ধ মহম্মদ শাহের মৃত্যুসংবাদ প্রাপ্ত হইলেন। রাজধানীতে উপনীত হইয়া আহম্মদ শাহ বাদশাহের তখত অধিকার করতঃ পাত্রমিত্রগণকে যথাযোগ্য রাজপদ বিতরণ করিতে আরম্ভ করিলেন। যে সকল মুসলমান আমীর ওমরাহ স্বার্থপরতায় অন্ধ হইয়া মোগল-সাম্রাজ্যের ভিত্তিমূল খনন করিতে আরম্ভ করিয়াছিলেন, আহম্মদ শাহের অনুকম্পায় তাঁহারাি প্রধান প্রধান রাজপদে অভিষিক্ত হইলেন।

অযোধ্যার মনসুর-আলি-খাঁ ওমরাহদিগের মধ্যে সর্বপ্রধান। তিনি উজীরপদে অভিষিক্ত হইয়া ইচ্ছানুসারে আশ্রিত ও অনুগত অন্তরঙ্গগণকেই রাজকার্যে নিয়োগ করিতে লাগিলেন। তদনুসারে গাজিউদ্দীন খাঁ মীর বকসী হইলেন। প্রকৃতপক্ষে অযোধ্যার উজীর দিল্লীর বাদশাহের সমস্ত শাসনক্ষমতা অপহরণ করিয়া-স্বাধিকার সংস্থাপন করিতে লাগিলেন।

অত্যাচারী আমীর ওমরাহগণ ইহাতে অতিমাত্র অসন্তুষ্ট হইয়া বাদশাহের নিকট নানারূপ অভিযোগ উপস্থিত করিতে লাগিলেন। উজীর আত্মপক্ষ স বল করিবার আশায় বাদশাহকে কারারুদ্ধ দস্য তক্ষরের খায় প্রহরবেষ্টিত করিয়া রাখিলেন। সমুদয় রাজকর্মচারিণী উজীরের দাসানুদাস, স্বয়ং সেনানায়েক তাঁহারই অনুগত অন্তরঙ্গ, রাজকোষ ও সেনাবল তাঁহারই পদগোরব রক্ষা করিতেছে—এরূপ অবস্থায় মুখের কথায় উজীরকে পদচ্যুত করা সহজ নহে। বাদশাহ আত্মকার্যের পরিণাম দর্শনে শিহরিয়া উঠিলেন, এবং উজীরের অত্যাচার ইহাতে মুক্তিলাভ করিবার আশায় পাত্রমিত্রগণের সহিত গোপনে ষড়যন্ত্র করিতে আরম্ভ করিলেন। মোগল-সাম্রাজ্যের অধঃপতন-দিনে এইরূপে গৃহকলহের সূত্রপাত হইল।

উজীর মনসুর আলি খাঁ সহজে ছাড়িবার পাত্র ছিলেন না; তিনি বাহুবলে সকল ষড়যন্ত্র চূর্ণ করিবার জন্ত যুদ্ধঘোষণা করিলেন। এই যুদ্ধে মোগলের শাসনগোরব একেবারে তিরোহিত হইয়া গেল।

'মনসুর' আলি খাঁ রণপরাজিত হইয়া জাঠরাজ্যে পলায়ন করিলেন; ইন্তিমাদৌলা উজীরপদে অভিষিক্ত হইলেন; কিন্তু মনসুর আলির রাজ-বিদ্রোহের দণ্ডদান করা দূরে থাকুক, তাঁহাকে ক্ষমা প্রদর্শন করিতে হইল। এতদুপলক্ষে পাত্রমিত্রগণ ছুইদলে বিভক্ত হইয়া পড়িলেন। মীর বকসি গাজি উদ্দীন মনসুর আলির 'অনুগ্রহেই' পদগোরব প্রাপ্ত হইয়াছিলেন, কিন্তু তাঁহাই মনসুর আলিকে ক্ষমা করিতে অসম্মত হইয়া বাহুবলে জাঠরাজ্য আক্রমণ করিলেন। প্রধানামাত্য ইহার সহায়তা সাধন করিতে অসম্মত হইয়া কামান প্রেরণ করিতে নিষেধ করিলেন।

গাজি উদ্দীন প্রধানামাত্যের ব্যবহারে অবমাননা প্রাপ্ত হইয়া মহারাষ্ট্র সেনার সহায়তা গ্রহণের চেষ্টা করিতে লাগিলেন। মহারাষ্ট্র-সেনানায়ক মল্‌হর রাও সসৈন্যে গাজি উদ্দীনের সহায়তাসাধনার্থ অগ্রসর হইতেছেন দেখিয়া বাদশাহ ও উজীর তাঁহাদের বিরুদ্ধে যুদ্ধযাত্রা করিলেন। বাদশাহী সেনা এই যুদ্ধে জয়লাভ করিতে পারিলে ক্ষতি ছিল না, কিন্তু ইহাতেই হিতে বিপরীত হইল। বাদশাহ পরাজিত হইয়া দিল্লীভ্রম্ণে অপরুদ্ধ হইলেন; বিজয়োৎসব প্রতিহিংসাতাড়িত হৃদয় মোগল সেনাপতি গাজি উদ্দীন বাদশাহকে সিংহাসন-চ্যুত করিয়া বলপূর্বক তাঁহার চক্ষুঃদ্বয় উৎপাটন করতঃ শূন্য সিংহাসনে তৈমুর বংশীয় রাজকুমার 'আজিমুদ্দীনকে বসাইয়া দিয়া তাঁহার নামে দমস্ত শাসনভার স্বহস্তে গ্রহণ করিলেন। এইরূপে ১৭৫৫ খৃষ্টাব্দের নবেম্বর মাসে দিল্লীস্থর আত্মভৃত্যের সূত্রাচ্ছালিত ক্রীড়াপুতলে পরিণত হইলেন।

বাদশাহ গাজি উদ্দীনের রূপায় সিংহাসন লাভ করিলেও গাজি উদ্দীনের কৃতঘ্নতার কথা বিস্মিত হইতে পারিলেন না; পাকে চক্রে গাজি উদ্দীনকে পদচ্যুত করিবার উপায় অন্বেষণে নিযুক্ত হইলেন।

ভারতবর্ষের এইরূপ অরাজক অবস্থায় প্রধান প্রধান পাত্রমিত্রগণ সকলেই আহম্মদ শাহ আবদালীকে ভারতবর্ষে উপনীত হইবার জন্ত পুনঃপুনঃ আহ্বান করিতে লাগিলেন; স্বয়ং বাদশাহ পর্যন্তও তাহাতে যোগদান করিলেন। এই সময়ে মহিমুল্‌মোল্‌কের মৃত্যু হওয়ায় তাঁহার বেগম লাহোরের শাসনভার গ্রহণ করিয়াছিলেন; স্তরাং ব্যহ্বারে রমণী এবং ব্যহাভ্যন্তরে আত্মকলহের সন্ধানলাভ করিয়া আহম্মদ শাহ আবদালী ভারতাক্রমণে অসম্মত হইলেন না।

মহিমলমোলকের বেগম তেজস্বিনী বীররমণীর ঞায় আব্দালীর আক্রমণের গতিরোধ করিতে ক্রটি করিলেন না; কিন্তু এবার আর আব্দালীকে কেহ পরাজিত করিতে পারিল না; তিনি দ্বৈসৈথে দিল্লী অধিকার করিয়া গাজি উদ্দীনকে পদচ্যুত করিলেন এবং দিল্লীরকে ইচ্ছামত উজীর নিয়োগের অধিকার দান করিয়া জাঠরাজ্য ধ্বংস করিবার আশায় যুদ্ধযাত্রা করিলেন।

বাদশাহ ক্ষণকালের জন্ত গাজি উদ্দীনের শৃঙ্খলমুক্ত হইয়া আপন পুত্র আলি গহরকে উজীরপদে অভিষিক্ত করিলেন। এই আলি গহরই ভারত-বর্ষের শেষ মোগল বাদশাহ শাহ আলম নামে ইতিহাসে পরিচিত।

আব্দালী জাঠরাজ্য ধ্বংস করা দূরে থাকুক, জাঠবংশীয় বীরবৃন্দের নিকট নানারূপ লাঞ্ছনা প্রাপ্ত হইতে লাগিলেন। পদবিচ্যুত গাজি উদ্দীন সেই স্থযোগে আব্দালীর নিকট প্রস্তাব করিলেন যে, তাঁহাকে পুনরায় উজীরপদে অভিষিক্ত করিলে, তিনি কটাক্ষে জাঠবংশ ধ্বংস করিয়া দিবেন। আব্দালী তাহাতে অসম্মত হইলেন না। ঘটনাক্রমে গাজি উদ্দীন জয়লাভ করায় আব্দালীর আদেশে পুনরায় উজীরপদ প্রাপ্ত হইলেন। দিল্লীধর পুনরায় তাঁহার করালকবলে নিপতিত হইলেন, আলি গহর প্রাণ লইয়া দূরস্থানে পলায়ন করিতে বাধ্য হইলেন।

আলি গহর মোগল-সাম্রাজ্যের ধ্বংস দশায় এই সকল অন্তর্বিপ্লবে নিপতিত হইয়া পিতৃসিংহাসন আগমুক্ত করিবার আশায় মহারাষ্ট্র সেনানায়ক ইটলরাওর শরণাগত হইলেন। দিল্লীধরের জ্যেষ্ঠ পুত্র, মোগল-সাম্রাজ্যের ভাবী সম্রাট এইরূপ মোগলশাসনের প্রবল শত্রু মহারাষ্ট্রকুলের বাহুবলের আশ্রয় গ্রহণ করিতে বাধ্য হইলেন। এই সময় হইতে যুবরাজ আলি গহর ইতিহাসে পরিচিত—এই সময়ে তাঁহার রাজনৈতিক জীবনের প্রথম প্রভাত। কিন্তু হায়! সেই প্রভাত নিবিড় কুঞ্জাটিকাচ্ছন্ন—আলি গহর সে তমসাভেদ করিয়া আশার আলোকরেখা দর্শন করিতে সক্ষম হইলেন না।

শ্রী অক্ষয়কুমার মৈত্রেয়।

## রাসলীলা।

কোয়েল নদীর নীরে কার্তিকী রাকায়  
দ্রব রজতের ধারা ধীরে বহি' যায়।

তীরে তরু-ছায়াতলে পত্র অবকাশছলে  
কিরণকুমারী কেহ চুরী করি চায়,  
সখীরা হাসিছে তার পাতায় পাতায়।

রজত প্লাবনে যেন মগ্ন ধরাতলে  
দুঃখে মাথা তুলি চাহে সুনীল অচল।

শুধু তরুছায়া-তলে, কালিম কুন্তল দোলে  
রূপসী-কপোলে চূর্ণকেশরাশি প্রায়।  
কি মহিমা, কি মাধুরী কার্তিকী রাকায়!

নদী-শিলা-তলে শশিকিরণে মগ্নিত  
উলসিয়া সেফালিকা হ'তেছে পতিত।

দীর্ঘ সীতাহার শিরে কুসুম ফুটিছে ধরে;  
মধুমানতীর লতা প্রশ্নে দোলায়।  
কি মোহ প্রকৃতি-মুখে কার্তিকী রাকায়!

জড় জীব মুগ্ধ আজি কুহকে রাকায়,  
পাপিয়ার কলকণ্ঠে অমৃত সকার!

আবেশে বিমানতলে ধ্বনি প্রতিধ্বনি খেলে,  
বাঁশরী বাজিছে বুঝি রাস-পূর্ণিমার—  
চিরবিরহের গীতি তীরে যমুনার!



বনমাঝে মনোমাঝে সেই এক(ই) গান—

এ সুখ সৌন্দর্যে কই ভরিল না প্রাণ !  
রঞ্জে রঞ্জে নব সুরে কায় বাঁশী তান পুরে  
শুনায় জগৎ জনে সঙ্গীত মহান—  
অনন্ত অতৃপ্ত চির বিরহের গান !

কোয়েলের তীরে আজো শুনি সেই গান—

—বৃন্দাবনে বিরহিণী—নিত্য নব তান !  
কুটীর প্রাপ্ত মাঝে নীপ তরুণর রাজে  
যুবক যুবতী তলে বেড়ি নাচে গায় !  
রাসরসে ভরপুর, মাদোল বাজায় !  
পঞ্চমে পুরুষকণ্ঠে মিলি উঠে তান,  
দোহারি কামিনী গায় মধুরে সে গান !  
ঝুমুর গানের ছলে নিন্দে নরনারীদলে ;  
হাসিয়া যুবতী ফিরি ফিরি দেয় গালি,  
রাধার উদার পদে বাঁধা বনমালী !

সুখে রঞ্জে মাতোয়ারা সবে নাচে গায়,  
চেরো\* বালা “সেঁউতিরে” না ফিরিয়া চায় ।

অদূরে তটিনী মূলে বসি একা শিলাতলে,  
“সরযূর” মুখখানি ভাবি ক্ষীণ কায় ;—

চেরো যুবতীর পানে কে ফিরিয়া চায় ?

বিগত নিশায় এই কোয়েল-পুলিনে  
সেও নেচে গেয়েছিল সরযূর সনে ।

আজি বিভা হবে বন্ধে কত আশা কুতূহলে  
পরিপূর্ণ ছিল তার হৃদয়নিলয়—  
বিরহে তাহার আজি সকলি তন্ময় !

\* পালার্মোর জাতি বিশেষ ।

গত যামিনীতে সবে ঝুমুরে মগন,—

সহসা ধ্বনিয়া উঠে শার্দূল-গর্জন ।

গোষ্ঠে গাভী ছোটে রুড়ে, সরযু ধাইছে ফিরে—

“নন্দিনী” কৃতান্তকরে কবলিত তার,

সত্যপ্রসবিনী সেই গোধনের সার ।

করে ধনুঃ কটিতটে শানিত রূপাণ,

নিমেষে সে বীরদাপে করিল প্রয়াণ ।

বলে গেছে সেঁউতিরে, দুষমনে মারি ফিরে

আসি যদি কাল, তবে সুধত জীবন !

তা না হ'লে এ জনমে হবেনা মিলন !

তন্ময় হয়ে বালা ভাবে সেই রূপ,

অদর্শনে আরো তার শোভা অপরূপ !

নীলিমায় রাকাবুকে, নদী জলধারা মুখে

হৃদয়ে নয়নে রূপ শুধু সরযূর,—

আত্মহারা গোপী যেন বিরহবিধুর !

হরিভাবে ভোর, হরিপ্রেমে পাগলিনী

এমনি নিশায় হরি লোভিলা গোপিনী !

সে ভাব সে প্রেম স্মরি সৃষ্টি-শিরোমণি হরি

সেঁউতিরে ফিরে দেহ সরযু রতন—

কোয়েলের তীরে তার প্রেম-বৃন্দাবন !

নিশি জাগরণে শ্রান্ত ক্লান্ত দেহ মন,

সেঁউতি সে শিলাতলে মুদিল নয়ন ।

স্বপ্নে হেরে বৃকোপরে সরযু এসেছে ফিরে,

করে ধনুঃ কটিতটে শানিত রূপাণ ।

জীবন্ত শার্দূল, বীরবিজয়-নিশান !

পুষ্পবৃষ্টি করে দেব সরযুর শিরে  
অমরী কিন্নরী গায় বিজয়ীরে ঘিরে ।  
আনন্দে মেলিয়া আঁখি সঁউতি হেরিছে একি !  
যথার্থ সরযু তার বিজয়ী জোয়ান,—  
করে দোলে বুকমুণ্ড, কটিতে রুপাণ !

উঠিছে সে শিলা ঘিরি মহানন্দ-রোল  
সখীসখা গায়, বাজে মধুরে মাদোল !  
যুবকেরা গায় হাসি, “উঠি দেখ প্যারিশশী  
মথুরার রাজা তোর কুঞ্জবনে চোর।”  
সখী হাসে, “রাইরাজা নফর ও’ তোর !”

কোয়েল নদীর তীরে কার্তিকী রাকায়  
সঁউতি সরযু মিলে শ্রীহরি-রুপায় ।

তীরে নীপতরুন্মূলে রচি রাস কুতূহলে  
সখী সখা নাচে গায় মাদোল বাজায় ।  
কিরণকুমারী হাসে পাতায় পাতায় !

শ্রীশ্রীশচন্দ্র মজুমদার ।

## বাজার দেনা ।

বাজার দেনা নাই, এমন লোক বিরল । ছোট বড় প্রায় সকলেরই  
বাজার দেনা আছে; ছোটের জ্বালা অল্প, খরচ কম, দেনার সমষ্টিও কম;  
বড়ের জ্বালা অধিক, খরচ অধিক, দেনাও অধিক। বাজার দেনাটাকে  
আমরা দেনার মধ্যেই ধরি না। চাউল, ডাউল, তৈল, লবণ প্রভৃতির উঠনা  
হিসাব হইতে কাপড় প্রভৃতির হিসাবে দেনা ও ডাক্তারখানার ঔষধের

‘একাউন্ট’ সবই বাজার দেনা। মাসান্তেই শোধ করি, আর বর্ষান্তেই শোধ  
করি—দেনা যতদিন শোধ না করি, তত দিন দেনা—তত্ত্বিন্ন আর কিছুই নহে।  
কিন্তু বাজার দেনাকে আমরা দেনার মধ্যেই ধরি না। বাজার দেনা আফিসের  
মাহিনা পাইলে মাসকাবারে চুকাই, বা কোম্পানীর কাগজের সুদ পাইবার  
কিস্তিমত চুকাই, বা আদায়ের কিস্তিমত চুকাই। দেনার মধ্যে ধরি না  
বলিয়াই বাজার দেনা রাখি; এবং বাজার দেনার লাভালাভ খতাইয়া  
দেখি না। নহিলে মাসকাবারে বা নির্দিষ্ট সময়ে বখন দেনা চুকাইয়া দিয়া  
থাকি, তখন ইচ্ছা করিলে নগদে কাজও করিতে পারি; বড়জোর তাহাতে  
সময় সময় একটু সামান্য অসুবিধা হয়। কতকগুলো জিনিস কিনিব স্থির  
করিয়া বাজারে যাইয়া সেগুলো কিনিবার পর হয়ত আর একটা জিনিস  
কিনিবার কথা মনে পড়িল, বা একটা নূতন জিনিস দেখিয়া কিনিতে ইচ্ছা  
হইল। তখন সঙ্গে টাকা না থাকিলে কি করি? দোকানদার দেশীয়  
হইলে জিনিসটা লইয়া আসি, আর বলিয়া আসি, এবার যেদিন বাজারে  
আসিব, দাম দিয়া যাইব বা অমুক দিন যাইয়া টাকা লইয়া আশ্রিত।  
যুরোপীয়ের দোকান হইলে জিনিসটা লইয়া আসি, আর ‘লন্ডউচার’ সুছি  
করিয়া নাম ও ঠিকানা লেখা কার্ড দিয়া বলিয়া আসি, ‘বিল’ পাঠাইয়া  
টাকা আদায় করিও। নগদে কাজ করিতে হইলে, পরদিন টাকা লইয়া  
যাইয়া তবে জিনিসটি কিনিতে হয়। এই সামান্য অসুবিধা।

যে অসুবিধার কথা বলিয়াছি, সেটা ধনবানের পক্ষে, কিন্তু যাহার  
গৃহে ‘বিল’ আসিলেই ‘বিল’ শোধের উপযোগী অর্থ পাওয়া যায় না, তাহার  
পক্ষে সময় সময় এই অসুবিধাটা একটু গুরুতর হইয়া দাঁড়াইয়া। যে দরিদ্র  
কেরাণী সামান্য বেতনে নির্ভর করিয়া কোনরূপে সংসার চালায়, তাহারও  
গৃহে আধিব্যাধির আবির্ভাব বিরল নহে। যে মাসমাহিনা পনের টাকা  
কোনরূপে সংসার চালায়, তাহার গৃহে ব্যাধির জন্ত যেবার তাহাকে চিকিৎসা  
সকের দর্শনীতে ও ঔষধের দামে পাঁচ ছয় টাকা ব্যয় করিতে হয়, সেবার  
তাহার পক্ষে মাসের শেষ কয়দিন ধার না করিয়া চালান অসাধ্যসাধন।  
দোকানে ধারে জিনিস পাইলে তাহাকে আর লজ্জানতশিরে গৃহিণীর গহনা  
বন্ধক রাখিয়া কোথাও টাকা ধারের চেষ্টায় যাইতে হয় না।

এ কথাটা বাজার দেনার সপক্ষে প্রবল যুক্তি। কিন্তু অর্থনীতি-বিদগণ হিসাব করিয়া যাহা দেখাইয়াছেন, তাহাতে গহনা বন্ধক রাখিয়া টাকা ধার করিলে সে হয়ত শতকরা বার্ষিক টাকা সুদে টাকা পাইত; কিন্তু বাজারদেনায় তাহাকে শতকরা কুড়ি টাকা অধিক দিতে হইতেছে।

এই কথাটা বুঝানই বর্তমান প্রবন্ধের উদ্দেশ্য। এখন সেই কথাটাই বুঝাইব।

যে দোকানদার ধারে বিক্রয় করে, তাহাকে ব্যবসায়ে অনেক টাকা ঢালিতে হয়; কারণ কতক টাকা ধারে বিক্রয়ের হিসাবে বাহিরে থাকে। কাজেই যে ধারে দেয়, তাহার যত টাকার আবশ্যক, যে কেবল নগদ বিক্রয় করে, তাহার তদপেক্ষা অনেক কম টাকার আবশ্যক। টাকার সুদ হিসাব করিতে হয়, আবার লোকশানের আশঙ্কা আছে। এই সুদের টাকাটা দোকানদারকে পণ্যের উপর হইতেই আদায় করিয়া লইতে হয়। যে দোকানদার কেবল নগদ বিক্রয় করে, সে এই সুদের হস্ত হইতে নিষ্কৃতি পায়। কাজেই অপেক্ষাকৃত অল্পমূল্যে পণ্য বিক্রয় করিতে পারে। ধারে বিক্রয়ে অনেক টাকা আবার আদৌ আদায় হয় না। ক্রেতার মৃত্যু হইলে বা ক্রেতা ফেরার হইলে বা ঐরূপ অথ কোন কারণ ঘটিলে টাকা আদায় করা অসম্ভবজনক বা অসম্ভব হইয়া উঠে। দোকানদারের পক্ষে আদালতে যাইয়া খরচ পত্র করিয়া,—সময় নষ্ট করিয়া সামান্য টাকা আদায় করাও সম্ভব নহে। এই যে টাকাটা অনাদায় থাকে, সেটাও দোকানদারকে পণ্যের উপর পোষাইয়া লইতে হয়। যে দোকানদার কেবল নগদ বিক্রয় করে, তাহার টাকা অনাদায় থাকে না; কাজেই সে অপেক্ষাকৃত অল্পমূল্যে পণ্য বিক্রয় করিতে পারে। সুতরাং দেখা যাইতেছে, যে দোকানদার কেবল নগদে বিক্রয় করে, সে যে দামে পণ্য বিক্রয় করিতে পারে, যে দোকানদার ধারে বিক্রয় করে, সে সে দরে পণ্য বিক্রয় করিতে পারে না।

এতদিন কেবল নগদে কাজ করিলে যথাসম্ভব অল্প মূলধনে ব্যবসায় চলে। অল্প টাকায় অনেকটা কারবার করা যায়। মূলধন পুনঃপুনঃ ঘুরিয়া যায়—তাহাতে অনেক খরিদ বিক্রয়ের কাজ চলে। যে সকল দোকান কেবল নগদে চলে, তাহাতে এমনও দেখা গিয়াছে যে, বৎসরে

মূলধন দশবার ঘুরিয়াছে, অর্থাৎ দশবার মূলধনের পূর্ণ টাকাটায় দ্রব্য খরিদ হইয়াছে।

আবার যে দোকানদার ধারে বিক্রয় করে না, তাহার ধারে কিনিবারও আবশ্যক হয় না। তাহার হাতে টাকা থাকে, সে বাজার সুবিধা বুঝিয়া মাল ক্রয় করিতে পারে। সুবিধার বাজারে অল্পদামে ভাল মাল ক্রয় করে, যে ধারে বিক্রয় করে, সে টাকা আদায় করিয়া—সংগৃহীত টাকার মাল ক্রয় করিতে না করিতে বাজার বদলাইয়া যায়—সুবিধা চলিয়া যায়। নগদে কারবারের এই আর এক বিশেষ সুবিধা।

সুতরাং নগদে বিক্রয়ের সুবিধা প্রধানতঃ এই কয়টি :—

(১) টাকা আবদ্ধ থাকে না এবং অনাদায়ে বাকি মারা যায় না।

(২) যথাসম্ভব অল্প মূলধনে যথাসম্ভব অধিক কাজ করা যায়।

(৩) নগদে বিক্রয় করিলে নগদে ক্রয় করা যায়; কাজেই সুবিধার বাজারে সুবিধা দরে ভাল জিনিস ক্রয় করা যায়।

এই সুবিধাগুলি বড় সামান্য নহে।

ধারে কাজ করায় ক্রেতা ও বিক্রেতা উভয়পক্ষেরই আরও কতকগুলি অসুবিধা আছে। খরিদদারের কাছে পাওনা (“বিলাত বাকি”) সঙ্গেও অনেক দোকানদার দেউলিয়া হয় বা অমনই দোকান উঠাইয়া দিতে বাধ্য হয়। পাওনা টাকার অনাদায় হেতু বা সময়ে আদায় করিতে না পারায় দোকান উঠিয়া যায়। ব্যবসায়দারের পক্ষে এ বড় লোকসান।

ধারে জিনিস পাইলে ক্রেতা অনেক সময় আপনার আয়ের দিকে লক্ষ্য না করিয়া জিনিস ক্রয়ে অতিরিক্ত অধিক ব্যয় করিয়া বসে। ইহার ফল বিষময়। কোন প্রসিদ্ধ ইংরাজ অর্থনীতিবিদ বলিয়াছেন—সত্যই ধারে শ্রমজীবীগণের সর্বনাশ হয়। আবার লোকের স্বভাব এই যে, যখন দেনা অত্যন্ত অধিক হইয়া উঠে, শোধ করিবার আর কোনই উপায় না থাকে, তখন আর লোকে ব্যয় সংক্ষেপ করিতে যত্নবান হয় না; “একেন পাপ, শতেন পাপ”—ভাবিয়া খরচ করিতে আরম্ভ করে; শেষে তাহার সর্বনাশ হয়। ক্রেতা যে দোকানে ধারে জিনিস লয়, সে সেই দোকানে জিনিস লইতেই বাধ্য, কারণ নহিলে দোকানদার নাশিত করিতে পারে, নানা দোকানে

দেনা হইলে তাগাদা আরও অধিক হয়—ইত্যাদি। কাজেই দোকানদার যাহা চাহে, তাহাকে তাহাই দিতে হয়; দোকানদারও সুবিধা পাইয়া তাহার নিকট যথাসম্ভব অধিক লয়—বাণী টাকাটা পোষান চাহি—তন্নিম্ন আদায়ের সম্ভাবনার জন্তও কতকটা ভয় আছে। ক্রেতা যেন বিক্রেতার দাস হইয়া পড়ে!

আবার ধারে বিক্রয়ের প্রথায় অসাধুর ঋণ সাধুকে শোধ করিতে হয়—উদোর পিণ্ডি বুদোর ঘাড়ে পড়ে। অসাধু ক্রেতার নিকট যে টাকাটা অনাদায় পড়ে—দোকানদার তাহা মোটের উপর অথ সব জিনিসের উপর পোষাইয়া লয়;—তাহার আর সব ক্রেতাকেই প্রকারান্তরে সেই টাকাটা দিতে হয়।

ইংলণ্ডে অনেকগুলি দোকান কেবল নগদ বিক্রয় করে। তাহাদের হিসাব নিকাশে দেখা যায়, তাহারা যদিও অথ সব দোকানের অপেক্ষা শতকরা কুড়ি টাকা কম দামে জিনিস বিক্রয় করে, তথাপি তাহাদের লাভ অথ দোকানের লাভের অপেক্ষা অধিক ভিন্ন—অল্প নহে। লণ্ডনের এইরূপ নগদে বিক্রয়-ব্যবসায়ী একটা দোকানের মূল্য তালিকা দেখিয়া মফঃস্বলে একজন দোকানদার বলিয়াছিল,—এ দোকানে আমার দোকানের অপেক্ষা শতকরা কুড়ি টাকা কম দামে জিনিস পাওয়া যায় সত্য, কিন্তু ইহারা যে কেবল নগদে কারবার করে। আমি যদি কেবল নগদে কারবার করিতে পাই, তবে আমিও এখনকার অপেক্ষা শতকরা কুড়ি টাকা কম দামে জিনিস বিক্রয় করিতে পারি; অধিকন্তু তাহাতে আমার অধিক লাভ থাকে।

কথাটা খুবই সত্য। লণ্ডনে অনেকগুলি Co-operative সমিতির দোকান আছে। তাহাদের লাভের কতকটা ক্রেতাদিগের মধ্যে বিভক্ত হয়। তাহারা ধারে বিক্রয় করে না। তাহাদের হিসাব দেখিয়া অর্থনীতিবিদগণ এই সিদ্ধান্তে উপনীত হইয়াছেন যে, ধারে জিনিস বিক্রয়ের প্রথায় ক্রেতাকে শতকরা কুড়ি টাকা অধিক দিতে হয়; অর্থাৎ নগদে কাজ হইলে তিনি যাহা একশত টাকায় পাইতেন, ধারে কাজ হওয়ার তাহাকে তাহারই জন্ত একশত কুড়ি টাকা দিতে হয়। বিস্ময়ের বিষয় এই যে, এই শতকরা কুড়ি টাকা “টেক্স” আমরা দিয়া থাকি, অথচ তাহার কথা জানিও না। গভর্নমেন্ট যদি এখন নিয়ম করেন যে, যে যত টাকার জিনিস কিনিবে, তাহাকে সেই টাকার উপর শতকরা কুড়ি টাকার একটা “টেক্স”

দিতে হইবে; তবে আমরা তাহার বিরুদ্ধে কতই আপত্তির উত্থাপন করি, অথচ আমরা স্বেচ্ছায় এই শতকরা কুড়ি টাকা “টেক্স” দিয়া আসিতেছি!

কাজেই দেখা যাইতেছে, ধারে ত্রয়বিক্রয় উঠিয়া গেলে, ক্রেতা ও বিক্রেতা উভয় পক্ষেরই বিশেষ লাভ হয়।

শ্রীহেমেন্দ্রপ্রসাদ ঘোষ ।

## বঙ্গবালিকার প্রাণ ।

সংসারে বালক-বালিকার প্রাণ পূর্ণবয়স্ক নরনারীর হৃদয় অপেক্ষা কোমল হইয়া থাকে, ইহা সর্ববাদিসম্মত। স্বার্থচিন্তা এবং আত্মসুখাভিলাষ সম্পূর্ণরূপে ইহাদের অন্তঃকরণে অধিকার করিতে পারে না বলিয়াই, এই প্রভেদ পরিলক্ষিত হয়। আবার সাধারণতঃ পুরুষ অপেক্ষা নারীর প্রাণ অধিক কোমল বলিয়া, বালক অপেক্ষা বালিকার প্রাণে স্নেহমমতা ও পর-দুঃখ-কাতরতা সমধিক প্রবল। বঙ্গরমণী ভিন্নদেশীয় নারীগণের সহিত অথ বিষয়ে তুলনায় সমকক্ষ না হইলেও, হৃদয়ের কোমল গুণে বোধ হয়, এখনও জগতের আদর্শস্থানীয়। সুপরিচিত নব্যকবি প্রিয়সুহৃৎ শ্রীযুক্ত দ্বিজেন্দ্রলাল রায়, বঙ্গরমণীর গুণগান করিতে যাইয়া ইহাদিগকে ‘জীব-প্রেমপূরিত-হৃদয়া’ ‘দেবী’ বলিয়া বর্ণনা করিয়াছেন। আমরা এ বর্ণনার সম্পূর্ণ অনুমোদন করি। বস্তুতঃ এ বিষয়ে ভারতের অগাথ প্রদেশের রমণীপ্রকৃতি ও বঙ্গরমণীর প্রকৃতি হইতে পৃথক। কয়েক বৎসর হইল, আমি আমার একজন আত্মীয় সমভি-ব্যাহারে কলিকাতার, অদূরবর্তী কোন এক স্থানে গঙ্গায় অবগাহন নিমিত্ত গমন করি। আষাঢ় মাস, প্রায় সন্ধ্যা হইয়া আসিয়াছে। গঙ্গার জল বাড়িয়াছে। আমরা জলে নামিব, এমন সময়ে একটা নীচজাতিয়া বর্ষীয়সী স্ত্রীলোক ঘাট হইতে আমাদের কাছে কহিল, “বাবা! নদীতে হাঙ্গর আসিয়াছে, সিঁড়ির উপর বসিয়াই গা ধোন, আপনারা জলে যাইবেন না।” আমার আত্মীয় চিরদিন কাশীধামে অবস্থিত করেন, তিনি বৃদ্ধার কথাটা শুনিয়া একটু হাসিলেন এবং আমাদের কহিলেন, “দেখিবেন, বাঙ্গালী স্ত্রীলোকের প্রাণ আর পশ্চিমা স্ত্রীলোকের প্রাণ! আমার মনে আছে, একদিন কাশীতে

সন্ধ্যার সময়ে একটা সঙ্কীর্ণ গলিতে চলিতে চলিতে আমাদের সঙ্গী একটা লোক পথের পার্শ্ব গর্ভে পড়িয়া যায়। একটা স্ত্রীলোক নিকটে বসিয়া কলা বেচিতেছিল। লোকটা বিলক্ষণ বোনা পাইয়াছিল, কিন্তু সে দেখিয়াই হাসিয়া বলিয়া উঠিল, “মরদ্ হোকে গির গিয়া”—পুরুষ (হইয়া) পড়িয়া গিয়াছে। এই বৃদ্ধা সেখানে থাকিলে নিশ্চয় বলিত, “আহা বাবা বড় লেগেছে!” ও আমাদিগকে চেনেনা, অথচ জলে নামিবার পূর্বেই সাবধান করিয়া দিতেছে।” পাঠক দেখিবেন, উভয়ে কত প্রভেদ! একজন ভাবী আশঙ্কা নিবারণের জন্য পূর্ব হইতে সতর্ক; অথো উপস্থিত যাতনা দেখিয়াও উপহাস করিতে কুঞ্জিত নহে। তাই বলিতেছিলাম পরদুঃখ-কাভরতার বঙ্গনারী বৃদ্ধি অধিতীয়।

বঙ্গবালিকার প্রাণ যে আরও কোমল হইবে তাহাতে সন্দেহ কি? বর্তমান প্রবন্ধে আমরা কোন বঙ্গবালিকার একটীমাত্র উক্তির উল্লেখ করিয়া তাহার প্রাণের পরিচয় দিব। এই বালিকা বঙ্গের কোন সুবিখ্যাত দানশীল ভূম্যধিকারীর ছহিতা, এবং অথ এক ধনাঢ্য ভূস্বামীর পুত্রবধু। কয়েক বৎসর হইল ইহার বিবাহ হইয়াছে। ভূস্বামীর একমাত্র পুত্র, স্ততরাং শ্বশ্রু-ভবনেও বধুর আদর অত্যন্ত অধিক। আমরা যে সময়ের কথা বলিতেছি, তখন ইহার বয়ঃক্রম ত্রয়োদশ বৎসর। ঐকদিন সন্ধ্যার সময়ে ইহার শ্বশুর-বাড়ীর স্নায়ুলবর্গ এবং অথাত্ত ভৃত্যগণ বড়ই উল্লাসিত হইয়া আমোদ করিতেছিল। তাহাদের মধ্যে সন্দেশ মিঠাই বৃষ্টি হইতেছিল। বধু তাহার শ্বশ্রুকে জিজ্ঞাসা করিলেন, “মা! ইহাদের আজ এত আমোদ দেখিতেছি কেন?” শ্বশ্রু উত্তর করিলেন, “আজ আমাদের একটা নূতন জমিদারী খরিদ হইয়াছে, তাহার আয় প্রায় দশ হাজার টাকা। সেই সংবাদ আজ বৈকালে আসিয়াছে বলিয়া উহারা সন্দেশ মিঠাই কিনিয়াছে। যে জমিদারের এই সম্পত্তি ছিল, পূর্বেই তাহার কতক সম্পত্তি আমাদের কেনা হইয়াছিল, এইটাই তাহার বড় জমিদারী, তাহা আজ খরিদ হইয়াছে।” বালিকাবধু পুনরায় প্রশ্ন করিলেন, “হাঁ মা! তাঁর জমিদারী বিক্রয় হইল কেন?” শ্বশ্রু কহিলেন, “দেনার জথো, গুনিয়াছি তিনি বড়ই বেহিসাবী লোক, আয় অপেক্ষা ব্যয় বেশী তাহার চিরদিন।” “আচ্ছা মা! এখন তাঁর চলিবে কিসে?” বলিয়া বধু কাতরভাবে শ্বশুরের মুখের দিকে চাহিলেন। “আর চলিবে কিসে, কষ্ট

পাবেন;” যা ছিল, সবই গেল;” এই বলিয়া শ্বশুরী উত্তর করিলেন। বালিকা এইবার কাঁদো কাঁদো মুখে কহিলেন, “মা! ঠাকুরকে (শ্বশুরকে) বলুন, তাঁর জমিদারীটা ফিরাইয়া দিতে; মা! চিরকাল জমিদারী করে এখন কি কষ্টই হবে তাঁর! আচ্ছা মা! আমাদের বাড়ীতে আজ এই আমোদ; কিন্তু তাঁদের বাড়ীতে বোধ হয়, উলুনে হাঁড়িও চড়েনি। ওদের বারণ করুন আমোদ কর্তে।” শেষের কথাগুলির সঙ্গে বালিকার চক্ষুঃ দিয়া জল পড়িল। শ্বশুরী প্রাণে বিলক্ষণ আঘাত লাগিল, তিনি তৎক্ষণাৎ স্বামীকে ডাকিয়া সমস্ত কথা কহিলেন, বিষয়ী শ্বশুরেরও হৃদয় বিচলিত হইল। তিনি তৎক্ষণাৎ আমলাদিগের আমোদ বন্ধ করিয়া দিলেন। এই ঘটনার কিছুদিন পরেই তিনি আমাদের নিকট ইহার উল্লেখ করিয়া কহিলেন, “যে মানুষের মেয়ে একথা ত বলিবেই। কথাটা আমার প্রাণেই এত লাগিয়াছে যে, সেই অবধি কেবলই মনে হয়, কোনরূপে এই সর্বস্বান্ত জমিদারের গ্রাসাচ্ছাদনের সংস্থান রাখিয়া দেই।” ইহার পরে তিনি কি করিয়াছিলেন, বালিকার প্রার্থনা কতটা সফল হইয়াছিল কি না, আমরা তাহার সংবাদ রাখিব না। কিন্তু কথাটা গুনিয়াই প্রাণে এত আহ্লাদ হইয়াছিল যে, তাহা লিখিয়া বুঝাইবার নহে। সংসারে অনেক সময়েই একের সম্পত্তির বৃদ্ধি হইতে হইলে, অথোর সম্পত্তির ক্ষয় হইয়া থাকে। কিন্তু আমাদের বাড়ীতে, আমোদ, তাদের হৃদয় উলুনে হাঁড়িও চড়ে মাই; এমন ভাব সহসা কয়জনের হৃদয়ে উদয় হয়? উপরোক্ত ভূস্বামীর বাড়ীতেই এই দেবস্বভাবা বালিকা ব্যতীত অথ কাহারও মনে এমন চিন্তার উদয় হয় নাই। তবে বালিকার শ্বশুরের গায় আমরাও স্বীকার করিতে প্রস্তুত যে, যেমন পিতা, তাহাতে ছহিতা এইরূপই হওয়া উচিত। “আকরে পদরাগাণাং জন্মঃ কাচমণেঃ কুতঃ?” ফলতঃ এই বালিকার পিতার গায় দানশীল ও উদারস্বভাবের জমিদার আমরা অল্পই দেখিয়াছি। অনেকস্থলেই তাহার দান গৃহীতা ভিন্ন অথো জানিতে পারে না। ইহা অপেক্ষা অধিক পরিচয় আর আমরা দিব না। ছহিতা পিতার হৃদয় সম্পূর্ণ পাইয়াছেন, সন্দেহ নাই; পরের প্রতি মমতা, ছঃখীর প্রতি দয়া চিরদিন তাহার সমান থাকিবে, ইহাই আমাদের বিশ্বাস। ভগবান তাহাকে দীর্ঘজীবনী করুন।

## আজ।

বনে বনে ফিরিতেছি, পাখী আর গাহে না ;  
নয়নে নাহি কি আর প্রণয়ের রাগ ?  
বনে বনে ফিরিতেছি, ফুল আর চাছে না ;  
কপোলে নাহি কি আর চুষনের দাগ ?

ঘরে ঘরে ফিরিতেছি, শিশু আর হাসে না ;  
মুখেতে নাহি কি আর কল্পনার ভাষা ?  
দ্বারে দ্বারে ফিরিতেছি, নারী কাছে আসে না ;  
হৃদয়ে নাহি কি আর সৌন্দর্য-পিপাসা ?

কাছে কাছে ফিরিতেছি, সখা আর ডাকে না ;  
নিতে দিতে পারি না কি সুখ দুখ আর ?  
পাছে পাছে ফিরিতেছি, কেহ কাছে থাকে না ;  
হারায় কি ফেলিয়াছি বাঁশরী আমার ?

বেড়াইব ঘুরে ঘুরে ঘাটে মাঠে পথে কি  
বায়ু-বিতাড়িত গুরু পুত্রের মতন !  
যৌবন-মধ্যাহ্নে এই, সুন্দর জগতে কি,  
শরতের মেঘ মত, নিস্পৃহ জীবন !

কারো দৃষ্টি, কারো শ্বাস, কভু কারো স্পর্শ কি  
লবে না আপন করি এ শূন্য হৃদয় ?  
পীরিতি কল্পনা আশা সুখ দুখ হর্ষ কি  
এ জীবনে পাইবে না কারো পদাশ্রয় !

শ্রীঅক্ষয়কুমার বড়াল।

## বিশ্ব-রচনা।

হর্সেলের পর যে সকল প্রথিতমহিমা জ্যোতির্বিদগণ তারাজগতের গঠন-পদ্ধতির বিষয় অনুশীলন করিয়াছিলেন, তাহাদিগের মধ্যে পল্‌কোবর বেথালয়ের অধ্যক্ষ জ্যেষ্ঠ ষ্ট্রুবের মত বিবৃত হইতেছে। তারাজগতের গঠন-সম্বন্ধে ষ্ট্রুবের যে বিচারণ, তাহা প্রধানতঃ বেস্‌সেল্‌ কর্তৃক পরিলক্ষিত বিষুবমণ্ডলের উভয়পার্শ্বে ১৫° বিস্তীর্ণ অর্থাৎ ৩০° পরিমিত আকাশের মধ্য-মেখলার অন্তর্গত তারাসংখ্যার উপরে সংস্থাপিত। যে অনুমানের উপর ষ্ট্রুবের মত সংস্থাপিত, তাহা হর্সেলের উত্তরকালীন মতের বিসদৃশ নহে; কারণ ষ্ট্রুবও মনে করিতেন যে, তারাগণের শ্রেণীর দ্বারা তাহাদের দূরত্ব লাভ হয় অর্থাৎ তারাগণের দূরত্ব তাহাদিগের ঔজ্জ্বল্যের শিলোমানুপাতী,—যে বত নিকট, সে তত উজ্জ্বল। হর্সেলের মত এই যে, যদি রবিকে মধ্যে রাখিয়া এরূপ হিসাবে কতিপয় সঙ্কেদিক গোলকল্পনা করা যায়, যে গোলকল্পনের মধ্যগত স্থানের সহিত তারাশ্রেণীর সামঞ্জস্য থাকে, তবে উত্তরোত্তর মত উর্দ্ধদিকে যাইবে, মন্দাকিনীতে এবং মন্দাকিনীতে ততই তারাগণের নিবিড়তার বৃদ্ধি দেখিতে পাইবে। এ সিদ্ধান্ত পূর্বোক্ত তথ্য হইতেই উপলব্ধি হয়; কারণ তারা যত ছোট ছোট হয়, ততই তাহারা মন্দাকিনী প্রদেশে ঘন ঘন দেখায়। ষ্ট্রুব বলেন যে, যে সকল তারা শুধু চক্ষে স্পষ্টরূপে দেখা যায় অর্থাৎ যদি কেবল পঞ্চম শ্রেণীর তারাগুলি ধর, তবে সেগুলি মন্দাকিনীতে যেমন নিবিড়, নভোমণ্ডলের অগ্রাংশ ভাগেও তেমনই নিবিড়; কিন্তু মন্দাকিনী প্রদেশে ষষ্ঠ শ্রেণীর তারা অগ্রাংশে অপেক্ষা নিবিড় তরে এবং সপ্তম শ্রেণীর গুলি ততোধিক নিবিড়। এইরূপ বিচারের বিষয়মত দৃষ্টিবস্তুর শক্তি অনুসারে উত্তরোত্তর বেশী বেশী দেখা যায়।

এই সকল দেখিয়া শুনিয়া ষ্ট্রুব সিদ্ধান্ত করিলেন যে, তারা-জগৎ মন্দাকিনীক্ষেত্রের সমান্তর তারাস্তরে সংগঠিত। এই স্তর সকলের তারার নিবিড়তা সমান নহে। মধ্য স্তরগত ও তৎপার্শ্বগত তারাগণের নিবিড়তা সর্বাপেক্ষা অধিক; এবং এই মধ্যস্তরের মধ্যস্থলে আমাদের রবির অবস্থিতি।

এই মধ্যস্তর হইতে বহির্গমন করিলে উভয়পার্শ্বে তারাগণের 'ক্রমশঃ বিরলতা' দৃষ্ট হইতে থাকে। কিন্তু স্তর হইতে স্তরান্তর কোথা শেষ বা আরম্ভ হইল, এরূপ সুপরিচ্ছিন্ন সীমা লাভ হয় না; যেমন নভোমণ্ডলের উর্দ্ধে উঠিতে থাকিলে বায়ু উত্তরোত্তর পাতলা দেখা যায়, অথচ বায়ু এত অল্পে অল্পে পাতলা হইতে থাকে যে, বায়ুমণ্ডল কোথা শেষ হইল, তাহার ঠিকানা করা যায় না; তেমনই ষ্ট্রুবের মত এই যে, যদি আমরা মন্দাকিনীর এড়া দিকে বায়ুমণ্ডলে আরোহণ করি, তবে বায়ুর মত তারা সকল ক্রমে ক্রমে পাতলা দেখিব।

হর্সেলের দূরবীক্ষণের নভোমণ্ডল ভেদ করিয়া যতদূর পর্যবেক্ষণ করিবার শক্তি ছিল, সেই দূরত্বকে একক ধরিয়া ষ্ট্রুব মন্দাকিনীর উভয় পার্শ্বের তারাগণের নিবিড়তার এইরূপ হিসাব দিয়াছেন।

মন্দাকিনীর মধ্যগত প্রধান ক্ষেত্র হইতে অন্তর	নিবিড়তার পরিমাণ	সন্নিহিত তারাদ্বয়ের মধ্যম ব্যবধান।
প্রধান ক্ষেত্রে	১. ০০০০০	১. ০০০
প্রধান ক্ষেত্র হইতে ০. ০৫ অন্তরে	০. ৪৮৫৬৮	১. ২৭২
" " ০. ১০ "	০. ৩৩২৮৮	১. ৪৫৮
" " ০. ২০ "	০. ২৩৮২৫	১. ৬১৩
" " ০. ৩০ "	০. ১৭৯৮০	১. ৭৭২
" " ০. ৪০ "	০. ১৩০২১	১. ৯৭৩
" " ০. ৫০ "	০. ০৮৬৪৬	২. ২৬১
" " ০. ৬০ "	০. ০৫৫২০	২. ৬২৮
" " ০. ৭০ "	০. ০৩০৭৯	৩. ১৯০
" " ০. ৮০ "	০. ০১৪১৪	৪. ১৩১
" " ০. ৮৬৬ "	০. ০০৫৩২	৫. ৭২৯

মধ্যক্ষেত্রে তারাগণের নিবিড়তা এবং উভয়পার্শ্বে তারাগণের ক্রম বিরলতা দ্বারা তারাবিছাসের সাধারণ ভাবমাত্র উপলব্ধি হয়। পরন্তু নিজ মধ্যক্ষেত্রগত এক প্রদেশের তারাগণ অল্প প্রদেশের তারাগণ অপেক্ষা বহুগুণে

নিবিড় হওয়ার বিলক্ষণ সম্ভাবনা; আর মধ্যক্ষেত্র পরিত্যাগ পূর্বক পার্শ্বদ্বয়ে যাও, সেখানেও দেখিবে বিরলতার হার নানাস্থানে নানারকম। পার্শ্বদ্বয়ে যে ক্রমবিরলতা তাহা অবশ্য অস্বীকর্তব্য নহে; কিন্তু ষ্ট্রুবের প্রমাণ প্রশস্ত বলিয়া অনেকে মনে করেন না; কারণ তিনিও হর্সেলের স্থায় তারাগণ যে বস্তুতঃ ছোট বড়, তা না স্বীকার করিয়া, স্বীকার করিতেন যে, পৃথিবী হইতে তারাগণের দূরত্ব নিবন্ধন তারাগণ ছোট বড় দেখায়। যে স্থলে তারাবিছাস প্রায় সমভাবাপন্ন, সেস্থলে এককল্পনা নিতান্ত দোষের না হইতে পারে, কিন্তু অসমভাবে বিচ্ছিন্ন তারাস্তূপে উপনীত হইলে, বিশেষতঃ দূর-বীক্ষণ ভেদ্য তারাগণের উপাত্তে আসিলে বিষয়টি সম্পূর্ণ রূপান্তর ধারণ করে। এস্থলে উপাত্তে স্থিত ক্ষুদ্র ক্ষুদ্র তারা সকলকে পৃথক পৃথক রূপে নির্বাচন করাই হুঃসাধ্য, এবং বড় বড়গুলি সীমার বাহিরে পড়িল, তবেই ষ্ট্রুবের ক্রম-বিরলতা যে তারাগণের উজ্জ্বলতার বাস্তব তারিতম্যজমিত তাহা বলিতে হইল।

তারাগণ সম্বন্ধে ইদান্তিন জ্যোতির্বিদগণের মধ্যে সুবিখ্যাত প্রকটরের বিচারণা সবিশেষ আলোচনার বিষয়; কারণ যে সকল তথ্য তাহার মতের ভিত্তিমূল, সে সকল তথ্য পূর্বোক্ত অল্পসঙ্খ্যাতারাগণের সুপরিচিত, বা পর্যাবহিত ছিল না। প্রকটর বলেন যে, যিনিই তারাগণের বিছাসসম্বন্ধে মত প্রকাশ করিয়াছেন, তিনিই স্বীকার করিয়াছেন যে, তারাগণ বাস্তব উজ্জ্বলতা সম্বন্ধে সদৃশ ভাবাপন্ন অথবা তাহারা অন্তরীক্ষের সর্বত্র সমভাবে সন্নিবিষ্ট,—এই বিষয়প্রমাদে সকলেই পড়িয়াছেন। প্রকটরের এ কথায় কাহার দ্বিকল্পিত কল্পনার শক্তি নাই।

তিনি বলেন, যে, নভোমণ্ডলের নানাস্থানে বহুসংখ্য তারা আছে। সেই সকল তারাসংঘের এমন একটি সাধারণ বাস্তব গতি আছে যে, তাহা উক্ত তারাসংঘের অন্তর্ভূত বা তৎপার্শ্বস্থ তারাগণের গতি হইতে সম্পূর্ণ বিসদৃশ। তবেই এরূপ তারাসংঘযোগে এক একটি তারাবূহ সংগঠিত হইয়াছে। এই ব্যূহের গতিজনিত তদন্তর্গত তারাগণের গতি ঘটয়া থাকে, অথচ তাহাদের সাপেক্ষিক গতির কোন ব্যত্যয় ঘটে না। বুধরাশি, এবস্তৃত তারা-বূহের একটি অপূর্ব উদাহরণস্থল। রোহিণী ও কৃত্তিকার মধ্যগত বহুসংখ্যক সমুজ্জ্বল তারা প্রতি শতবর্ষে চাপাত্মক ১০ বিকলা পরিমাণে পূর্বাভিমুখে

গমন করে। এ তারাংঘে কতগুলি তারা আছে, তাহা 'কেহই' বলিতে পারেন না, কারণ সমুজ্জল তারা ভিন্ন অপরাগুলির গতি পুঙ্খানুপুঙ্খরূপে নিরূপিত হয় নাই। সপ্তর্ষির 'অর্কগত' ঐ তারা এইরূপ স্বকীয় গতি আছে। এ ছাড়া আরও কত তারা বৃহৎ আছে। অতএব প্রকটর বলেন, মন্দাকিনী এবস্তৃত তারা বৃহৎ হইতে পারে। আর মন্দাকিনীর যে আয়তি হর্সেল নির্দিষ্ট করিয়াছেন, তাহা না হইতে পারে।

ভিন্ন ভিন্ন শ্রেণীর তারাগণের ব্যুহভাবত্ব সম্বন্ধে আরও পর্যবেক্ষণ না হইলে শুদ্ধ প্রকটরের বিচারণার উপর নির্ভর করিয়া বিশ্বরচনাবাদ পক্ষে কত দূর মত পরিবর্তন করা যাইতে পারে, তাহা বিবেচ্য। পরন্তু নির্দিষ্টবাদে বলা যাইতে পারে যে, পূর্বাংগে এখন তারাগণ মধ্যে যে ব্যুহভাব প্রাপ্তি পক্ষে একটা প্রবণতা আছে, তাহার প্রমাণ অধিক পাওয়া যাইতেছে। অর্থাৎ তারাগণের পরস্পর সংযোগাধীন আকার বিশেষ প্রাপ্তির প্রতি যে ঝোক, তাহা বেশী বেশী দেখা যাইতেছে। কতিপয় যুগল তারার কক্ষা পর্যবেক্ষণ করিয়া উইলসন্ সাহেব যে অপূর্ব ফললাভ করিয়াছেন, তদ্বারা উক্ত প্রবণতা অনেকটা বিশদীকৃত হইয়াছে। জ্যোতিষ-জগতে লক্ষ্য্যতি মরালকে ৬১ সংখ্যক তারাযুগলের মধ্যে যে প্রাকৃত সংযোগ আছে, তাহা বিনিঃসন্দেহ, তথাপি পরস্পরের আকর্ষণজনিত, তাহাদিগের গতিতে কোন রকম ব্যতিক্রম লক্ষিত হয় না। ১৭৫৩ হইতে ১৮৭৪ পর্যন্ত উক্ত তারাযুগলের পরীক্ষণ করিয়া উপলব্ধি হইয়াছে যে, তাহাদিগের গতি সমভাবাপন্ন এবং প্রত্যেকে স্বতন্ত্রভাবে চলিতেছে। কিন্তু তারাংঘের যুগলত্ব প্রযুক্ত ব্যবধানের এতই স্বল্পতা যে, তাহাদের গতির স্বাতন্ত্র্য সহজে স্বীকার করা যায় না। সুতরাং বলিতে হইবে যে, তারা দ্বিতয়ের প্রত্যেকে তাহাদের ভারমধ্যপরিত সুরহৎ কক্ষায় পরিভ্রমণ করিতেছে। এ কক্ষার পরিমাণ চাপাঙ্গক কতিপয় বিকলা, কলা নহে; কতিপয় অংশ ও ভগণ কাল হাজার হাজার বৎসর হওয়া সম্ভব। তারাংঘের মধ্যে এখন যে ব্যবধানটুকু আছে, তাহা এখন হইতে ২০০০ বৎসর অতিবাহিত না হইলে পরিমেষ বলিয়া বোধ হইবে না।

পুনর্স্বনক্ষত্রের আলফা অঙ্কিত কস্তুরাখ্য তারাটি উক্তব্য ভাবাপন্ন যুগল তারার উদাহরণান্তর। ইহার কক্ষা ভ্রম রেখাকার বলিয়া প্রতীতি

হয়। কক্ষা যদি ভ্রমরেখা হয়, তবে তারাংঘের মধ্যে কোনরূপ, প্রাকৃতিক সম্বন্ধের অস্তিত্ব সম্ভবনীয় নহে। প্রত্যুত তারাংঘ অন্তরীক্ষে ভ্রমণ করিতে করিতে অকস্মাৎ কিয়ৎকালের জন্ত এত সন্নিহিত হইয়াছে যে, পরস্পর পরস্পরের আকর্ষণাধীন হইয়া পড়িয়াছে, এবং কালবশাৎ ক্রমে ক্রমে চিরকালের জন্য অন্তরিত হইতে থাকিবে; আর এখন একত্রিত হওয়ার পর যে ভাবে একত্রিত হইবার পূর্বে সে ভাবে চলিত না। পরন্তু উক্ত কক্ষা যে ভ্রমরেখাকার তাহা স্থির সিদ্ধান্ত বলিয়া গ্রহণ করা যাইতে পারে না। কারণ এস্থলে বৃহদ্ব্যুহভাবসে ও ভ্রমরেখায় যে ভেদ তাহা ধরা বড় কঠিন। ফলতঃ উক্ত জ্যোতিষদ্বয়ের স্বীয় সাধারণ গতি দেখিয়া প্রতীতি হয় যে, তদ্বয় যুগলতারা এবং প্রত্যেক অনেক তফাতে গিয়া পড়ে।

তবেই অনেক অনেক যুগল তারাকে তাহাদের সাধারণ ভারমধ্য পরিতঃ সুরহৎ কক্ষায় ভ্রমণ করিতে দেখিয়া, বিশ্বাস হইতে পারে যে, নভো-মণ্ডলে এবস্তৃত বহুসংখ্যক তারাযুগল, তারাস্তূপ এবং তারাংঘ আছে; তাহাদের অঙ্গীভূত তারা সকল পরস্পর হইতে এত তফাৎ যে, কখন কেহ অনুমান করিতে পারে নাই, যে তাহারা সম্বন্ধবিশেষে আবদ্ধ। এবং দিগ্দিগন্তে বিক্ষিপ্ত স্বকীয় সাধারণ গতিবিশিষ্ট তারাস্তূপ সকল উক্তরূপ ব্যুহ বিশেষের অঙ্গ হইতে পারে।

কতিপয় পারিভাষিক শব্দের ইংরাজী।

আয়তি,	Extension.	মন্দাকিনী,	Galaxy, Milky way.
আলফা,	Alpha.	মরালক,	Cygnus.
একক,	Unity.	যুগল,	Binary.
কস্তুর,	Castor.	রোহিণী,	Aldebaran.
কৃত্তিকা,	Pleiades.	বাদ,	Theory.
ক্ষেত্র,	Plane.	বিকলা,	Second.
চাপাঙ্গক,	Angular.	বিশ্বাস,	Arrangement.
ঝোক,	Tendency.	বিরলতা,	Thinness.
তথ্য,	Fact.	বেধালয়,	Observatory.
তারাস্তূপ,	Cluster of stars.	বেসসেল্‌স,	Bessels.



নিবিড়তা,	Thickness, density.	ব্যুহ,	System.
পুনর্কক্ষ,	7th. Lunar mansion.	শ্রেণী (তারা)	Magnitude.
পুলকোবা,	Pulkowa.	ধ্রুব,	Struve.
প্রকটর,	Proctor.	সংকেন্দ্রিক,	Concentric.
প্রবলতা,	Tendency.	সপ্তর্ষি,	Ursamajor.
ভ্রমরেখা,	Hyperbola.	সামঞ্জস্য,	Correspondence.
ভেদ্য	Penetrable.	সুপরিচ্ছিন্ন,	Well defined.

শ্রীমাধবচন্দ্র চট্টোপাধ্যায়।

## শ্রীশ্রীরামকৃষ্ণকথামৃত ।\*

(শ্রীম—কথিত ।)

[ শ্রীশ্রীরামকৃষ্ণ পরমহংসের সিন্দুরিয়াপটী ব্রাহ্মসমাজে  
গমন ও শ্রীযুক্ত বিজয়কৃষ্ণ গোস্বামী প্রভৃতির  
সহিত কথোপকথন । ]

কার্তিক মাসের কৃষ্ণা একাদশী তিথি। ইংরাজী ২৬শে নবেম্বর, ১৮৮৩ খ্রীষ্টাব্দ। শ্রীযুক্ত মণিমল্লিকের বাটীতে সিন্দুরিয়াপটী ব্রাহ্মসমাজের অধিবেশন হইত। বাড়ীটী চিৎপুর রোডের উপর, পূর্বধারে; হারিসন রোডের চৌমাথা—যেখানে বেদানা, পেস্তা, আপেল এবং অগ্ন্যাগ্ন মেওয়ার দোকান আছে, সেখান হইতে কয়েকখানি দোকান-বাড়ীর উত্তরে। সমাজের

\* এই প্রবন্ধটী ইতঃপূর্বে শাবণের “নব্যভারতে” প্রকাশিত হয়। সেইজন্য আমরা পুনরায় ইহা “উৎসাহে” প্রকাশ করিতে ইতস্ততঃ করি। তাহাতে লেখক মহাশয় লিখিয়াছেন “The teachings of Rama Krishna are of permanent interest and never get old.”—তাঁহার এই উদ্দেশ্যের আবশ্যকতা অনুভব করিয়া সাহিত্য প্রদীপ প্রভৃতি পত্র-সম্পাদকগণ প্রকাশিত প্রবন্ধ পুনঃ মুদ্রিত করিয়া থাকেন। এই উদ্দেশ্যে ইহা পুনরায় উৎসাহে প্রকাশিত হইল।

উৎসাহ সম্পাদক ।

অধিবেশন রাজপথের পার্শ্ববর্তী ছতলা হল-ঘরে হইত। আজ সমাজের সাপ্তাহিক; তাই শ্রীযুক্ত মণিমল্লিক মহোৎসব করিয়াছেন। উপাসনা-গৃহ আজ আনন্দপূর্ণ, বাহিরে ও ভিতরে হরিৎ বৃক্ষপল্লবে, নানাপুষ্প ও পুষ্পমালায় সুশোভিত। গৃহমধ্যে ভক্তগণ আসন গ্রহণ করিয়া প্রতীক্ষা করিতেছেন, কখন উপাসনা হইবে। গৃহমধ্যে সকলের স্থান হয় নাই, অনেকেই পশ্চিম-দিকের ছাদে বিচরণ করিতেছেন বা যথাস্থানে স্থাপিত সুন্দর বিচিত্র কাষ্ঠাসনে উপবিষ্ট হইয়াছেন। মাঝে মাঝে গৃহস্বামী ও তাঁহার আত্মীয়গণ আসিয়া মিষ্ট সম্ভাষণে অভ্যাগত ভক্তবৃন্দকে আপ্যায়িত করিতেছেন। সন্ধ্যার পূর্বে হইতেই ব্রাহ্ম ভক্তগণ আসিতে আরম্ভ করিয়াছেন। তাঁহারা আজ একটি বিশেষ উৎসাহে উৎসাহান্বিত। আজ শ্রীযুক্ত রামকৃষ্ণ পরমহংসের শুভাগমন হইবে। পরমহংসদেবের ব্রাহ্মদের উপর বিশেষ দৃষ্টি। ব্রাহ্মদের তিনি বড় ভালবাসেন, ব্রাহ্মসমাজের নেতৃগণ কেশব, বিজয়, শিবনাথ প্রভৃতি ভক্তগণকে তিনি প্রাণতুল্য ভালবাসেন। তাই তিনি ব্রাহ্ম ভক্তদের এত প্রিয়। পরমহংসদেব হরিপ্রেমে মাতওয়ারা, তাঁহার প্রেম, তাঁহার জলন্ত বিশ্বাস, তাঁহার বালকের স্থায় ঈশ্বরের সঙ্গে কথোপকথন, ভগবানের জন্য তাঁহার ব্যাকুল হইয়া ক্রন্দন, তাঁহার মাতৃজ্ঞানে স্ত্রীজাতির পূজা, তাঁহার বিষয়কথা বর্জন ও তৈলধারা তুল্য নিরবচ্ছিন্ন ঈশ্বরকথাপ্রসঙ্গ, তাঁহার সর্বধর্মসম্বরণ ও অপর ধর্মের বিদ্রোহ-ভাবলেশশূন্যতা, তাঁহার ঈশ্বরভক্তের জন্য রোদন, এই সকল ব্যাপার ব্রাহ্ম ভক্তদের চিত্তাকর্ষণ করিয়াছে। তাই আজ অনেকে বহুদূর হইতে তাঁহার দর্শন লক্ষ্যার্থে আসিয়াছেন।

[ শিবনাম ও সত্যকথা । ]

উপাসনার পূর্বে শ্রীরামকৃষ্ণ, শ্রীযুক্ত বিজয়কৃষ্ণ গোস্বামী ও অন্যান্য ব্রাহ্মভক্তদের সহিত সহাস্র বদনে আলাপ করিতে লাগিলেন। সমাজ-গৃহে আলো জ্বালা হইল, অনতিবিলম্বে উপাসনা আরম্ভ হইবে।

পরমহংসদেব বলিলেন “হ্যাঁগা শিবনাথ আসবে না?” একজন ব্রাহ্ম-ভক্ত বলিলেন, “না আজ তাঁর অনেক কাজ আছে, আসতে পারবেন না।” পরমহংসদেব বলিলেন, “শিবনাথকে দেখলে আমার বড় আনন্দ হয়, আহা।

যেন ভক্তিরসে ডুবে আছে; আর যাকে অনেকে গাণে মানে, তাতে নিশ্চয়ই ঈশ্বরের কিছু শক্তি আছে। তবে শিবনাথের একটা ভারি দোষ আছে—কথার ঠিক নাই। আমাকে বলেছিল যে, একবার ওখানে (দক্ষিণেশ্বরের কালী বাটীতে) যাবে, কিন্তু যায় নাই, আর কোন খবরও পাঠায় নাই। ওটা ভাল নয়। এই রকম আছে যে, দত্য কথাই কলির তপশ্রা। সত্যকে আঁট করে ধরে থাকলে ভগবান লাভ হয়। সত্যে আঁট না থাকলে ক্রমে ক্রমে সব নষ্ট হ'য়ে যায়। আমি এই ভয়ে, যদি কখনও বলে ফেলি যে, বাছে যাব, আর বাছে যদি না পায়, তবুও একবার গাড়ুটা সঙ্গে করে ঝাউতলার দিকে যাই। ভয় এই যে, পাছে সত্যের আঁট যায়। যখন আমার এই অবস্থার পর মাকে ফুল হাতে করে বলেছিলুম 'মা! এই নাও তোমার জ্ঞান, এই নাও তোমার অজ্ঞান, আমার শুদ্ধাভক্তি দাও, মা! এই নাও তোমার শুচি, এই নাও তোমার অশুচি, আমায় শুদ্ধাভক্তি দাও; মা! এই নাও তোমার ভাল, এই নাও তোমার মন্দ, আমায় শুদ্ধাভক্তি দাও; মা! এই নাও তোমার পুণ্য, এই নাও তোমার পাপ, আমায় শুদ্ধাভক্তি দাও'—যখন এই সব বলেছিলুম, তখন একথা বলতে পারি নাই 'মা! এই নাও তোমার সত্য, এই নাও তোমার অসত্য।' সব মাকে দিতে পারিনি, কিন্তু সত্য মাকে দিতে পারিনি না।

(উপাসনা, সঙ্কীৰ্তন ও পরমহংসদেবের সমাধি।)

ব্রাহ্মসমাজের পদ্ধতি অনুসারে উপাসনা আরম্ভ হইল। বেদীর উপরে আচার্য্য, সম্মুখে সেজ। উদ্বোধনের পর আচার্য্য পরব্রহ্মের উদ্দেশে বৈদ্যোক্ত মহামন্ত্র উচ্চারণ করিতে লাগিলেন। ব্রাহ্মভক্তগণ সম্বরে সেই পুরাতন আৰ্য্য ঋষির শ্রীমুখনিঃসৃত, তাঁহাদের সেই পবিত্র রসনার দ্বারা উচ্চারিত নাম গান করিতে লাগিলেন। বুলিতে লাগিলেন, "সত্যংজ্ঞানমনস্তং ব্রহ্ম আনন্দমমৃতম্ যদিভাতি শান্তম্ শিবম্ হৈতম্ শুদ্ধমপাপবিহ্বম্।" এই প্রণব সংযুক্ত ঋনি ভক্তদের হৃদয়াকাশে প্রতিধ্বনিত হইতে লাগিল। অনেকের অন্তরে বাসনা নির্বাপিতপ্রায় হইতে লাগিল। চিত্ত অনেকটা স্থির হইল ও ধ্যানপ্রবণ হইতে লাগিল। সকলেরই চক্ষুঃ মুদিত—ক্ষণকালের জন্ত বৈদ্যোক্ত সগুণ ব্রহ্মের চিন্তা করিতে লাগিলেন।

পরমহংসদেব ভাবে মগ্ন হইলেন। স্পন্দহীন, স্থিরদৃষ্টি, অবাধ, চিত্র পুতুলিকার স্থায় বসিয়া রহিলেন। যেন আত্মাপক্ষী কোথায় আনন্দে বিচরণ করিতেছে; আর দেহটীমাত্র, শূন্য মন্দির পড়িয়া রহিয়াছে।

সমাধি ভঙ্গের অব্যবহিত পরেই পরমহংসদেব চক্ষুঃ মেলিয়া চারিদিকে চাহিতে লাগিলেন, দেখিলেন, সভাস্থ সকলেই নিমীলিতনেত্র; তখন "ব্রহ্ম" বলিয়া হঠাৎ দণ্ডায়মান হইলেন। উপাসনান্তে ব্রাহ্মভক্তেরা খোল করতাল লইয়া নাম সঙ্কীৰ্তন করিতে লাগিলেন। শ্রীরামকৃষ্ণ প্রেমানন্দে মত্ত হইয়া তাঁহাদের সঙ্গে যোগ দিলেন, আর নৃত্য করিতে লাগিলেন। সে মধুর নৃত্য সকলে মুগ্ধ হইয়া দেখিতে লাগিলেন। শ্রীযুক্ত বিজয়কৃষ্ণ ও অন্যান্য ভক্তেরাও তাঁহাকে বেড়িয়া বেড়িয়া নাচিতে লাগিলেন। অনেকে এই অদ্ভুত দৃশ্য দেখিয়া ও কীর্তনানন্দ সন্তোগ করিয়া এককালে সংসার ভুলিয়া গেলেন। ক্ষণকালের জন্য তাঁহার হরিরসমুদ্র পান করিয়া বিষয়ানন্দ ভুলিয়া গেলেন। ক্লিয়-স্বখের রস তিক্তবোধ করিতে লাগিলেন। কীর্তনান্তে সকলে আসন গ্রহণ করিলেন। এক্ষণে পরমহংসদেব কি বলেন, শুনিবার জন্য সকলে তাঁহাকে ঘেরিয়া বসিলেন।

(গৃহস্থের প্রতি উপদেশ।)

সমবেত ব্রাহ্মভক্তগণকে সম্বোধন করিয়া তিনি বলিতে লাগিলেন;—

"নির্লিপ্ত হ'য়ে সংসার করা বড় কঠিন। প্রতাপ (মজুমদার) বলেছিল, 'মহাশয় আমাদের জনক রাজার মত। জনক নির্লিপ্ত হ'য়ে সংসার ক'রে ছিলেন, আমরাও তাই করিব।' আমি বলুম, 'মনে কল্পেই কি জনক রাজা হওয়া যায়? জনক রাজা কত তপশ্রা ক'রেছিলেন। তিনি হৈমন্ত উৎকপদ হ'য়ে অনেক বৎসর ঘোরতর তপশ্রা ক'রে তবে জ্ঞানলাভ ক'রেছিলেন। জ্ঞানলাভ ক'রে তবে সংসারে ফিরে গিছিলেন।' 'তবে সংসারী কি উপায় নাই? হাঁ অবশ্য আছে। দিন কতক নির্জনে সাধন, ক'র্তে হয়। নির্জনে সাধন ক'লে তিক্তলাভ হয়, জ্ঞানলাভ হয়, ভগবানের দর্শন লাভ হয়, তারপর গিয়ে সংসার কর, দোষ নাই। যখন নির্জনে সাধন ক'রবে, তখন সংসার থেকে একেবারে তফাতে যাবে, তখন যেন স্ত্রী, পুত্র,

কন্যা, পিতা, মাতা, ভাই, ভগিনী, আত্মীয় কুটুম্ব কেহ কাছে না থাকে। নিৰ্জনে সাধনের সময় ভাববে আমার কেহ নাই, ঈশ্বরই আমার সৰ্বস্ব। আর কেঁদে কেঁদে তাঁর কাছে জ্ঞান ভক্তির জন্য প্রার্থনা করবে।”

“যদি বল, কতদিন নিৰ্জনে সংসার ছেড়ে থাকব, তা একদিন যদি দুই রকম করে থাক, সেও ভাল, তিনদিন থাকলে আরও ভাল। বা বার দিন, এক মাস, তিন মাস, এক বৎসর যে যেমন পারে, জ্ঞান ভক্তি লাভ করে সংসার কল্লে আর বড় বেশী ভয় নাই।”

“হাতে তেল মেখে কাঁটাল ভাঙ্গলে হাতে আটা লাগে না।

“চোর চোর যদি খেল, বুড়ী ছুঁয়ে ফেললে আর ভয় নাই।

“একবার পরেশমণিকে ছুঁয়ে সোণা হও। সোণা হবার পর হাজার বৎসর যদি মাটিতে পোতা থাক, মাটি থেকে তোলবার পর সেই সোণাই থাকবে। “মনটি দুধের মত। সেই মনকে যদি সংসার-জলে রাখ, তা হ'লে দুধে জলে মিশে যাবে। তাই দুধকে নিৰ্জনে দই গোতে মাখন তুলতে হয়। মন-দুধ থেকে, যখন নিৰ্জনে সাধন করে, জ্ঞান ভক্তি রূপ মাখন তোলা হ'লো, তখন সেই মাখন অনায়াসে সংসার-জলে রাখা যায়। সে মাখন কখনো সংসার-জলের সঙ্গে মিশে যাবে না। সংসারজলের উপর নির্লিপ্ত হ'য়ে ভাসবে।”

( বিজয়কৃষ্ণ গোস্বামী । )

শ্রীযুক্ত বিজয়কৃষ্ণ গোস্বামী সবে গয়া হইতে ফিরিয়া আসিয়াছেন। সেখানে অনেক দিন নিৰ্জনে বাস ও সাধুসঙ্গ হইয়াছিল। এক্ষণে তিনি গৈরিক বসন পরিধান করিয়াছেন। অবস্থা ভারী সুন্দর, যেন সৰ্বদা অন্তমুখ। পরমহংসদেবের নিকট হেঁটমুখ হইয়া রহিয়াছেন, যেন মগ্ন হইয়া কি ভাবিতেছেন।

বিজয়কৃষ্ণ দেখিতে দেখিতে পরমহংসদেব তাঁহাকে বলিলেন “বিজয়! তুমি কি বাসা পাক্ড়েছ?”

“দেখ ছজন সাধু ভ্রমণ করিতে করিতে এক সহরে এসে পড়েছিল। একজন হাঁ করে সহরের বাজার, দোকান, বাড়ী দেখছিল, তখন অপরটির সঙ্গে দেখা হ'ল। তখন সে সাধুটী বললে, তুমি যে হাঁ করে সহর দেখছ, তলপী তালপা কোথায়? প্রথম সাধুটী বললে, আমি আগে বাসা পাক্ড়ে

তলপী তালপা রেখে ঘরে চাবি দিয়ে নিশ্চিন্ত হ'য়ে বেরিয়েছি। এখন সহরের রং দেখে বেড়াচ্ছি। (বিজয়ের প্রতি) তাই তোমায় জিজ্ঞাসা করছি, তুমি কি বাসা পাক্ড়েছ?”

(মাষ্টার ইত্যাদির প্রতি।) “দেখ বিজয়ের এতদিন ফোয়ারা চাপা ছিল, এইবার খুলে গেছে।

[ বিজয় ও শিবনাথ । নিষ্কামকর্মে ও সকাম কর্মে । ]

শ্রীরামকৃষ্ণ—(বিজয়ের প্রতি) “দেখ শিবনাথের ভারী ঝঞ্জাট। খবরের কাগজ লিখতে হয়, আর অনেক কর্মে কর্তে হয়। বিষয়কর্মে কল্লেই অশান্তি হয়, অনেক ভাবনা চিন্তা এসে জোটে।”

“শ্রীমদ্ভাগবতে আছে যে, অবধৌত চব্বিশ-গুরুর মধ্যে চিলকে একটা গুরু ক'রেছিলেন। এক জায়গায় জেলেরা মাছ ধর্তে ছিল, একটা চিল এসে একটা মাছ ছোঁমেরে নিয়ে গেল। কিন্তু মাছ দেখে পেছনে পেছনে প্রায় এক হাজার কাক চিলকে তাড়া ক'রে গেল এবং এক সঙ্গে কা কা ক'রে বড় গোলমাল কর্তে লাগলো। চিল মাছ নিয়ে যে দিকে যায়, কাকগুলোও তাড়া ক'রে সেই দিকে যেতে লাগল। দক্ষিণ দিকে চিলটা গেল, কাকগুলোও সেই দিকে গেল, আবার উত্তর দিকে যখন গেল, ওরাও সেই দিকে গেল। এইরূপে পূর্বাধিকে ও পশ্চিমাধিকে চিল ঘুরতে লাগলো। শেষে ব্যতিব্যস্ত হ'য়ে, ঘুরতে ঘুরতে মাছটা তার কাছ থেকে পড়ে গেল। তখন কাকগুলো চিলকে ছেড়ে মাছের দিকে গেল। চিল তখন নিশ্চিন্ত হ'য়ে একটা গাছের ডালের উপর গিয়া বসলো। বসে ভাবতে লাগলো, “ঐ মাছটা যত গোল ক'রেছিল। এখন মাছ কাছে নাই, তাই আমি নিশ্চিন্ত হলাম।”

“অবধূত চিলের কাছে এই শিক্ষা ক'ল্লেন যে, যতক্ষণ মুখে মাছ থাকে অর্থাৎ বাসনা থাকে, ততক্ষণ কর্মে থাকে, আর কর্মের দরুণ ভাবনা চিন্তা, অশান্তি। বাসনা ত্যাগ হ'লেই কর্মে ক্ষয় হয়, আর শান্তি হয়।

“তবে নিষ্কাম কর্মে ভাল। তাতে অশান্তি হয় না। কিন্তু নিষ্কাম কর্মে করা বড় কঠিন। মনে কচ্চি নিষ্কাম কর্মে কচ্চি, কিন্তু কোথা থেকে

সমস্যা এসে পড়ে, জানতে দেয় না। আগে যদি অনেক সাধন থাকে, সাধনের বলে কেউ কেউ, নিষ্কাম কৰ্ম করতে পারে। ঈশ্বর দর্শনের পর নিষ্কাম কৰ্ম অনায়াসে করা যায়। ঈশ্বর দর্শনের পর প্রায় কৰ্ম ত্যাগ হয়; তুই একজন যেমন নারদাদি লোকশিক্ষার জন্ত কৰ্ম করে।

( সঞ্চয় - 'Take no thought for the morrow.' )

শ্রীরামকৃষ্ণ—( বিজয়ের প্রতি ) “অবধূতের আর একটা গুরু ছিল—মোমাছি। মোমাছি অনেক কষ্টে অনেক দিন ধরে মধু সঞ্চয় করে। কিন্তু সে মধু নিজের ভোগ হয় না। আর একজন এসে চাক ভেঙ্গে নিয়ে যায়। মোমাছির কাছে অবধূত এই শিখলেন যে, সঞ্চয় করতে নাই। সাধুরা ঈশ্বরের উপর ষোল আনা নির্ভর ক’রবে, তাদের সঞ্চয় করতে নাই।

“এটা সংসারীর পক্ষে নয়। সংসারীর সংসার প্রতিপালন করতে হয়। তাই সঞ্চয়ের দরকার হয়। পাখী আর দর্কেশ (সাধু) সঞ্চয় করে না, কিন্তু পাখীর ছানা হ’লে সে সঞ্চয় করে—ছানার জন্য মুখে ক’রে খাবার আনে।

( বিজয়ের প্রতি, ) “দেখ বিজয়! সাধুর সঙ্গে যদি পুটলী পাটলা থাকে পনুরটা গাঁটওয়াল। যদি কাপড় বৃহৎ থাকে, তাহ’লে তাদের বিশ্বাস কোরো না। আমি বটতলায় \* ঐ রকম সাধু দেখেছিলাম। ছুতিন জন বসে আছে, ফেট ডাল বাচ্ছেন, কেউ কাপড় সেলাই ক’চ্ছেন, আর বড় মানুষের বাড়ীর ভাঙার গল্প বাচ্ছেন। ব’লছেন “আরে ও বাবুনে লাখো রুপেয়া খরচ কিয়া হয়, সাধুলোককো বহুং খিলায়া হয়; পুরী, জিলেবী, পেঁড়া, বরফী, মালপোওয়া, বহুং চিজ তৈয়ার কিয়া।” সকলের হাস্য।

বিজয়। আজ্ঞা হ্যা! গয়ায় ঐ রকম সাধু দেখেছি। গয়ার লোটাওয়াল। সাধু। ( সকলের হাস্য। )

### [ প্রেম ও কৰ্মত্যাগ । ]

শ্রীরামকৃষ্ণ। ( বিজয়ের প্রতি ) ঈশ্বরের প্রতি প্রেম আসলে কৰ্ম-ত্যাগ আপনি হ’য়ে যায়। যাদের ঈশ্বর কৰ্ম করাচ্ছেন, তারা কৰ্মক।

\* রাসমণির দক্ষিণেশ্বরের কালীবাড়ীতে যে পঞ্চবটী আছে, সেইখানে।

তোমার এখন সময় হয়েছে, সব ছেড়ে তুমি ব’লো ‘মন তুই ত্যাগ আর আমি দেখি, আর যেন কেউ নাহি দেখে।’

এই বলিয়া ভগবান শ্রীরামকৃষ্ণ সেই অতুলনীয় কণ্ঠে মাধুর্য বর্ষণ করিতে করিতে গান গাইলেন :—

গান।

যতনে হৃদয়ে রেখ আদরিণী শ্রামা মাকে।  
মন তুই দ্যাখ আর আমি দেখি আর যেন কেউ নাহি দেখে ॥  
কামাদিরে দিয়ে ফাঁকি, আয় মন বিরলে দেখি।  
রসনারে সঙ্গে রাখি, সে যেন মা বলে ডাকে ॥

( মাঝে মাঝে সে যেন মা বলে ডাকে )

কুরচি কুমত্ৰী যত, নিকট হতে দিওনাকে।  
জ্ঞাননয়নকে প্রহরী রেখো, সে যেন সাবধানে থাকে ॥  
( খুব যেন সাবধানে থাকে )

### [ অষ্টপাশ ও জীব । ]

শ্রীরামকৃষ্ণ। ( বিজয়ের প্রতি ) ভগবানের শরণাগত হ’য়ে, এখন লজ্জা ভয় এ সব ত্যাগ কর। ‘আমি হরিনামে যদি নাচি, লোকে আমায় কি বলবে’ এই সব ভাব ত্যাগ কর।

“লজ্জা, ঘৃণা ভয়। তিন থাকতে নয় ॥

“লজ্জা, ঘৃণা, ভয়, জাতি, অভিমান এ সব জীবের পাশ ॥  
এসব গেলে তবে সংসার হতে মুক্তি হয়।

“পাশবদ্ধ জীব পাশমুক্ত শিব ॥

“ভগবানের প্রেম বড় দুর্লভ জিনিস। স্ত্রীর যেমন স্বামীতে নিষ্ঠা আছে, সেইরূপ একটা নিষ্ঠা ঈশ্বরেতে হয়। তবেই ভক্তি হয়। গুণভক্তি হওয়া বড় কঠিন। ভক্তিতে প্রাণ মন ঈশ্বরেতে লীন হবে।

“তার পর ভাব। ভাবেতে মানুষ অবাক হয়। বায়ু স্থির হ’য়ে যায়। আপনি কুস্তক হয়। যেমন বন্দুকে গুলি ছোড়বার সময়, যে ব্যক্তি গুলি ছোড়ে, সে বাক্যশূন্য হয় ও তার বায়ু স্থির হ’য়ে যায়।”

প্রেম হওয়া অনেক দূরের কথা। চৈতন্যদেবের প্রেম হ’য়েছিল। ঈশ্বরে প্রেম হ’লে বাহিরের জিনিস সব ভুল হ’য়ে যায়। জগৎ ভুল হ’য়ে

যায়। আর নিজের দেহ যে এত প্রিয় জিনিস তাও ভুল হ'য়ে যায়।”  
এই বলিয়া পরমহংসদেব আবার গান গাহিতে লাগিলেন :—

গান।

সে দিন কবে বা হবে?

হরি বলিতে ধারা বেয়ে পড়বে (সে দিন কবে বা হবে)

সংসার-বাসনা যাবে (সে দিন কবে ... ..)

অঙ্গে পুলক হবে (সে দিন কবে ... ..)

\* \* \* \*

এইরূপ কথাবার্তা চলিতেছে, এমন সময়ে নিমন্ত্রিত আর কয়েকটি ব্রাহ্ম ভক্ত আসিয়া উপস্থিত হইলেন। তন্মধ্যে কয়েকটি পণ্ডিত ও উচ্চ-পদস্থিত রাজকর্মচারী ছিলেন। তাঁহাদের মধ্যে একজন শ্রীরজনীনাথ রায়।

পরমহংসদেব তাঁর হইলে বায়ুস্থির হয়, এই কথা বলিতেছিলেন। আরও বলিতেছিলেন, “অর্জুন যখন লক্ষ্য বিধিতেছিলেন, তখন কেবল মাছের চোখের দিকে দৃষ্টি ছিল—আর কোন দিকে দৃষ্টি ছিল না। এমন কি মাছের চোক ছাড়া মাছের আর কোন অঙ্গ দেখিতে পান নাই। এইরূপ অবস্থায় বায়ু স্থির হয়, কুস্তক হয়।

“ঈশ্বরদর্শনের একটা লক্ষণ—ভিতর থেকে মহাবায়ু গর্ গর্ গর্ গর্ ক'রে উঠে। উঠে মাথার দিকে যায়। তখন যদি সমাধি হয়, ভগবানের দর্শন হয়।”

[ পাণ্ডিত্য ]

শ্রীরামকৃষ্ণ—(অভ্যাগত ব্রাহ্ম ভক্ত দৃষ্টে) “বাহারা শুধু পণ্ডিত, কিন্তু ভগবানে ভক্তি হয় নাই, তাঁদের কথা গোলমালে। সামাধ্যায়ী বলে এক পণ্ডিত বলেছিল, “ঈশ্বর নীরস, তোমরা নিজেদের প্রেম ভক্তি দিয়ে সরস কর।” বেদে যাকে রস স্বরূপ বলেছে, তাঁকে কিনা নীরস বলে! আর এতে বোধ হ'চ্ছে, সে ব্যক্তি ঈশ্বর কি বস্তু, তা কখনও জানে নাই। তাই এরূপ গোলমালে কথা।

“একজন বলেছিল, ‘আমার মামার বাড়ীতে একগোয়াল ঘোড়া আছে,’ একথায় বুঝতে হবে, ঘোড়া আদবেই নাই।” সকলের হাস্য।

[ ঐশ্বর্য্য, বিভব, মান, পদ । ]

“কেউ কেউ ঐশ্বর্য্যের অহঙ্কার করে—বিভব, মান, পদ এই সবের অহঙ্কার করে। কিন্তু এসব দুইদিনের জন্তে, কিছুই সঙ্গে যাবে না।”

গান।

“ভেবে দ্যাখ্ মন কেউ কার নয়, মিছে ভ্রম ভ্রমওলে।

ভুলনা দক্ষিণে কালী বন্ধ হয়ে মাঙ্গ জালে ॥

যার জন্ত মর ভেবে, সেকি তোমার সঙ্গে যাবে।

সেই প্রেয়সী দিবে ছড়া অমঙ্গল হবে বলে ॥

দিন দুই তিনের জন্তে ভবে, কর্তা বলে সবাই মানে;

সেই কর্তারে দেবে ফেলে, কালাকালের কর্তা এলে ॥

“আর টাকার অহঙ্কারও কতে নাই। যদি বল, আমি ধনী, তো ধনীর আবার, তা'র বাড়ী, তা'র বাড়ী আছে।”

“সন্ধ্যার পর যখন জোনাকি পোকা উঠে, সে মনে করে, আমি এই জগৎকে আলো দিচ্ছি। কিন্তু নক্ষত্র যাই উঠলো, অমনি তার অভিমান চলে গেল। তখন নক্ষত্রেরা ভাবতে লাগলো, আমরা জগৎকে আলো দিচ্ছি। কিছুক্ষণ পরে চন্দ্র উঠলে তখন নক্ষত্রেরা লজ্জায় মলিন হয়ে গেল। চন্দ্র মনে কল্লেন, আমাদের আলোতে জগৎ হাঁস্চে, আমি জগৎকে আলো দিচ্ছি। দেখতে দেখতে অরুণ উদয় হ'লো, সূর্য উঠলেন। চাঁদ মলিন হ'য়ে গেল—ক্ষণিকক্ষণ পরে আর দেখাই গেল না।

“এইগুলি ধনীরা যদি ভাবে, তা হ'লে ধনের অহঙ্কার হয় না।”

উৎসব, উপলক্ষে শ্রীযুক্ত মণি মল্লিক অনেক উপাদেয় খাদ্য সামগ্রীর আয়োজন করিয়াছিলেন। তিনি অনেক ঋণ করিয়া শ্রীরামকৃষ্ণকে ও সমবেত ভক্তগণকে পরিতোষ করিয়া খাওয়াইলেন। যখন সকলে বাড়ী প্রত্যগমন করিলেন, তখন রাত্রি অনেক হইয়াছিল। কিন্তু কাহারও কোন কষ্ট হয় নাই।

## ভাগ।

(১)

“আমার সর্বস্ব!” বলি বৃথা ভাগ করি,  
তুমি কি হৃদয়ে আছ, হৃদয়বিহারী?  
লোকে জানে, তব ধ্যানে সন্ন্যাসিনী আমি,  
তুমি জান এ অন্তর, ওহে অন্তর্যামী!

কি রূপট, কি কঠিন,  
স্নেহহীন, প্রেমহীন,

মোর এ হৃদয়, ওহে হৃদয়বিহারী,  
তোমাতে “সর্বস্ব” বলি বৃথা ভাগ করি।

(২)

লোকে জানে, তব ধ্যানে সন্ন্যাসিনী আমি,  
তুমি জান এ অন্তর, ওহে অন্তর্যামী!

এই যে উদিতা উষা পূর্ব গগনে,  
দীনা কি মগনা তব শ্রীচরণ ধ্যানে?  
এই যে মধ্যাহ্ন তপ্ত শব্দহীন ধরা,  
আমি কি তোমারি তরে আকুলা বিধুরা?  
চন্দ্রকর-সুশীতল শান্ত স্নিগ্ধ নিশি,  
তোমারি ধ্যানে জাগি পোহাই কি বসি?  
নহে নাথ, নহে, বৃথা ভাগ সব মোর,  
অন্তর্যামী, জান তুমি আমার অন্তর।

(৩)

লোকে জানে, সর্বত্যাগী আমি উদাসিনী,  
তোমারি ধ্যানে কাটি দিবস যামিনী।  
জানেনা তো কেহ ত্যাগে কি যে অভিমান!  
জানেনা এ উদাসীন্ধ্য শুধু বৃথা ভাগ!  
লোকে দেখে, বুকে ধরি চরণ শীতল,  
জানেনা কি বিষ সেথা, সংসার গরল!

## দেশ ভ্রমণ।

৮৫

(৪)

ওহে অন্তর্যামী, ওহে সর্বস্ব আমার!  
দাসীতে এ সঙ্ঘোষনে দাও অধিকার।  
কেন তুমি সহিতেছ এত অত্যাচার?  
ভাঙ্গ নাথ বৃথা যত অভিমান, তার।  
দাও লজ্জা, কর হেয় সংসার মাঝারে  
সে ভুলে, বলিয়া তুমি ফেলোনা তাহারে।

শ্রীসরলাবালা দাসী।

## দেশ ভ্রমণ।

রেলের গাড়ীতে একটি ব্যাপার বোধ হয় অনেকেই প্রত্যক্ষ করিয়াছেন। সেটা কি জানেন?—এই গান করা। যিনি একটু আদটুকু গাহিতে জানেন, তিনি না হয় গান করিলেন, তাহা একপ্রকার সহিয়া থাকা যায়; কিন্তু যাহার কণ্ঠের রবের সহিত চতুষ্পদ জীব বিশেষের মধুর, স্নিগ্ধদের তুলনা অনুচিত হয় না, তিনিও রেলের গাড়ীতে চড়িলে একবার তান ছাড়িয়া নিরীহ লোকদিগকেও বিরক্ত করিয়া তুলেন। আমাদের সহযাত্রী নখাগড় বাবুদের মধ্যে এইপ্রকার স্মরণীয় একজন ছিলেন। তিনি সেই শেষরাতে কোকিলকণ্ঠে গান জুড়িয়া দিলেন;—তাঁর না আছে সুর, না আছে কিছু। তাঁহার একজন সঙ্গী আবার এমন গানটা বৃথা যাইতেছে দেখিয়া, গাড়ীর দেওয়ালকে বাতাসরূপে পরিণত করিয়া তুমুল বাজনা জুড়িয়া দিলেন। দ্বিতীয় শ্রেণীর গাড়ী বলিয়া গাড়ীর উপর বোল তুলিতে পারিলেন না। শ্রীমান গায়ক মহাশয় যদি ভাল গান গাইতেন, তাহা হইলেও না হয় তাঁহার এই আক্রমণ ও অত্যাচার সহ করা যাইত; কিন্তু তিনি একেবারে খাস কৃষ্ণনগরের আমদানী পচা সর পুরিয়ার গান জুড়িয়া দিলেন; যেমন তার ভাব, তেমনি তার রচনা-কৌশল।

এ সকল অত্যাচার আমার অনেক সহিয়াছে ; কিন্তু সঙ্গী বন্ধু মহাশয় ত একেবারে অতিষ্ঠ হইয়া পড়িলেন এবং আমাকে অনুযোগ করিতে লাগিলেন। আমার অপরাধ এই যে, আমি এসব কথা পূর্বে তাঁহাকে বলিলে, তিনি একটা কামরা রিজার্ভই করিতেন। আমি এ অনুযোগের আর কি জবাব দিব, তিনি যে এতটুকুও সহিতে পারিবেন না, তাহা ত আমি জানিতাম না। আমার দীর্ঘ অভিজ্ঞতায় এমন সঙ্গী কখনও ত জোটে নাই ; সুতরাং বন্ধুবরের অভিযোগ নীরবে সহ করা ব্যতীত আমার উপায়ান্তর ছিল না।

একটা গান শেষ করিয়া কিন্নরপ্রবর যখন আর একটা গানের রাগিণী আলাপ করিতে আরম্ভ করিলেন, আমি তখন তাঁহারা কতদূরে যাইবেন, জিজ্ঞাসা করিলাম। তাঁহারা বলিলেন, বেশী দূরে নয়, এই পোড়াদহে। তাঁহারা রেলের চাকুরী করেন ; পোড়াদহে নামিয়া উত্তরদেশের গাড়ীতে যাইবেন। আমি তখন চুপে চুপে বন্ধুকে বলিলাম যে, বাবু কয়টিকে এই সন্মুখের ষ্টেশনেই নামাইয়া দিতে পারিব ; পোড়াদহ পর্যন্তও তাঁহাদিগকে যাইতে হইবে না। বন্ধু আমাকে জেরা করিবার জন্ত প্রস্তুত হইলেন, আমি তাঁহাকে তখন বাক্যব্যয় করিতে নিষেধ করিলাম। আমি বাবু কয়টির আকার প্রকার বাবুদের দেখিয়াই বুঝিলাম যে, তাঁহারা রেলের চাকুরী করিলেও হয় টিকিট বাবু, কি তারের বাবুগিরি করেন ; তাহার উপর পদের রেলের বাবু হইলে তাঁহারা অনেকটা সভ্য হইন ; ঐ তিনটা বাবু নিতান্তই “রেলের বাবু।” আমি তখন বাবুদিগকে জিজ্ঞাসা করিলাম, “মহাশয়দের রেলের মধ্যে কি কাজ করা হয় ?” একজন ঐকটু ইংরেজী হিসাবে বলিলেন, “আমরা ষ্টেশন স্টাফ” আমি তখন বলিলাম, “মহাশয়দের কি সেকেরোক্রাসের পাশ আছে ?” যে বাবুটা আমার কথার জবাব দিয়াছিলেন, তিনি একটু চড়িয়া বলিলেন, “সে খবর আপনার কেন ? চুপ করিয়া বসিয়া থাকুন” আর সেই সঙ্গে একটা ইংরেজী প্রবাদ বচনের মধ্যে ষোল আনা ভুল করিয়া আওড়াইয়া দিলেন ; তাহার অর্থ এই যে, আমি আমার নিজের যন্ত্রে তৈল প্রদান করি। আমি ধীরে ধীরে বলিলাম, “মহাশয়েরা ক্ষমা করিবেন, এই সন্মুখের চুয়াডাঙ্গা ষ্টেশনে যদি নামিয়া না যান, তাহা হইলে আমি আপনাদিগকে

অগত্যা পুলিশের জিহ্বা করিয়া দিব। আপনারা যদি ছুটীতে থাকেন, তাহা হইলে আপনাদের তৃতীয় শ্রেণীর উপর পাশ নাই, আর যদি সরকারী কার্যে যান, তবে মধ্যম শ্রেণীর পাশ ; দ্বিতীয় শ্রেণীর পাশ আপনাদের নিশ্চয়ই নাই।” বাবু তিনটা আর কথা বলিলেন না ; চুপ করিয়া গেলেন। গাড়ীরও গতি মন্দ হইতে লাগিল। ক্রমে যখন গাড়ী চুয়াডাঙ্গার ষ্টেশনের নিকট আসিল, তখন আমি বলিলাম, “মহাশয়েরা কিছু মনে করিবেন না, আমি গার্ড সাহেবকে এখনই ডাকিয়া ডুবানিতেছি।” তখন সেই বাবুত্রয়ের মধ্যে যিনি গান বাজনা কিছুতেই ছিলেন না, তিনি বলিলেন, “মহাশয় ! এত গোলমাল কেন ; তাড়াতাড়িতে এই গাড়ীতে উঠিয়া পড়িয়াছিলাম ; আমরা এখানেই নামিয়া অত্র গাড়ীতে যাইব।” আমি আর কথা বলিলাম না। ষ্টেশনে গাড়ী লাগিল, বাবু তিনটা নামিয়া গেলেন। আমার সঙ্গী একটু সোয়াস্তি বোধ করিলেন। বাবুদের এইপ্রকার দুর্গতি দেখিয়া চাকাগামিনী রমণী ত হাসিয়া অস্থির হইয়া তাহার হাসি দেখিয়া বন্ধু বড়ই চটিয়া গেলেন এবং ধীরে ধীরে আমাকে বলিলেন, “মহাশয় ! এর চাইতে বাবুদের গান যে ছিল ভাল” আমি দেখিলাম, এমন সঙ্গী লইয়া পথচলা এক বিষম বিড়ম্বনা। কিন্তু সেকথা আর মুখ ফুটিয়া বলিলাম না। অবশিষ্ট রাত্রিটুকুতে আর বিশেষ কোন উল্লেখযোগ্য ঘটনা ঘটিয়াছিল না। প্রত্যয়ে, আমরা গোয়ালন্দে উপস্থিত হইলাম।

এতক্ষণও বলা হয় নাই, আমরা কি মাসে দেশ ভ্রমণে বহির্গত হইয়াছিলাম। আশ্বিন মাস, পূজা শেষ হইয়া গিয়াছে। আমরা যেবার এই ভ্রমণে গিয়াছিলাম, সেবার পূর্বাঞ্চলে ভয়ানক বর্ষা হইয়াছিল। আমরা গোয়ালন্দে নামিয়া তাড়াতাড়ি ষ্টীমারে উঠিবার ব্যবস্থা করিতে লাগিলাম। বন্ধুবর তখনও ভাল করিয়া চারিদিক দেখিতে পান নাই, কারণ ভোর হইলেও সে সময়ে একটু আঁধার ছিল। আমরা দুইজন ও ভৃত্যটি ষ্টীমারে উঠিলাম।

ষ্টীমারের উপরে গিয়া বন্ধু নদীর দিকে চাহিয়া দেখিলেন। দেখেন ভয়ানক ব্যাপার ! নদীর অপর পার দেখিতে পাওয়া যায় না ; অকূল জলরাশি গর্জন করিতে করিতে, লাফাইতে লাফাইতে চলিয়াছে। ষ্টীমারখানি

এক একবার কাঁপিয়া উঠিতেছে। এই দৃশ্য দেখিয়া বন্ধুবর একেবারে ভয়ে আড়ষ্ট! এমন ভয়ানক নদীর মধ্যে ষ্টীমারে চড়িয়া যাইতে হইবে।—তাহার মুখে আর কথা নাই, তিনি একেবারে ভয়ে অসাড় হইয়া গেলেন। একটু পরেই প্রকৃতিস্থ হইয়া বলিলেন, “মহাশয়! আমার আর আজ যাওয়া হইবে না; জান—কবুল, এমন ভয়ানক নদীর ভিতরে আপনি ষ্টীমারই বলুন; আর যাই বলুন, আমি কোন প্রকারেই যাইতেছি না। রামকৃষ্ণ, জিনিস পত্র নামাও। বন্ধুবরের ভীতিবিহ্বল মুখ দেখিয়া আমি ত একেবারে অবাক হইয়া গেলাম; কি বলিব, কি করিব কিছুই স্থির করিতে পারিলাম না। আমাকে এইপ্রকার অবস্থায় দেখিয়া বন্ধু বলিলেন, “আর না মশাই চলুন দেশে ফিরিয়া যাই। এরূপ নদীর মধ্যে আমি প্রাণ থাকিতে যাইতে পারিব না।”

যে কথা সেই কাজ; বন্ধুমহাশয় একেবারে তাড়াতাড়ি নামিয়া ডাঙ্গায় গিয়া হাজির!—তাহার মুখ দেখিয়া বোধ হইল, যেন তিনি আসন্ন মৃত্যুর গ্রাস হইতে রক্ষা পাইয়াছেন। রামকৃষ্ণ কিন্তু তখনও নামে নাই। আমিও নামি নাই। রামকৃষ্ণ আমার মুখের দিকে চাহিল। আমি বলিলাম, “বুমা! তুই একটু অপেক্ষা কর, আমি দেখি যদি তোর বাবুর ভয় ভাঙ্গিতে পারি।” আমি তখন জাহাজ হইতে নামিয়া বন্ধুর নিকটে গেলাম; তাহাকে অন্তরে সুখ হইলাম; কিন্তু বিশাল পদ্মা দিকে তিনি এক একবার চাহেন, আর তাহার বুক ছড়ছড় করিয়া উঠে। তিনি আমার সাহসবাক্যে কর্ণপাতও করিলেন না, তখন অন্ত্রোপায় হইয়া রামকৃষ্ণকে জিনিসপত্র নামাইতে বলিলাম। কুলীদিগের সাহায্যে দ্রব্যাদি আবার তীরে আনীত হইল।

বন্ধু ফেরত গাড়ীতেই কলিকাতায় আসিবার জন্ত প্রস্তুত হইলেন। এবার আমি একটু দৃঢ়তার সহিত বলিলাম, “ষ্টীমারেই না গেলেন; এবেলা গোয়ালন্দে থাকিলে আর পদ্মা নদী খাইয়া ফেলিবে না? এই সমস্ত রাত্রি জাগরণ করিয়া আসা গেল; আবার সমস্ত দিন গাড়ীতে যাওয়া। আমার দ্বারা এমন কর্ম হইবে না।”—আমার এই কথা শুনিয়া বন্ধুবর সেবেলা গোয়ালন্দে থাকিতে সম্মত হইলেন। ঢাকাগামী ষ্টীমার, আসাম ষ্টীমার, কাছার ষ্টীমার ধুম উল্লীর্ণ করিয়া তরঙ্গের উপর নাচিতে নাচিতে চলিয়া গেল। আমরা তিনটি জীব তীরে দাঁড়াইয়া দেখিতে লাগিলাম। ষ্টীমার

চলিয়া গেলে মুটে ডাকিয়া সেই প্রকাণ্ডকায় লগেজ, বাক্স প্রভৃতি লইয়া— আমার এক বাল্যবন্ধুর প্রবাসগৃহে, অতিথি হইলাম। তিনি আমাদিগকে পাইয়া পরম আনন্দিত হইলেন। আমরা ঢাকায় যাইব বলিয়াই আসিয়াছিলাম, কিন্তু বন্ধুর আর ঢাকা যাওয়া হইল না, তাই আমরা কলিকাতায় ফিরিয়া যাইতেছি। কেন যাওয়া হইল না, সে কথাটা বলিয়া বন্ধুকে নিতান্ত ক্ষীণজীবী, ছর্সল বাঙ্গালী বলিয়া পরিচিত করিয়া লজ্জা দেওয়া কর্তব্য মনে করিলাম না। সমস্ত দিন গোয়ালন্দে অতিবাহিত করিলাম। আমার জীবনের কয়েকটি সুখের বৎসর এই গোয়ালন্দের পদ্মাতীরে অতিবাহিত হইয়াছিল। আমরা যে গোয়ালন্দে ছিলাম, যদিও তাহার চিহ্নমাত্রও নাই; তবুও স্থানের নামটী মনে হইলেই কত সুখের কথা, কত আনন্দের ছবি মনে পড়িয়া যায়।

সে কথা থাকুক, রাত্রে মেলট্রেণে আরোহী হইয়া বন্ধুকে লইয়া কলিকাতায় পৌঁছিলাম—এবং একখানি দ্বিতীয় শ্রেণীর ভাড়াটীয়া গাড়ী করিয়া তাহাকে তাহার গৃহদ্বারে পৌঁছাইয়া দিলাম। পূর্ববঙ্গ ভ্রমণ করিয়া কত নোট সংগ্রহ করিবেন, সে সকল সুবিশ্রুস্ত করিয়া সুন্দর একখানি ভ্রমণ-বৃত্তান্ত লিখিবেন, এই প্রকার নান্দু কল্পনা তাহার মস্তিষ্কে প্রবিষ্ট হইয়াছিল। ফিরিয়া আসিবার পর আমি অনেকবার তাহাকে এই গোয়ালন্দ ভ্রমণ-বৃত্তান্ত লিখিবার জন্ত অনুরোধ করিয়াছি, কিন্তু তিনি কিছুতেই সম্মত হন নাই। আজ এতদিন পরে তাহার দেশ-ভ্রমণ-কাহিনী লিখিয়া আমি তাহার আরক্ত-কাষ্ঠ শেষ করিয়া দিলাম।

শ্রীজলধর সেন ।

## শ্রীকৃষ্ণদাস কবিরাজের কথা ।

সুশিক্ষিত সাহিত্যসেবিগণের আজকাল বৈষ্ণব-সাহিত্যের প্রতি কথঞ্চিৎ দৃষ্টি পতিত হইয়াছে; ইহা শুভজনক সংশয় নাই। এই উত্তমে অনেক প্রাচীন বিলুপ্তপ্রায় গ্রন্থ প্রচারিত হইতেছে, অনেক প্রাচীন কথার আলোচনা ও মীমাংসা হইতেছে; এ সকলই উত্তম।—অনেক প্রাচীন গ্রন্থেই রচনাটির



তারিখ প্রভৃতি পাওয়া যায় না, স্মৃতিশীল বিজ্ঞ সমালোচকের গবেষণায় ঐরূপ স্থলেও গ্রন্থ ও গ্রন্থকারের সময় নির্দেশও হইয়া থাকে। সর্বত্র তাহা ভ্রান্তি-বিরহিত না হইলেও ঐরূপ চেষ্টা উত্তম; কিন্তু স্বসিদ্ধান্তে অন্ধ অত্যাধুনিক কোনস্থলেই প্রশংসনীয় নহে।

প্রাচীন বৈষ্ণবসাহিত্যে ভয়ানক জাল জুরাচুরী বিद्यমান; আমরা যে অল্প দুই চারিখানি বৈষ্ণবগ্রন্থ দেখিয়াছি, তাহাতেই ঐরূপ ধারণা জন্মিয়াছে। ঐরূপ গ্রন্থ-প্রচারকের চাতুর্য্য সামান্য নহে। যাহাদের বৈষ্ণবধর্ম্মে প্রবেশ নাই, বৈষ্ণবধর্ম্মের সিদ্ধান্তে অভিজ্ঞতা নাই, তাঁহারা অনেকস্থলেই প্রতারণিত হইয়া থাকেন। বৈষ্ণবধর্ম্মের নাম করিয়া অনর্থস্বরূপ যে সকল উপধর্ম্ম প্রচারিত হইয়াছে, ঐ সকল গ্রন্থ অধিকাংশই তাঁহাদের রচিত ও প্রচারিত।

ঐ সকল উপধর্ম্মের মতে ও বৈষ্ণবীয় বিশুদ্ধ রসতত্ত্বে বাক্যভেদ অধিক নাই; ভাবভেদ ক্রমে রসতত্ত্ব সর্বোত্তম ও বৈষ্ণবনামের পতাকাধারী উপধর্ম্মগুলি সর্বাধম হইয়াছে। রসতত্ত্ব সম্পূর্ণ অপ্রাকৃত, তাহাতে জড়দেহের স্ত্রী-পুরুষ সম্বন্ধ নাই; উপধর্ম্মের সমস্তই তদ্বিপরীত বলিয়া হয়। সুতরাং বৈষ্ণবধর্ম্ম-মন্মানবিজ্ঞ ব্যক্তি শিক্ষিত হইলেও ঐ সকল অস্পৃশ্য অবৈষ্ণব গ্রন্থকে বৈষ্ণব-গ্রন্থকার-ধিরচিত মৌলিক গ্রন্থ ভাবিয়া প্রচারিত হন।

ঐ সকল গ্রন্থ-প্রায়শঃ কোন প্রসিদ্ধনামা বৈষ্ণব-গ্রন্থকারের নামে প্রচারিত হইয়াছে দেখা যায়। আমাদের এই কৃষ্ণদাস কবিরাজের উপরই প্রবঞ্চকগণের বেশী ঝোক ছিল বলিয়া বোধ হয়। ইহার নামে যতখানি জালগ্রন্থ প্রচারিত হইয়াছে, অপর কোনও প্রাচীন গ্রন্থকারের নামে তত হইয়াছে বলিয়া মনে হয় না। ইহার কারণ, কৃষ্ণদাসের চৈতন্যচরিতামৃত ও গোবিন্দলীলামৃত গ্রন্থ বৈষ্ণবসমাজে বিশেষ আদরনীয় হইয়াছে এবং গ্রন্থকার সকল শ্রেণী বৈষ্ণবের শ্রদ্ধা লাভ হইয়াছেন। ইহার নামে তাঁহাদের অপসিদ্ধান্ত সহজেই লোকসমাজে প্রচারিত হইবার বিশেষ সম্ভাবনা দৃষ্টে, তাঁহারা সে সুবিধা সাদরে গ্রহণ করিয়াছে। কেবল কৃষ্ণদাস নহেন, কবি বৃন্দাবন দাস, স্বরূপ ও বীরভদ্র গোস্বামী, নরোত্তম দাস, লোচন, ঘনশ্যাম প্রভৃতি বহুতর প্রাচীন মহাজনের নামে অসংখ্য ক্ষুদ্র ক্ষুদ্র গ্রন্থ ও পদ প্রচারিত হইয়াছে।

“সাহিত্য পরিষৎ পত্রিকাতে” মণ্ডে মণ্ডে প্রাচীন বাঙ্গালা গ্রন্থের বিবরণ প্রকাশিত হইয়া থাকে; যে সকল গ্রন্থ সাহিত্যিক প্রবঞ্চকের প্রচারিত জাল, বিবরণের সম্পাদকীয় মন্তব্যে তাঁহার নির্দেশ থাকা কর্তব্য বলিয়া বোধ করি। “আত্মনিরূপণ” প্রভৃতি বহুতর সাহজিক গ্রন্থ কৃষ্ণদাসের নামে প্রচারিত; চরিতামৃতের আদর্শে ইহাতে “শ্রীরূপ রঘুনাথপদে ধীর আশ,” ইত্যাদি বাক্যে ভণিতি সংযোজিতও হইয়াছে।

ঐ সকল গ্রন্থের কোন, কোন খানি নিতান্ত আধুনিকও নহে, রচনা প্রভৃতি দৃষ্টে জাল ধরিবার বিশেষ সুবিধা নাই। অতএব বৈষ্ণবতত্ত্বানবিজ্ঞ ব্যক্তিগণ সহজে বুঝিয়া উঠিতে পারেন না। বহুকালের হস্তলিখিত নূতন গ্রন্থ পাইলেই, প্রসিদ্ধ গ্রন্থকারের নাম দেখিলেই তাঁহারা হঠাৎ সিদ্ধান্ত করিয়া ফেলেন। এ কথা অনুমানমূলক নহে, বর্তমান সাহিত্যক্ষেত্রে কোন কোন সুপরিচিত বিজ্ঞজনকেও ঐরূপ ভ্রমে পতিত হইতে দেখিয়া দুঃখিত হইয়াছি। কিন্তু সত্যের জয় চিরদিন। কথিত আছে, কোকিল ও কাক-শাবক একত্রে প্রতিপোষিত হইলেও, নববসন্ত-সমাগমে উভয়ের পার্থক্য পরিলক্ষিত হয়; বৈষ্ণবধর্ম্মমন্মজ্জ ব্যক্তি ঐ সকল অপকৃষ্ট গ্রন্থরাশি হইতে সহজেই সদগ্রন্থ বাছিয়া লইতে পারেন।

সে যাক, কবিরাজ কৃষ্ণদাসের চরিতামৃত-রচনা ও তাঁহার দেহত্যাগের কাল-নির্ণয়সম্বন্ধে যে ভ্রান্ত মত চলিয়া আসিতেছে, বর্তমান প্রবন্ধে তৎসম্বন্ধে কিঞ্চিৎ আলোচনা করিতে ইচ্ছা করি।

“তত্ত্বদিগ্দর্শিনী” নামে একখানি তালিকা আছে, ঐ তালিকানুসারে কৃষ্ণদাসের জন্ম ১৪১৮ শকে হয়। কৃষ্ণদাস একজন ভক্তশ্রেষ্ঠ, কিন্তু ১৪১৮ শকে তাঁহার জন্ম হইয়া থাকিলেও, তিনি শ্রীমহাপ্রভুকে দর্শন করেন নাই। কৃষ্ণদাস বৈষ্ণবংশে নৈহাটীর সন্নিকট বামটপুর গ্রামে জন্মগ্রহণ করেন, “আনন্দ-রত্নাবলী” নামক একখানি ক্ষুদ্র গ্রন্থে লিখিত আছে, অল্পবয়সেই কৃষ্ণদাসের পিতা মাতার মৃত্যু হয়; তাঁহার পিতৃষসা, কৃষ্ণদাস ও তৎকনিষ্ঠ শ্যামদাসকে নিজ গৃহে লইয়া গিয়া প্রতিপালন করেন। সেইস্থানেই কৃষ্ণদাসের যে কিছু বিদ্যাশিক্ষা। কৃষ্ণদাসের শিক্ষা ভালরূপই হইয়াছিল, তিনি রীতিমত দর্শনাদি শাস্ত্র অধ্যয়ন করিয়াছিলেন বলিয়াই অনুমিত হয়। বৈষ্ণব

পরিবারে জন্মগ্রহণ করিয়া থাকিলেও এইজন্মই বোধ হয়, তন্মত অল্পবয়সে ভক্তিরাজ্যে ভ্রমণ করিতে পারেন নাই; এইজন্মই শ্রীচৈতন্য মহাপ্রভুর সাক্ষাৎ দর্শন বোধ হয় তাঁহার ভাগ্যে ঘটে নাই। যে আকস্মিক ঘটনাসূত্র কৃষ্ণদাসকে সংসারের বাহিরে লইয়া গিয়াছিল, তৎসম্বন্ধে তিনিই লিখিয়াছেন। একদা নিত্যানন্দ-ভৃত্য মীনকেতন রামদাস, কৃষ্ণদাসগৃহে উপস্থিত হইয়া কোন কারণে শ্রামদাসের উপরে কিঞ্চিৎ বিরক্ত হন; কৃষ্ণদাস যথার্থই শ্রামদাসের অপরাধ দৃষ্টে ক্ষুব্ধ হইয়া তাঁহাকে ভৎসনা করেন। তৎপরে—

“ভাইকে ভৎসিলু মুঞি লঞা এই গুণ।  
সেই রাতে প্রভু (নিত্যানন্দ) মোরে দিলা দরশন ॥  
নৈহাটী নিকটে ঝামটপুর গ্রাম।  
তাহা স্বপ্নে দেখা দিল নিত্যানন্দ রাম ॥  
দণ্ডবৎ হৈয়া আমি পড়িলু পায়েতে।  
নিজ পাদপদ্ম প্রভু দিলা মোর মাথে ॥

\* \* \* \* \*  
আনন্দে বিহ্বল আমি কিছুই না জানি।  
তবে হাসি প্রভু মোরে বলিলেন বাণী ॥  
আরে আটের কৃষ্ণদাস! না কর তু ভয়।  
বৃন্দাবনে যাহ তাঁহা সর্ব লভ্য হয় ॥

\* \* \* \* \*  
স্বপ্নভঙ্গ হৈল, দেখো হঞাছে প্রভাতে।  
\* \* \* \* \*  
সেইক্ষণে বৃন্দাবনে করিলু গমন।  
প্রভুর রূপাতে স্থখে আইলু বৃন্দাবন ॥”

(চৈতন্য চরিতামৃত)

এই ঘটনাটী ১৪৫৫ শকের পরে সংঘটিত হয়। কৃষ্ণদাস তখন একজন সুপরিচিত ভক্ত; তাঁহার বাড়ীতে তখন মীনকেতন প্রভৃতি মহাত্মা-গণের গমনাগমন ঘটে। শ্রীমহাপ্রভু প্রকট থাকিলে, বৃন্দাবন যাইবার পূর্বে কৃষ্ণদাস অবশ্যই নীলাচল হইয়া যাইতেন। কৃষ্ণদাস শ্রীমহাপ্রভুর

দর্শন না পাইলেও অষ্টৈতাচার্য্য ও নিত্যানন্দপ্রভুকে দর্শন।  
শ্রীমন্নিত্যানন্দপ্রভু কৃষ্ণদাসের দীক্ষাগুরু ছিলেন। চরিতামৃতের—

“নিত্যানন্দ রায়, প্রভুর স্বরূপ প্রকাশ।  
তাঁর পাদপদ্ম বনো, মুই য়ার দাস ॥”

এবং

“যতপি আমার প্রভু চৈতন্যের দাস।  
তথাপি জানিয়ে আমি, তাঁহার প্রকাশ ॥”

—এ দুইটি কথাই তাহার প্রমাণ। প্রসিদ্ধ বিশ্বনাথ চক্রবর্তী ইহ  
টীকাপ্রসঙ্গে লিখিয়াছেন, যথা—“নিত্যানন্দ রায় প্রভুর স্বরূপ প্রকাশ ইত্যাদি,  
যতপি ইত্যাদিনাচ গুরুপদে নাত্র নিত্যানন্দ প্রভুরেবতি ব্যঞ্জিতং ॥”

কৃষ্ণদাস কবিরাজ, বৃন্দাবনে উপস্থিত হইয়া, প্রথমেই রাধাকুণ্ডে  
গমন করেন। রাধাকুণ্ডে রঘুনাথ দাসগোস্বামী বাস করিতেন, কবিরাজ  
তাঁহার সঙ্গস্থ থাওয়া করিতে না পারিয়া, রাধাকুণ্ডে তাঁহারই আশ্রয়ে  
অবস্থিতি করেন। যথা—

“কবিরাজ শিষ্য, রহিলেন তাঁর কাছে।”

(প্রেমবিলাস)

প্রেমবিলাসের এই “শিষ্য” কথা, উপর নির্ভর করিয়া, কেহ কেহ  
কৃষ্ণদাসকে দাসগোস্বামীর শিষ্য বলেন; বস্তুতঃ তাহা নহে, শিক্ষাগুরু বলিয়া  
কৃষ্ণদাস, রঘুনাথের নিকট শিষ্যবৎ অবস্থিতি করিতেন। যাহোক, উক্ত  
প্রেমবিলাসেই ইহার মীমাংসা পাওয়া যায়। যথা—

“নিজ গ্রন্থে লিখে, প্রভুর শিষ্য আপনাকে।

\* \* \* \* \*

পুনর্বার বৃন্দাবনে করিল গমন।

আশ্রয় করিল রঘুনাথের চরণ ॥

কেন হেন লিখে? কেন করয়ে আশ্রয়?

সেই বুঝে—যার মহা অনুভব হয় ॥

সিদ্ধ ব্যবহার এই অত্যন্ত নির্মল।

ভাবাশ্রয় করিলে ক্ষুণ্ণি হয় যে সকল ॥”

এ হউক, চৈতন্যচরিতামৃত গ্রন্থই কৃষ্ণদাসের পাণ্ডিত্যের  
গাথা তখন শিশু হইলেও কবিরাজের প্রতিভাবলে তখনই  
তত্ত্ব তাহাতে লিখিত হইয়া সংস্কৃতপ্রাবিত দেশে বাঙ্গালাভাষার  
করিয়াছিল। চৈতন্যচরিতামৃত কখন রচিত হয়? মুদ্রিত চরিতামৃত  
গ্রন্থরচনার তারিখ ১৫৩৫ শক বলিয়া লিখিত; কিন্তু ঐ তারিখটি  
ত বলিয়া বোধ হয় না।

শ্রীরূপ-সনাতন-প্রমুখ গোস্বামিগণ কর্তৃক বৃন্দাবনে বিবিধ বৈষ্ণবগ্রন্থ  
রচিত হয়। শ্রীনিবাসাচার্য্য, নরোত্তম ঠাকুর ও শ্রামানন্দ বঙ্গদেশে ঐ সকল  
গ্রন্থ-প্রচারের ভারপ্রাপ্ত হন। তাঁহারা গ্রন্থসমূহ লইয়া বিষ্ণুপুর পর্য্যন্ত  
নির্ঝিন্দে আগমন করেন, বিষ্ণুপুরে গ্রন্থগুলি লুপ্তিত হয়। এ ঘটনা ১৫০৪  
শকাব্দার মধ্যে কোন এক সময়ে ঘটে। বৈষ্ণবগ্রন্থ-পাঠে অবগত হওয়া  
যায় যে, এই ঘটনা হইতেই বিষ্ণুপুরের রাজার ধর্ম্মজীবা আরম্ভ হয়; এবং  
তিনি শ্রামচন্দ প্রভৃতি বিগ্রহ স্থাপন করেন। বিষ্ণুপুর-রাজ ঐ সময় যে  
সকল মন্দির প্রতিষ্ঠা করেন, তাহার খোদিত প্রস্তরফলকে ১৫০৭ এবং  
ততোধিক শক সংখ্যা দৃষ্ট হয়। গ্রন্থ চুরী ইহার পূর্ব্বকার ঘটনা। যে  
সকল গ্রন্থ অপহৃত হয়, তন্মধ্যে “চৈতন্যচরিতামৃত” ছিল। এতৎপ্রমাণে  
চরিতামৃতের রচনাকাল কখনই ১৫৩৫ শকাব্দ হইতে পারে না। “গোড়ে  
ব্রাহ্মণ”-প্রণেতা বিশেষ বিবেচনার সহিত অনুমান করেন যে, ১৫০৫ শকের  
মধ্যে চরিতামৃত রচিত হয়। বিষ্ণুপুর রাজবাটীতে শ্রীনিবাস শিষ্য ব্যাসাচার্য্য-  
লিখিত একখানি প্রাচীন পুঁথি আছে, তাহার শেষে এই শ্লোকটি পাওয়া  
যায়। যথা—

“শাক্যি বিন্দুবাগেনৈ জ্যৈষ্ঠবৃন্দাবনান্তরে।

স্বর্ঘ্যেহসিতপঞ্চম্যাং গ্রন্থোহয়ং পূর্ণতাং গতঃ ॥”

এতদ্বারা ১৫০৩ শকাব্দই চরিতামৃতের রচনাকাল বলিয়া নির্দেশ করা  
হইয়াছে। ইহাই সঙ্গত বলিয়া বোধ হয়।

চরিতামৃত রচনার পর কৃষ্ণদাস বড় অধিককাল জীবিত ছিলেন  
বলিয়া বোধ হয় না। কবিরাজের মৃত্যুসম্বন্ধেও একটা ভ্রান্ত মত প্রচলিত  
রহিয়াছে। হুইখানি প্রসিদ্ধ বাঙ্গালাগ্রন্থের গ্রন্থকারদিগকেও এ ভ্রান্তি কিঞ্চিৎ

স্পর্শ করিয়াছে; প্রেমবিলাস হইতেই এ ভ্রমের উৎস  
লিখিত আছে যে, গ্রন্থচুরীর সংবাদ বৃন্দাবনে পৌঁছিলে, শুনিতে  
পাইলেন, তাঁহার বৃদ্ধকালের বহুযত্নের ধনও অপহৃত হ-  
ত্থে ক্ষোভে সেই অন্ধপ্রায় ভুল কবি রাধাকুণ্ডে ঝাপ দিয়া  
যথা প্রেমবিলাসে :—

“রঘুনাথ কবিরাজ শুনি হুইজনে।

কান্দিয়া কান্দিয়া পড়ে লোটাইয়া ভূমে ॥

কবিরাজ কহে প্রভু না বুঝি কারণ।

কি করিল কিবা হৈল ভাবে মনে মন ॥

জরাকালে কবিরাজ না পারে চলিতে।

অন্তর্দান কৈল সেই হুঃখের সহিতে ॥

বাণ্ডতীরে বসি সদা করে অহুতাপ।

উছলি পড়িল গোসাঞি দিয়া এক ঝাপ ॥”

এ ঘটনা গ্রন্থচুরীর পরেই ঘটে, স্মরণ্য ১৫০৪ শকেই কবিরাজের  
মৃত্যু ঘোষিত হইয়াছে। কিন্তু কৃষ্ণদাস ঐ সময় মৃত্যুমুখে পতিত হন নাই;  
তিনি গ্রন্থপ্রাপ্তির সংবাদও পরে প্রাপ্ত হইয়াছিলেন। গ্রন্থান্তরে তাহার  
প্রমাণ আছে।

রাজসাহীর অন্তর্গত খেতরীতে নরোত্তম ঠাকুর মহাশয় এক মহোৎসব  
করেন। শ্রীমহাপ্রভুর সময়ের অব্যবহিত পরে, বৈষ্ণবসমাজে ঐ মহোৎসব  
এক অতি প্রধান ঘটনা। ইহা গ্রন্থচুরীর কয়েক বৎসর মাত্র পরে হয়;  
তখন শ্রীনিবাস নরোত্তম প্রভৃতি বৈষ্ণবজগতে বিখ্যাতনামা পুরুষ। এই  
উৎসবেরও পরে শ্রীমন্নিত্যানন্দ-পত্নী জাহ্নবাবদেবী বৃন্দাবনে গমন করেন, তখনও  
কবিরাজ জীবিত ছিলেন, দেবীর সহিত তাঁহার সন্মিলন হয়।  
যথা ভক্তিরত্নাকরে—

“শ্রীদাস গোস্বামী সে নির্জন কুণ্ডতীরে।

করেন শ্রীনাম গ্রহণাদি ধীরে ধীরে ॥

কৃষ্ণদাস কবিরাজ অগ্রেতে আসিয়া।

দাস গোস্বামীর আগে ছিলা দাঁড়াইয়া ॥

বসর পাইয়া করেন নিবেদন ।

শ্রীজাহ্নবা ঈশ্বরীর হৈল আগমন ॥” ইত্যাদি ।

ও পরে নিত্যানন্দাশ্রয় বীরচন্দ্র গোস্বামী বৃন্দাবন গমন করেন, বীরাজকে তিনি প্রাপ্ত হন; কিন্তু তখন দাসগোস্বামী ছিলেন ক্রিয়াকলাপে একথারও প্রমাণ প্রাপ্ত হওয়া যায়। (ঐ গ্রন্থের দশ তরঙ্গ দৃষ্টব্য) ।

শ্রীকৃপাদি গোস্বামিগণের অন্তর্দ্বানে কৃষ্ণদাস সংস্কৃতে শোকসূচক কবিতা লিখেন। আমরা বহুচেষ্টায় শ্রীকৃপের ‘শোচক’ প্রাপ্ত হইয়াছি; কৃষ্ণদাস কৃত গোপালভট্ট ‘শোচক’ অনেকেই জানেন। কর্ণানন্দ গ্রন্থপাঠে জ্ঞাত হওয়া যায় যে, দাসগোস্বামীর অন্তর্দ্বানের পর কৃষ্ণদাস তাঁহার ‘শোচক’ রচনা করিয়াছিলেন। প্রেমবিলাসে লিখিত আছে যে, কৃষ্ণদাস দাসগোস্বামীর অগ্রে পরলোক গমন করেন; কর্ণানন্দ, কৃষ্ণদাস কৃত রঘুনাথ ‘শোচকের’ উল্লেখ করিয়া প্রকৃতপক্ষে প্রেমবিলাসের প্রতিবাদ করিয়াছেন। যথা কর্ণানন্দে—

“গ্রন্থের চুরীর কথা তিঁহো যে শুনিয়া ।

উছলি পড়িলা যাই কুণ্ডেই যাইয়া ॥

বড়ই বিরক্ত চিত্ত ধৈর্য্য নাহি রয় ।

হায় হায় হেন দুঃখ সহন না যায় ॥

শ্রীদাসগোস্বামী আগে দেহত্যাগ কৈল ।

ইহা শুনি চিত্তে মোর সন্দেহ জন্মিল ॥

শ্রীল কবিরাজ গোস্বামিঃ লিখিলা সূচকে ।

একে একে তাহা আমি লিখি ত্রু প্রত্যেকে ॥

“ভূয়াৎ শ্রীরঘুনাথ দাসঃ” এইত লিখন ।

বড়ই সন্দেহ, পদে কৈল নিবেদন ॥

রঘুনাথ অপ্রকট কবিরাজ আগে ।

সূচকেতে এই কথা লিখিল মহাভাগে ॥” ইত্যাদি ।

কর্ণানন্দকার পদকর্তা যখনন্দন দাসের এ সন্দেহ অনুপযুক্ত হয় নাই। তিনি এ সন্দেহ না করিলে কৃষ্ণদাসের মৃত্যু অসীমাংসিত থাকিয়া যাইত। যাহা হউক, গ্রন্থকারের সন্দেহ দূর হইয়াছিল। কৃষ্ণদাস অসহনীয় দুঃখে

রাধাকৃষ্ণে ঝাপ দিয়াছিলেন বটে, কিন্তু তখনই তাঁহার দেহত্যাগ ঘটে নাই; রঘুনাথ দাস তাঁহাকে মূর্ছিতাবস্থায় উত্তোলন করিয়াছিলেন, তৎপর তিনি জীবনপ্রাপ্ত হন। কর্ণানন্দ বলেন :—

“পুনঃ কবিরাজ দেহে হইল চেতন।” ইত্যাদি ।

অতএব, ১৫০৪ শকাব্দাই কৃষ্ণদাসের মৃত্যু-শক নহে; ইহা নিশ্চয়। কৃষ্ণদাস একজন দীর্ঘজীবী পুরুষ ছিলেন, তাহা সহজেই অনুমিত হয়।

লেখকের অসুস্থাবস্থায় লিখিত বলিয়া প্রবন্ধে বিবিধ অসঙ্গতি দোষ থাকিল, পাঠক মহাশয়ের নিকট তজ্জ্ঞা বোধ হয়, ক্ষমা প্রার্থনা করিতে পারেন।

শ্রীঅচ্যুতচরণ চৌধুরী তত্ত্বনিধি ।

## কলা-লক্ষী ।

চিরদিন তুমি জাগ্রত স্থির যৌবনে,  
অক্ষয় লাভণ্যে বিরাজ মর্ত্যভুবনে,  
গগনে গগনে কীর্তি বহে পবনে;

ওগো সুরেন্দ্র-সেবিতা !

মানস-যৌবরাজ্যে তুমি ঈশ্বরী,  
প্রতাপে প্রভাবে উছলি উঠ, সুন্দরি,  
অমৃত-উৎসে দিক দিকে যায় সস্তরি  
শিল্প চিত্র কবিতা ।

অলিখিত মহাগ্রন্থে তুমি নিত্য-নায়িকা;  
কোটি প্রেমিক ভবে,—তুমি বিশ্ব-প্রেমিকা!  
শত শত কর্ণে পরাইছ গন্ধ-মালিকা,  
জয় তব জয় হে !

কল কল শ্লোকে কবিকুল করে সাধনা,  
শিল্পী দেয় পদে আপনার হৃদি-রচনা,  
নিত্য স্বেভার তরে তবু নব-বাসনা  
কাদে তব বিরহে।

এস বক্ষে নভ-অঞ্জন পথ রঞ্জিয়া,  
অযুত কর্ণে অকথিত বাণী সঞ্জিয়া,  
চিত্ত-ফলকে চরণযুগ অঙ্কিয়া,  
এস এস, প্রেয়সি!

সুধা সিঞ্চনে জাগিবে মৃত কল্পনা,  
ঊর্ধ্বে বাজিয়া চৌদিকে জয়-বাহানা;  
ভক্তকুলের তৃষিত মনোবেদনা  
যাবে, অস্বি মানসি!

যদি সাধ,—এস গো গোপন পথ বাহিয়া,  
ললিত নৃত্যে হৃদয়-গগন প্লাবিয়া,  
নিথর নীরদে তড়িত-ছটা হানিয়া,  
এস মৌন-গৌরবে;

লহ বন্ধন, ওগো বিচিত্রা অভিসারিকা,  
সাজাও স্বহস্তে বঙ্গের চিত্র-শালিকা,  
কবিকুঞ্জে আন নব শুক সারিকা,  
ভর গীতি-সৌরভে।

শ্রীপ্রমথনাথ রায় চৌধুরী।

## পৌরাণিক গল্প।

পূর্বকালে কাঞ্চীনগরে চোল নামক রাজা রাজত্ব করিতেন। মহারাজ চোলের নামানুসারে তদীয় রাজ্য, চোলরাজ্য নাম ধারণ করিয়াছিল। তাঁহার রাজ্যে কোন ব্যক্তি রুগ্ন, দরিদ্র বা পাপিষ্ঠ ছিল না। সকলেই বেদোদিত ক্রিয়াকলাপের অনুষ্ঠান করিয়া পরমসুখে কালাতিপাত করিত। মহারাজ চোল, নিরন্তর যজ্ঞকার্যে ব্যাপৃত ছিলেন। চোলরাজ্যের অন্তর্কর্তিনী তাত্রপর্ণী নদীর উভয়তট শোভাময় স্বর্ণযুগে অলঙ্কৃত হইয়া চৈত্ররথোত্তানের শোভা ধারণ করিয়াছিল। চোলরাজ্যের অন্তঃপাতী অনন্তশয়ন নামক স্থানে যোগ-নিদ্রাশয়ান ভগবান রমাপতির এক মূর্তি ছিল। রমাপতির আশীর্ব্বাদে চোল রাজ্যবাসিগণের আধিব্যাধির ভয় ছিল না। ভগবান তাহাদের যোগক্ষেম বহন করিতেন।

একদা মহারাজ চোল, স্বর্ণপুষ্প ও মণিমাণিক্যে ভগবানের পূজা করিয়া উপবিষ্ট আছেন, এমন সময় কাঞ্চীনগরবাসী বিষ্ণুদাস নামক ধর্ম-পরায়ণ ব্রাহ্মণ, ভগবানের পূজার জন্ত জল তুলসী হস্তে লইয়া তথায় উপস্থিত হইলেন। ব্রাহ্মণ পুরুষহস্ত দ্বারা ভগবান্মূর্তির স্নানবিধি সমাপন করিয়া তুলসী মঞ্জরীদ্বারা ভগবানের পূজা করিলেন। রাজপ্রদত্ত রত্নরাজি তুলসীমঞ্জরী দ্বারা আচ্ছাদিত হওয়াতে রাজার অন্তরে ক্রোধের সঞ্চার হইল। রাজা সক্রোধে ব্রাহ্মণকে বলিলেন, “বিষ্ণুদাস! কিরূপে বিষ্ণুপূজা করিতে হয়, তুমি তাহা জান না। আমার পূজায় ভগবানের যে শোভা হইয়াছিল, তাহা আচ্ছাদন করিয়া তুমি স্বকীয় নিকরুদ্ভিতা প্রকাশ করিলে?” রাজার সাহকারবান্ধু শুনিয়া ব্রাহ্মণ কহিলেন, “মহারাজ! আপনি নৃপশ্রীতে অত্যন্ত গর্বিত হইয়াছেন। কিরূপে বিষ্ণুভক্তি হয়, আপনি তাহা অবগত নহেন।” রাজা অবজ্ঞার হাস্য হাসিয়া বলিলেন, “দরিদ্রের অহঙ্কার শোভা পায় না। তুমি কখনও যজ্ঞ, দান বা দেবমূর্তি প্রতিষ্ঠা কর নাই। তোমার অহঙ্কার শোভা পায় না।” বিষ্ণুদাস ও রাজেন্দ্র চোলের এইরূপ তর্কবিতর্ক হইলে, চোল বলিলে

“বিষ্ণুদাস! তুমিও চেষ্টা কর, আমিও চেষ্টা করি। দেখি, কোন্ ব্যক্তিকে বিষ্ণু অগ্রে দর্শন দেন।” আমাদের শ্রেষ্ঠ এই প্রকারে নির্ণীত হইবে।

অনন্তর উভয়ে স্ব স্ব গৃহে প্রতিগমন করিলেন। মহারাজ চোল, বিষ্ণু সাক্ষাৎকার মানসে মুদগলকে আচার্য্য করিয়া বহুব্রহ্ম, ত্রিবিদ্য, যজ্ঞের অনুষ্ঠান করিলেন। বিষ্ণুদাসের ধন-সম্পত্তি ছিল না, কিন্তু সূকলের সার যে ভক্তি, তাহা ছিল। বিষ্ণুদাস অনন্তর্যয়নে বাস করিয়া আন্তরিক ভক্তির সহ ভগবানের আরাধনা করিতে লাগিলেন। ব্রাহ্মণের ভক্তিতে ভগবান সন্তুষ্ট হইলেন।

এইরূপে দীর্ঘকাল অতিবাহিত হইল। এক দিবস, বিষ্ণুদাস নিত্যবিধি সমাপনান্তে অন্নপাক করিয়া বিশ্রাম করিলেন। বিশ্রামের পর বিষ্ণুকে নিবেদন করিতে যাইয়া দেখিলেন যে, পাকান্ন কে হরণ করিয়াছে। সেই সময়ে ভগবান সবিভা অস্তাচল-চূড়ায় আরোহণ করিলেন। ব্রাহ্মণ, সন্ধ্যা-সময়ের কর্তব্যবিধির উল্লঙ্ঘনের ভয়ে সে দিবস আর পাক করিলেন না, উপবাসী রহিলেন। দ্বিতীয় দিবসেও পাক করিয়া পাকান্ন বিষ্ণুকে নিবেদন করিতে গিয়া পূর্বদিবসের স্থায় পাকান্ন অপহৃত হইয়াছে দেখিতে পাইলেন। ব্রাহ্মণ অনাহারে রহিলেন। তাহার সঙ্কল্প ছিল, বিষ্ণুকে নিবেদিত না করিয়া অন্ন ভোজন করিবেন না। এইরূপে সাত দিবস অতিবাহিত হইলে ব্রাহ্মণ মনে করিলেন, এ কর্ম কে করে? আমাকে এস্থান হইতে তাড়াইতে কাহার অভিলাষ হইয়াছে? আমি প্রাণান্তেও এই ক্ষেত্র ত্যাগ করিব না, এইস্থান ত্যাগ করিলে আমার উগবৎ-সম্মিধি পরিত্যাগ করিতে হয়। ব্রাহ্মণ এই ঘটনার কারণানুসন্ধানের জন্ত অষ্টম দিবসে অস্তুর অলঙ্কিত স্থানে সতর্ক হইয়া অবস্থান করিতে লাগিলেন। দেখিলেন, এক ক্ষুৎকাম দীনবদন অস্থিচর্মা-বশিষ্ঠ-দেহ চণ্ডাল পাকান্ন হরণে উত্তত হইয়াছে। বিজবর্ষ্য অন্নহরণকারীকে দেখিতে গাইয়া রূপাধরবশ হইয়া “তুমি কি জন্ত এই রক্ষ অন্ন ভোজন করিতেছ, আমি ঘৃত দিতেছি, তাহা দিয়া ভোজন কর। আহা! সাত দিন তুমি বড় কষ্ট পাইয়াছ”—বিপ্রকে এই কথা বলিতে বলিতে আসিতে দেখিয়া চণ্ডাল দ্রুতবেগে পলায়ন করিল। পলায়নবেগে সে মুচ্ছিত হইয়া পড়িল। ব্রাহ্মণ, মুচ্ছিত চণ্ডালের সমীপে গমন করিয়া মুচ্ছাপনোদনের জন্ত বস্ত্রান্ত দ্বারা তাহাকে বীজন করিতে লাগিলেন। ভগবান নারায়ণ, ব্রাহ্মণের ভক্তি-

পরীক্ষার্থ চণ্ডালবেশ ধারণ করিয়া আসিয়াছিলেন। ব্রাহ্মণের প্রতি পবিত্র হইয়া তিনি নিজমূর্তি পরিগ্রহ করিলেন।

নিরাকার ব্রহ্ম, ভক্তের অভিলাষ পূরণের জন্ত সাকার মূর্তি ধারণ করিয়া থাকেন। সত্ব, রজঃ, তমঃ ও অহঙ্কার তাহার চতুর্ভুজ হইল। পৃথ-ভূতাত্মা তাহার শঙ্খ, মনস্তত্ত্ব চক্র, ব্রহ্মাণ্ডতত্ত্ব পদ্ম, আত্মাবিতাতত্ত্ব গদা, তাহার বাহুচতুষ্টয় শোভিত করিল। চন্দ্র, সূর্য্য, অগ্নি ও বাক্যের তেজোময়-সত্ত্বা ভগবানের বক্ষঃস্থলে কোস্তভমণি হইল। ব্রাহ্মণ অতসীসঙ্কাসবর্ণ ভগবানকে সম্মুখে দেখিতে পাইয়া আনন্দসাগরে নিমগ্ন হইলেন। দেখিতে দেখিতে সেই-স্থানে বৈকুণ্ঠ হইতে বিমান আনীত হইল। ভগবান, বিষ্ণুদাসকে বিমানে অধিরোপিত করিয়া বৈকুণ্ঠধামে গমন করিলেন। বিষ্ণুদাসকে বিমানারূঢ় অবলোকন করিয়া, যজ্ঞদীপ্তি চোলভূপতি পুরোহিত মুদগলকে বলিলেন, “ব্রহ্মন্! দেখুন দেখুন, বিষ্ণুদাস বিমানে আরোহণ করিয়া বৈকুণ্ঠধামে গমন করিতেছেন। আমি এই ব্রাহ্মণের প্রতি স্পর্ধা করিয়া বহুব্রহ্মেরে বহুব্রহ্ম করিয়াছি। ব্রাহ্মণ কেবল ভক্তিবলে আমাকে পরাজিত করিয়াছেন। ভগবান, কেবল আন্তরিক ভক্তির বশীভূত। তিনি যে “নিকড়িয়ার বন্ধু”, তাহা অল্প প্রত্যক্ষ করিলাম।”

মহারাজ চোলের অন্তরে দারুণ নির্বেদ উপস্থিত হইল। রাজার পুত্রসন্তান ছিল না। তিনি ভাগিনেয়কে স্বকীয় নৃপাসনে অভিষিক্ত করিয়া যজ্ঞবাটে গমন করিলেন। রাজা হোমকুণ্ডের সমীপে গমন করিয়া, “হে ভগবন্! ভক্তি দেও!” এই বাক্য তিনবার বলিয়া আপনার দন্তের প্রায়শ্চিত্ত বিধানার্থ অগ্নিকুণ্ডে প্রবেশ করিলেন। রাজাকে অগ্নিকুণ্ডে প্রাণত্যাগ করিতে দেখিয়া, পুরোহিত মুদগল দক্ষণ ক্ষোভে আপনার মস্তকের শিখা উৎপাটন করিলেন। চোলভূপতি ও বিষ্ণুদাস বৈকুণ্ঠধামে স্থশীল ও পুণ্ডরীক নামে ভগবানের দ্বারপাল হইয়া বিরাজ করিতেছেন।

মহারাজ চোল, ভাগিনেয়কে উত্তরাধিকারী করেন। তদবধি চোল রাজসিংহাসনে ভাগিনেয়গণ আরোহণ করিতেন। মুদগল শিখা ছিড়িয়া ফেলিয়াছিলেন, তদবধি মুদগলবংশীয় ব্রাহ্মণগণ শিখাধারণ পরিত্যাগ করেন। এইস্থানে পৌরাণিক আখ্যা সমাপ্ত হইল।

চোলরাজ্য অতি প্রাচীন। রামায়ণ, মহাভারত, অশোকের তাম্র-শাসন ও প্লিনির গ্রন্থে চোলরাজ্যের নাম আছে। চোল নামের পূর্বে এই দেশের লক্ষকর্ণ নাম ছিল। মহারাজ সগরের সময় কতকগুলি ধর্মভ্রষ্ট আর্য্য-সন্তান এই দেশে প্রবেশ করে। তুর্কস্বরবংশীয় কতকগুলি আর্য্যসন্তান, ইহার পূর্বে বা পরে লক্ষকর্ণ দেশে উপনীত হয়। মগধের একদল লোক, তাম্র-পর্ণী নদীতীরে প্রথমতঃ উপনিবিষ্ট হইয়া লক্ষাদ্বীপ অধিকার করে। এই ঘটনা হইতে লক্ষাদ্বীপের তাম্রপর্ণী নাম হয়। এইরূপে চোলরাজ্যে আর্য্য-বসতি বিস্তার হয়। তাম্রপর্ণী অতি প্রসিদ্ধ নদী। ইহার দক্ষিণে ভারতে আর নদী নাই। এই নদীর সমুদ্রসঙ্গমস্থানে পূর্বে মুক্তা পাওয়া বাইত। সিংহল-দেশের মহাবংশ নামক ইতিহাসে চোল নামক রাজার লক্ষা-বিজয়ের উল্লেখ আছে। চোল রাজগণের মধ্যে অনেকে দিগ্বিজয়ী ছিলেন। এই রাজ্যের একজন রাজা বঙ্গবিহার পর্য্যন্ত জয় করেন। কেহ কেহ বলেন, বৈষ্ণনাথের শিব, চোলরাজ্যের কোন রাজা কর্তৃক স্থাপিত হইয়াছেন। আমাদের বর্ণিত আখ্যায়িকায় চোল ও বিষ্ণুদাসের বিবাদ ও বিবাদের পরিণামসম্বন্ধে বিশ্বাস করার ভার আমরা পাঠকদিগের রুচির প্রতি অর্পণ করিলাম। আমরা উক্ত আখ্যায়িকা হইতে নিম্নলিখিত কয়েকটি ঐতিহাসিক তত্ত্ব পাইতেছি।

(১ম) চোল নামের উৎপত্তির কারণ।

(২য়) চোল রাজসিংহাসনে ভাগিনেয়গণের উত্তরাধিকারিণ্যের কারণ।

(৩য়) মুদগল গোত্রীয় ব্রাহ্মণগণের শাখাহীনতার কারণ।

শ্রীরজনীকান্ত চক্রবর্তী।

## রাজা রামানন্দ রায়।

(৮)

শ্রীমচ্চৈতন্যদেব একটা নূতন ধর্মের প্রবর্তক বলিয়া অনেকের ধারণা আছে, কিন্তু প্রকৃতপক্ষে চৈতন্যদেব কোন নূতন ধর্মের প্রচার করেন নাই। তাঁহার বহু পূর্ব হইতেই যে তদবলম্বিত প্রেমধর্ম প্রচলিত ছিল, তদনুসারে বহু সাধু সন্ন্যাসী ভজন সাধনাদি করিতেন। মাধবেন্দ্রপুরী, ঈশ্বর-

পুরী, নিত্যানন্দ, অদ্বৈতাচার্য্য, পুণ্ডরীক বিদ্যানিধি প্রভৃতি সকলে যে চৈতন্যের বহুপূর্ব হইতেই কৃষ্ণপ্রেমে মাতোয়ারা ছিলেন, তাহার যথেষ্ট প্রমাণ চৈতন্য-প্রাণিত বৈষ্ণব-সাহিত্যের নানা স্থানে বর্তমান রহিয়াছে। রামানন্দ রায়ও যে চৈতন্যের সহিত সাক্ষাৎকারের বহুপূর্ব হইতে কৃষ্ণতত্ত্বাভিজ্ঞ পরম সাধক প্রেমী বৈষ্ণব ছিলেন, কৃষ্ণদাস কবিরাজ তাহার প্রকৃষ্টতম প্রমাণ চৈতন্য-চরিতামতে সন্নিবেশিত করিয়াছেন।

১৪৩২ শকাব্দের বৈশাখমাসে 'বিদ্যানগরে চৈতন্যদেবের সহিত রাজা রামানন্দের প্রথম সাক্ষাৎ হয়। ইহার পূর্বে কোথাও কাহারও নিকট চৈতন্যদেবের ধর্মমত পরিস্ফুটরূপে প্রকটিত হয় নাই। চৈতন্যচরিতামৃতের মধ্যলীলার অষ্টম পরিচ্ছেদে কৃষ্ণদাস কবিরাজ যে চৈতন্য-রামানন্দ সংবাদ লিপিবদ্ধ করিয়াছেন, তাহা পাঠ করিলে স্পষ্টই প্রতীত হয় যে, রামানন্দ তাঁহার কৃষ্ণপ্রেমানন্দ-প্রাপ্তির জন্ত চৈতন্যদেবের নিকট আদৌ ঋণী নহেন, বরঞ্চ যাহারা চৈতন্যদেবের ভগবত্তায় বিশ্বাস স্থাপনে পরাভুত, তাঁহাদের ধারণা হইবে যে, চৈতন্যদেব স্বয়ংই রামানন্দের নিকট প্রেম-তত্ত্বের জন্য অনেকটা ঋণী। বাস্তবিকই রামানন্দ রায় একরূপ গভীরজ্ঞানী, অথচ প্রেমরসে সুরসিক ছিলেন যে, চৈতন্যদেব কৃষ্ণতত্ত্বানুসন্ধারিগণকে রামানন্দের নিকট তাঁহাদের সন্দেহভঞ্জন জন্য প্রেরণ করিতেন। শ্রীক্ষেত্রে প্রত্যক্ষমিত্র মহাপ্রভুর নিকট কৃষ্ণকথা শ্রবণেচ্ছা প্রকাশ করিলে মহাপ্রভু বলিয়াছিলেন :—

“—কৃষ্ণকথা আমি নাহি জানি।

সবে রামানন্দ জানে তার মুখে শুনি ॥

ভাগ্য তোমার কৃষ্ণকথা শুনিতে হয় মন।

রামানন্দ পাশে যাই করই শ্রবণ ॥”

চৈ চ, অন্ত্য, ৫ প।

রামানন্দের ধর্মমতের প্রতি মহাপ্রভুর কিরূপ শ্রদ্ধা ছিল, তাহা কৃষ্ণদাস কবিরাজ গোস্বামীর লিখিত :—

“প্রভু কহে,—আইলাম শুনি তোমার গুণ।

কৃষ্ণকথা শুনি শুদ্ধ করাইতে মন ॥

যেছে ও নিল তৈছে দেখিল তোমার মহিমা।

রাধাকৃষ্ণ প্রেম রসজ্ঞানে তোমার সীমা ॥”

চৈ চ, মধ্য, দ, প।

রামানন্দের প্রতি চৈতন্যদেবের এই উক্তি হইতেই স্পষ্টীকৃত হইতেছে।

“রাধাকৃষ্ণ প্রেমরসজ্ঞানে” রাজা রামানন্দের শ্রেষ্ঠতা এইস্থানে স্পষ্ট প্রকটিত হইয়াছে।

চৈতন্যদেবের সহিত রামানন্দের ধর্মতত্ত্বালোচনায় রামানন্দ যে সকল তত্ত্বের উল্লেখ করিয়াছেন, কৃষ্ণদাস কবিরাজ অতি সূক্ষ্মশৈলী ও সংক্ষিপ্ত-ভাবে অথচ বিশদভাবে চৈতন্যচরিতামৃতে লিপিবদ্ধ করিয়াছেন। ইহা হইতে চৈতন্যপ্রচারিত বৈষ্ণবধর্মের মূলতত্ত্বগুলি সম্পূর্ণ অবগত হওয়া যায় এবং তাহাতে রামানন্দের গভীর জ্ঞান ও অপূর্ণ প্রেমিকতার পরিচয় পাওয়া যায়। রামানন্দ যে একজন অন্ধবিশ্বাসী ছিলেন না এবং অধিকারিভেদে ভজন প্রণালীভেদের আবশ্যিকতায় বিশ্বাস করিতেন, তাহার প্রমাণ বর্তমান আছে। চৈতন্যদেব যখন রামানন্দের উক্তিগুলি বিশেষ মনোযোগের সহিত শ্রবণ করিয়া তাহার পোষকতা করিয়া গিয়াছেন, তখন রামানন্দের উক্তি ও বিশ্বাসকে চৈতন্যদেবের উক্তি ও বিশ্বাস বলিয়া গ্রহণ করা যাইতে পারে। ভক্ত ও বিশ্বাসী বৈষ্ণবগণও রামানন্দের মুখে চৈতন্যদেবকেই বক্তা জ্ঞান করিয়া থাকেন। এস্থলে সংক্ষেপে রামানন্দের প্রতিপাদিত ধর্মমত সংক্ষেপে প্রদত্ত হইতেছে।

“রাজা রামানন্দের মতে প্রথমতঃ স্বধর্মাচরণ অর্থাৎ বর্ণাশ্রমোচিত ধর্মের অনুষ্ঠানেই বিষ্ণুভক্তি লাভ হইতে পারে। বর্ণাশ্রমধর্ম পরিহার না করিয়া ভগবানের প্রীতির জন্য কর্মানুষ্ঠান ও কর্মফল ভগবানে অর্পণ প্রথমাপেক্ষা উচ্চতর-সাধন। উপরোক্তরূপে ফলকামনা ত্যাগ করতঃ কর্মানুষ্ঠান অভ্যস্ত হইলে হৃদয়ে সূদৃঢ় শ্রদ্ধার উৎপত্তি হয়। এই শ্রদ্ধার উৎপত্তি হইলে কর্মের আর প্রয়োজন থাকে না; সুতরাং মানুষ তখন বর্ণাশ্রম বর্ন্যত্যাগ করতঃ উচ্চতর সাধনের যোগ্যতা লাভ করে। এই অবস্থায় জ্ঞানমিশ্রা ভক্তির উৎপত্তি হয়। জ্ঞানমিশ্রা ভক্তি হইতে জ্ঞানের হীনতার উপলব্ধি হইয়া শুদ্ধ প্রেমভক্তির উদয় হয়। এই শুদ্ধ প্রেমভক্তি অবস্থাভেদে পঞ্চবিধ,—

শান্ত, দাঁশ, সখা, বাৎসল্য ও মধুর। এই পঞ্চবিধা ভক্তির মধ্যে পূর্ব পূর্বটি হইতে ক্রমে পর পরটি শ্রেষ্ঠতর এবং পূর্ব পূর্বটি পর পরটির অন্তর্গত। মধুর বা কান্তাপ্রেম আবার দ্বিবিধ,—ব্রজদেবী বা গোপীগণের ভাব এবং রাধাভাব। রাধাভাবই সর্বশ্রেষ্ঠ। রাধার প্রেমের তুলনা নাই, রাধার প্রেমেই কৃষ্ণের পূর্ণপ্রীতি এবং স্বয়ং চৈতন্যদেব রাধাভাবেই নিয়ত নিমগ্ন থাকিতেন। সুতরাং গোপীভাব ও রাধাভাবের সাধনই সর্বশ্রেষ্ঠ সাধন।

রাজা রামানন্দ, গোপীভাব বা রাধাভাবের সাধনকে সর্বশ্রেষ্ঠ বলিলেও অন্তবিধ সাধন বা উপাসনা প্রণালীকে উপেক্ষা করেন নাই। তিনি বলিয়াছেন :—

“কৃষ্ণপ্রাপ্তির উপায় বহুবিধ হয়।

কৃষ্ণপ্রাপ্তির তারতম্য বহুত আছয়”।

কিন্তু যার যেইভাবে সেই শ্রেষ্ঠতম।”

ইহা হইতেই দেখা যাইতেছে, রামানন্দের মতে সর্ববিধ ভজনেই কৃষ্ণপ্রাপ্তি ঘটে। তাহার যেকোন ভজনে নিষ্ঠা, তাহার সেইরূপ ভজনেই কৃষ্ণপ্রাপ্তি ঘটিবে। রামানন্দের এইমত এই ঊনবিংশ শতাব্দীর শেষার্ধ্বেও মার্জিতজ্ঞান বৈষ্ণব কেন, হিন্দু মুসলমান সকলেই অনুসরণ করিয়া পরস্পরের প্রতি ধর্মভেদজনিত বিদ্বেষভাবকে বিদায় দান করিতে পারেন।

বৈষ্ণবসমাজের বর্তমান শেফচনীয় অবস্থা পরিদর্শনে গোপীভাবে “কৃষ্ণানুশীলন” সর্বোৎকৃষ্ট সাধন এইরূপ মত প্রকাশিত হইতে দেখিয়া নাসিকা কুঞ্চিত করিতে পারেন, কিন্তু প্রকৃত রাধাকৃষ্ণতত্ত্ব এবং গোপীতত্ত্ব প্রাচীন বৈষ্ণবগণকর্তৃক যেকোন নির্দেশিত হইয়াছে, তাহার আলোচনা করিলে, বৈষ্ণবশাস্ত্র বা তত্ত্ব সাধনপ্রণালী ঘণ্টা বন্ধি বিবেচিত হইবে না, বরঞ্চ এতাবৎ আবিষ্কৃত ভগবদ্ভজন-প্রণালী সমুদায়ের মধ্যে একটি উৎকৃষ্ট প্রণালী বলিয়া বিশ্বাস করিতে হইবে, এবং রামানন্দের ব্যাখ্যান হইতেই তাহা প্রদর্শিত হইতে পারে। এস্থলে সংক্ষেপে তাহা প্রদর্শন করিবার জন্ত কৃষ্ণদাস কবিরাজের রচনা হইতে রামানন্দের রাধা, কৃষ্ণ, সখী ও প্রেমসম্বন্ধে কয়েকটিমাত্র বচন উদ্ধৃত করিতেছি।



রামানন্দ, এইরূপে কৃষ্ণের স্বরূপ নির্দেশ করিতেছেন :—

“ঈশ্বর পরম কৃষ্ণ স্বয়ং ভগবান ।

সর্ব অবতারী সর্ব কারণ প্রধান ॥

অনন্ত বৈকুণ্ঠ যার অনন্ত অবতার ।

অনন্ত ব্রহ্মাণ্ড ইহা সবার আধার ॥

সচ্চিদানন্দ তনু ব্রহ্মেন্দ্র নন্দন ।

সর্বৈশ্বর্য, সর্বশক্তি সর্ব রসপূর্ণ ॥”

চৈ চ, মধ্য, ৮ পঃ ।

রাধার স্বরূপ নির্ণয়ার্থ রামানন্দ বলিতেছেন :—

“কৃষ্ণের অনন্তশক্তি তাতে তিন প্রধান ।

চিহ্নশক্তি, মায়ীশক্তি, জীবশক্তি আন ॥

অন্তরঙ্গা বহিরঙ্গা তটস্থা কহি যারে ।

অন্তরঙ্গা স্বরূপ শক্তি সবার উপরেণা

সচ্চিদ আনন্দ হয় কৃষ্ণের স্বরূপ ।

অতএব স্বরূপশক্তি হয় তিনরূপ ॥

আনন্দাংশে হ্লাদিনী, সর্দাংশে সন্ধিনী ।

চিদাংশে সখিৎ যারে জ্ঞান করি মানি ॥

কৃষ্ণকে আহ্লাদে তাতে নাম আহ্লাদিনী ।

সেই শক্তিবারে সুখ আস্বাদে আপনি ॥

সুখরূপ কৃষ্ণ করে সুখ আস্বাদন ।

ভক্তগণে সুখ দিতে হ্লাদিনী কারণ ॥

হ্লাদিণীর সার অংশ তার প্রেমনাম ।

আনন্দ চিন্ময় রস প্রেমের আখ্যান ॥

প্রেমের পরম সারি মহাভাব জানি ।

সেই মহাভাবরূপা রাধা ঠাকুরাণী ॥”

অপরস্থলে—

“রাধার স্বরূপ—কৃষ্ণপ্রেম কল্পনতা ।

সখীগণ হয় তার পল্লব পুষ্পপাতা ॥”

উপরি উক্ত অংশে প্রেম ও সখীগণের স্বরূপ স্থানান্তরেও আছে—

মহাভাব চিন্তামণি রাধার স্বরূপ ।

লীলাদি সখী তাঁর কায় ব্যূহ রূপ ॥

রামানন্দ উক্ত রূপে রাধাকৃষ্ণের স্বরূপ ও

সহিত পর্যালোচনা করিয়াছেন । ইহা হইতে প্রতীত

প্রেম সম্পূর্ণ অলীলতাবর্জিত, বা তাহা কোনরূপ

নহে । রাধাকৃষ্ণের প্রেমতত্ত্বের বিষয় যাহারা পর্যালোচনা

আমি তাহাদিগকে চৈতন্যচরিতামৃতের রামানন্দ-চৈতন্য-

অনুরোধ করি ।

রামানন্দ, চৈতন্যদেবের সহিত সাক্ষাৎলাভ

বিষয়-সংশ্রবত্যাগের জন্য সচেষ্টি হইয়া অনন্যমনে প্রেমানু

হন । চরিতামৃতকার চৈতন্যের সহিত সাক্ষাৎকার কালেই রাম

বিরাগোৎপত্তি ও তাঁহার সম্মুখে সন্ন্যাসী চৈতন্যে রাধাশ্রাম বিগ্রহ

উল্লেখ করিয়াছেন । চৈতন্যদেব এই সময়ে তাঁহাকে বিষয়ত্যাগ করিয়া

নীলাচলে যাইবার উপদেশ দেন এবং মহাপ্রভু দক্ষিণ-ভ্রমণান্তে ছই বৎসর

পর শ্রীক্ষেত্রে প্রত্যাবর্তন করিলে রামানন্দ তাঁহার সহিত মিলিত হইয়া

অনন্যমনে কৃষ্ণপ্রেমানুশীলনে নিরত হন ।

( ৯ )

কৃষ্ণদাস কবিরাজ চৈতন্যচরিতামৃত-গ্রন্থে শ্রীকৃষ্ণচৈতন্যদেবের নীলাচল-  
লীলার নিত্যপরিষ্কার-গণের মধ্যে ভক্ত হরিদাসের তিরোভাব বর্ণনা করিয়া-  
ছেন, স্বয়ং গৌরানন্দদেবের লীলাবসানের চিত্রপ্রদান করিয়াছেন, কিন্তু তাহাতে  
রাজা রামানন্দ রায়ের তিরোধান সম্বন্ধে কোন উল্লেখ দৃষ্ট হয় না ।  
ইহা হইতে প্রতীত হয় যে, রাজা রামানন্দ রায় শ্রীগৌরানন্দ প্রভুর  
লীলাবসানের পরেও বর্তমান ছিলেন । নরহরি চক্রবর্তী ভক্তিরত্নাকর-গ্রন্থে  
শ্রীনিবাস আচার্যের জীবনী লিপিবদ্ধ করিয়াছেন । শ্রীনিবাস আচার্য

চাক্ষুয় শ্রীক্ষেত্রে গমন করেন, — কিন্তু মহাপ্রভুর লীলা-  
দেবের সাক্ষাৎকার লাভ করিতে সার্থক হন নাই; —  
স্বভক্ত স্বরূপ রামানন্দের দর্শনলাভ করিয়াছিলেন।

হয় যে, চৈতন্যদেবের পর রামানন্দের প্রতিরোধানের  
র সাময়িক বৈষ্ণবগণ বিশ্বাস করিতেন। চৈতন্যদেবের  
দুই বৎসর পর রামানন্দ শ্রীকৃষ্ণের পাদপদ্ম লাভ  
করিলে ১৪৫৭ শকাব্দা বা ১৫৩৫ খৃষ্টাব্দকে রামানন্দের  
গণনা করা যাইতে পারে।

বলে মহীয়ান মানব হিন্দুসমাজের শীর্ষশ্রেণীস্থ না হইলেও  
চলের পূজ্য ও নমস্কৃত হইতে পারেন, তাহার দৃষ্টান্ত  
রর ইতিহাসে বিরল নহে। এই উনবিংশ শতাব্দীর  
প্রথমভাগেও সেইরূপ দৃষ্টান্তের অভাব পরিদৃষ্ট হয় নাই।

দর জীবনী আলোচনা করিলেও দৃষ্ট হয় যে, তিনি জীবনের  
সাধুজনোচিত সমাদর ব্রাহ্মণগণের নিকটেও প্রাপ্ত হইতেন।

চৈতন্যদেব, ব্রাহ্মণ প্রজন্মমিশ্রকে রামানন্দের নিকট ধর্মোপদেশ গ্রহণ জন্য  
প্রেরণ করিয়াছিলেন এবং শেষ জীবনে তাহার এই সম্মান এতদূর বর্দ্ধিত  
হইয়াছিল যে, শাস্ত্রজ্ঞ শ্রীনিবাস আচার্য্য তাহার পাদস্পর্শ করিয়া আপনাকে  
ধন্যজ্ঞান করিয়াছিলেন।

রামানন্দের শাস্ত্রজ্ঞান ও জ্ঞানগান্ধীর্ষ্যের কথা ইতিপূর্বে আলোচনা  
করিয়াছি। কিন্তু তিনি কোন্ গুরু বা শিক্ষাচার্য্যের নিকট শিষ্যত্ব অঙ্গীকার  
করিয়াছিলেন, তাহার কোন নিদর্শন বৈষ্ণবগ্রন্থে পাওয়া যায় না। চৈতন্য-  
দেবের পূর্বে হইতেই যে চৈতন্যদেবের প্রচারিত ধর্মের মূলতত্ত্বগুলি তিনি  
অবগত ছিলেন, তাহা ইতিপূর্বে প্রদর্শিত হইয়াছে; সুতরাং চৈতন্যদেবকেও  
তাঁহার গুরু বলিয়া স্বীকার করা যায় না। বৈষ্ণবগণ তাঁহাকে একজন  
সিদ্ধপুরুষ বিবেচনা করিয়া থাকেন। গৌরগণোদ্দেশ দীপিকাদি চৈতন্যদেবের  
অব্যবহিত পরবর্ত্তী বৈষ্ণব গ্রন্থাদিতে রামানন্দ অর্জুন বলিয়া বর্ণিত হইয়াছেন,  
এবং ভক্ত বৈষ্ণবগণ তাঁহাকে কোন্স্থানে অর্পণ করিবেন, সম্ভবতঃ তাহা  
স্থির করিতে না পারিয়াই, তাঁহাকে কেহ অর্জুন, কেহ অর্জুনিয়া,

কেহ বা গ্লানিতা সখী বলিয়া নির্দেশ করিয়াছেন (১)। বৈষ্ণবগ্রন্থকারগণ  
কর্তৃক এইরূপ রামানন্দের পূজ্যতা নির্ণয় হইতে অনায়াসে অনুমিত হইবে  
যে, তাঁহার সমসাময়িক বৈষ্ণবজগতেও তাঁহার জীবন মহা রহস্যময় ছিল।

বঙ্গীয় বৈষ্ণব গ্রন্থাবলীর সাহায্যে চৈতন্যদেবের ধর্মপ্রচারের ইতিবৃত্ত  
আলোচনা করিয়া আমার বিশ্বাস হইয়াছে যে, ডাবিড় দেশেই প্রেমধর্ম-  
শ্রোতের আদিম প্রস্রবণ। সেই প্রস্রবণক্ষরিত প্রেমশ্রোতঃ উড়িষ্যা হইয়া  
বঙ্গদেশে তৎপরে চৈতন্যদেবের কৃপায় সমগ্র ভারতবর্ষে প্রবল বন্যা উপস্থিত  
করে। তবে বঙ্গদেশই প্রেমবন্যায় প্লাবিত হওয়ায় তাহাকেই প্রেমধর্ম-  
প্রবাহের আদিম উৎস বলিয়া সাধারণের ধারণা জন্মিয়াছে। এইরূপ  
আলোচনা হইতে আমার বিশ্বাস জন্মিয়াছে যে, উড়িষ্যার রাজকার্য্যে নিযুক্ত  
থাকার সময়েই প্রত্যক্ষ ভাবেই হউক, আর পরোক্ষভাবেই হউক, রাজা  
রামানন্দ রায় কোন বৈষ্ণব সাধুর শিষ্যত্ব স্বীকার করিয়াছিলেন।

সমাপ্ত ।

শ্রীরাধেশচন্দ্র শেঠ ।

(১) প্রিয়নর্শসখা কশ্চিদর্জুনঃ পাণ্ডবোর্জুনঃ ।

মিলিত্বা সমভূঁজামানন্দরায়ঃ প্রভোপ্রিয়ঃ ॥

অতো রাধাকৃষ্ণভক্তি পেমতত্বাদিকং কৃণী ।

রামানন্দো গৌরচন্দ্রঃ প্রত্যর্ঘ্যদম্বহং ॥

ললিতেত্যাছরেকে বস্তদে কেনানুমত্ততে ।

ভবানন্দং প্রতি প্রাহ গৌরো যদ্বং পৃথাপতিঃ ॥

গোপ্যর্জুনিয়য়া সার্কমেকীভূয়রপি পাণ্ডবঃ ।

অর্জুনোষদ্রায় রামানন্দ ইত্যাহরুত্তমাঃ ॥

গৌরগণোদ্দেশ দীপিকা ।

## হাসির গান । দেশের ক্রমোন্নতি ।

হয়নি কি ধারণা, বুঝিতে পারনা  
ক্রমে উঠে দেশ উচ্ছে,  
যে হেতু যে গুলো রুচিত না আগে  
এখন সে গুলো রুচ্ছে ।

কেননা আমাদের বেড়ে মাথা সাফ,  
“গ্যানো” খুলে পড়ছি বিছাৎ আলো তাপ,  
মাপছি স্কোরার ফুটে বায়ুরাশির চাপ  
আর, মনের অন্ধকার শুচ্ছে ।

যে হেতু বুঝেছি বিস্কুট কেমন মধুর,  
কুকুট-অস্থি কেমন স্বাদ,  
আর ক্রমে মদিরায় বার মতি যায়,  
কেমনে সে হয় সাধু ;

যে হেতু আমাদের মনে মুখে দুই,  
( যাকে ) বলতে হবে “আপনি” তাকে বলি “তুই”,  
চাকুরি দেবে বলে চরণতলে শুই  
আর, ঘৃণা করি গরীব তুচ্ছে ।

যে হেতু আমরা হ্যাটে ঢাকি টিকি,  
সদা জন্মা রাখি শরীরে,  
“শান্তিপো” বলি “শান্তিপুর”কে  
আর “হ্যারি” বলে ডাকি “হরি”রে ;

## হাসির গান ।

১১১৭

যে হেতু আমরা ছেড়েছি একান্ত,  
শীটদষ্ট বাতুলতা বেদ বেদান্ত,  
মোদের অস্থিমজ্জাগত সাহেবি দৃষ্টান্ত,  
দেখ—“চাটুয্যে বাড়ুয্যে” !

কারণ ধর্মহীনতাটাই ধর্ম আমাদের,  
কোন ধর্মে নাই আস্থা,  
কি হবে ও ছাইভস্ম গুলো ভেবে  
মস্তিষ্কটা নয় সস্তা ;

অণুবীক্ষণ আর দূরবীক্ষণ ধরে’  
বাহিরের আঁখি ছুটো ফুটাচ্ছি, বেশ করে,  
মনশঙ্কুঃ অন্ধ তার খবর কে করে  
ও সে বেচারি আঁধারে ঘুরছে ।

আর, যেহেতু আমরা নেশা করি,—কিন্তু  
প্রাইবেট ক্যারাক্টার দেখুনা ;  
কংগ্রেসে কি বলি তাই মনে রেখো  
আর কিছু মনে রেখ না ।

বাপকে করি ঘৃণা মাকে দেই না অন  
বাইরের আবরণটা রাখি পরিচ্ছন্ন  
কোট প্যাণ্টালুনে ঢাকি কুম্বরণ  
বেনন দাঁড়কাক নয়রপুচ্ছে !

আর, যেহেতু আমরা পত্নী-আজ্ঞাকারী  
প্রাণপণে যোগাই গহনা,—  
আরে বাপ্রে তার রুপ্ত আঁখি তাপে  
শুকায় প্রেমদীর মোহনা,—

(সে যে) মাকে বলে বেটী,—হেঁসে দেই উড়িয়ে,  
 (তার) পিতৃবংশ নিয়ে আসি সব কুড়িয়ে  
 (মোদের) চিনিয়ে দিতে হয় এ “মাসী” “হুড়ি” এ  
 (ভুলে) প্রণাম করিনা পূজে!

কারণ খবরের কাগজ, সাইনবোর্ড আর  
 বিজ্ঞাপনের বেজায় ছড়াছড়ি,  
 তাতে দেখবে যথাক্রমে “পঞ্চানন্দ” আর  
 তিনকড়ি কবিরাজের “প্রেমবড়ি”!

আর যেহেতু আমাদের সাহস অতুল,  
 সাহেব দেখলে হয় পিতৃনামটা ভুল,  
 দেশটা, সংক্রান্তি পুরুষের হাত পা মাথা ছেড়ে—  
 ধরেছিল বুঝি গুহে!

### বৈয়াকরণ দম্পতীর প্রেমপত্র ।

(স্ত্রীর পত্র)

কবে হবে তোমাতে আমাতে সন্ধি!  
 যাবে বিরহের ভোগ, হবে শুভযোগ  
 স্বন্দ সমাসে হইব বন্দী ।

তুমি মূল ধাতু আমি হে প্রত্যয়,  
 তোমা যোগে আমার সার্থকতা হয়  
 কবে শ্রুতিশ্রুতঃ শ্রুতির ঘুচে যাবে ভয়  
 হব বর্তমানের তিপু তস অস্তি ।

(আমি) অবলা কবিতা, তুমি অলঙ্কার  
 তোমা বিনা আমার কিসের অহঙ্কার,  
 করিছে অনঙ্গ, ছন্দ-যতি-উঙ্গ  
 এসে সংশোধনের কর হে ফন্দি!  
 (স্বামীর উত্তর)

প্রিয়ে, হয়ে আছি বিরহে হসন্ত।  
 শুধু অধিখানা কোনমতে রয়েছি জীবন্ত।  
 কি কব ধাতুর ভোগ, নানা উপসর্গ যোগ  
 জীবনে কে লাগিয়েছে বিসর্গ অনন্ত।

প্রেয়সী প্রকৃতি তুমি, প্রত্যয়ের লীলাভূমি  
 তোমা বিনা কে আমারে ব্যাকরণে মান্ত?  
 অধ্যয়ন, উঠছে চাঙ্গে, রাত্রে যখন নিদ্রা ভাঙ্গে  
 লুপ্ত অকারের মত মরে থাকি জ্যাস্ত।

এ যে সন্ধিবিচ্ছেদের রাজ্য, কবে হব কর্তৃবাচ্য  
 বিরহ-অসমাপিকা-ক্রিয়া পাইনা অন্ত।  
 প্রিয়ে তুমি আছ কুত্র, খেঁয়েছি সব মূল হুত্র  
 পেয়ে তোমার প্রেমপত্র করি হা হা হস্ত!

### পুল্লোদ্ধাহের ফর্দ ।

(কণ্ঠার পিতার প্রতি)

কণ্ঠাদায়ে বিব্রত হ'য়েছ বিলক্ষণ;  
 তাই বুঝে সংক্ষেপে করছি ফর্দ সমাপন।  
 নগদে চাই তিনটী হাজার,  
 তাতেই আবার গিন্নী বেজার,  
 বলেন “এবার বরের বাজার,  
 কষা কি রকম!”

(কিন্তু) তোমার কাছে চক্ষুঃ-লজ্জা লাগে যে বিষম !  
 পড়ার খরচ মাসে তিরিশ,  
 “হয়না কমে”—বলে গিরিশ  
 কাজেই সেটা হ্যাঁ হ্যাঁ, বেশী বলা অকারণ ;  
 সোণার চেন ঘড়ী, আইভরি ছাড়ি  
 ডায়মণ্ড কাটা সোণার বোতাম,  
 দিও এক শেট কতই বা দাঁম,  
 বিলাতী বুট ভাল শ্লিপার বরের প্রয়োজন ।  
 (আর) ফুলষ্টিকিং রেসমী রুমাল দিও ছুডজন ।

ছপ্তি বুকু আমমা চিরুণ,  
 ফুট কাটা দ, বেরা টি পেণ্টালুন  
 ছজোড়া শাল সার্জে, চাদর গরদ সূচিকণ,  
 জমকালো ব্যাপার, আতর ল্যাভেণ্ডার,  
 খান পনের দেশী ধুতী,  
 রেসমী না হয় দিও স্মৃতি,  
 —হাদ্ দেখ, ধরেনি চশমা কেমন ভুলা মন !  
 হেলে হুসী পেনে খুসী,—একটু খাটো দরশন !

খাট চৌকি, মশারি গদি,  
 এর মধ্যে নাই “পারি যদি”,—  
 তাকিয়া তোষক বালিস আদি দস্তুর মতন ;  
 হবে ছুপ্রস্ত, শয্যা প্রশস্ত  
 (আর) টেবিল চেয়ার আধানা ডেক্স,  
 হাতীর দাঁতের হাত বাক্স ;  
 ষ্টিল ট্র্যাক খুব বড় ছটো যা দেশের চলন ;  
 তারি সঙ্গে পুরো এক শেট রূপার বাসন ।

গিনী বলেন বাউটা শুটে  
 রূপলাবণ্য উঠে ফুটে  
 একশ ভরি হলেই হবে একটা গেট উত্তম ;  
 যেন অলঙ্কার দেখে, নিন্দে করেনা লোকে  
 দিও বারাগুসী বোম্বাই, ফর্দ কিছু হ'ল লম্বাই,  
 তা তোমার মেয়ে তোমার জামাই, তোমার আকিঞ্চন যোগ মিটিয়া  
 আমার কি ভাই, আজ বাদে কাল মুদ্ব ছ'নয়ন গোল মিটিত,  
 আছে বলিয়া  
 কাল হইতে  
 রাচ্ছে ।  
 তর্কাদির,  
 আমি পাই

(আর) দিও যাতায়াতের খরচ  
 না হয় কিছু হবে করজ  
 তা—তোমার মেয়ে, তোমারি গরজ—তোমার অর্কাটীন হইয়া  
 (আবার) আম্বে কুলীন দল  
 (তাদের) চাই বিলাতী জল  
 ডজন বিশেক ছইঙ্কি রেখো  
 নইলে বড় প্রমাদ দেখো ;  
 কি করবো ভাই দেশের আজকাল এমনি চাল চলন ।  
 কেবল চক্ষুঃ লজ্জায় বাধ' বাধ' ঠেবুছে যে কেমন ।

(আর) ছেলেটা মোর নব-কার্তিক,  
 ভাবটা আবার খাটা সাস্তিক,  
 এই বয়সেই ভারভাতিক,—কতাদের মতন ;  
 যদি দিতেন একটা পাশ, তবে লাগিয়ে দিতাম ত্রাস  
 ফেল ছেলে তাই এক কুম পণ  
 তাতেই তোমার উঠলো কম্পন ?—  
 —কেবল তোমার বাজার যাচাই বকালে অস্কারণ !  
 দেশের দশা হেরে কান্ত করে অশ্রু বরিষণ !!

শ্রীরজনীকান্ত সেন ।

## ফলিত জ্যোতিষ-প্রসঙ্গ ।

চৈত্রের 'প্রদীপে' অশেষ শ্রদ্ধাভাজন গুরুস্থানীয় শ্রীযুক্ত রামেন্দ্র-  
ত "ফলিত জ্যোতিষ" বলিয়া একটা প্রবন্ধ ছিল। বিজ্ঞানশাস্ত্র-  
পুত্র রামেন্দ্রবাবুর নাম দেখিয়া বড়ই আগ্রহ, বড়ই ভক্তিসহকারে  
করিতে আরম্ভ করিয়াছিলাম; ভাবিয়াছিলাম, ফলিত জ্যোতিষ-  
বিদ কোন যুক্তিতর্কপূর্ণ সিদ্ধান্ত পাওয়া যাইবে। তাঁহার  
(অ) জ্যোতিষশাস্ত্রবিদ নানা কলাকুশল পণ্ডিতের রচিত প্রবন্ধে  
সঙ্গত, কিন্তু অশ্রেয় কল্পিত বুলিয়াছেন জানি না, ক্ষুদ্র-  
তাহা পাঠে নিরাশ হইয়াছি, তাই সে সম্বন্ধে ছই একটা  
আসিলাম। আমার উদ্দেশ্য প্রতিবাদ নহে, শ্রীযুক্ত রামেন্দ্র-  
আমার বাদ প্রতিবাদ চলিতেই পারে না, তিনি আমার গুরু-  
তারপর আমি জ্যোতিষশাস্ত্রসম্বন্ধে অনভিজ্ঞ; তবে সাধারণ জ্ঞান ও  
অভিজ্ঞতার বাহা বোধ হয়, তাই আমি নিবেদন করিতে আসিয়াছি।  
আমার উদ্দেশ্য প্রদীপের\* আলোকে সন্দেহস্বাত্ত নিরসনমাত্র। আজকাল  
অনেকেই মনে করেন যে, কোন প্রবন্ধসম্বন্ধে কিছু বলিতে গেলেই সেটা  
লেখকের প্রতি ঈর্ষা, হিংসাবশতঃ বা লেখকের সঙ্গে মনোমালিন্য বশতঃই  
হইয়া থাকে, তাই উল্লিখিত কৈফিয়ৎ দেওয়া আবশ্যিক মনে করিলাম;  
রামেন্দ্রবাবুর সহিত আমার সাক্ষাৎসম্বন্ধে কোন আলাপ পরিচয় নাই, সুতরাং  
ঈর্ষ্য কারণের কোনও সম্ভাবনাই নাই।

প্রবন্ধটি পড়িয়া বোধ হয় যে, শ্রদ্ধাস্পদ রামেন্দ্রবাবু ঐ প্রবন্ধে স্বীয়  
গাভীর্য্য রক্ষা করেন নাই। প্রবন্ধটির আশ্রয় রহস্য, শ্লেষ ও উপহাসপূর্ণ;  
সে সব শ্লেষ ও রহস্য-অঙ্গগুলি 'মরিচাধরা' নহে, বেশ শাণিত, বেশ উজ্জ্বল,

\* প্রবন্ধটি "প্রদীপেই" প্রকাশিত হইবার জন্য প্রেরিত হইয়াছিল। প্রদীপ সম্পাদক  
প্রকাশিত করিতে অসম্মত হইয়া ফেরত দেওয়ার, ইহা উৎসাহে প্রকাশিত হইল।

উৎসাহ সম্পাদক।

বেশ মর্মান্তিক, কিন্তু তাহার মধ্যে প্রকৃত সারবত্তা যেন কমই আছে বলিয়া  
বোধ হয়। তিনি প্রথমেই বলিয়াছেন যে, এ বিষয় অতি প্রাচীনকাল হইতে  
বিবাদস্থানীয় হইয়া আসিতেছে, যুক্তি, তর্কও যথেষ্ট খরচ হইয়া গিয়াছে।  
আমরা ভাবিয়াছিলাম, তাঁহার মত সুপণ্ডিত ব্যক্তি আধুনিক যুক্তি-তর্কাদির  
সমাবেশ দ্বারা একটা মীমাংসার চেষ্টা করিবেন, কিন্তু তাহাতে আমি পাই  
নাই, অথবা বুঝিতে পারি নাই। তিনি এক কথায় সব গোলযোগ মিটিয়া  
যাইতে পারে বলিয়াছেন বটে, কিন্তু ঐ এক কথায় যদি সব গোল মিটিত,  
তবে সংসারে অনেক বিবাদই লয়প্রাপ্ত হইত।

প্রত্যেক পক্ষই যখন নিজ বাগ্জাল বিস্তার করিয়া যুক্তি তর্কের  
অবতারণা করেন, তখন প্রত্যেকেই মনে করেন, তাঁহাদের কথাগুলি অদ্রান্ত,  
যুক্তি অকাট্য, কেহ তদ্বিরুদ্ধে কিছু বলিতে গেলেই সে অর্কাচীন হইয়া  
দাঁড়ায়; অনেক সময় লোকে যুক্তিতর্কে প্রতিপক্ষের সহিত আঁটিয়া উঠিতে  
না পারিয়া টিটকারী ও হাততালি দ্বারা তাহাকে উড়াইয়া দিতে চেষ্টা করে,  
সুতরাং সেটা ভাবিয়া দেখিলে সংসারের সাধারণ নিয়ম বা মানবের স্বাভাবিক  
চরিত্রগত একটা ধর্ম। 'জগতে ছইটি বস্তু আছে, যাহা লোকে প্রায়ই কম  
দেখেনা, সে দুটি জিনিস :—স্বকীয় বুদ্ধি আর পরকীয় ধন।'

সুতরাং এক পক্ষ অপর পক্ষকে মন্দ বালিলে সেটা অসাধারণ কিছু  
হয় না। অবশ্য আমি সেটা প্রশংসা করি না, সেরূপ করা কোন ক্ষেত্রেই  
উচিত নহে, কেবল সম্প্রদায়বিশেষে নহে, কাহারই তাহা করা কর্তব্য  
নহে, কিন্তু সকলেই বোধ হয় স্বীকার করিবেন যে, কার্যতঃ প্রায়ই তাহার  
বিপরীত আচরণ দেখা যায়।

ফলিত জ্যোতিষ নূতন নহে। অনেকের মতে ফলিত ও গণিত  
জ্যোতিষ একই সময়ের পরে পৃথক হইয়া গড়িয়াছে। সুধু ভারতবর্ষে নহে,  
ইয়ুরোপ খণ্ডের প্রাচীন গ্রীস, রোম হইতে আধুনিক ইংলণ্ড, জার্মেনি  
প্রভৃতি সভ্যদেশে, আমেরিকায়, মিসরে, চীনে এই বিচার আলোচনা চলিয়া  
আসিতেছে; অবশ্য সর্বদেশেই বিরুদ্ধ মতের লোকও আছেন, বিরোধিদলও  
আছেন; কোন বিষয়েরই বা নাই? সুতরাং তাই বলিয়াই যে বিত্যাটাকে  
উপেক্ষা ও শ্লেষের পেষণযন্ত্রে ফেলিয়া নির্দয় পীড়ন করিতে হইবে, সাই-

বিরিয়ার ভূমিকম্প, লুইনেপোলিয়নের পৌত্রের শিরঃপীড়া বা আমার নিমন্ত্রণ গ্রহণের সম্ভাবনা দেখাইয়া উচ্চ হাসি হাসিতে হইবে, একরূপ কোন কথা আছে বলিয়া বোধ হয় না। 'আজ যাহা অশ্রান্ত সত্য বলিয়া গৃহীত হইতেছে, পূর্বে হয়ত তাহাই উপেক্ষার বিষয় ছিল, আবার দুদিন পর তাহাই পুনরায় উপেক্ষিত হইতে পারে। জগতের নিয়মই তাই।

অন্যান্য বিজ্ঞানও যে মূলস্থত্রের উপর প্রতিষ্ঠিত, ফলিত জ্যোতিষও তাহাই। নিখিল বস্তুজাতের ভূতলপতন দৃষ্টে যেমন এইটা বস্তুসমূহের একটা বাধ্যবাধকতা বলিয়া স্থির হইয়াছে, সেইরূপ কপাল, চক্ষুঃ, নাসিকা, ওষ্ঠ প্রভৃতির আকার প্রকার, কর রেখাবলীর বিচারণ এবং আকাশের নক্ষত্র সংস্থানের সহিত ভূতলস্থ জীবগণের জীবনের সম্বন্ধ সম্বন্ধে নানারূপ পরীক্ষা দ্বারাই ফলিত জ্যোতিষের তত্ত্ব সমস্ত নির্ণীত হইয়াছে; বিশেষ বিশেষ রেখা বা চিহ্ন হস্তে বা দেহে থাকায় অনেক লোকের জীবনে এইরূপ ঘটনা হইয়াছে দেখিয়াই সাধারণ-স্থত্র স্বরূপে পরীক্ষাকারিগণ স্থির করিয়াছেন যে, এইরূপ চিহ্নে বা রেখায় এইরূপ ফল হইয়া থাকে। গগনের অমুক নক্ষত্র সংস্থানের কালে জন্মিলে জীবনের ফল এইরূপ হইয়া থাকে, ইহা নানাস্থানে পরীক্ষা করিয়াই তাহা সাধারণ স্থত্রস্বরূপে গৃহীত হইয়াছে। নতুবা প্রাচীন পণ্ডিত ঋষিগণ সোমরস পানে বিভোর হইয়া যে স্থত্রগুলি যথেষ্ট রচনা করিয়াছেন, তাহা আমার ক্ষুদ্রবুদ্ধিতে ধারণা হয় না।

তবে বলিতে পারেন যে, গণনা সর্বদা ঠিক হয় না কেন? একথার উত্তরে জ্যোতিষিক বলিতে পারেন যে, গণনা উপযুক্তরূপ হয় না। যে কারণেই হউক, ফলিত জ্যোতিষের আলোচনা লুপ্তপ্রায়! ফলিত জ্যোতিষের গণনাও বিশেষ কঠিন। জন্মকালের ঠিক সময় নিরূপণের উপরই জীবনের গণনার সত্যাসত্য নির্ভর করে, তাহা অনেক সময়ই ঠিকরূপ হয় না, তার পর তাহা ঠিক হইলেও পরবর্তী গণনার অঙ্কপাতে অনেক বিঘ্ন আছে, তাহাতে অনেক ভুলত্রাস্তি হইয়া থাকে। আজকাল গ্রহাচার্যগণের উপরই সাধারণতঃ ফলিত জ্যোতিষের ভাগ্য গুস্ত আছে। তাঁহাদের অনেকেই নিরক্ষর, বা সংস্কৃতশাস্ত্রানভিজ্ঞ, সুতরাং তাঁহারা যথেষ্ট গণনা করিয়া যা খুসী তাই বলিয়া থাকেন, তাহা অনেক সময়ই ভুল হয়। এই সব নিরক্ষর

লোকই ফলিত জ্যোতিষের উপর লোককে বীতশ্রদ্ধ করিয়া দিয়াছেন, কিন্তু সেজন্য জ্যোতিষের অপরাধ কি? রাসায়নিক সংযোগ-বিয়োগে অনেক নূতন বস্তু প্রস্তুত হয় বটে, কিন্তু যে যে পরিমাণে 'যাহা' মিশ্রিত করিতে হইবে তাহা যদি না হয়, তবে কি সে সব দ্রব্য প্রস্তুত হইয়া থাকে? অথবা তাহা না হইলে রসায়নদৃষ্টে বলিয়া প্রতিপন্ন হয়? কবিরাজ গোক্ষুর দ্বারা ঔষধ প্রস্তুতের ব্যবস্থা করায় যদি গাভীর ক্ষুর কণ্ডিত হয়, তবে সেজন্য কি আয়ুর্বেদ অপরাধী হইবে?

রীতিমত প্রকৃত সময় নিরূপণ ও গ্রহাদি সংস্থান জ্ঞাত হইয়া শাস্ত্রোক্ত বিধানে গণিত হইলে ফলিত জ্যোতিষ অশ্রান্ত ফল প্রদান করে, একথা জ্যোতিষিক দর্প করিয়া বলেন। সুতরাং সুপণ্ডিত ফলিত জ্যোতিষিকগণকে আহ্বান করিয়া ঐরূপে গণনা করাইয়া সত্যাসত্য নির্ধারণ করা আবশ্যিক, তাহা হইলেই প্রকৃত উপকার হয়, অন্যথা ফাঁকা শ্লেষে কোন কাজ হয় না।

তবে ফলিত জ্যোতিষের কোন বিশেষ গণনাসম্বন্ধে যথার্থ অনুসন্ধান করায়, একটা অন্তরায় আছে। শ্রীযুক্ত রামেন্দ্রবাবু প্রত্যক্ষ প্রমাণ চাহেন, তাঁহার বিজ্ঞান সেরূপ প্রমাণ দিতে সমর্থ; কারণ সে যে তত্ত্বের প্রমাণ করিবে, তাহার প্রমাণোপযোগী বস্তুজাত সর্বদাই একরূপ। জড়জগতের বস্তুজাত একভাবেই আছে। জল, অগ্নির উত্তাপে বাষ্প হয়, ইহা 'দেখান সহজ'; কারণ জল, অগ্নি উত্তাপ দিবার পাত্র প্রভৃতি সবই সর্বকালে একরূপ। বাত্মের ঢাকা না খুলিয়াও দেখা যায়, ইহাও সর্বদাই প্রমাণিত; কারণ 'রক্তগেন' আলোক থাকিলেই আর ভাবনা নাই, কিন্তু ফলিত জ্যোতিষে তাহা সম্ভব নহে; কারণ অমুক নক্ষত্রের এই অবস্থায় জন্মিলে জাতসন্তান এইরূপ হইবে, তাহা যখন তখন প্রমাণ করা সহজ নহে; কারণ গ্রহের সেইরূপ সংস্থান এবং সেই সংস্থানের সময় জীব সৃষ্টি করা, জল ও অগ্নি সংগ্রহ করার স্থায় আমাদের সাধ্যাত্ত নহে, সেজন্য আমাদের প্রকৃতির উপর নির্ভর করিতে হয়। জলহীন দেশে বৈজ্ঞানিক শত চেষ্টাতেও জলের বাষ্পীভবন প্রত্যক্ষরূপে প্রমাণ করিতে পারেন না। বৈজ্ঞানিক যন্ত্রহীন বিদ্যালয়ে অধ্যাপনাকালে অতি সুপণ্ডিত বৈজ্ঞানিককেও অনেক প্রত্যক্ষ প্রমাণ সাপেক্ষতত্ত্ব খড়ি ও বোর্ডের সাহায্যে প্রমাণ করিয়াই সন্তুষ্ট থাকিতে হয়। এবং সর

অমুক দিন, অমুক সময় গ্রহণ হইবে, ইহাও ঠিক সেইকালের পূর্বে প্রমাণ করা অসম্ভব! সেইরূপ ফলিত জ্যোতিষের অনেক তথ্যও যখন তখন প্রমাণ করা অসম্ভব। যাহারা ইহাতে বিশ্বাসী নহেন, তাঁহারা অনেকস্থলেই যতদূর প্রমাণ সংগ্রহের প্রয়োজন, ততদূর প্রমাণ সংগ্রহের ক্রেশ স্বীকারে অস্বীকৃত। তাঁহারা আগে হইতেই বুঝিয়া রাখিয়াছেন যে উহা অসার, সুতরাং সেই স্বতঃসিদ্ধ অসারত্বের প্রমাণ জন্ম অথচ নিকট অনুসন্ধান তাঁহারা আবশ্যিক মনে করেন না। এস্থলে আমি রামেন্দ্রবাবুকে লক্ষ্য করিতেছি না, সাধারণ ভাবেই বলিতেছি।

বিভাসাগর মহাশয় জন্মবার সময়ে সে কোষ্ঠী প্রস্তুত হইয়াছিল, তল্লিখিত ঘটনাবলী যদি তাঁহার পরজীবনে ঠিক মিলিয়া যায়, তবে সে গণনা সত্য হইয়াছে ইহা কেন না বলিয়া গণক আর অবশ্য তখন ভগবানের প্রত্যাদেশলাভে বুঝিতে পারে নাই যে এই শিশু কালে এইরূপ বড়লোক হইবে, সুতরাং ঘটনা ঘটবার পূর্বে যদি তাহা বলিয়া দেওয়া যায় এবং কালক্রমে যদি তাহা সত্য হয়, তবে তাহা সত্য বলিব না কেন?

সংসারে সর্ববিষয়েই প্রত্যক্ষ দৃষ্টি করিয়া বিশ্বাস অসম্ভব; তাহা হইলে অনেক দেশের অনেক বিষয়ই অবিশ্বাস করিতে হয়; যে বৈজ্ঞানিক নিজ প্রত্যক্ষ দৃষ্টি ব্যতীত আর কিছুই বিশ্বাস করিতে চাহেন না, তাঁহার পক্ষে বিচার্য বিষয়ের সম্বন্ধে গভীর গবেষণা, অনুসন্ধান ও নানাপ্রকার পরীক্ষা করা প্রথমে আবশ্যিক; যদি বিচার্যশাস্ত্রে সুপণ্ডিত হইয়া উপদিষ্টরূপে পরীক্ষা দ্বারাও ফল না পাওয়া যায়, তখন তাঁহার অবিশ্বাসের হেতু উপস্থিত হইতে পারে, তৎপূর্বে নহে।

ফলিত জ্যোতিষসম্বন্ধে রামেন্দ্রবাবু তাহা করিয়াছেন কি না, আমি জানি না, তবে অনেকেই যে অনেক বিষয়ে পবেশ না করিয়া উপর উপর মত দেন, তাহা বিলক্ষণ জ্ঞাত আছি এবং অভিজ্ঞ রামেন্দ্রবাবুও যে জ্ঞাত না আছেন তাহা নহে।

পূর্বেই বলিয়াছি, আমি জ্যোতিষশাস্ত্রে অভিজ্ঞ নহি, সে বিষয়ের বিশেষ কিছু জানিও না, সুতরাং সত্য বা অসত্য কিছুই বলিতে পারি না; কিন্তু রীতিমত গণনা হইলে যে অনেক সময় আশ্চর্য্য ফল দেখা যায়, তাহা

নিজেও প্রত্যক্ষ করিয়াছি এবং অনেক বিশ্বস্ত লোকের মুখে, এ বিষয়ের পক্ষে যে যুক্তি আমার সাধারণ জ্ঞানে সম্ভব বোধ করিয়া, তাহারই কতক কতক নিবেদন করিলাম।

কলিকাতার শ্রীযুক্ত রমণকৃষ্ণ, শ্রীযুক্ত হরিমোহন, শ্রীযুক্ত তারিণী-প্রসাদ প্রভৃতি অনেক কৃতবিদ্য, সুপণ্ডিত ফলিত জ্যোতিষী আছেন, মাদ্রাজ প্রভৃতি দেশেও ঐ শাস্ত্রের ভাল ভাল পণ্ডিত, আছেন, তাঁহাদিগকে আহ্বান করিয়া এ বিষয়ের প্রমাণের অনুরোধ করিলে সুখের বিষয় হয়। আমাদের দেশের কৃতবিদ্যগণ চেষ্টা করিলে কি তাহা হয় না? তাঁহারা আসিয়া করকোষ্ঠী বিচার পূর্বক ফলিত জ্যোতিষের সত্যতা প্রমাণ করুন, জাত বালকের কোষ্ঠী-প্রস্তুত করিয়া দিয়া তাহার যথার্থ্য সম্বন্ধে দায়ী হউন, তাহা হইলে আমরা অজ্ঞেরা বুঝিতে পারি, বিজ্ঞেরাও বুঝিতে পারেন, নতুবা এরূপ মেঘের আড়ালে থাকিয়া বাণবধ করিলে উভয় পক্ষের বাণকাটা-কাটা ভিন্ন অথ কোন লাভ হইবে বলিয়া আমরা বিবেচনা করি না। আমাদের কৃতবিদ্য দেশীয় ভ্রাতৃগণ আমার এই নিবেদনের বিষয় একবার বিবেচনা করিলে কৃতার্থ হইব।

শ্রীযত্ননাথ চক্রবর্তী।

সৌন্দর্য্য।

মর জগতে সৌন্দর্য্যের ক্ষমতা অসীম। যাহা সুন্দর কি জানি কেন, ইচ্ছা না থাকিলেও, হৃদয়ের উপর তাহা অতি আশ্চর্য্যরূপে কার্য্য করিয়া থাকে। তুমি পলিতকেশ বৃদ্ধ হও, তোমারও চিত্ত সুন্দর দেখিলে ছুটিয়া যাইবে; আবার সুকুমার শিশু হও, তুমিও সুন্দর বস্তু দেখিলে কি এক অদ্ভুত শক্তিবলে সেই দিকে হস্ত প্রসারণ করিবে। সৌন্দর্য্যপ্রিয়তা মনুষ্য-হৃদয়ের একটি স্বাভাবিক ধর্ম্ম। তাই মনুষ্য যাহা কিছু সুন্দর দেখিতে পায়, তাহারই অনুকরণ করে এবং বাহ্য জগতে যাহা নাই, এরূপ বস্তু সকলও কল্পনা দ্বারা গঠন করিয়া বিধাতার সৃষ্টি রাজ্যকেও হার মানাইয়া



অমুক দিনষ্টা করে। ইংরাজী ভাষায় যাহাকে "Fine Arts" কহে, তাহা করা-হৃদয়ের এইরূপ সৌন্দর্য-প্রিয়তারই ফল। সভ্যতার সোপানে যে কজাতি যত উঠিয়াছে, সৌন্দর্য প্রিয়তা সেই জাতিরই তত অধিক। তাই সভ্য জাতির বাস-ভবন, তাহাদিগের পরিচ্ছদ, তাহাদিগের যানবাহন, তাহাদিগের বৃক্ষ-বাটিকা এবং পুষ্পকানন এমন কি, তাহাদিগের অতি ক্ষুদ্র এবং সামান্য প্রত্যেক বস্তুতেই এই সৌন্দর্য-প্রিয়তার বিকাশ দেখিতে পাওয়া যায়! এমন কি অনেক সময়ে এই সৌন্দর্য-প্রিয়তা একটা উৎকট ব্যাধি-স্বরূপ হইয়া দাঁড়ায়। এই সৌন্দর্য-প্রিয়তা মনুষ্যের হৃদয়ে অনেক সময়ে অতি আশ্চর্যরূপে কার্য্য করিয়া থাকে, যাহারা পৃথিবীতে জন্মগ্রহণ করিয়া চিরকাল কঠোরতার জোড়ে লালিত হইয়া চিত্তের কোমল অংশটুকুর প্রায় বিলোপ সাধন করিয়াছেন এবং নরশোণিতে পৃথিবী রঞ্জিত করিয়া আপনাদিগের কীর্তি রাখিয়া গিয়ানেন, তাহারাও সৌন্দর্যের মোহিনী শক্তির প্রভাব এড়াইতে পারেন নাই। আবার যাহারা পৃথিবীতে আপনার স্বার্থ বিসর্জন দিয়া আপনার সুখ ছুঃখের প্রতি কিছুমাত্র দৃষ্টি না করিয়া, পরহিতব্রত অবলম্বন করিয়াছেন, এবং পরার্থে জীবন পর্যন্ত সংকল্প করিয়াছেন, তাহারাও অনেক সময়ে জীবনের মহামন্ত্র ভুলিয়া বাহ সৌন্দর্যের সেবায় রত হইয়াছেন।

মনুষ্য হৃদয়ের উপর যাহার এতদূর আধিপত্য, তাহার সম্বন্ধে কিঞ্চিৎ আলোচনার উপকার দর্শিতে পারে।

এই পরিদৃশ্যমান বিশ্বের প্রতি পদার্থে এবং পদার্থের প্রতি পরমাণুতে একটা অব্যক্ত অথচ মনোমুগ্ধকর ভাবের বিকাশ দেখিতে পাই। ভাষার সাগর মন্থন করিয়া হৃদয়ের অতি গুপ্ত স্থানগুলি তন্ন তন্ন করিয়া অনুসন্ধান করিয়া এই অব্যক্ত ভাবটির যথাযথ নামকরণ করা ছুঃখট বুলিয়া বিবেচনা করি। যাহারা ঐব্যের নামকরণ করিয়াছেন, বোধ হয় এই ভাবটিকেই তাহারা সৌন্দর্য নামে অভিহিত করিয়াছেন। কিন্তু সাধারণতঃ সৌন্দর্য বুলিলে যাহা বুঝা যায়, তাহা এই ভাবটি ব্যক্ত করিতে সক্ষম কিনা, সে বিষয়ে সন্দেহ করি।

যাহারা মনোবিজ্ঞানবিৎ তাহারা বলিবেন, কৃতকগুলি সম্বন্ধরহিত বস্তুর একত্র সমবায় দ্বারা যে সামঞ্জস্যের উৎপত্তি হয়, তাহারই নাম সৌন্দর্য। বহু পদার্থের মধ্যে একতা স্থাপনেই সৌন্দর্যের উৎপত্তি (Unity in

plurality)। তাহা হইতে পারে, কিন্তু এই plurality'র মধ্যে unity স্থাপিত হয় কিসে? সৌন্দর্য অবশ্যই অনুভবের বিষয়। অনুভব বলিলে আমরা স্বতঃই দুইটি পদার্থের অস্তিত্ব বুঝিয়া, লই—একজন দ্রষ্টা এবং আর একটি দৃশ্য পদার্থ। সুতরাং সৌন্দর্য, এই দ্রষ্টা এবং দৃশ্য পদার্থের মধ্যে সম্বন্ধ-জনিত কোন ভাব বিশেষ। ইহার পর স্বতঃই এই প্রশ্ন উঠিতে পারে যে, তবে সৌন্দর্যের আধার কোথায়—বাহ পদার্থে অথবা হৃদয়াভ্যন্তরে? বাহ পদার্থ সৌন্দর্যের আধার হইতে পারে না, ইহা সহজেই প্রতিপন্ন হইতে পারে। তুমি যে বস্তুকে অতি সুন্দর বলিয়া মনে কর, হয়ত আমি তাহাতে সৌন্দর্যের কোনই লক্ষণ দেখিতে পাই না, আবার আমার চক্ষে যাহা সুন্দর, হয়ত তুমি তাহা অতি কুৎসিত বলিয়া মনে কর। বাড়ী ঘর গাছ পালা প্রভৃতির স্থায় যদি সৌন্দর্যও কেবল একটা বাহ বস্তু হইত, তাহা হইলে সুন্দর ও কুৎসিত লইয়া এত মতভেদ, রাদানুবাদ সম্ভব হইত না। কলিকাতার মনুষ্যে কঠিন ইষ্টক-নির্মিত, এ বিষয়ে বিকৃত বুদ্ধি ব্যক্তি ছাড়া অত্র কাহারও সহিত মতবৈধ হইতে পারে কি? তাই বলি সৌন্দর্যের আধার বাহ জগতে নহে, অন্তর্জগতে এবং এই কারণেই সৌন্দর্য লইয়া এত মতভেদ দেখিতে পাওয়া যায়। বিধাতার সৃষ্টি বৈষম্যে পরিপূর্ণ, মনুষ্য-প্রকৃতিতে এই বৈষম্যের বোধ হয় পূর্ণ বিকাশ দেখিতে পাওয়া যায়। কোটা কোটা মনুষ্যের মধ্যে অবিকল একরূপ প্রকৃতি-বিশিষ্ট দুইটি মনুষ্য বোধ হয় খুঁজিয়া পাওয়া যায় না। এই প্রকৃতিগত বৈষম্যই সৌন্দর্যে এইরূপ মতভেদের কারণ। মোটামুটি দেখিতে পাওয়া যায়, যিনি সাম্প্রিক প্রকৃতিবিশিষ্ট, তিনি শান্ত শুদ্ধ রূপ ভালবাসেন। যে রূপে উগ্রতা নাই, যে লাষণ্যে নয়ন ঝলসিয়া যায় না, যে মূর্তির আবির্ভাবে হৃদয় এক অনির্বচনীয় আশ্চর্য পূরিয়া উঠে—তিনি সেই রূপ ভালবাসেন। আর যিনি সাম্প্রিক প্রকৃতি-বিশিষ্ট, তিনি উগ্রমূর্তির সেবক। যেখানে উগ্রতা, যেখানে রূপের বিভীষিকায় হৃদয় ভীত স্তম্ভিত হয়, তামসিকের নিকট তাহাই প্রিয়। তিনি সেই রূপই সৌন্দর্যময় দেখেন।

প্রকৃতিগত বৈষম্য ব্যতীত, অত্র অনেক কারণেই সৌন্দর্য লইয়া মতভেদ ঘটিয়া থাকে। শিক্ষা, সংসর্গ, দেশ, কাল ইত্যাদি ভেদেও সৌন্দর্যের

মতভেদ ঘটয়া থাকে। তুমি আমি যাহাকে সুন্দর মনে করি, হয়ত সুন্দর ইংলণ্ডবাসী তাহাকে অতি কুৎসিত বিবেচনা করেন, আবার তিনি যাহাকে সুন্দর বলিয়া থাকেন, তুমি আমি তাহাতে সৌন্দর্যের কোন লক্ষণই দেখিতে পাই না। ইহা ব্যতীত সৌন্দর্যে মতভেদের আর একটি কারণ, সুখ দুঃখ। মনুষ্য-হৃদয় যখন সুখের সাগরে ভাসিতে থাকে, তখন পৃথিবীকেই সৌন্দর্যময় দেখে, আবার যখন দুঃখের সাগরে হাবুডুবু খাইয়া চিত্ত অস্থির হয়, তখন পৃথিবীর সকল পদার্থই যেন একটা অতি কুৎসিত মূর্তি ধারণ করিয়া থাকে।

তাই বলি, সৌন্দর্যের লীলাভূমি মনুষ্য-হৃদয়। যত কিছু সুন্দর, যত কিছু কুৎসিত বস্তু সংসারে আছে বলিয়া, আমাদিগের প্রতীতি জন্মিয়া থাকে, তৎসমুদয়েরই সৃষ্টি এবং স্থিতি এই মনুষ্য-হৃদয়ে। মনুষ্য-হৃদয় সৌন্দর্যের লীলাভূমি বধিয়া, মনুষ্য-হৃদয়ের যেটি সর্বশ্রেষ্ঠ বৃত্তি, তাহার সহিত সৌন্দর্যের অতি ঘনিষ্ঠ সম্বন্ধ। সেটি প্রেম অথবা ভালবাসা। হৃদয় যাহা চাহে—যাহা প্রাপ্ত হইলে হৃদয়ে আনন্দের সঞ্চারণ হয়, প্রাণের চক্ষে তাহাই সুন্দর। আবার যাহা সুন্দর, হৃদয় অনিচ্ছা সত্ত্বেও তাহাতে আকৃষ্ট হয়, অলক্ষিতে তাহাকে ভালবাসিয়া ফেলে। যাহা মনোমুগ্ধকর এবং হৃদয়ের প্রীতিকর, তাহাই সুন্দর এবং মনুষ্যহৃদয় তাহাতেই আকৃষ্ট হয়, সুতরাং তাহাই ভালবাসে। সেই জন্তই সৌন্দর্যের সহিত ভালবাসা ওতপ্রোতভাবে জড়িত। যেখানে সৌন্দর্যের সমাবেশ, জানি না কেন, হৃদয় স্বাভাবিকই সেখানে আকৃষ্ট হয়, আবার যেখানে ভালবাসার স্কৃতি, কি জানি, কি এক নিগূঢ় কারণ বশতঃ, সেখানে সকলই পরম সুন্দর বলিয়া বোধ হয়। এক হৃদয়ের সহিত অত্র হৃদয়ের মিলনের নামই ভালবাসা অথবা এইরূপ মিলনেই ভালবাসার উৎপত্তি। নতুবা বাহু সৌন্দর্যের মোহবশতঃ যে ভালবাসার উৎপত্তি, তাহাকে প্রকৃত ভালবাসা বলিতে পারি না, তাহা একটা অপকৃষ্ট বৃত্তিমাাত্র। বাহু সৌন্দর্য ইন্দ্রিয়তৃপ্তির উপাদান বৈ আর কিছুই নয়। সুতরাং বাহ্যিক সর্বকালের সেবাই, যে ভালবাসার চরমফল, তাহা একটা অতি তুচ্ছ বৃত্তি বৈ আর কি হইতে পারে? এবং এই প্রকার বাহ্যিক-সেবার উপাদানমাত্র যে সৌন্দর্য, তাহাও অতি তুচ্ছ পদার্থ। যে সৌন্দর্য হৃদয়ের অন্তঃস্থলে প্রবেশ করিয়া হৃদয় উদ্বেলিত করিতে

পারে না, যাহার অব্যক্ত শক্তিবলে হৃদয়ে স্বর্গীয় আনন্দের সঞ্চারণ হয় না, যাহার অনুভূতিমাত্র প্রাণে এক অব্যক্ত ভাবে পুরিয়া উঠে না, বাহ্যিক চরিতার্থ করিয়াই যাহা নিলয় প্রাপ্ত হয়,—সে সৌন্দর্যের পূজা জগৎ হইতে উঠাইয়া দাও, জগতের কোন ক্ষতি হইবে না। আর কবি অন্তরালে বসিয়া প্রকৃতির প্রতি কার্ষ্যে প্রতি বস্তুতে যে সৌন্দর্যের খেলা দেখিতেছেন, যে সৌন্দর্য দেখিতে দেখিতে এক এক বার হৃদয়ে আনন্দের জোয়ার আনিয়া সৌন্দর্যরাশিকে কবিতা-শ্রোতে পরিণত করিয়া থাকে, দার্শনিক যে সৌন্দর্যের লীলা দেখিয়া আপন ভাবে আপনি বিভোর হইয়া এক অনির্বচনীয় শান্তিরস পান করিয়া থাকেন, যে সৌন্দর্য প্রতিনিয়ত সাধকের হৃদয়ে উদ্ভাসিত হইয়া তাঁহার চিত্তকে পরম সুন্দর সেই জ্যোতির্স্বয়ের নিকট লইয়া যাইতেছে,—সে সৌন্দর্য এক স্বতন্ত্র পদার্থ। তাহার পূজা জগতে বাড়িতে থাকুক, জগতের মঙ্গল হইবে। এ সৌন্দর্যে পাপের আবির্ভাব নাই, উপভোগ-জমিত, ক্লান্তি বা বিতৃষ্ণা নাই, বাহু চাকচিক্যের সম্মোহন নাই। ইহাতে হৃদয় নির্মল ও চিত্ত শুদ্ধ হইয়া প্রাণ এক অভিনয় ভাবে পূর্ণ হয়। এ সংসারে যে সকল ব্যক্তি চিরকাল কেবল মস্তিষ্কের পরিচালনা করিয়া হৃদয়ের কোমল প্রবৃত্তিগুলি উন্মূলিত করিয়া আপনাদিগকে জ্ঞানী এবং পণ্ডিত বলিয়া অভিমান করিয়া থাকেন, তাঁহারা হয়ত, এ সৌন্দর্যের কথা উপহাস করিতে পারেন। কিন্তু যাহারা মস্তিষ্কের সঙ্গে সঙ্গে নিজ হৃদয়কেও উপযুক্তরূপে সমুন্নত করিয়াছেন, যাহাদিগের ভালবাসা শুধু নিজ হৃদয়ে আবদ্ধ না হইয়া, সমস্ত জীব-জগতে ছড়াইয়া পড়ে, তাঁহারা এই সৌন্দর্যের স্বাদ গ্রহণ করিতে সক্ষম। তাঁহারা এই সৌন্দর্যের প্রকৃত উপাসক। এইরূপ হৃদয়বান ব্যক্তি এই অখিল ব্রহ্মাণ্ডময় একটা বিশ্বব্যাপী সৌন্দর্যের খেলা দেখিতে পান। তাই তাঁহার নিকট এই বিশ্বের যিনি স্রষ্টা, তিনি নিগূঢ় নিরাকার রূপে অবিভূত হইতে পারেন না। তিনি আপনার মনোমত একটি সৌন্দর্যের রূপ কল্পনা করিয়া, আপনার প্রাণের দেবতাকে সেইরূপেই চিন্তা করিয়া থাকেন। পূর্বেই বলিয়াছি, শিক্ষাভেদে, সংসর্গভেদে, প্রকৃতিভেদে মনুষ্যের সৌন্দর্যের আদর্শ বিষয়েও বৈলক্ষণ সৃষ্টি থাকে। এই কারণে তুমি যাহা পরম সুন্দর মনে করিয়া থাক, আমি

সে রূপ গ্রাহ্য করি না, আবার যাহা আমার চক্ষে সৌন্দর্যের আদর্শ বলিয়া বোধ হয়, তুমি তাহা অতি বীভৎস রূপ বলিয়া বিবেচনা কর। এই জন্ত এই বিশ্বের নিয়ন্তাকে ভিন্ন ভিন্ন ব্যক্তি, ভিন্ন ভিন্ন আকারবিশিষ্ট বলিয়া কল্পনা করিয়া থাকে। তাই ভগবানের অসংখ্য রূপ, তাই হিন্দুর তেত্রিশ কোটি দেবতা। কিন্তু যিনি যে আকারেই চিন্তা করেন না কেন, সকলেই সেই এক এবং অদ্বিতীয় পরম পুরুষকেই চিন্তা করিয়া থাকেন; এবং যিনি যে রূপে ভগবানকে চিন্তা করিয়া থাকেন, তিনি সেই রূপেই তাঁহার দর্শন লাভ করিয়া থাকেন। ভক্তের নিকট ভগবান সর্বদা বিক্রীত। ভক্তের অভিলাষ পূর্ণ করিবার জন্ত, তিনি ভক্তকল্পিত রূপে আবিভূত হইয়া থাকেন। তাই ভক্ত-চূড়ামণি অর্জুন যখন ভগবানের বিশ্বরূপ দর্শন করিয়া তীত স্তম্ভিত হৃদয়ে করজোড়ে সেই “কিরীটিনং গদিনং চক্রহস্তম্” ইত্যাদি রূপে দর্শন কামনা করিলেন, তখন ভগবান তাঁহার ভক্তের মনোমত— “সৌম্য মনুষ্যরূপে” আবিভূত হইয়া বলিলেন :—

নাহং বেদৈর্ন তপসা ন দানেন ন চেজ্যয়া ।

শক্য এবং বিধো দ্রষ্টুং দৃষ্টবানসি যন্মম ॥

ভক্ত্যা হনন্তয়া শক্যো অহমেবং বিধোহর্জুন ।

জ্ঞাতুং দ্রষ্টুং চ তস্মৈন প্রবেষ্টুং চ পরন্তপ ॥”

ইহা ভগবদ্বাক্য। ভগবদ্বাক্যে বাহাদিগের আস্থা আছে, তাঁহারা অবশ্যই স্বীকার করিবেন, ভালবাসার শক্তি অতি অপরিমিত,—ভক্তির ক্ষমতা অতি আশ্চর্য্য।

কেন এরূপ হয়? ভালবাসার সহিত সৌন্দর্যের এত ঘনিষ্ঠতা কেন? যেখানে ভালবাসা সেইখানেই সৌন্দর্য্য, আবার যেখানে সৌন্দর্যের সমাবেশ, সেইখানেই চিন্তাকর্ষণ হয় কেন? জগতে সৌন্দর্যের উপাসনা সর্বত্র দেখিতে পাই কেন? গুহ্র জ্যোৎস্না-বিধৌত রজনীতে প্রকৃতির সৌন্দর্য্য দর্শন করিয়া, কবির হৃদয়ে এক অমির্কচনীয়া ভাবের সঞ্চার হয় কেন? অসীম অনন্ত জলরাশিতে অসংখ্য উন্মিলার বিচিত্র খেলা দেখিতে দেখিতে শান্ত হৃদয়েও তরঙ্গ উঠে কেন? পর্বতের অপ্রভেদী চূড়ার সম্মুখীন হইলে মন স্তম্ভিত হয় কেন? স্নমধুর কণ্ঠ-নিঃসৃত স্বর্গীয় সঙ্গীত শুনিলে মন

ছুটিয়া যায় কেন? ভাবকের চক্ষুঃ প্রকৃতির স্তরে স্তরে কি এক অনির্কচনীয়া সৌন্দর্য্য অনুভব করিতে করিতে বাষ্পাকুল হইয়া উঠে কেন?

কেমন করিয়া বলিব—কেন? যিনি মনুষ্যকে হৃদয় দিয়াছেন এবং বিচিত্র সুন্দর পদার্থে বিশ্ব-ব্রহ্মাণ্ড পুরিয়া রাখিয়াছেন, তিনিই বলিতে পারেন—কেন? যিনি আকাশে পূর্ণচন্দ্র দিয়াছেন এবং চন্দ্রে স্নিগ্ধোজ্জল কমণীয়তা দিয়াছেন, তিনিই বলিতে পারেন—কেন? যিনি বৃক্ষে পুষ্প দিয়াছেন এবং পুষ্প সকল সৌগন্ধে পূর্ণ করিয়া রাখিয়াছেন, তিনিই বলিতে পারেন—কেন? যিনি ধরাতলে শৈলশ্রেণী দিয়াছেন এবং শৈলশ্রেণীতে উচ্চতা দিয়াছেন, তিনিই বলিতে পারেন—কেন। যিনি পৃথিবীতে স্রোতস্বতী দিয়াছেন এবং তাহার কলনাদে মাধুর্য্য দিয়াছেন, তিনিই বলিতে পারেন—কেন।

বিধাতার হাজী, অপূর্ব নিয়মবশে হৃদয়ের সহিত হৃদয় মিলিলে বড়ই আনন্দ হয়। ত—মহা-হৃদয় স্বতঃই মনুষ্য-হৃদয়াকাজী। তাই প্রেম ভালবাসা ইত্যাদি বৃত্তিগুণ মনুষ্য-হৃদয়ে এত উচ্চ স্থান। যেখানে এক হৃদয় অগ্র হৃদয়ের সহিত মিলিয়াছে, যেখানে একে অপরকে সুন্দর দেখে। বলিয়াছি ভালবাসার সহিত সৌন্দর্যের সম্বন্ধ অতি ঘনিষ্ঠ। হৃদয়ের সহিত হৃদয়ের মিলনের নামই ভালবাসা। তাই তোমার হৃদয়ের সহিত আমার হৃদয়ের মিলন অসম্ভব হইলে, তুমি অপরের চক্ষে অতি সুন্দর হইলেও, আমার নিকট তোমার ও সৌন্দর্য্য স্থান পায় না। তাই যেখানে ভালবাসা নাই, সেখানে হৃদয়ের সহিত হৃদয়ের মিলন নাই, সুতরাং সেখানে সৌন্দর্যের বিকাশ নাই।

এই বিশ্ব-জগতের যিনি মহাপ্রাণ, যে মহাপ্রাণে অল্পপ্রাণিত হইয়া বিশ্বচরাচর নিয়ত ঘুরিতেছে, যাহা হইতে এ জগতের উৎপত্তি, যাহাতে জগৎ স্থিত এবং বাহাতে এই জগৎ লয় প্রাপ্ত হয়, তাঁহারই বিচিত্র কৌশলগুণে অনন্ত বিশ্বস্থিত পরম্পর বিরুদ্ধ স্বভাব-সম্পন্ন অসংখ্য পদার্থের মধ্যে এক অব্যক্ত সামঞ্জস্য রহিয়াছে। বাই দৃষ্টিতে যাহাকে জড় প্রকৃতি বলিয়া থাকি, বাস্তবিক তাহা এই মহাপ্রাণের আবরণমাত্র। এই অব্যক্ত, সামঞ্জস্যের অপর নাম প্রাকৃতিক সৌন্দর্য্য। এই বিশ্বনিহিত অনন্ত হৃদয়ের সহিত মানবের সান্ত হৃদয় একই সূত্রে গাঁথা, তাই মনুষ্য বাহ সৌন্দর্য্য

উপলব্ধি করিতে পারে। মনুষ্য-হৃদয়ের তন্ত্রীগুলি বাহু জগতের তন্ত্রীর সহিত একই সুরে বাঁধা। হৃদয়ের তারগুলি যতক্ষণ বাহু জগতের তন্ত্রী-গুলির সহিত একই সুরে বাঁধা থাকে, ততক্ষণই মনুষ্য সৌন্দর্যের আনন্দ লাভ করিতে পারে। বাঁহার হৃদয়ের তার ছিঁড়িয়াছে, সামঞ্জস্য নষ্ট হইয়াছে, তাহার হৃদয় কেবলই বেহুলা বকিতে থাকে, প্রকৃতির অনন্ত সৌন্দর্য্য সে হৃদয়ে স্থান পায় না। বাঁহার এই অনন্ত সৌন্দর্যের সেবক, তাঁহারাই প্রকৃত হৃদয়বান এবং তাঁহারাই প্রকৃত সুখী। জগতে তাঁহার কিছুই কুৎসিত দেখেন না। সকলই তাঁহাদের চক্ষে সুন্দর,—সুতরাং তাঁহার সর্বদাই আনন্দময়। এই বিশ্ব-নিহিত মহাপ্রাণের সহিত তাঁহাদিগের প্রাণ একই সুরে গাঁথা। সুতরাং তাঁহার বিশ্বকে সৌন্দর্য্যময় <sup>বিশ্ব</sup> <sup>দিনঃ</sup> <sup>গাহার</sup> <sup>দুঃখময়</sup> <sup>মঞ্জস্য</sup> <sup>যিনি</sup> <sup>রক্ষা</sup> <sup>করিতে</sup> <sup>পারিয়াছেন,</sup> <sup>তিনি</sup> <sup>দুঃখের</sup> <sup>হাত</sup> <sup>এড়াইয়াছেন।</sup> সংসারের চুবানি খাইয়া অার ক্লেশ পাইতে হয় না। তিনি সর্বত্র সমদর্শী হইয়া সর্বদা এক অনির্বচনীয় আনন্দরস পান করিতে থাকেন। গ্রীক দার্শনিক-গণের মধ্যে যে “গোলক সঙ্গীতের” উল্লেখ দেখিতে পাওয়া যায়, সে সঙ্গীত এই প্রকার ব্যক্তির কর্ণেই ধ্বনিত হইয়া থাকে। সংসারাবর্তে পড়িয়া বাঁহার হৃদয়েব সামঞ্জস্য নষ্ট হইয়াছে, তিনি সে সঙ্গীত শুনিতে পান না। যিনি প্রকৃত কবি, তিনিই এ সঙ্গীতের মর্গগ্রাহী, তাই তাঁহার হৃদয় সর্বদাই আনন্দময়। প্রকৃত কবি সংসারে অতি দুর্লভ। ইহার জগতে সকলেরই পূজ্য। সংসারে যদি শান্তি চাও, প্রাণে যদি আরাম চাও, কবির শ্রায় হৃদয়কে গঠিত কর। অভ্যাস দ্বারা সিদ্ধ হইবে। সাধনায় সকলই সম্ভব, হৃদয় গঠিত হইবে না? প্রেম, ভক্তি, ভালবাসা প্রভৃতি বৃত্তিগুলির ক্ষুরণ কর। আপনার হৃদয়াভ্যন্তরে ঐ গুলিকে আবদ্ধ না রাখিয়া সমগ্র জীব-জগতে বিস্তার করিতে শিখ। হৃদয়ের সহিত হৃদয় মিলাইতে শিখ। হৃদয় ক্রমে প্রশস্ততা লাভ করিয়া যখন বিশ্ব-ব্রহ্মাণ্ডকে ভালবাসিতে শিখিবে, যখন প্রেমের তরঙ্গে হৃদয় সদাই নাচিতে থাকিবে, বিধাতার সৃষ্ট পদার্থে কু ও

সু নইয়া যখন বুঝা বিতণ্ডা করিতে প্রবৃত্তি হইবে না; যখন বিশ্বময় এক অসীম অনন্ত সৌন্দর্যের খেলা দেখিতে পাইবে, আর সেই অসীম অনন্ত সৌন্দর্যের খেলা দেখিতে দেখিতে এক এক বার হৃদয়ে ভাবের জোয়ার সিয়া নয়নে ধারা বহিবে—তখনই বুঝিবে সাধনা সফল হইয়াছে, তখনই যাবে দুঃখের অপ্রতিহত গতি তোমার সম্মুখে অার দাঁড়াইতে পারিবে না। ই যদি দুঃখের হাত এড়াইতে চাও, হৃদয়ের সহিত হৃদয়ের সামঞ্জস্য করিও। সৌন্দর্যের পূজা করিও। সৌন্দর্যের সাধনায় সিদ্ধ হইলে মন সুখময় হইবে।

শ্রীযোগীন্দ্রচন্দ্র চক্রবর্তী।

## জাহাঙ্গীরের অনুশাসন।\*

জাহাঙ্গীর বাদশাহ মোগল সাম্রাজ্যের শাসন জন্ত কতিপয় অনুশাসন বিধিবদ্ধ করিয়াছিলেন; তজ্জন্ত তিনি তৎকালীন মুসলমান সমাজে একজন বিচক্ষণ রাজনীতিবিশারদ বলিয়া প্রসিদ্ধিলাভ করেন। আমরা বক্ষ্যমাণ প্রবন্ধে তাঁহার অনুশাসনগুলির সংক্ষিপ্ত পরিচয় প্রদান করিয়া জাহাঙ্গীর বাদশাহ শিঙ্গে তাহাদের কিরূপ মর্যাদা রক্ষা করিয়াছিলেন, তাহা প্রদর্শন করিব।

### প্রথম অনুশাসন।

“আমি তমঘা ও মিরবারি নামক শুল্ক গ্রহণের প্রথা রহিত করিয়াছি। সুভা ও সরকারের জায়গীরদারগণ আপনাদের স্বার্থের জন্ত নানারূপ কর সংগ্রহ করিয়াছেন, তাহাও আমি তাহাদিগকে গ্রহণ করিতে নিষেধ করিয়াছি।”

তদীয় পিতা আকবরও তমঘা এবং মিরবারি নামক শুল্ক গ্রহণ না করার জন্ত কঠোর নিষেধ আজ্ঞা প্রচার করিয়াছিলেন। বাদশাহগণ

পুনঃ পুনঃ একই প্রকার অনুশাসন প্রচার করিয়াছেন; ইহাতে ইহাই প্রকাশ পায় যে, প্রথমে যিনি ঘোষণা প্রচার করিয়াছিলেন, তিনি স্বপ্রণীত নিয়ম কার্যে পরিণত করিতে পারেন নাই, অথবা তাহার পরবর্তী বাদশাহগণ পূর্বপুরুষের ঘোষণা মনে করিয়া আত্মগৌরব বর্ধন করিতে যত্নশীল হইয়াছিলেন। বাবর ও আকবরের, ত্রায় প্রবল প্রতাপাবিত শাসনকর্তার সময়েই যদি তাহাদের কৃত অনুশাসন প্রতিপালিত না হইয়া থাকে, তবে দুর্বলচিত্ত জাহাঙ্গীর যে সিদ্ধকাম হইয়াছেন, তাহা সন্তোষের নহে।

### দ্বিতীয় অনুশাসন।

“দস্যসকুল পথপার্শ্বের নির্জনাংশে সরাই ও মসজিদ নির্মাণ করিতে আমি আদেশ করিয়াছি। জায়গীর ভূমির অন্তর্গত সরাই ও মসজিদ জায়গীরদারের ব্যয়ে নির্মিত হইবার ও খালেসা ভূমির সরাই ও মসজিদ নির্মাণের ব্যয়ভার রাজকোষ হইতেই বহন করার আদেশ ছিল।”

জাহাঙ্গীরের সিংহাসনে আরোহণের বহু পূর্ব হইতেই রাজপথপার্শ্ব সরাই ও মসজিদ নির্মাণ করার প্রথা প্রচলিত ছিল। সেরশাহ ও তদীয় পুত্র সেলিম শাহের রাজত্বকালেই বহুসংখ্যক সরাই ও মসজিদ নির্মিত হইয়াছিল। ইহাদের মধ্যবর্তী দূরত্ব, জাহাঙ্গীর যত দূরে দূরে সরাই ও মসজিদ নির্মাণ করিতে কল্পনা করিয়াছিলেন, তাহা অপেক্ষা মন ছিল বলিয়াই অনুমিত হয়।\*

এই সময় রাজপথ সর্বদা দস্যসম্প্রদায়-কর্তৃক পরিবৃত থাকিত, পুরচজের ভ্রমণ বৃত্তান্ত নামক গ্রন্থে বর্ণিত হইয়াছে যে, দস্যভয়ে কেহ

\* Salim Shah in the beginning of his reign issued orders that as the sarais of Sher Shah were two miles distant from one another, one of similar form should be built between them for the convenience of the public; and that a mosque and reservoir should be attached to them, and that Vessels of water and of Victuals, cooked and uncooked should be always kept in readiness for Hindu as well as Mahamedan travellers. *Tarikh-i Baudini.*

### জাহাঙ্গীরের অনুশাসন।

ব্রহ্মকশু হইয়া, ঘরের বাহির হইতে পারিত না। সার টমাস রো আপন ভ্রমণ বৃত্তান্তে লিখিয়াছেন যে, নিরাপদে ভ্রমণের বন্দোবস্ত করার জন্ত তাহাকে সময় সময় কালবিলম্ব করিতে হইয়াছে। কাষে হইতে সুরাট ত্রিশ ক্রোশ পথ; এই পথে সর্বদা লোক যাতায়াত করিত; এ পথেও পথিকগণ সর্বদা দস্যগণ-কর্তৃক আক্রান্ত ও সর্বস্ব হত হইত। এমন কি আগ্রা, লাহোরের প্রসিদ্ধ পথেও দস্যর অভাব ছিল না। জন ব্রোথার ও রিচার্ডষ্টিল নামক পরিব্রাজকদ্বয় বলিয়াছেন যে, এই পথ রাত্রিকালে দস্যসমাগমে পূর্ণ হইত, কিন্তু দিবাভাগে তাহাদিগকে দেখিতে পাওয়া যাইত না। সেকালে রাজপথ-পার্শ্ব সরাই অবস্থিত না থাকিলে পর্যটন অথবা বাণিজ্য অচল হইয়া পড়িত। টেরীনামক একজন বৈদেশিক পর্যটক নির্দেশ করিয়াছিল যে, জাহাঙ্গীরের রাজত্বকালে ভ্রমণকারিগণের বাস জন্ত পাহাশালার একান্ত অভাব ছিল; কিন্তু বৃহৎ বৃহৎ নগরে তাহাদের অভ্যর্থনার জন্ত সরাই নামক সুদৃশ্য প্রাসাদমালা দৃষ্টিগোচর হইত। ধনশালী হিন্দুগণ আপনাদের ধনের কিয়দংশ রাজপথ-পার্শ্ব সরাই নির্মাণ ও কূপ খননে ব্যয় করিয়া দানশীলতার পরিচয় প্রদান করিতেন। অতএব ভ্রমণকারিগণের আশ্রয় জন্য যে সকল সরাই নির্মিত হইয়াছিল, তাহাতে রাজকোষের অর্থ কতদূর কার্যকরী ছিল, তাহা নির্ধারণ করা সহজ নহে।

### তৃতীয় অনুশাসন।

“মালিকের বিনা অনুমতিতে কোন ব্যক্তিই পথপার্শ্বস্থ পণ্য দ্রব্যের ভার খুলিতে পারিবেক না। কোন রাজপুরুষ মৃত মুসলমান অথবা হিন্দুর সম্পত্তি দাবী করিতে পারিবেক না। তাহার উত্তরাধিকারীই পরিত্যক্ত সমস্ত সম্পত্তির অধিকারী হইবে। যদি কাহারও উত্তরাধিকারী বর্তমান না থাকে, তবে নির্দিষ্ট রাজকর্মচারিগণ তাহার সম্পত্তির তত্ত্বাবধান করিবে এবং তাহার আয় সরাই নির্মাণ, সেতুসংস্কার ও পুষ্করিণী খননে ব্যয়িত হইবে।”

উত্তরাধিকারিগণের সম্পত্তি প্রাপ্ত হইবার আদেশ তৈমুর লঙ্গের অনুশাসনের পুনরুক্তিমাাত্র। আকবর বাদশাহ ইহা অপেক্ষা উৎকৃষ্ট নিয়মের প্রচার করিয়াছিলেন। “Let him look after the effects of deceased

persons, and give them up to the relations or heirs or such, but if there be none to claim the property let him place it in security, sending at the same time an account of such to court, so that when the true heir appears he may obtain the same. In fine, let him act conscientiously and virtuously in this matter, lest it should be the same here as in the kingdom of Constantinople.\*  
 আমীরগণ পরলোক গমন করিলে, তাঁহাদের পরিত্যক্ত সম্পত্তি রাজকোষে গ্রহণ করাই মোগল বাদশাহগণের সাধারণ নিয়ম ছিল; মৃত ব্যক্তির সন্তানগণ বাদশাহের ইচ্ছামত পৈতৃকধনের কিয়দংশমাত্র প্রাপ্ত হইতেন, বাদশাহগণ সচরাচর তাহাদের সঙ্গে সদ্ব্যবহার করিতেন। †

জাহাঙ্গীর বাদশাহ স্বরচিত জীবন বৃত্তের একস্থানে উল্লেখ করিয়া ছিল যে, আকবরের খোজাপ্রধান দৌলত খাঁ অসদোপায়ে অতুল ধনের অধিকারী হইয়াছিল, তাহার মৃত্যুর পর আকবর তৎসমুদয় বাজেয়াপ্ত করিয়া, রাজকোষ স্ফীত করিয়া তুলিয়াছিলেন। কিন্তু তজকিরত-উল-উমর নামক ইতিহাস গ্রন্থ পাঠে জানা যায় যে, এই ব্যক্তি জাহাঙ্গীরের সিংহাসন আরোহণের সপ্তমবর্ষে কালগ্রাসে পতিত হন। অতএব তাহার বিপুল ধনরাশি পিতার পরিবর্তে পুত্রের হস্তগত হইয়াছিল বলিয়াই অনুমান করা যাইতে পারে। জাহাঙ্গীর বাদশাহের দরবারে সমাগত সার টমাস রো লিখিয়াছেন যে, কোন প্রজাই উত্তরাধিকার সূত্রে ভূমি দখল করিতে পারিত না; রাজার ইচ্ছার উপরেই সমস্ত নির্ভর করিত; এজন্য বহুসংখ্যক উচ্চপদস্থ ব্যক্তি যত্র আয় তত্র ব্যয় করিতেন। বণিকগণ সমস্তে আপনাদের ধন সংগোপন করিয়া রাখিতেন। বাদশাহ বিশিষ্ট ব্যক্তিগণের সন্তানবর্গের ভরণপোষণ জন্য সানাত্ত ভাবে বন্দোবস্ত করিয়া দিতেন; রাজানুগ্রহ লাভ করিতে না পারিলে তাহাদের অবস্থা উন্নতির কোন উপায় থাকিত না। বন্দর সমূহে যথেষ্টাচার পূর্ণভাবে বিদ্যমান ছিল। এমন কি যদিচ সার টমাস

\* Gladwin's Ain-Akbari.

† Narrative by W. Hawkins in Purchas's pilgrims.

রো পেরম সমাদরে অভ্যর্থিত হইয়াছিলেন, তথাপি বন্দররক্ষক বলপূর্বক তাহার দ্রব্য তন্ন তন্ন করিয়া, অনুসন্ধান পূর্বক তাহার কিয়দংশ আত্মসাৎ করিতে বিরত হয় নাই।

### চতুর্থ অনুশাসন ।

“কেহ মদ অথবা অগ্র প্রকার মাদক দ্রব্য প্রস্তুত অথবা বিক্রয় করিতে পারিবে না।”

জাহাঙ্গীর স্বয়ং আজীবন আকণ্ঠপূর্ণ করিয়া মত্ত পান করিতেন। সমস্ত সভাসদের সম্মুখেও মত্ত পান করিতে কিছুমাত্র কুণ্ঠিত হইতেন না। জাহাঙ্গীর বাদশাহ খ্রীষ্টধর্মের পক্ষপাতী ছিলেন। ইতিহাসবেত্তা কাত্তু নির্দেশ করিয়াছিল যে, মত্তপান ও সর্বপ্রকার মাংস আহার সম্বন্ধে খ্রীষ্টশাস্ত্রে কোন প্রকার প্রতিষেধক বিধি না থাকাতেই বাদশাহ তাদৃশ পক্ষপাতী হইয়াছিলেন। জাহাঙ্গীর কখনও বা মস্দের আড্ডায় গমন করিয়া ইতর জাতীয় লোকের সঙ্গে মিলিত হইয়া আমোদ প্রমোদে মত্ত হইতেন। সার টমাস রো লিখিয়াছিল যে, চেপছাইডের সমস্ত মণি মাণিক্য অপেক্ষা ৪৫ বাক্স লাল মদ জাহাঙ্গীর অধিকতর মূল্যবান বলিয়া বিবেচনা করিয়া থাকেন। জাহাঙ্গীর চল্লিশ বৎসর বয়ঃক্রমকালে অহিফেন সেবন পরিত্যাগ করেন। তৎপূর্বে তিনি নিয়ত অহিফেন সেবন করিতেন। অনুশাসন কর্তা নিজেই স্বকৃত নিয়ম ভঙ্গে অগ্রগণ্য ছিলেন, এ অবস্থায় প্রকৃতিপুঞ্জ যে, তাহার প্রবর্তিত নিয়ম প্রতিপালন করিয়াছে, তাহা কখনও সম্ভবপর নহে।

### পঞ্চম অনুশাসন ।

“আমি আদেশ করিয়াছি যে, কেহ বলপূর্বক অথবা গৃহে দাস করিতে পারিবে না। আমি বিচারকদিগকে আদেশ করিয়াছি যে, অপরাধ যতই গুরুতর হউক না কেন, অপরাধীর নাসাকর্ণ ছেদন করিয়া শাস্তি বিধান করা হইবে না। আমি, নিজেও ধর্মসাক্ষী করিয়া এ কার্য হইতে বিরত থাকিতে প্রতিজ্ঞাবদ্ধ হইয়াছি।”

এই নিয়মও জাহাঙ্গীরের নিজের উদ্ভাবিত নহে। ইহার পূর্বে আকবর বাদশাহ এই প্রকার অনুজ্ঞা প্রচার করিয়াছিলেন।

যুদ্ধোপলক্ষে মহাবত খাঁ দূরদেশে বাস করিবার সময় বাদশাহ শাহজাদী পরবেজের অবস্থান জ্ঞাত অনুপস্থিত সেনাপতির পরিবারবর্গকে স্থানান্তরিত করিয়া তাঁহার প্রাসাদ নির্দিষ্ট করিয়া দিয়াছিলেন। জাহাঙ্গীর সমগ্র নগর ভস্মীভূত করিবার সময় দরিদ্র প্রজার বাসভবনের প্রতি দৃষ্টিপাত করিবার অবসর পাইতেন না। সার টমাস রো লিখিয়াছেন যে, বাদশাহ আজমির সহরের সমগ্র লক্ষের অগ্নি প্রদান করাত্তে তিনি বাসভবন পরিবর্তন করিতে বাধ্য হন। সমগ্রস্থান ভস্মীভূত ও উচ্ছিন্ন হইয়াছিল; এবং তিনি চোরের উপদ্রবে ব্যতিব্যস্ত হইয়া পড়িয়াছিলেন। গ্রন্থান্তরে বর্ণিত হইয়াছে যে, দরিদ্র অধিবাসিগণ মান্দুনগর পরিত্যাগ করিয়াছিল, রাজকীয় ঘোষণা প্রচার দ্বারাও তদপেক্ষা অধিক সংখ্যক নগরবাসী স্ব স্ব বাসস্থান পরিত্যাগ করিতে আদিষ্ট হইয়াছিল। জাহাঙ্গীর নাসাকর্ণ ছেদন করিয়া কাহাকেও শাস্তি প্রদান করেন নাই। কিন্তু তদপেক্ষা কঠোর শাস্তি প্রদান করিয়া তিনি ক্রুরতার যথেষ্ট পরিচয় প্রদান করিয়াছেন। সুপ্রসিদ্ধ ইতিহাসবেত্তা ইলিরট সাহেব তাহার ভূরি ভূরি দৃষ্টান্ত প্রদর্শন করিয়াছেন। আমরা বাহুল্য ভয়ে তৎসমুদয়ের উল্লেখ করিলাম না। কাহাকেও বা শূলে চড়াইয়া হত্যা করা হইত, কেহ বা সর্প দংশনে প্রাণ পরিত্যাগ করিত, কাহাকেও বা জীবিত অবস্থাতেই ভূ-প্রোথিত করা হইত। অপরাধীর প্রাণ বিনাশ করিবার জন্ত নানাবিধ নিষ্ঠুর উপায় উদ্ভাবন করা হইয়াছিল। হস্তীর দাঁতলে মর্দিত করিয়া প্রাণ সংহার করার নিয়মই অধিকাংশ স্থলে অনুষ্ঠিত হইত। জাহাঙ্গীর স্বরচিত জীবন বৃত্তে লিখিয়াছেন যে, তিনি খান-ই দৌওরনের পুত্রের অসম্মানসূচক বাক্য সহ্য করিতে না পারিয়া তাঁহার প্রাণনাশ জন্ত জীবিত অবস্থাতেই চর্ম তুলিয়া লইয়া ছিলেন এবং তৎপর নগরবাসীদিগকে দৃষ্টান্ত প্রদর্শন জন্ত মৃত দেহ নগরের তত্বদিকে প্রদক্ষিণ করাইয়াছিলেন। হাসন বেগ ও আবদুল রহিম নামক দুইজন রাজ-দ্রোহীকে বধ করিবার জন্ত জাহাঙ্গীর বাদশাহ এক অভিনব উপায় উদ্ভাবন করিয়াছিলেন। হাসন বেগকে ষাঁড়ের চর্ম মধ্যে ও আবদুল রহিমকে গর্দভের চর্ম মধ্যে পুরিয়া উহার মুখ শেলাই পূর্বক গর্দভ-পৃষ্ঠে নগর প্রদক্ষিণ করান হইয়াছিল। হাসন বেগ এই অবস্থায় নিখাসরুদ্ধ হইয়া প্রাণ

পরিত্যাগ করে; কিন্তু আবদুল রহিম ঈশ্বরানুগ্রহে ও বন্ধুগণের সাহায্যে প্রাণ রক্ষা করিতে সমর্থ হয়।

### ষষ্ঠ অনুশাসন।

“আমি আদেশ করিয়াছি যে, রাজপুরুষ অথবা জায়গীরদারগণ আমার প্রজাবর্গের ভূমি হরণ করিতে অথবা আত্ম স্বার্থের জন্ত উহা আবাদ করিতে পারিবেন না।”

জাহাঙ্গীর বাদশাহের শাসন-কালে প্রকৃতি-পুঞ্জের অবস্থা শোচনীয় ছিল। সার টমাস রো লিখিয়াছেন, “এ রাজ্যের সর্বত্র প্রজার সর্বনাশ ও উচ্ছেদ হইয়া থাকে, কারণ রাজাই সর্ব সাধারণের সম্পত্তির অধিকারী বলিয়া কোন ব্যক্তিই কিছুতে বন্ধ প্রকাশ করে না। এজন্য সর্বত্র ভয় দশা দৃষ্টিগোচর হয়।” গ্রন্থান্তরে লিখিত আছে, “For all the great men live by farming Governments in which they all practise every kind of tyranny against the natives under their jurisdiction, oppressing them with continual exactions.”

### সপ্তম অনুশাসন।

আমি রাজ্যসংস্থষ্ট আমিন ও জায়গীরদারগণকে আমার অসম্মতি ব্যতীত আপন আপন শাসিত প্রদেশের প্রজাগণের সঙ্গে বিবাহ বন্ধনে আবদ্ধ হইতে নিষেধ করিয়াছি।”

### অষ্টম অনুশাসন।

“আমি রাজ্যের প্রধান প্রধান নগরে দাতব্য চিকিৎসালয় সংস্থাপন করিয়াছি। পীড়িত ব্যক্তির চিকিৎসার জন্য চিকিৎসক নিযুক্ত রাখিতে এবং তাহার সমস্ত ব্যয় রাজকোষ হইতে প্রদান করিবার জন্য আদেশ করা হইয়াছে।”

### নবম অনুশাসন।

“আমি পিতার অনুকরণে আমার জন্মদিনে জীবহত্যা করিতে নিষেধ করিয়াছি। এতদ্ব্যতীত আমার সিংহাসনে আরোহণের দিন

বৃহস্পতিবার এবং পিতার জন্মদিন রবিবারেও জীবহত্যা করিতে নিষেধ করা হইয়াছে। পিতা এই দিনকে ভক্তিভাবে দর্শন করিতেন। এইদিন সূর্যের নামে উৎসৃষ্ট, কেবলমাত্র এজন্যই যে তিনি তাদৃশ ব্যবহার করিতেন তাহা নহে; রবিবারে সৃষ্টিক্রিয়া আরম্ভ হইয়াছিল বলিয়াও তিনি এই অত্যন্ত পবিত্র মনে করিতেন। এজন্য তিনিও রবিবারে জীবহত্যা করিতে নিষেধ করিয়াছিলেন।”

জাহাঙ্গীর মুসলমানধর্মের বিশ্বাসী ছিলেন না। সমস্ত মুসলমান জাতি রমজান মাসের উপবাসকে একান্ত পবিত্র কার্য বলিয়া মনে করে; কিন্তু তিনি উহা লইয়া বিদ্রূপ করিতেন। যে সকল শাস্ত্রজ্ঞ মুসলমান ইসলাম ধর্মের অনুশাসন প্রতিপালন করিতে একান্ত তৎপর ছিলেন, তিনি তাহা-দিগকে নিমন্ত্রণপূর্বক কৌশল ক্রমে নিষিদ্ধ মাংস ভক্ষণে ও মদ্যপানে সহকারী করিয়া তুলিতে অপারিসীম আনন্দ অনুভব করিতেন। ধর্মশাস্ত্রবেত্তাগণ তাহাকে সর্বদা ভক্ষ্যাভক্ষ্য সম্বন্ধে উপদেশ প্রদান করিতেন; তাহাদের উপদেশ বাক্যে বিরক্ত হইয়া তিনি এতদূর জিজ্ঞাসা করেন যে, কোন ধর্মের মত্তপান ও নিষিদ্ধ মাংস ভোজন নিষিদ্ধ নহে। প্রত্যুত্তরে একমাত্র খ্রীষ্টানধর্মের মত্তপান ও নিষিদ্ধ মাংস ভোজন নিষিদ্ধ নহে, অবগত হইয়া তিনি বলেন, “তাহা হইলে আমরা সকলে খ্রীষ্টান ধর্মের পক্ষপাতী হইব। দর্জি-নিয়ম করিয়া আমাদের আচকান খাট কোটে ও পান্ডী-টুপিতে পরিবর্তিত করা হউক” এই বাক্যে ধর্মশাস্ত্রবেত্তাগণ মুসলমানের অদৃষ্টে কি নিহিত আছে, তাহা ভাবিয়া কল্পিত হন এবং সকলেই একবাক্যে বলেন যে, বাদশাহ-কখনও কোরাণের অনুশাসনে বাধ্য নহেন; এবং তিনি যথেষ্টভাবে মত্তপান ও নিষিদ্ধ মাংস ভক্ষণ করিতে পারেন।

### দশম অনুশাসন।

“পিতা যে সকল জায়গীর ও মনসেব প্রদান করিয়াছিলেন, তাহা স্থির রাখিবার জন্য আমি আদেশ প্রদান করিয়াছি। কিয়ৎকাল অতিবাহিত হইলে আমি মর্যাদানুসারে প্রত্যেকের মনসেব বৃদ্ধি করিয়া দিয়াছি। অহিন্দী দশ হইতে বারতে উদ্ধিত হইয়াছে এবং পিতার ভৃত্যবর্গের

বেতনও দশ হইতে বারতে বৃদ্ধিপ্রাপ্ত হইয়াছে। রাজাস্তঃপুরের মহিলাদের বৃত্তিও বৃদ্ধি করিয়া দেওয়া হইয়াছে।”

জাহাঙ্গীর সিংহাসনে আরোহণ করিয়া বহুসংখ্যক সুভাদারকে এক প্রদেশ হইতে অত্র প্রদেশে স্থানান্তরিত করিয়াছিলেন; আপনার প্রিয়পাত্র ও সাহায্যকারীদিগকে নিয়োজিত করিবার জন্ত কাহাকে কাহাকেও বা পদচ্যুত করিয়াছিলেন। পদচ্যুত রাজপুরুষগণ রাজধানীতে আগমন করিয়া উৎকোচ প্রদান করিয়া ও বড়রত্নে লিপ্ত হইয়া পূর্ব-মর্যাদা লাভ করিবার জন্ত যত্নশীল হইয়াছিলেন। বাহারা সিদ্ধকাম হইতে পারিয়াছিলেন না, তাহারা রাজদ্রোহাচরণ করিয়াও আপন আপন লুপ্ত ক্ষমতা ও প্রতিপত্তি উদ্ধারের জন্ত প্রয়াসী হইয়াছিলেন। একজন বিদেহী পর্য্যটক রাজাস্তঃপুরের মহিলাদের বৃত্তিনির্দ্ধারিত অর্থ দিবার প্রণালীকে দরিদ্রকে ভিক্ষাদানের সঙ্গে তুলনা করিয়াছেন।

### একাদশ অনুশাসন।

আয়মাতোগী ও মদআশগণ (ইহাদের দ্বারা আশীর্বাদপ্রার্থী সৈন্যদল পূর্ণ ছিল) স্ব স্ব ফারমানের সর্ব অঙ্গসারে আপনাদের ভূমিতে হিরতর থাকিবার আদেশ প্রাপ্ত হইয়াছেন। হিন্দুস্থানের বিশুদ্ধ সৈয়দ-বংশোদ্ভব মিরণ সদরজাহাঙ্গীর পিতার অধীনে রাজধানীতে কিয়ৎকাল উচ্চ রাজপদে অভিষিক্ত ছিলেন। ইনি প্রত্যহ দরিদ্রদের অভাব মোচন করিবার আদিষ্ট হইয়াছেন।

### দ্বাদশ অনুশাসন।

“রাজ্যের যাবতীয় কারাগার ও ছুর্গের নন্দীদিগকে মুক্তি দিবার জন্ত আদেশ করিয়াছি।”

উইলিয়ম ফিঞ্চ নামক একজন পরিব্রাজক জাহাঙ্গীরের মৃগয়াসম্বন্ধে যে বিবরণ লিপিবদ্ধ করিয়াছেন, আমরা এই প্রসঙ্গে তাহার সার মর্ম প্রদান করিয়া প্রবন্ধের উপসংহার করিতেছি। জাহাঙ্গীর মৃগয়া উপলক্ষে নবেম্বর মাসের প্রথমে রাজধানী হইতে বহির্গত হইতেন, এবং দেশান্তরে ত্রিশ-চল্লিশ ক্রোশব্যাপী স্থানে শিকার করিয়া মার্চ মাসের শেষে গ্রীষ্মাধিক্য নিবন্ধন



প্রত্যাবর্তন করিতেন। জাহাঙ্গীর শিকারের উপযোগী বন্যস্থান লোক দ্বারা পরিবেষ্টিত করিয়া লইতেন; তৎপর এই পরিবেষ্টিত স্থান মধ্যে মাল্লুফই হউক, পশুই হউক, বাহা কিছু ধৃত হইত, তাহাই রাজকীয় শিকার বলিয়া গণ্য করার নিয়ম ছিল। যে সকল পশু ধৃত হইত, তন্मध्ये মল্লুষ্যের বাহা ভক্ষ্য থাকিত, তাহা বিক্রয় করিয়া বাদশাহ বিক্রয়লব্ধ অর্থ দরিদ্রদিগকে দান করিতেন। বাদশাহ শিকারলব্ধ মল্লুষ্যদিগকে ক্রীতদাসরূপে গণ্য করিয়া প্রতি বৎসর তাহাদিগকে কাবুলে প্রেরণপূর্বক তাহাদের বিনিময়ে কুকুর ও বিড়াল গ্রহণ করিতেন। এই সকল মল্লুষ্য আচার-ব্যবহারে পশুবৎ ছিৎ, এবং চৌর্য্যবৃত্তি দ্বারা জীবিকা নির্বাহ করিত বলিয়াই জাহাঙ্গীর তাদৃশ ব্যবহার করিতে কুণ্ঠিত হইতেন না। বাদশাহের কয়েদীর ছুর্ভাগ্যে সহানুভূতি থাকিলে, তিনি কখনও ঈদৃশ কঠোর ব্যবহার করিতে পারিতেন না।

শ্রীরামপ্রাণ গুপ্ত।

## চাঁদের হাসি।

১  
চল চল চল হাসিছে শনী  
নীলিমা স্ফুচারু আকাশতলে,—  
খল খল খল হাসিছে সিন্ধু  
সে ছায়া ধরিয়া হৃদয়তলে।

২  
চল চল চল হাসিছে ধরা  
চাঁদের হাসিটি পরশ করি,  
হাসে কুমুদিনী সরসি মাঝে  
বঁধুয়া নেহারি প্রেমেতে ভরি।

## চাঁদের হাসি।

৩  
হাসিছে প্রকৃতি গরব ভরে  
প্রভাত ভাবিয়া গাহিছে পিক,  
চাঁদের হাসিতে জগত হাসে  
কাঞ্চন ছটার উজলি দিক।

৪  
এ জগত মাঝে কেবা না হাসে  
এমন মধুর হাসিটি কার?  
বালক যুবক স্থবির নাতে  
হেরিলে ইহারে একটবার!

৫  
হাসির সাগর বিরলে পেয়ে  
যতনে তাহা মথিরা স্মখে,—  
বক্ষিয়া সবারে চন্দ্রমা একা  
রেখেছে মাথায় আপন মুখে।

৬  
হেরিয়া চাঁদের মধুর হাসি  
শিশুরা নাচিছে মধুরভাগে  
কবির হৃদয়ে স্বভাব স্মখে  
ঝলকে ঝলকে অনিয়া ঢালে।

৭  
হাস হাস চাঁদ এমনি ক'রে  
মধুর মধুর মধুর পারা,  
মোর আঁখিজল বাড়ুক ভেবে  
তোমাতে হ'রে আপনা হারা!

শ্রীনগেন্দ্রবালা মুস্তাফী।

## শ্রেম-বৈচিত্র্য ।

### চতুর্থ পরিচ্ছেদ ।

অথ দিবাবৈঠকে মধ্যাহ্নে প্রভাতের অন্তঃপুরে ডাক পড়িল। প্রভাত ঘরে গিয়া দেখেন, কুসুমপ্রমুখা সখীর দল সিন্ধুকে ঘিরিয়া মেজেয় বসিয়া আছে। প্রভাত গৃহে প্রবেশ করিলেন, কিন্তু কৈ, কেহত কিছু বলে না! সকলেই অতৃদিকে চাহিয়া আছে! যেন তাঁহাকে কেহ দেখে নাই! প্রভাত কিছু গোলে পড়িলেন, বুঝি একটু অপ্রতিভও হইলেন! এই সময়, সিন্ধু একবার, সখীদের লুকাইয়া, স্বামীর পানে চাইল, তাহার মধুর অধরে, একটু মধুর হাসি খেলিল! প্রভাত ব্যাপার বুঝিলেন, বলিলেন—“আসানী হাজির।” কিন্তু তবু কোন উত্তর নাই, কেবল সিন্ধু, আর একবার তেমনিই হাসিয়া চাহিল,—প্রভাত পুনশ্চ বলিলেন,—

“তলব হ'য়েছে কেন রাইয়ের দরবারে?”

এবার কুসুমের মূখ ফুটিল,—তমি গরহাজির, তাই রাইরাজার কাছে মান বাদী হ'য়েছে!

প্রভাত। তলব মাত্র হাজির হ'য়েছি!

কুসুম। তলব করতে হয় কেন? তা অতশত বুঝিনে, এখন মান ভাঙ্গ।

প্রভাত। কেমন ক'রে ভাঙ্গতে হবে?

কুসুম। “তা আমি কেমন ক'রে বলব? আমি কি পুরুষ মানুষ?

এত তোমাদেরই কাজ, ঐ দেখ” বলিয়া দেওয়ালের একখানি ছবি দেখাইয়া

দিল—প্রভাত দেখিলেন—মানভঙ্গনের ছবি—তার নিচে ছাপার অক্ষরে লেখা—

“দেহি পদপল্লবমুদারং”। প্রভাত একটু হাসিয়া বলিলেন,—

“তোদেরা সব সখী মিলে ভাল ফলালে তিল গাছে,

মানের সাগর প্রবল আমি কেমনে ফেলি ছেঁচে!”

## শ্রেম-বৈচিত্র্য ।

১৪১

সকলে হাসিয়া উঠিল। কুসুম হাসি থামাইয়া বলিল, “কেন, তোমার কি কোন দোষ হয়নি নাকি? এতদিন ভুলেছিলেন, সেটা বুঝি অপরাধ নয়! সই যেই সই অল্পে ছেড়েচে!”

প্রভাত। আর তুমি হলে?

কুসুম একটু অপ্রতিভ হইয়া ক্রকুট করিয়া—“আহা, কি কথাই বল্লেন আর কি?” বলিয়া সইয়ের দিকে চাহিল! বলিল, “মিনের আকল খানা দেখ একবার!” সই একটু হাসিল!

তারপর সে শুকশারীর দ্বন্দ্ব মিটিয়া গেল। সিন্ধুর অনুরোধে কুসুম কপাট বন্ধ করিয়া আসিল—পাছে কর্তা মা, কি আর কেউ ঘরে আসে! তা হ'লে ত বড় অপ্রতিভ হ'তে হ'বে।

এতক্ষণ কুসুম একলা আসর রাখিয়াছিল, দোর বন্ধ করার পর, বৌ ঝি সবাই এখন নিশ্চিত হইয়া কুসুমের সহকারিণীরূপে বাক্ষ্যুদে যোগ দিল! মহারথী হইলেও সপ্তরথি-বেষ্টিত অভিমতের মত প্রভাতকে এষুদে কিছু বিব্রত হইতে হইল!

ধম, ধম, ধম, কে দরজায় ধাক্কা দিল। ধাক্কা, ধাক্কা, ধাক্কার পর ধাক্কা, সে ধাক্কা আর থামে না—সিন্ধু জিভ কাটিয়া, এক হাত ঘোমটা টানিয়া, এক কোণে লুকাইল, বৌর দলও যেন কিছু শব্দব্যস্ত হইয়া উঠিল। কুসুম তাঁড়াতাড়ি দরজার নিকট আসিয়া হাকিল, “কে গা? বাহির হাতে কে উত্তর দিল, “বলি তোরাই কি একলা একলা রাসলালা করবি—বুড়িকে কি নিবিনে? ও হোঁ, এ যে চেনা গলা! সকলে চিনিল, ডাক্তারঠাকুরগণ দিদি—তবু রক্ষে!

‘এস এস চন্দ্রাবলি দিদি এস’ বলিয়া কুসুম দরজা খুলিয়া দিল। হাসিতে হাসিতে ডাক্তারগিন্নি গৃহে প্রবেশ করিলেন—প্রভাত, পাট হইতে নামিয়া, ঠাকুরাণীকে প্রণাম করিলেন। ঠাকুরাণী আশীর্ব্বাদ ও কুশলাদি জিজ্ঞাসা করিলে প্রভাত বলিলেন, “বাগানের যে এত দেবী।”

ডাঃ গিঃ। “আর ভাই, আমাদের ভাঙ্গা বাগান, এখন আর জোগান দেওয়া ভার!” তারপর সিন্ধুর দিকে চাহিয়া, “ও কিলো বাগান, আমার কাছে এত লজ্জা কেন? ওলো লজ্জা রাখ” বলতে বলতে তাঁহাকে ধরিয়া আপনার কাছে টানিয়া আনিলেন। সিন্ধু জড়সড় হইয়া, ঠাকুরাণী

দিদির কাছে যেসিয়া বসিল। প্রভাত, ঠাকুরাণী দিদির অনুমতি ক্রমে আবার স্বস্থানে গিয়া বসিলেন। তখন, ডাক্তার গিনি, কুসুমের দিকে চাহিয়া বলিলেন, “হাঁলা আতরদানি, আমাকে ডেকে আনতে নেই কি? তোরা গেলিনে দেখে আমি শেষ গন্ধে গন্ধে এলাম!” প্রভাত হাসিয়া বলিল, “ঠান্দিদির ত খুব ঘ্রাণশক্তি।” ডাক্তার গিনি একটু চাপা হাসি হাসিয়া বলিলেন, “তুমি যখন এসে বাগানে পড়েছ, তখন আমি না এলে কি আর রক্ষা ছিল!”

প্রভাত বুঝিলেন, উত্তর উপযুক্ত হইয়াছে।

ডাক্তার গিনি বলিয়াই চলিলেন, “তুমি ত ভারি নিষ্ঠুর, এতদিন কি ভুলে থাকতে হয়! পাট অভাবে, আমার এমন সুন্দর বাগান যেন শুকিয়ে উঠেছে! তুমি কি রকম মালী? মালী উপস্থিত না থাকলে ফলস্ব বাগানের কি দশা হয়, -তা কি জান না?”

এবার সিদ্ধু ঠাকুরাণী দিদির দিকে ক্রকুটি করিল। প্রভাত বলিলেন, “ওজ্ঞ ত এতক্ষণ অনেক খোটা খেলাম।”

ডাঃ গিঃ। খোটার এখনই হয়েছে কি?

প্রভাত। তা বটে! যে রকম দেখছি, তাতে কেবল খোটার পার পেলে বাঁচি, আর কিছু খেতে না হয়।

সকলে হাসিয়া উঠিল, সিদ্ধুও মুহু হাসিল, তারপর, ঘোমটার ভিতর হাতে একটু কোপ-কুটল কটাফে একবার স্বামীর পানে চাহিল। ডাক্তার গিনি আবার বলিলেন, “দেখ না তজামাই, একটা মজা শুনেছ! ওমাসে তুমিত ভাই, আসবো বলে এলেনা, সিদ্ধুর যে কান্না! একদিন দেখি, হেমকে আর শৈলকে সিদ্ধু শ্লোক শেখাচ্ছে, সে শ্লোকটা কেন শেখাচ্ছিল তুমি শুনলেই বুঝবে এখন।” বলিয়া ডাক্তারগিনি দরজা খুলিয়া বাহিরে গিয়া শৈলকে ধরিয়া আনিলেন। হেম পলাইয়া গেল। শৈল সিদ্ধুর জ্ঞাতি ভগ্নী, তারাও সব দল বাধিয়া উঁকিঝুকি মারিতেছিল। শৈলকে ধরিয়া আনিয়া ডাক্তারগিনি বলিলেন, “বলত শৈল—সেদিন তোর সিদ্ধুদিদি যে শ্লোকটা শেখাচ্ছিল, সেটা বলত? এখনি পুতুল আর পুতুলের গয়না দেব।” সিদ্ধু হাত নাড়িয়া, ঘোমটার ভিতর হইতে চোক পাকাইয়া

শৈলকে বারণ করিল—কিন্তু সে পুতুল পাওয়ার লোভ পাইয়াছে, নিবেধ শুনবে কেন? শৈল তখন হাঁফাইতে হাঁফাইতে আধ আধ কথায় বলিতে আরম্ভ করিল—

“বালিকা ছিলাম, ছিলাম ভাল সই;

ছিলনা সুখ অতীলাষ।

পতি চিন্তামনা, ও রস জান্তামনা,

হৃদপদ্ম ছিল অপ্রকাশ।

এখন সেই শতদল মুদিত কমল, কাল পেয়ে ফুটিল,

পদ্মের মধু পদ্মে রেখে ভৃঙ্গ উড়ে গেল।

একে”——

আর বলা হ’ল না। সিদ্ধু আসিয়া শৈলের মুখ চাপিয়া ধরিল! আর কাণে কাণে কি বলিল—শৈল “আচ্ছা” বলিয়া ছুটিয়া পলাইল। ডাক্তারগিনি বলিলেন,—ওকে তাড়িয়ে দিলি কেন লো বাগান? এখন আবার এত লজ্জা কেন?

তারপর অত্র কথা পড়িল। এদিকে বেলা যার যার দেখিয়া ক্রমে আসর ভাঙ্গিতে আরম্ভ হইল। তখন প্রভাতের জল খাবারের ডাক পড়িল। প্রভাত উঠিলেন। “আসুন, আমরাও আজ এইখানে বিদায় গ্রহণ করি।”

### পঞ্চম পরিচ্ছেদ।

‘জোর-সে হাঁকাও’ প্রভাত বারবার গাড়োয়ানকে তাড়া দিতেছেন! আজ আর্টটার ট্রেন ধরিয়া এগারটার পূর্বে আফিস যাইতেই হইবে, নতুবা,—সহসা,—প্রভাতের মানসচক্ষে বড় সাহেবের রাগ-রক্ত-বদনমণ্ডল উদিত হইল, প্রভাত তখন ব্যাকুলভাবে দ্বিগুণ আগ্রহে আবার হাঁকিলেন, ‘জলদি হাঁকাও’। বকসিসের লোভে গাড়োয়ান চাবুক কিছু জলদি হাঁকাইতে লাগিল সত্য, কিন্তু অশ্বের বেগ তাহাতে বড় বাড়িল না; প্রভাত উৎসুক নয়নে ঘড়ি খুলিয়া, ষ্টেসনের দিকে একদৃষ্টে তাকাইয়া তাকাইয়া কেবল আফিসের

চিন্তাতেই আকুল হইতেছিলেন, এমন সময়, পশ্চাৎ হইতে কোন গাড়ির রসিক গাড়োয়ান গাহিয়া উঠিল,—

“বিরহিণী বিবি আমার বাঁধে নাকো চুল!”

এ সঙ্গীতে প্রভাতের হৃদয় যেন 'স্পন্দিত' হইল! সেই বিদায়ের দৃশ্য, সিন্ধুর সেই ছল ছল জলভরা আঁখি ছুটি, যেন তাঁর সম্মুখে ভাসিয়া উঠিল! সিন্ধু যে তাঁকে আর একটা দিনের জন্ত থাকিতে অনুরোধ করিয়াছিল, কিন্তু প্রভাত বালিকার সে আদ্যার রক্ষা করিতে পারেন নাই। সহসা প্রভাত, বড় অগ্ৰমনস্ক হইলেন, আফিস, সাহেব, মুহূর্তে সব ভুলিয়া গেলেন। সিন্ধুর স্মৃতি, হৃদয়সিন্ধু উদ্বেলিত করিয়া দিল!

কবি বলিয়াছেন, জীবন অস্থায়ী, ইহা ছুঃখের বিষয় বটে, কিন্তু অধিকতর কষ্টের কথা, জীবনের উপভোগ্য সুখের দিন আরও ক্ষণভঙ্গুর! এ উক্তির সত্যতা প্রভাত, আজ মর্মে মর্মে বুঝিতেছিলেন। হায় দাসহ! আবার দাসহ,—প্রভাত তখন ঘড়ির দিকে দৃষ্টিপাত করিয়া আকুলকণ্ঠে ডাকিলেন, ‘গাড়োয়ান!’

\* \* \* \* \*

আর সিন্ধু! সমবয়স্কাদের সহিত সিন্ধুর সে খেলা আর ভাল লাগিল না, সে উচ্ছ্বাসি আর আসে না, দুইদিনে সে যেন কত বিজ্ঞ হইয়া পড়িয়াছে, সে স্নান-প্রফুল্লমুখে, যেন বিবাদের ছায়া পড়িয়াছে, সে কাঁচা বাঁশে যেন ঘুণ ধরিয়াছে! সত্যই যেন এতদিন সিন্ধুর “হৃদ-পদ্ম ছিল অপ্রকাশ!” কিন্তু যে ভৃঙ্গের মধুর ঝঙ্কারে সে হৃদয়-কোরক বিকশিত হইল, কোথায় সে আজ? হায় পথিক, কেন তুমি দুদিনের জন্ত আসিয়া, এই অবলা বালিকার হৃদয়ে এ আগুন জ্বালাইয়া গেল!

ষষ্ঠ পরিচ্ছেদ ।

শরৎকাল! চারিদিকে স্মদুর-বিস্তৃত, বায়ু-হিল্লোল-বিধৃত, শ্রামলশশু-রাজি দেখিতে দেখিতে মন মুগ্ধ হইয়া যায়। এ যেন বিক্ষুব্ধ সাগর-বক্ষে শ্রামতরঙ্গরাজির অপূর্ণ ক্রীড়া! গ্রামে গ্রামে অশ্বখ, বট, আম্র প্রভৃতি

বৃক্ষ সকল কেমন সতেজ, তাহাদের শাখায় শাখায়, পাতায় পাতায়, চিকণ যৌবন উদ্ভাসিত। মাঝে মাঝে স্তবকে স্তবকে ‘রাধা চূড়া’ পুষ্পের লোহিত আভা, শ্রামল পত্রের অবকাশ-পথে পড়িয়া মন হরণ করিতেছে! বিল খাল পুষ্করিণী সবই কাণায় কাণায় পুরিয়া উঠিয়াছে! এই সরিৎ-শীতলা; শশু-শ্রামলা পত্র-পুষ্প-বিভূষিতা শরৎরাণীর পরিপূর্ণ শোভা দেখিতে দেখিতে হৃদয়ে যেন কি এক নূতন শক্তির সঞ্চার হয় না? আশায় আকাঙ্ক্ষায় হৃদয় মাতিয়া উঠে। আর সেই ‘শক্তি সাধনার’ সঙ্গে সঙ্গে প্রবাসী আত্মীয়ের জন্ত বাঙ্গালীর মন আকুল হইয়া পড়ে। বিশেষতঃ জননীর প্রাণ তখন পরগৃহ-বাসিনী, প্রাণ-প্রতিমা নন্দিনীর জন্ত নিতান্তই অধীর হয়। তখন শত জননীর ব্যাকুলতাপূর্ণ করুণ-আগমনীগীতি বাঙ্গলার গৃহে গৃহে ধ্বনিত হয়। এমন সময়ে কি কোন জননী প্রাণ ধরিয়া ‘ঘরের মেয়েকে পরের বাড়ী’ পাঠাইতে পারেন? তাই আজ সিন্ধুর জননীর এত ছুঃখ! “বেয়ান মাগীর কি আকল গা, পূজা সামনে করে, কিনা নিতে পাঠিয়েছে? তার কি পেটের মেয় নাই!, মায়ের ব্যথা কি সে জানেনা?” কিন্তু হায়! মেয়ের মায়ের যে সবই অরণ্যে রোদন! সিন্ধুর মা, মেয়ে পাঠাইয়া কেবল কাঁদিতে লাগিলেন,—কিন্তু

“মা তুমি বোকা মেয়ে কেন কেঁদে মর—  
ভেবে দেখ মা তুমি কার ঘর কর!”

সপ্তম পরিচ্ছেদ ।\*

শারদীয়া পূজার মোট আর দুই দিন বাকী! আজ আফিস করিনা প্রভাতের ছুটি। অগ্ৰবার ছুটি হয় ব্যারদিন, এবার বড় সাহেব দয়া করিয়া,

\* “প্রেমবৈচিত্র্য” এই কয়েকটা পরিচ্ছেদের কতকংশ “পূজার ছুটি” নামে “সাধনায়” প্রকাশিত হইয়াছিল।

লেখক।

জোড়া তাড়া দিয়া, ছুটিটা দিন ছুই বাড়াইয়া দিয়াছেন;—আনন্দের কথা আর কাজ কি? বড় সাহেবের জয় জয়কার হোক ।

প্রভাত আফিস হইতে বাসায় আসিয়া তাড়াতাড়ি হাত মুখ ধুইয়া, সংক্ষিপ্ত জলযোগ করিয়া লইলেন;—বলিতে লজ্জা করে, বাড়ী যাবার আয়োজনে; এ বয়সেও প্রভাতের উদর পুরিয়া উঠিল। চিরপ্রবাসী কেরণী সংবৎসর পর বাড়ী বাইতেছে, তার আহ্লাদ তোমরা সবাই বুঝিবে কি? ক্ষিপ্ৰহস্তে জিনিস পত্র গুছাইয়া লইয়া “নদী যথা ধায় সিদ্ধু পানে”—প্রভাত গৃহোদ্দেশে ছুটিলেন।

হাওড়া ষ্টেশনে ঢুকিতে না ঢুকিতে একটা অক্ষুট জনকল্লোল শুনা গেল। বোধ হইল যেন দূরে সমুদ্র গর্জিতেছে। ষ্টেশনে, টিকিট-ঘরে, লোকে লোকারণ্য; টিকিট লইয়া প্রভাত তখনই গাড়ীতে উঠিলেন। গাড়ী কিন্তু সব ভরপুর। বহুকষ্টে বসিবার স্থান মিলিল। যে স্বর্গে উঠিতেছে সে সিঁড়ির ভয় করে না, কাজেই প্রভাতও এ কষ্ট গায়ে মাখিলেন না। একটু পরে, গাড়ী ছাড়িবার ঘণ্টা পড়িল; ত্র্যস্তা, ভীতা ফণিনীর মত তীরবেগে গাড়ী ছুটিল।

প্রভাতের গাড়ীতে অধিকাংশই গৃহবাত্রী বাঙ্গালী। কেহ বালক, কেহ বৃদ্ধ, কেহ সুবক। কাহারও জন্ত স্নেহময়ী জননী পথ চাহিয়া চাহিয়া দাঁড়াইয়াছেন,—কবে তাঁহার অঞ্চলের নিধি, কাঙ্গালের সোণা বিদেশ হইতে ফিরিবে! কাহারও পুত্র কন্যা, আত্মীয় বন্ধুবান্ধব আশাপথ ধরিয়া আছেন; কাহারও বা প্রণয়িনী কাঁদিয়া কাঁদিয়া দিন গণিতেছেন, কবে আবার তাঁহার সেই প্রবাসক্রিষ্ট, হৃদয়দর্পক স্বামী গৃহে ফিরিবেন। হায়! আবার কতদিনে, সেই বিরহ-সন্তাপিতা পথিকবধু, বঁধুর বুকে মাথা রাখিয়া, সারা বছরের দুঃখ-সমুদ্র ভুলিবেন।

আনন্দময়ী মার আগমনে, বস্তু যে এত আনন্দ, এত উচ্ছ্বাস, বুঝি বা প্রিয়জনের মিলন-আশাই এর প্রধান কারণ! ক্রমে গাড়ী ষ্টেশনের পর ষ্টেশনে থামিতে থামিতে প্রভাতের গন্তব্য ষ্টেশনে উপস্থিত হইল, প্রভাত নামিয়া পড়িলেন। রাত্রি তখন আটটা। ষ্টেশনের বাহিরে, প্রভাতদের গ্রামস্থ তিনটী স্কুলের ছাত্রের সঙ্গে দেখা হইল; একজন কিশোরবয়স্ক, অপর

ছুটি বালক। তাঁহারা তিনজনেই এক পরিবারভুক্ত, কলিকাতায় থাকিয়া পড়াশুনা করেন। সম্প্রতি ছুটিতে বাড়ী বাইতেছেন। ইহারা চারিজনে একখানি ঘোড়াগাড়ি ভাড়া করিবেন, স্থির হইল। বহুত গ্রাহক, এদিকে গাড়ী কম, গাড়োয়ানদের স্ততরাং পোয়াবারো! অল্প সময় তাহারা ছুটিয়া আসিয়া হাতের ব্যাগ বহিয়া গাড়ীতে লইয়া যায়, আজ আর তাহাদের মাটিতে পা পড়ে না। তারা কোচবান্ধে গম্ভীরভাবে সমান বসিয়া রহিল। কিন্তু গরজ বড় বালাই, প্রভাত নিজের দায়ে অগত্যা মহান্নদের সেই উপদেশ-বাক্য স্মরণ করিলেন। গাড়োয়ানেরা কেহ অগ্রসর হয় না দেখিয়া, প্রভাতই শেষ, গাড়ীর কাছে হাজির হইলেন। অল্প সময় ছুই টাকার মধ্যেই গাড়ী মিলে, কিন্তু আজ আর কেহ পাঁচ টাকার কমে বাইতে স্বীকার হইল না। তাই স্বীকার করিয়া প্রভাতেরা গাড়ীতে উঠিলেন; গাড়ী চলিতে আরম্ভ করিল; পক্ষিরাজঘর, গজেন্দ্র-গতিতে ছুটিলেন। তাহাদের প্রতি পাদক্ষেপে, একটা গম্ভীর উদাত্ত ও নির্নিপুতার ভাব প্রকাশ পাইতেছিল। হায়! এই অশ্বিনীকুমার-যুগলেরও বুঝি গাড়োয়ানদের মত পারাভারি হইয়াছে।

বাই হোক, কোনরূপে প্রভাত রাত্রি এগারটার সময় বথাস্থানে পৌঁছিলেন। এইবার নৌকায় বাইতে হইবে, এখান হইতে প্রভাতদের বাড়ী সাতক্রোশ, তবে জলপথে কিছু ঘুরিয়া বাইতে হয়।

সেদিন চতুর্থী; স্ততরাং জ্যোৎস্না অনেকক্ষণ ডুবিয়া গিয়াছে, রাত্রি কিছু অন্ধকার, তবে ঘোর নহে; সেই তরল অন্ধকার ভেদ করিয়া তারকারাজি অল্প অল্প কিরণ দিতেছিল। প্রভাত তখনই নৌকা ছাড়িয়া দিলেন। অনুকূল বাতাস বহিতেছিল, মাঝিরাম্পাল তুলিয়া দিল, সেই নিশীথ রাত্রে, অনন্ত আকাশতলে, প্রশান্ত ভাগীরথী-বক্ষে, পালভরা নৌকাতর তর বেগে মুক্তপক্ষ কলহংসীর মত চলিল। আশ্বিনে, বর্ষার সে হৃদমনীয় চাঞ্চল্য নাই, কিন্তু ভাগীরথী এখনও কলার কলয় পূর্ণ। যৌবনের মত্ততা গিয়াছে, কিন্তু যৌবন আজিও চল চল। গঙ্গার উভয়কূলের দূরস্থ গ্রামগুলি, কুরাশাচ্ছন্ন বলিয়া বোধ হইতেছিল। গাছপালা সবই ছায়া ছায়া, যেন চিত্রাৰ্পিত! দেখিতে বড় সুন্দর! কোথায়ও বা অদূরে ছুই একটা সৌধশ্রেণী পাড়িয়া আছে, কোনটার বা মুক্তবাতায়ন পথে আলো দেখা বাইতেছে। দূরে মাঝি

মাল্লারা সারি গাহিয়া চলিয়াছে, গান বুঝা যায় না, কিন্তু সেই গভীর নিস্তরঙ্গ রজনীতে সঙ্গীতের সেই শেষ ভাগ বড়ই মধুর শুনাইতেছিল!—আর প্রভাতের মনে যে সঙ্গীত বাজিতেছিল, তাহা আরও মধুর! ক্রমে প্রভাতের তন্দ্রা আসিল, তন্দ্রা স্বপ্নময়, আর স্বপ্ন যে কি-ময়, তাহা বলিতে হইবে কি?

কখন প্রভাত হইয়াছিল, প্রভাত জানিতে পারেন নাই। বেলা তিন চারি দণ্ডের সময় মাঝিদের ডাকে প্রভাতের ঘুম ভাঙ্গিয়া গেল। মাঝিরা বলিতেছে, “বাবু! ঘাটে এসেছি, উঠুন”—

কথাটা কাণের ভিতর দিয়া, মরমে পশিল গো,—

আকুল করিল তার প্রাণ,

প্রভাত আর কি স্থির থাকিতে পারেন? তাড়াতাড়ি উঠিয়া বসিলেন। সঙ্গে যে বালক ছুইটী ছিল, তাহারা নৌকা ঘাটে লাগিবামাত্রই লাফ দিয়া ঘাটে উঠিয়াছিল—তীরে উঠিতে না উঠিতে তাহারা কতদূর চলিয়া গেল।

গঙ্গার ধার হইতে প্রভাতদের বাড়ী এক পোয়া পথ। গ্রামের নীচেই বিল, কিন্তু ঘুরিয়া সেই বিলপথে গেলে প্রায় ছুই ঘণ্টা লাগে। প্রভাত ততটা ঘুরিতে প্রস্তুত ছিলেন না।

বালক ছুইটী চলিয়া গেলে, প্রভাত সেই কিশোরটীকে বলিলেন—  
“কই উপেন, তুমি যে ওদের সঙ্গে গেলে না,” সে কোন উত্তর দিল না; কেবল প্রভাতের দিকে চাহিল, চাহিয়া একটু হাসিল। সে হাসি উদাত্তের! তাহার মত বয়সে সকলেরই একদিন এইরূপ উদাসভাব আসে। বাল্যকালে পূজা বলিয়া, গৃহ বলিয়া, যে একটা হৃদমণীয় টান থাকে, আমোদে যত উৎসাহ থাকে, বয়সে ক্রমে তাহা হ্রাস হইয়া থাকে। শেষে কিশোর বয়সে একেবারেই কমিয়া যায়। তখন একটা উদাস ভাব, হৃদয় ছাইয়া ফেলে। বাল্যকালের সে সব আমোদে মন আর মাতে না, সে সব বাঁধনে আর তেমন টান থাকে না, যেন কি একটা অভাবে, কি একটা শূন্যতায় হৃদয় সদাই খাঁ খাঁ করিয়া বেড়ায়। পুরাতনের কিছুতেই আর তাহা পূর্ণ হয় না। শেষ আর এক নুতন বন্ধন হয়, সে বন্ধনে শিথিল গ্রন্থি সব আবার দৃঢ় হইয়া পড়ে, জগৎ আবার স্নেহময় হইয়া উঠে; শীতের পর বসন্তের উদয় হয়।

## অষ্টম পরিচ্ছেদ ।

প্রভাত বাটী প্রবেশ করিতে না করিতে “কাকা বাবু দাও সন্দেশ আমরা সবাই খাই” বলিয়া ভ্রাতৃপুত্র ও ভাইঝি ছুটি ছুটিয়া প্রভাতের কাছে আসিল! প্রভাতও অতটা খেয়াল করিয়া সন্দেশ আনেন নাই, মনে মনে কিছু অশ্রুতিভ হইলেন। হায়! নবকৃষ্ণবাবু কাকাবাবুদের সহিত আপনার কি এমন শত্রুতা ছিল! যাইহোক প্রভাত সন্দেশ দিতে না পারিলেও বালক-বালিকা-দলের উৎসাহ ভঙ্গ হইল না। তাহারা কেহ কাঁপাইয়া প্রভাতের কোলে উঠিল, কেহ বা হাত ধরিয়া ‘কাকা এসেছে গো’ ‘কাকা এসেছে গো’ রবে তোল পাড় করিতে করিতে প্রভাতকে ‘অন্দরের’ দিকে টানিয়া লইয়া গেল; তখন একে একে প্রভাতের মা, ভগিনী, পিসিমাতা, ঠাকুর-মাতা, প্রভৃতি সকলে তাঁহাকে ঘিরিয়া দাঁড়াইলেন; গুরুজনদের যথারীতি প্রণাম করিলে পর ভগিনী প্রভাতকে বসিবার জায় একটা মাতুর বিছাইয়া দিলেন। বালক-বালিকার দলও তখন কেহ প্রভাতের কোলে, কেহ পাশে বসিল। মা খাবার আনিতে গেলেন, আর সকলে কাছে বসিয়া গল্প করিতে লাগিলেন; অনেক দিনের পর স্নেহের পুত্তলি ও ভক্তির প্রতিমাগুলি দেখিয়া প্রভাতের হৃদয় আনন্দে উছলিয়া উঠিল; আমরা সত্য কথা লুকাইব না, কথা কহিতে কহিতে প্রভাত মাঝে মাঝে অশ্রুমনস্ক হইতেছিলেন। তাঁহার চঞ্চল চক্ষু কোন একটা নেপথ্যবর্তিনীর উদ্দেশে ছুটিয়া বেড়াইতেছিল। আরও একটা উৎসুক দৃষ্টি যে, অদূরে অন্তরালের ছিদ্র পথে ঘনপঙ্কচ্ছায়া তলে চঞ্চল হইয়া উঠিয়াছিল, তাহা প্রভাতের অন্তর জানিত।

জল খাওয়ার পর প্রভাত বন্ধু বান্ধবদের সহিত দেখা করিতে বাহির হইলেন। পূজায় অনেকেই বাটী আসিয়াছেন, একে একে প্রায় উপস্থিত সকলের সঙ্গেই দেখা করিলেন।

বাল্যকালের সেই বাঁধাঘাট, সেই বটগাছ, সেই বকুলতল সকলই দেখিলেন। শৈশবের কত কথা মনে পড়িল, হায়, আজ সে সব দিন কোথায়? আর সেই শৈশবের সেই যে সঙ্গী তারাই বা আজ কোথায়?

কেহ দেশান্তরে, বহুকাল দেখা নাই, কেহ লোকান্তরে, এ জীবনে দেখি-বার আশা নাই!

দেখা সাক্ষাতে, আসরে নিদ্রায় গল্প গানে সমস্ত দিন কাটিয়া গেল; রাত্রি নয়টার পর প্রভাত আহারাদি করিয়া শয়ন-গৃহে গেলেন। আজ এ পর্যন্ত প্রভাত তাঁর সেই নয়নানন্দ-দায়িনীর সাক্ষাৎ পান নাই। বালিকা বা যুবতী বধূর প্রথম স্বপ্নের বাটী আসিয়া দিবসে স্বামিসন্দর্শন বড় কঠিন কথা! গৃহে আসিয়া প্রভাত প্রায় আধ ঘণ্টা শুইয়া রহিলেন। পাতাটি নড়িলে, বায়ু একটু সশব্দে বহিলে উৎফুল্ল হইয়া উঠেন, কিন্তু বৃথা আশা! তখন তাঁর মনে হইতে লাগিল—

জানে কাঁদি তার তরে,  
তবু সে বিলম্ব করে—

রমণী নিদ্রায়!

কাজ কর্ম সমাধা করিয়া সিন্ধুর আসিতে এ বিলম্ব টুকু হইতেছে বুঝিয়াও প্রভাতের অবুঝ মন চঞ্চল হইয়া উঠিল, ক্রমে যেন শব্দা-কণ্টক উপস্থিত হইল, প্রভাত পাশ ফিরিয়া শুইলেন; ধীরে ধীরে সহসা কে আসিয়া প্রভাতের চক্ষু টিপিয়া ধরিল।

কি কোমল স্পর্শ!

নবম পরিচ্ছেদ ।

প্রভাতদের বাটীতে পূজা হয়। আজ সপ্তমী পূজা। পূজার বাঘ বাজিয়া উঠিয়াছে। সঙ্গে সঙ্গে বালক-বালিকা “আঙ্গা কাপল” পরিয়া পূজা দেখিতে ছুটিয়াছে।

সন্ধ্যার পর আরতি। পুরোহিত ঠাকুর যথাসময়ে পঞ্চপ্রদীপহস্তে আরতি আরম্ভ করিলেন। তাঁহার হস্তের সেই কৌশলময় সঞ্চালন দেখিবার জিনিষ বটে। প্রতিমার নিকটে ঘন ঘন ধূপধূনা জ্বলান হইতেছিল—উভয় পার্শ্বে সারি বাঁধিয়া চামরব্যজন চলিতেছিল, মাঝে মাঝে লাল নীল আলোয়

চণ্ডীমণ্ডপ উজ্জ্বল হইয়া উঠিতেছিল। কাঁশর ঘণ্টার রবে দিক পুরিয়া উঠিয়াছিল; সঙ্গে সঙ্গে ঢাক ঢোর শানাই বাজিতেছিল। অসংখ্য নরনারী ভক্তিভরে, একদৃষ্টে প্রতিমা নিরীক্ষণ করিতেছে, সে সময়ে এ দৃশ্য দেখিতে দেখিতে মনে কেমন একটা পবিত্র ভাব আসে, ভক্তিভরে হৃদয় পুলকিত হইয়া উঠে।

পরদিন অষ্টমী পূজা। অষ্টবার সন্ধিপূজা গভীররাত্রে হইয়া থাকে, এবার আরতির সঙ্গে সঙ্গেই সন্ধিপূজার আরম্ভ হইল। আজ পূজার জম-জমাটা আরও কিছু বেশী রকমের।

নবমীর দিন লোক জন খাওয়ানিতেই কাটিয়া গেল। তারপর বিজয়া দশমী; বৈকালে প্রতিমাবরণ হইল। আজ গ্রাম ও আশপাশ হইতে অনেক লোক বিসর্জন দেখিতে আসিয়াছে।

সে গ্রামে আরও দুইখানি পূজা হইত। তিনখানি প্রতিমা একত্রে গ্রাম প্রদক্ষিণ করিয়া একসঙ্গে বিসর্জন দেওয়া হয়। গ্রামের প্রান্তেই বিল। সেই বিলে প্রতিমা বিসর্জন হয়। বিল এখনও জলে পূর্ণ, সুতরাং প্রতিমা লইয়া “বাচখেলার” বড় স্তুবিধা। প্রভাতেরাও নৌকাবিহারের লোভ সৃষ্ণ করিতে পারিলেন না। প্রকাণ্ড বিল, বিলের একধার হইতে অল্প ধার স্পষ্ট নজর হয় না। চারিদিকে কেবল স্থির জলরাশি, মাঝে মাঝে নিমোক্ষণস্থ গুল্ম বৃক্ষাদির শাখা জাগিয়াছে মাত্র। সেই সব শাখায় শাখায় উদ্ভাসপত্রের অন্তরালে বক, সারসাদি বসিয়া আছে। কোথাও বা কলহুংসী, কারণ্ডব, চক্রবাক, মিথুন প্রভৃতি জলচর পক্ষী সন্তরণ করিতেছিল—সন্ধ্যা সমাগত দেখিয়া তাহারা ঝাঁকে ঝাঁকে কুলার-উদ্দেশে চলিয়া গেল।

সন্ধ্যার পর বিসর্জন দিয়া প্রভাতেরা নৌকা ফিরাইলেন। কুলে পৌঁছবার পূর্বেই জ্যোৎস্না উঠিয়াছিল। কোমুদী-কিরণ-সম্পাতে জলরাশির শোভা দেখিতে দেখিতে সকলে উপরে উঠিলেন। তখন শানারে পূরবী রাগিনীতে বিসর্জনের গান গাহিতেছিল—সেই পানের সঙ্গে তখনকার প্রাণের সুর মিলিল।

গৃহে ফিরিতে একটু রাত্রি হইল। তারপর সকল পরিবার একত্র হইয়া সম্বন্ধ অনুসারে প্রণাম, আলিঙ্গন আশীর্বাদ লিখে লাগিল। শেষ,

গ্রামস্থ স্বজাতি, কুটুম্ব, আত্মীয় সকলের বাটীতে বিজয়ার প্রণাম উদ্দেশে সকলে বাহির হইলেন। আজ আর শত্রুমিত্র ভেদ নাই, শত্রু শত্রুতা ভুলিয়া মর্হীশত্রুকে আলিঙ্গন করিতেছে, আজ সকলের মন যেন শান্তি ও ক্ষমায় পূর্ণ।

আহারাদির পর প্রভাত শয়ন-গৃহে বসিয়া আছেন, সহসা তাঁর গৃহিণী আসিয়া টিপ করিয়া একটা প্রণাম করিলেন। নূতন নিয়মে, গৃহিণীকুলের নিকট আর বড় একটা প্রণাম পাওয়া যায় না, তাই, বোধ হয় প্রভাত প্রথমে একটু বিস্মিত হইয়াছিলেন। বিস্ময়ের প্রথম মুহূর্ত অতীত হইলে প্রতিদানে প্রভাতও তাঁর কর্তব্যসাধন করিলেন।

আজ পূর্ণিমা। রাত্রে ওপাড়ায় রায়েদের বাটীতে যাত্রা হইবে। প্রভাত এখন একটা রাত্রিও নষ্ট করিতে প্রস্তুত নহেন। কিন্তু কি করেন, বন্ধুবান্ধবদের অনুরোধে ও বিদ্রূপে পড়িয়া যাত্রা শুনিতে যাইতে হইল। রাত্রি বারটা পর্য্যন্ত থাকিয়া শেষ পাশ কাটাইয়া চলিয়া আসিলেন। শয়ন-গৃহের দ্বারে আসিয়া শিকল নাড়িলেন, দরজা খুলিয়া ঠাকুরমাতা বাহির হইলেন। একটু রহস্য করিতেও ছাড়িলেন না! প্রভাত ঘরে গিয়া দেখিলেন তাঁর গৃহিণী নিদ্রাভিত্তা। কয়েকদিন উপবৃত্তপরি রাত্রি জাগিয়া আজ এই অবকাশে একটু ঘুমাইয়া লইতেছেন। এতক্ষণ ঠাকুরমা তাঁর কাছে ছিলেন, শিকল নাড়ার শব্দ শুনিয়াই তাঁর ঘুম ভাঙ্গিয়াছিল, তিনি আর ইহার ঘুম না ভাঙ্গাইয়া ছয়ার খুলিয়া দিয়াছিলেন।

মুক্ত বাতায়নপথে পূর্ণচন্দ্রের কিরণ আসিয়া শয্যায় পড়িয়াছিল। প্রভাত দাঁড়াইয়া দাঁড়াইয়া সেই শরৎজ্যোৎস্নার সহিত তাহার গৃহ-জ্যোৎস্নার মিলন দেখিতেছিলেন।

\* \* \* \* \*

ক্রমে ছুটির দিন ফুরাইল। আজ রাত্রি দশটার পর প্রভাতকে কলিকাতায় রওনা হইতে হইবে।

প্রভাত সমস্তদিন কোথাও বড় একটা বাহির হইলেন না—মা, পিসিমা, ভগিনী ইহাদের কাছে কাছেই রহিলেন। আর সন্ধ্যার পরই আহার করিয়া শয়ন করিতে গেলেন।

প্রভাত যাওয়ার একটু পরেই গৃহিণী উপস্থিত হইলেন। সেই স্বভাবপ্রফুল্ল মুখখানি ড়ে আজ বিষণ্ণ!

অন্য দিনের অপেক্ষা দশটা আজ যেন ছ'চারি ঘণ্টা পূর্বে বাজিল। বিদায়কালীন মিন যখন নিবিড়তম, তখন কে ডাকিল,—

“বাবু মাঝি এসেছে।”

প্রভাত একে একে সকলের কাছে বিদায় হইলেন, নৌকার উঠিলেন। নৌকা ছাড়িয়া দিল।

শ্রীশৈলেশচন্দ্র মজুমদার।

## ইংরেজী বিবাহ।

সকলেই জানেন ইংরেজদের মধ্যে বাল্যবিবাহ নাই। আমাদের দেশে যে বয়সে মেয়েদের দোহিতা পৌত্র পর্য্যন্ত হইয়া থাকে, ইংরেজ কন্যাদের প্রায় সেই বয়সে বিবাহ হয়। সচরাচর স্ত্রীলোকদের ২০ হ'তে ৩০ আর পুরুষদের ২৫ হ'তে ৩৫ বৎসর বিবাহের সময়। অনেক সময় উহা অপেক্ষাও অধিক বয়সে বিবাহ ঘটয়া থাকে। কারণ, সংসার-পালনের উপযুক্ত অর্থ উপার্জিতে না পারিলে কোন কৃতিই বিবাহ করে না, কি ধনী, কি দরিদ্র, সকলেই ব্যয়চিত্রিত ধন হস্তগত না হ'লে বিবাহে অগ্রসর হয় না।

আমাদের দেশের মত বিলাতে ঘটক ও ঘটকালির ব্যবস্থা নাই। কোন সভায় বা প্রকাশস্থানে, কি বন্ধুবান্ধবদের বাড়ীতে অনেক স্ত্রীলোক ও পুরুষের একত্র সমাগম হইলে পরিচিত যুবকযুবতীরা নিজেই প্রণয়ী ও প্রণয়িনী জুটাইয়া লয়। এই পাত্রপাত্রীর আলাপ করার সময়কে ইংরেজীতে 'কোর্টশিপ' বলে। পুরুষই প্রথমে পত্র বা কথা দ্বারা স্ত্রীলোকের নিকট নিজের প্রেমের কথা জানায়, যুবতীরও তাহার প্রতি আসক্তি জন্মিলে সে যুবকের প্রণয়ে উপেক্ষা করে না। ক্রমে হৃদয়ে সর্বদা দেখাশুনা করিয়া উভয়ের মন জানিয়া লয়। এইরূপ আলাপের পর উভয়ের কোন বিষয়ে



অপত্তি না থাকিলে যুবক যুবতীর কাছে বিবাহের প্রস্তাব করে। কথ্য তাহাতে স্বীকৃত হলে উভয়ের পিতামাতার মত লওয়া হয়। পিতামাতারা প্রায়ই নিজ নিজ পুত্রকন্যাদের মনোনীত পাত্রপাত্রীর সঙ্গে বিবাহে আপত্তি করেন না।

এই বিবাহে অঙ্গীকারের পর উভয়ে আইনমতে বিবাহ করিতে বাধ্য হয়। এই কড়ার করাকে ইংরেজীতে, 'এনগেজমেন্ট' বলে। ইহার পরে পাত্রী পাত্রের প্রদত্ত একটি আংটি পরে, তাহাকে 'এনগেজমেন্ট রিং' বলে। এই সময়ে সেদিন খবরের কাগজে আমাদের মহারানী ভিক্টোরিয়ার দৃঢ় পতিপ্রেমের একটি উজ্জ্বল দৃষ্টান্ত পড়িয়াছি। এনগেজমেন্ট ও বিবাহের সময় মহারানীর মৃতস্বামী প্রিন্স কম্বট যে দুটি আংটি দিয়াছিলেন, তাহা তিনি এতকাল স্বামীকে স্মরিয়া পরিয়া আসিতেছেন—এখন বয়স আধিক্য বশতঃ আঙুল অত্যন্ত স্থূল হইয়া আংটি অপেক্ষা অনেক মোটা হয়ে পড়েছে, আর আংটির চারধারে মাংস জমিয়া তাহাকে অত্যন্ত যত্না দিতেছে—তথাপি তিনি জীবন থাকিতে স্বামীর প্রথম উপহার কাটিয়া আঙুল থেকে বাহির করিতে ইচ্ছুক নহেন। এরূপ পতিব্রতা ইংরেজ-মহিলাদের ত কথাই নাই, আমাদের হিন্দু মহিলাদের পক্ষেও অতি গৌরবের বিষয়।

ইংরেজ স্ত্রীপুরুষেরা এরূপ স্বাধীনভাবে নিজ নিজ ভাবী স্বামী স্ত্রী মনোনীত করিলেও বিবাহের প্রতিজ্ঞাভঙ্গের কথা মাঝে মাঝে শুনা যায়। ঐ কড়ার পর স্ত্রীলোকের বিনা দোষে পুরুষ বিবাহে অস্বীকৃত হইলে স্ত্রীলোক প্রতিজ্ঞাভঙ্গের জন্ত পুরুষের বিপক্ষে নালিশ করিতে পারে, মোক্ষদমা জিত হইলে পুরুষের অনেক অর্থও হইয়া থাকে।

এনগেজমেন্টের পর পরস্পর ভাবী স্ত্রীপুরুষের মত ব্যবহার করে। দুজনে একসঙ্গে বেড়ায়, খেলা করে, গির্জায় যায়, থিয়েটারে যায় ইত্যাদি। এই কোর্টশিপের কাল ছয়মাস হতে কাহারও ছয় বৎসর কাটিয়া যায়। কারণ, পূর্বেই বলিয়াছি সকল দিকে সুবিধা না হলে ইংরেজরা বিবাহ-বন্ধনে বদ্ধ হয় না। অনেক সময় সব ঠিকঠাক করিয়াও উহারা উপযুক্ত অর্থাভাবে অনেক দিন পর্যন্ত অপেক্ষা করে। ইংরেজরাও বিশুদ্ধ প্রণয়কে অতিশয় আদর করে, আর উহা মানবজীবনের পবিত্র বন্ধন বলিয়া স্বীকার

করে। উহাদের মধ্যে ব্যভিচার প্রশয় পায় না, পুরুষেরা পর্যন্ত ব্যভিচারকে ভয়ানক পাপ বলিয়া ভাবে।

বিবাহের দিন সকলদেশেই অত্যন্ত ঘট হইয়া থাকে। বরকনের ত কথাই নাই, বাড়ীর পরিবার ও ছেলে মেয়েদের আঙ্লাদের সীমা থাকে না। আমাদের দেশের মত ঢাকটোলের ও হলুধ্বনির শব্দে গৃহ পূরিয়া যায় না বটে, কিন্তু মেয়েদের গানবাজনা ও হাসিধ্বনিতে সমস্ত বাড়ী রৈ রৈ করে। বিলাতে কথার পিতৃগৃহে বা রাত্রিতে বিবাহ হয় না; সকালবেলা গির্জায় গিয়া বিবাহক্রিয়া সম্বয় হয়। ধনীলোকদের বিবাহে ফুল, পাতা, নিশান ইত্যাদি দিয়া গির্জা ও বাড়ী সাজায়; ও খুব ভাল ভাল গাড়ী করিয়া বিবাহ করিতে যায়। এদেশের মত সে দেশেও বরের ছোট ভাই কি বন্ধু নীতবর হয়, আর অবস্থানুসারে কথার একটি হতে বারটি পর্যন্ত নীতকনে সাজিয়া থাকে। নীতবরকে 'বেষ্টম্যান' আর নীতকন্যাদের 'ব্রাইড্‌স্মেড' বলে।

সকলে গির্জায় উপস্থিত হলে বর ও কথ্য বেদির নিকট দাঁড়াইয়া আচার্য্য ও আত্মীয় বন্ধুবান্ধবদের সমক্ষে প্রতিজ্ঞা করে যে, তাহারা পরস্পরকে স্ত্রী ও স্বামী বলিয়া গ্রহণ করিতেছে—জীবিত থাকিতে দুজনে পৃথক হইবে না, ইত্যাদি। পরে উভয়ে ঈশ্বরের কাছে প্রার্থনা করে ও তাহার আশীর্বাদ চায়। আচার্য্য বাইবেল হইতে কোন কোন অংশ পড়েন, নবদম্পতিকে উপদেশ দেন ও তাহাদের মঙ্গলের জন্ত মঙ্গলময় পিতার নিকট না করেন। এই প্রার্থনাতে উপস্থিত সকলেই যোগ দেন। এদেশের মত বিলাতেও পিতা কি বড় ভাই, কথাকে বরের হস্তে সমর্পণ করেন। বিবাহের প্রতিজ্ঞা ও প্রার্থনার পর বরকনে অণু ঘরে গিয়া সকলের সমক্ষে রেজিষ্টারী পুস্তকে নিজেদের নাম সহি করে। বেদির কাছে দাঁড়াইয়া প্রতিজ্ঞার পর তাহাদের সম্বন্ধ ধর্ম্মমতে যেমন অলঙ্ঘনীয়, সেইরূপ এই রেজিষ্টারীতে নাম লেখার পর পতিপত্নীর সম্পর্ক আইনমতে অখণ্ডনীয় হয়। বিবাহক্রিয়া নির্বাহ হলে বরকনে যখন গির্জা হতে বাহিরে আসিয়া গাড়ীতে উঠে, তখন সেখানকার আচার্য্যনুসারে সমবন্ধকেরা বরের চারদিকে চাল ছড়াইয়া দেয় ও তাহাকে জুতা ফেলিয়া মারে। ঐ জুতা মারার প্রথা

অনেকটা এদেশের বরের কাণমলার মত। গির্জা হতে সকলে আসিয়া কনের বাস্পর বাড়ীতে সমাগত হয়, ও আত্মীয়-বন্ধুরা মিলিয়া সকলে মহা-ভোজ লাগায় ও আমোদ আহ্লাদ করে।

হিন্দু-স্ত্রীদের বামহাতের লোহার মত, সোণার সাদা আংটা ইংরেজ-মহিলাদের মধ্যে বিবাহের চিহ্নরূপ, উহা তাহারা বামহাতের তৃতীয় অঙ্গুলে পরিয়া থাকে। সে দেশেরও প্রাচীনা ও কুসংস্কারাপন্ন স্ত্রীলোকেরা ঐ আংটা খোলাকে অমঙ্গলের চিহ্ন বলিয়া বিশ্বাস করে। ইংরেজদের মধ্যেও বিবাহের সময় সামাজিক ক্রিয়াকলাপের মধ্যে ছুচারি কুসংস্কার দেখিতে পাওয়া যায়, কিন্তু শিক্ষার উন্নতির সঙ্গে সে সব প্রায় উঠিয়া যাইতেছে। হিন্দু ও ফরাসী পিতার মত ইংরেজ পিতাকে কন্যাদের বিবাহের সময় অনেক গহনা, টাকা বা কাপড় দিতে হয় না। অবশ্য, ধনীলোকেরা ইচ্ছা করিলে মেয়েকে বিয়া পর্যন্ত দিতে পারেন বটে, কিন্তু উহার কোন বন্দোবস্ত নাই। বিবাহের সময় ঘোতুকের মত পিতামাতা আত্মীয় বন্ধুরা বরকনেকে নানাপ্রকার প্রয়োজনীয় দ্রব্য—ঘড়ি, চেন, পুস্তক, পোষাক, চাদান আসবাব—ইত্যাদি উপহার দিয়া থাকেন।

নববিবাহিত স্ত্রীপুরুষ কিছুদিনের জন্য কোন নূতন স্থানে গিয়া আমোদ করে। এই সময়কে ইংরেজীতে ‘হনিমুন’ অর্থাৎ মধুচাঁদ বলে। দেশে হয়, বিবাহের পর এই সময় সর্কাপেক্ষা সুখের বলিয়া ইহার এই দি পা। এইকালে নবদম্পতি সংসারের আলা, সন্তানের উপদ্রব ও দাস-দাসীর ঝগড়া ইত্যাদি গার্হস্থ্য-জীবনের কোনপ্রকার কষ্টই জানে না—বিবাহিত জীবনকে কেবল সুখের আধার বলিয়াই বিশ্বাস করে। অবস্থানুসারে ১৫ দিন হতে ৬ মাস পর্যন্ত নূতন স্ত্রীপুরুষে হনিমুনে কাটায়, পরে বাড়ীতে আসিয়া নূতন সংসার আরম্ভ করে।

ইংরেজদের মধ্যে অবিবাহিতা স্ত্রীলোকদেরকে ‘মিস’ অর্থাৎ কুয়ারী; আর বিবাহিতাদেরকে ‘মিস্ট্রেস্’ সংক্ষেপে মিসেস অর্থাৎ কস্ত্রী বা গিন্নি বলিয়া ডাকে। অনেকে মনে করেন, বিবাহের পর ইংরেজ স্ত্রীদের নাম বদলাইয়া যায়, কিন্তু বাস্তবিক তাহা নয়। আমাদের অন্তপ্রাশনের সময় নামকরণের ন্যায় সেদেশে ধর্ম্যদীক্ষার সময় নাম রাখা হয়—পিতামাতার

সেইকালে নিজ নিজ ইচ্ছামত সন্তানদের নাম দেন। সেই নামকে খৃষ্টান বা ডাকনাম বলে, তাহা কখন বদলায় না। বিবাহের পর আমাদের দেশেও যেমন স্ত্রীরা পিতৃপরিবারের নাম বা পদ্ধতি ছাড়িয়া স্বামিকুলের নাম গ্রহণ করিতে বাধ্য হয়, বিলাতেও সেইরকম। মিস্ বেল জোন্সের কোন হর্টরের সঙ্গে বিবাহ হলে তার নাম মিসেস্ বেল হর্টর হইয়া থাকে।

ইংরেজদের মধ্যে মামাতো, পিসতুতো, মাসতুতো ভাইবোনের মধ্যে বিবাহ হইয়া থাকে, এরূপ ঘরে ঘরে বিবাহে তাহাদের কোন আপত্তি নাই, কিন্তু আশ্চর্যের বিষয়, সেখানে স্ত্রী মরিয়া গেলে তার ভগিনীকে বিবাহ করিবার রীতি নাই, উহা আগে সমাজ ও আইনবিরুদ্ধ ছিল, এখন তাহারা অনেক চেষ্টায় আইন পাশ করিয়াছে বটে, কিন্তু সমাজে এখনও চলিত হয় নাই।

সেদেশে বিবাহিত ছেলেমেয়েরা পিতামাতার সঙ্গে এক বাড়ীতে বাস করে না; নবদম্পতি একটা ভিন্ন বাড়ীতে নিজেদের নূতন সংসার স্থাপন করে। তখন থেকে তাহাদের গার্হস্থ্যজীবন আরম্ভ হয়।

শ্রীকৃষ্ণভাবিনী দাস ।

## প্রবাস-চিত্র ( সমালোচনা ) ।

“প্রবাস-চিত্র” অর্থাৎ বঙ্গীয় সাময়িক সাহিত্য-জগতে সুপরিচিত সুলেখক শ্রীযুক্ত বাবু জলধর সেন বিরচিত তাহার নিজের, ভ্রমণ-কাহিনী। বিলাত-প্রত্যাগত কৃতিপয় ব্যক্তি-লিখিত “ভূ-প্রদক্ষিণ” প্রভৃতি কয়েকখানি, গ্রন্থে বৈদেশিক বিবরণ কিয়ৎপরিমাণে বঙ্গভাষায় প্রকাশিত হইয়া থাকিলেও, বাঙ্গলা বা ভারতীয় সাহিত্যে ভ্রমণ-বৃত্তান্ত নূতন কথা। বাঙ্গালী বা হিন্দু তীর্থ পর্যটন করিতেন, এখনও করেন। হিন্দু-সন্ন্যাসিগণ কত শত বৎসর ধরিয়া ভারতের নানাস্থান ভ্রমণ করিয়া আসিতেছেন। কিন্তু এ ভ্রমণের উদ্দেশ্য ভিন্ন, ইহার মূলে স্বার্থ ভিন্ন পরার্থ কখনও ছিল বা থাকিয়া থাকে, এরূপ কেহ জ্ঞাত নহে—স্বদেশ, স্বজাতি বা মামব-সাধারণের উপকার বা

উন্নতি-সাধন, মাতৃভাষার সেবা বা ভূপৃষ্ঠসম্বন্ধে সভ্য জগতের জ্ঞানবৃদ্ধি জীবনের সংকল্প করিয়া বাঙ্গালী কখনও দেশভ্রমণে বহির্গত হইয়াছেন, এরূপ শুনি নাই। পাশ্চাত্য পর্য্যটকগণ বিবিধ অতীষ্ট সাধন মানসে বিদেশ ভ্রমণ করিয়াছেন এবং করিয়া থাকেন। কেহ বা দূরদেশের প্রাকৃতিক সৌন্দর্য্য ও শিল্প-গৌরবের উজ্জ্বল চিত্রে জাতীয় সাহিত্য অলঙ্কৃত করিবার মানসে বিভিন্ন দেশের সুশোভন স্থানাদি পরিদর্শন করিতে যান, কেহ বা বৈদেশিক রীতিনীতি শাসন ও কার্যপদ্ধতি সম্যক্ আলোচনা করিয়া স্বদেশে সংস্কার প্রবর্তনের পথ উদ্ভাবনে যত্নবান; কেহ বা সভ্যতার আলোক প্রসারিত করিবার জন্য, সভ্যতার ফল সর্বত্র মানবজাতির উপভোগে আনিবার অভিলাষে, আন্তর্জাতিক সম্মিলনের উপায় স্বরূপ, গমনাগমনের সহজ পথ আবিষ্কারে নিযুক্ত হইয়া গিরিনদী বনপ্রান্তর অতিক্রম করেন, কেহ বা পৃথিবীর অজ্ঞাত প্রদেশ আবিষ্কার করিয়া স্বজাতীয় উপনিবেশ-সংস্থাপন, জাতির বাণিজ্য-বিস্তার বা লুকায়িত প্রাকৃতিক ঐশ্বর্য্য সভ্যজগতের জ্ঞান-দোচরে আনিয়া মানবসমাজের সুখ সংবর্দ্ধন করিতে প্রয়াসবান। মানবকুলের ভবিষ্যৎশীর্ষদের কখন কোন উপকারে আসিতে পারে, কেবলমাত্র এই বিশ্বাসে মানবের ভৌগোলিক জ্ঞানবৃদ্ধির প্রয়াসে কত মহাত্মা মেরু-প্রদেশের তুহিনরাশিতে জীবন বিসর্জন করিয়াছেন। ইহারাই প্রকৃত পর্য্যটক, এইরূপ পর্য্যটনেই পৃথিবীর মঙ্গল সাধিত হইবার সম্ভব। স্বজাতি বা মানবকুলের উপকারকল্পে এরূপ আত্মোৎসর্গের, এরূপ গৌরবের দিন বাঙ্গালীর জাতীয় জীবনে কখনও হইয়াছিল কি না জানি না, কখনও হইলে কত দিনে হইবে, তাহাও ভবিষ্যৎদর্শে নিহিত। বর্তমানে গৌরব করিবার এরূপ কিছু আমাদের নাই, এ কথাই প্রতিবাদ বোধ হয় কেহ করিবেন না, জলধর বাবুও প্রকৃত পর্য্যটক নহেন। তিনি শোকসন্তপ্ত হৃদয়ে শান্তির অন্বেষণে দেশত্যাগী হইয়াছিলেন, তবে তিনি সুশিক্ষিত, মার্জিতরুচি এবং মহদাশয়, নিজের হৃদয়ের ব্যথা প্রশমিত করিবার আশয়ে নানাস্থান ভ্রমণ করিয়া যাহা দেখিয়াছেন, যাহা শুনিয়াছেন, তাহা মাতৃভাষার সেবায় নিয়োগ করিতে প্রয়াস পাইয়াছেন। তিনি কৃতকার্য্যও হইয়াছেন, যে ভ্রমণ তিনি প্রথমে লক্ষ্যহীন মনে করিয়াছিলেন, তাহা মহত্বদেখে প্রযুক্ত করিয়াছেন; তিনি

শিক্ষিত বাঙ্গালীর ধন্যবাদের পাত্র। এ দুঃখময়, এ আনাশয় সংসারে জলধর বাবুর সমদুঃখীর সংখ্যা কম নহে, যাহারা তাঁহার ন্যায় ব্যথিত হৃদয়ে শান্তির তন্মাসে ছুটীতে সর্বদা ব্যগ্র; স্মরণীয় তাঁহার 'ভ্রমণোদ্দেশ্যের সহিত সহানুভূতির অভাব হইবে না, অনেকে কোঁতুহলপরবশ হইয়া তাঁহার গ্রন্থ পড়িবে।

জলধর বাবু তাঁহার গ্রন্থ ভ্রমণ-কাহিনী নামে আখ্যাত করেন নাই; তাঁহার গ্রন্থের নাম প্রবাস-চিত্র, অর্থাৎ তিনি যত কাল প্রবাসী ছিলেন, সেই সময় মধ্যে তিনি যাহা দেখিয়াছিলেন এবং যাহা শুনিয়াছিলেন, তৎ-সমুদায়ের বৃত্তান্ত সঙ্কলন করিয়া তিনি গ্রন্থাকারে প্রকাশ করিয়াছেন। অতএব তাঁহার গ্রন্থ একখানি বড় রকমের ভ্রমণ-বৃত্তান্ত নহে, অথবা তিনি প্রকৃত পর্য্যটক নহেন, ইহা বলিয়া তাঁহার নিন্দা করিবার, তাঁহার প্রবাস-চিত্রে দোষারোপ করিবার আমাদের অধিকার নাই। কল্পিত উৎকর্ষের অভাব দেখাইয়া সমালোচনা করা গ্রাসঙ্গত নহে। প্রবাস-চিত্রে যাহা আছে, আমরা তাহারই সমালোচনা করিব, এবং তাহার সৌন্দর্য্য যাহা তাহাই যখন আমাদের আদরের জিনিস, আমরা তাহার দোষানুসন্ধান বিশেষ তৎপরতা দেখাইবার চেষ্টা করিব না। প্রবাস-চিত্র উচ্চ দরের ভ্রমণ-কাহিনী না হইলেও, তাহাতে অনেক সৌন্দর্য্য আছে, তাহাতে প্রশংসার জিনিস অনেক দেখিতে পাওয়া যায়। লেখক সুশিক্ষিত, উচ্চনীতি, চিন্তাশীল ও উদারপ্রকৃতি হইলে, তিনি মূলে যে বিষয় অবলম্বন করিয়াই লিখিতে প্রবৃত্ত হউন না কেন, তাঁহার শিক্ষা ও প্রকৃতির পরিচয় তাঁহার লেখার সর্বত্র বিद्यমান থাকে। প্রবাস-চিত্রের গ্রন্থকার উচ্চশ্রেণীর ভ্রমণকারী না হইলেও তাঁহার শিক্ষা, রুচি, প্রকৃতি ও সৌন্দর্য্যানুভূতি সর্বত্র প্রশংসনীয়; তাঁহার হৃদয় প্রীতিপ্রবল ও পরহিতৈষী; তিনি শোকপীড়িত হৃদয়েও উদ্বিগ্নশীল, আপনা ভুলিয়া পরোপকার করিতে এবং কর্তব্যের অনুসরণে বিমুখ নহেন। তিনি মাতৃভাষার ঐতিহাসিক সাহিত্যের শরীর পুষ্ট করিবার জন্য প্রচলিত ইতিহাস-গ্রন্থে সচরাচর যে সকল ঘটনার উল্লেখ বা বিস্তৃত বর্ণন দেখিতে পাওয়া যায় না, এরূপ কোন ঘটনার বিবরণ প্রাপ্ত হইলেই তাহা সংগ্রহ করিয়া লিপিবদ্ধ করিয়াছেন, রুচিবিগর্হিত কার্য্য বা নীচপ্রকৃতির চিহ্ন তাঁহার দৃষ্টিগোচর হইলেই তৎপ্রতি কটাক্ষ করিতে তিনি ক্রটি করেন, নাই। যে হৃদয়ে প্রকৃতির ছবি প্রতি-

বিস্তৃত হয়, স্বভাবের সহিত সহানুভূতিতে যে হৃদয় সমর্থ, সে হৃদয় কবিত্ব-বিহীন নহে ; জলধর বাবু ভাবুক, তিনি ভাবুক এবং ভক্তও বটে।

বলিয়াছি জলধর বাবু উদারপ্রকৃতি, তাঁহার হৃদয় প্রীতিপ্রবল, ইহা তাঁহার লেখা পড়িয়া বেশ বুঝা যায়। একরূপ হৃদয় সর্বত্র প্রীতির সম্বন্ধ স্থাপনে সমর্থ। পরোপকার একরূপ হৃদয়ের স্বাভাবিক প্রবৃত্তি। মায়ার বন্ধন ছিন্ন করিয়া, স্বদেশ ও বন্ধুবান্ধবের নিকট বিদায় হইয়া, শোকসন্তপ্ত হৃদয়ে, শান্তির অন্বেষণে, জলধর বাবু প্রবাস-যাত্রা করিলেন; স্বদেশ পরিত্যাগ ও বন্ধুবিরহজনিত বিষাদ-চিন্তায় মগ্ন, রেলগাড়ীতে বসিয়া তিনি আপনার কথা আপনার মনে ভাবিতেছেন। ভাবিতে ভাবিতে নিদ্রাকর্ষণ হইয়াছে; এমন সময়ে গাড়ীর দরজায় খটখট শব্দ হইল, তাঁহার ঘুম ভাঙ্গিয়া গেল, তিনি উঠিয়া বসিলেন, একটা হিন্দুস্থানী যুবক শিশুসন্তান ক্রোড়ে তাহার কনিষ্ঠা ভগিনীকে গাড়ীতে উঠাইয়া দিয়া তাহাকে একটু বসিবার স্থান দিবার অনুরোধ করিয়া, ষ্টেশন-ঘরের দিকে তাহার জিনিসপত্র আনিতে গেল। গাড়ী ছাড়িয়া দিল, সে উঠিতে পারিল না, নিরাশ্রয় রমণী উচ্চঃস্বরে ক্রন্দন করিয়া উঠিল, ব্যাকুল হইয়া গাড়ী হইতে লাফাইয়া পড়িবার উদ্যোগ করিল। জলধর বাবু নিবারণ করিলেন, তাঁহার পরোপকার প্রবৃত্তি জাগরিত হইল, তিনি আপনা ভুলিলেন, রমণীকে আশ্বস্ত করিলেন—প্রতিশ্রুত হইলেন তাহাকে তাহার পিত্রালয়ে পৌঁছাইয়া রাখিয়া যাইবেন। রমণীকে অস্থিরচিত্ত দেখিয়া তিনি তাহার শিশু সন্তানটী কোলে লইয়া বসিলেন, পরে ঘুমাইলে তাহার মাতার ক্রোড়ে অর্পণ করিলেন। গাড়ী যথাস্থানে পৌঁছিল, রমণীর সহিত অবতরণ করিয়া তাহাকে তাহার পিত্রালয়ে লইয়া গেলেন, তথায় দুই একদিনের জন্ত তাহাদের আতিথ্য স্বীকার করিয়া, তাহাদের শান্তি সন্তুষ্টি ও সহৃদয়তার প্রীতি হইয়া, পুনরায় প্রবাস-পথে যাত্রা করিলেন। প্রবাস-চিত্র-প্রণেতার এই পরোপকার কার্যে অসাধারণ আত্মত্যাগ বা আত্মবিসর্জন কিছু না থাকিলেও, ইহাতে তাঁহার প্রকৃতি, তাঁহার হৃদয়ের গতি সূচিত করিতেছে। জলধর বাবু তাঁহার গ্রন্থশেষে যে অতি-প্রকৃত কথার উল্লেখ করিয়াছেন, তাহাও আমি এইরূপ পরোপকার প্রবৃত্তির, এইরূপ পরোপকার ধর্মের উচ্চ বিকাশ মনে করি। অতি-প্রকৃতে বিশ্বাস করিলে জীবন কবিত্বময়

হয়। যাঁহারা তাহা করিবেন না, তাঁহারা একরূপ বিশ্বাস করিতে না পারা কি যে কুটীরবাসী সন্ন্যাসী স্বয়ং না হউন, তাঁহার নিকট পরহিত-ব্রতে দীক্ষিত তাঁহার কোন শিষ্য মৃতপ্রায় অবস্থায় জলধর বাবুকে জলপান করাইয়া তাঁহার জীবন-রক্ষা করিয়াছিল। সন্ন্যাসী দ্রুতপদ কার্যকুশল হইলে, নিজেই, যে অতি অল্প সময়ে কোন গুপ্ত সহজ পথে গিয়া ব্রত পালন করিয়া ফিরিয়া আসেন নাই কে বলিবে? একরূপ সন্ন্যাসী ভারতে কয়টি আছে জানি না, থাকিলে সন্ন্যাস-ধর্মের পরহিতার্থে আত্মোৎসর্গ নাই এ কথা মনে করা যাইতে পারে না। কবির বঙ্কিমচন্দ্র তাঁহার চন্দ্রশেখর আখ্যায়িকায় এইরূপ কল্পিত চরিত্রের অবতারণা করিয়াছেন। রমানন্দ স্বামী তাঁহার আদর্শ সন্ন্যাসী, চন্দ্রশেখর প্রভৃতি তাঁহার মন্ত্রশিষ্য। এ আদর্শ বিশ্লেষণ করিলে তাহাতে দেখিতে পাওয়া যায়, অসীম জ্ঞান, অসাধারণ আত্ম-সংযম, পরহিতে আত্মোৎসর্গ, পরিশ্রমে অক্লান্তি, ক্ষমা, দয়া, গান্ধীর্ষ্য, দৃঢ়তা, সাহস, স্বাধীনতা, উদারতা, বল, বীর্য ও কর্ম-কুশলতা, \* চিন্তে, অলক্ষিত ভাবে, যশের জন্ত নহে, কর্তব্য জ্ঞানে, ব্রতপালন-মানসে, সতত পরোপকার কার্যে নিযুক্ত থাকিব, এইরূপ দৃঢ় সংকল্প। সর্বত্র, সকল অবস্থায়, প্রকৃত পরোপকার করিতে হইলে, এ সকল গুণেরই প্রয়োজন, তাই বঙ্কিম তাঁহার আদর্শ সন্ন্যাসীতে এ সকল গুণের সমাবেশ করিয়াছেন। কেহ কেহ জিজ্ঞাসা করিতে পারেন, সামান্য পরোপকার কার্যের উল্লেখ করিতে গিয়া পরহিতব্রতাবলম্বী সন্ন্যাসীর উচ্চ আদর্শের অবতারণা করা হইল কেন। আমি বলি, কোন কার্য সামান্য হইলেও, তাহার আনুষ্ঠানিক অবস্থার আলোচনা করিতে গেলে, যদি উচ্চ আদর্শের চিন্তায় স্বতঃপ্রবৃত্ত হইতে হয়, তবে সে সামান্য কার্যও প্রশংসনীয়; সে সামান্য কার্যেরও বিশেষ একটা মূল্য হইয়া উঠে, কেননা তাহার আলোচনায় সফল ফলে, মনুষ্যমন উন্নত হয়। হিন্দুস্থানী রমণী ও তাহার শিশু-সন্তানের প্রতি জলধর বাবুর হৃদয়াকর্ষণ-দৃশের চিত্র আমাদের নিকট, আর এক ভাবে সুন্দর বলিয়া প্রতীয়মান হইয়াছে। তাঁহার এই হৃদয়-উদারতার মূলে পরহিতব্রতাবলম্বী ব্যতীত অন্তরূপ নৈসর্গিক কারণও বিদ্যমান ছিল বলিয়া ধোঁধ হয়। জলধর বাবু বলিতেছেন—“তাহাকে দেখিয়া আর একটা ক্ষুদ্র সুন্দর শিশু ও তাহার

স্নেহময়ী মাঝার কথা তাঁহার মনে পড়িয়া গেল—তাহারা আর এ পৃথিবীতে নাই। ইহাই জলধর বাবুর সন্ন্যাসাবলম্বনের কারণ, এই দুঃখ প্রশমনের জন্তই তিনি প্রবাস-যাত্রা করিয়াছিলেন।

প্রবাস-চিত্র-প্রণেতা স্বভাব সৌন্দর্যের পক্ষপাতী, কাব্যে প্রকৃতির চিত্রে তাঁহার অনুরাগ বেশী, তিনি স্বভাব-কবি রবীন্দ্রনাথের অতি ভক্ত। তাঁহার হৃদয়ে প্রতিফলিত স্বভাবের প্রতিকৃতি যেখানেই তাঁহার পূর্ব স্মৃতির সহিত মিলিয়া গিয়াছে, সেইখানেই তিনি, উভয় ছবি একত্র করিয়া, তাঁহার পাঠকবৃন্দের সম্মুখে ধরিয়া, তাহাদের মিলিত সৌন্দর্যে, তাঁহাদের আনন্দ বর্ধনের চেষ্টা করিয়াছেন। সঙ্গীতেও জলধর বাবুর অধিকার আছে বলিয়া বোধ হয়, যেখানে প্রকৃতির ছবি তাহার অনুরূপ ভাব তাঁহার হৃদয়ে উদ্বোধিত করিয়া দিয়া সঙ্গীত-প্রবাহে সে ভাব প্রবাহিত করিবার প্রবৃত্তি উদ্ভিত করিয়াছে, সেখানে অনুস্মৃতি পূর্বাভ্যস্ত বা পূর্বশ্রুত সঙ্গীতের উপনয়ন করিতে করে নাই। সময় ও অবস্থার উপযোগী সঙ্গীত অগ্ৰকণ্ঠনিঃসৃত হইলেও, সে সঙ্গীত গায়ক নিজে অনুভূত করিয়া থাকুন বা না থাকুন, জলধর বাবু তাহা সম্পূর্ণ অনুভূত করিয়াছেন। আমরা এই স্থলে প্রবাসচিত্রের এক স্থানে জলধর বাবু রেলগাড়ীর যে চিত্র প্রদান করিয়াছেন, তাহার কিয়দংশ উদ্ধৃত করিব। ইহাতে দুই উদ্দেশ্য সাধিত হইবে—আমরা উপরে যাহা বলিলাম, তাহার কতকটা সপ্রমাণিত হইবে এবং লেখক অবলোকিত দৃশ্যের অবিকল চিত্র কিরূপ করিতে পারেন, তাহারও পরিচয় পাওয়া যাইবে। “গাড়ী যতই অগ্রসর হইতে লাগিল, লোক জনের ভিড়ও তত বাড়িয়া উঠিল। সঙ্গে সঙ্গে কথা, গল্প, হাস্য, পরিহাস, গুণগোল—সে সকলের আর ইয়ত্তা রহিল না। এক জন তাঁহার ভ্রাতার সঙ্গে পৃথক হওয়ার গল্প বলিতেছিলেন; শুনিলাম, তাঁহার সহোদর কিঞ্চিৎ অতিরিক্ত পরিমাণে জৈরণ এবং তাহাই তাঁহাদের এই পারিবারিক বিপত্তির কারণ। আর এক জন লোক তাহার অংশীদারকে কিরূপে ফাঁকি দিবে, এক জন স্নেহদের সঙ্গে সেই সন্ধানে ষড়যন্ত্র আঁটিতেছিল, এক জন বেঞ্চে হেলান দিয়া গান গাহিতেছিল, হটাৎ অর্ধপথে গান ছাড়িয়া পার্শ্ববর্তী আর এক জনকে জিজ্ঞাসা করিল, ‘মহাশয়! ককেটা একবার দেবেন?’ নিকটে

আর একটি তাম্বকুটপায়ী ককেটাতে একটা দম দিবার জন্ত অনেকক্ষণ হইতে উমেদার ছিল, সে তাহার অধিকার-হানির সম্ভাবনা দেখিয়া একটু রাগিয়া চোখ গরম করিয়া উঠিল; কিন্তু পূর্বোক্ত গায়কবর তাহাতে ক্রক্ষেপ মাত্র না করিয়া দুইটা উৎকট দমে কলিকা-সঞ্চিত তামাকটুকু নিঃশেষ করিয়া সেই গরম লোকটার হাতে দিল, এবং পূর্ববৎ গাহিতে লাগিল,—

‘ঘোরা তিমিরা রজনী, সজনি,  
না জানি কোথায় শ্যাম গুণমণি,  
পৃষ্ঠে ছলিছে লম্বিত বেণী।’ ইত্যাদি।

পৃষ্ঠে লম্বিত বেণী ছলার কথা মিথ্যা, তবে মস্তকে একটা অনতিদীর্ঘ শিখা ছলিতেছিল বটে এবং গায়কবর শ্যাম-দরশনের জন্ত কিরূপ কাতর হইয়াছিলেন, শুধু গান শুনিয়া তাহা ঠাহর করা যায় না; কিন্তু সেটি যে, ‘ঘোরা তিমিরা রজনী’, তাহাতে আর সন্দেহ ছিল না।

\* \* \* \* \*  
\* \* \* \* \*  
\* \* \* \* \*  
মাথা তুলিয়া দেখি, আমার কামরার দ্বার ধরিয়া একটা লোক টানাটানি করিতেছে। কামরাটি এমন নিস্তরঙ্গ যে, ভদ্রলোকটি শ্যাম-দরশনের আশায় হতাশ হইয়া বেহাগ গাইয়া বিরহ জ্বালা মিটাইতে ছিলেন, দেখিলাম, আর একটা বেঞ্চে তাঁর মুণ্ডুটা লুটাইতেছে। যুদ্ধশেষে যুদ্ধক্ষেত্রে আহত সৈন্যের ন্যায় যাত্রিদল গাড়ীতে নানারকম ভঙ্গী করিয়া গুইয়া পড়িয়াছে।” অল্প কথায় গায়কবরের সঙ্গীতের সহিত তাঁহার হৃদয়ভাবের অসঙ্গতি এবং তাঁহার সঙ্গীত-বোধ-বিহীনতা প্রদর্শিত হইয়াছে, যে হৃদয়ে এ অসঙ্গতি বাধিতেছিল, তাহারও পরিচয় দেওয়া হইয়াছে। কেবল তাহাই নহে, ইহা মানুষের হৃদয়-শূন্যতার প্রতি সুন্দর কটাক্ষ।

প্রবাস-চিত্রের গ্রন্থকার ঈশ্বরভক্ত এবং প্রাকৃতিক সৌন্দর্যে তাঁহার বিশেষ অনুরাগ। স্বভাবের সুন্দর মূর্তি দেখিয়া ভক্তের হৃদয় কৃতজ্ঞতারসে আপ্লুত হয়, যিনি অনন্ত সৌন্দর্যের আধার, তাঁহার দিকে হৃদয় প্রধাবিত হয়। মনের আনন্দ স্তোত্র বা সঙ্গীতে স্ফূর্তিত হইতে থাকে। জলধর

বাবু ও তাঁহার বন্ধু, নালাপাণি পাহাড় দেখিতে গিয়া সে স্থানের সৌন্দর্য্যে মোহিত হইয়া, উভয় বন্ধু শালবৃক্ষের মূলে বসিয়া, রবি কবিকে স্মরণ করিয়া মুক্ত প্রাণে গাহিয়াছিলেন—

“তাহারি আনন্দধারা জগতে যেতেছে বয়ে,  
এস সবে নরনারী আপন হৃদয় লয়ে ।  
সে আনন্দে উপবন, বিকশিত অনুক্ষণ,  
সে আনন্দে ধায় নদী আনন্দ বারতা করে ॥  
সে পুণ্য নিঝর স্রোতে বিশ্ব করিতেছে স্নান,  
রাখ সে অমৃতধারা পূরিয়া হৃদয় প্রাণ ;  
তোমরা এসেছ তীরে, শূন্য কি যাইবে ফিরে,  
শেষে কি নয়ন নীরে ডুববে তুষিত হয়ে ।  
চিরদিন এ আকাশ নবীন নীলিমায়,  
চিরদিন এ ধরণী যৌবনে ফুটিয়া রয় ;  
সে আনন্দরস পানে চিরপ্রেম জাগে প্রাণে,  
দহেনা সংসার তাপ সংসার-মাঝারে র’য়ে ।”

এইরূপে “প্রাণের আনন্দ ও উচ্ছ্বাস সঙ্গীতে ধ্বনিত” করিয়া, গ্রন্থকার নিম্নোক্ত বাক্যে, রবি কবির প্রতি তাঁহার ভক্তির প্রমাণ প্রদান করিয়াছেন—

“গানের শেষে মনে হইল, এই নিঝরপার্শ্বে, শৈল-অন্তরালবর্তী এই তরুচ্ছায়ায়, প্রকৃতির এই রমণীয় নিভৃত কুঞ্জে প্রকৃতির কবি পূজনীয় রবীন্দ্র-নাথকে বসাইয়া যদি তাঁহার মুখে এই গানটী শুনিতে পাইতাম, তাহা হইলে চতুর্দিকের এই পবিত্র সৌন্দর্য্য আরও সুন্দর বলিয়া বোধ হইত। এই সঙ্গীতশ্রবণে হয়ত তাহার যথার্থ উপভোগ হইত, এবং হৃদয়ের পিপাসাও কথঞ্চিৎ প্রশামিত হইত। চক্ষুদ্বারা সর্বদা সকল সৌন্দর্য্য অনুভব করা যায় না, কিন্তু কর্ণে যদি মধুর ভাষায় সেই সৌন্দর্য্যের মর্ম্ম ধ্বনিত হয়—এবং সঙ্গে সঙ্গে সকল সৌন্দর্য্যের যিনি কারণ, তাঁহার বিকাশ অনুভব করা যায়, তাহা হইলে হৃদয়ের সুপ্ত আকাঙ্ক্ষা অনেকাংশে পরিতৃপ্ত হয়। যখনই যে সুন্দর স্থানে গিয়াছি, কবিবরের রচিত সেই সকল স্থানের রমণীয় দৃশ্যবৎ

সুন্দর গান গাহিতে ইচ্ছা হইয়াছে, কিন্তু এ ভাঙ্গা গলায় শূন্যহৃদয়ে কি তেমন করিয়া গাহিতে পারা যায়?—পারি নাই, তাই সেই দূর প্রবাসে, নির্জন অরণ্য, মেঘমণ্ডিত গিরিশৃঙ্গ, উপলস্কুল খরতোয়া পার্বত্য প্রবাহিণী, প্রকৃতির প্রমোদ উদ্যান, সকল সুন্দর স্থানেই কবিবরের অভাব বড় গভীর-ভাবে অনুভব করিয়াছি।”

আমরা যে কেবল রবি কবির প্রতি গ্রন্থকারের অগাধ ভক্তি সপ্রমাণিত করিবার জন্ত তাঁহার প্রবাস-চিত্র হইতে উল্লিখিত অংশ উদ্ধৃত করি নাই, তাহা বলা বাহুল্য। উদ্ধৃতাংশ একাধিকরূপে লেখকের পরিচয় দিতেছে। প্রকৃতির সুন্দর মূর্তি দর্শনে তাঁহার মন যে কিরূপ ভাবে ভরিয়া যায়, তাঁহার কিরূপ তন্ময়তা জন্মে, ইহা তাহারও প্রমাণ। উদ্ধৃতাংশ তাঁহার লিপি-কুশলতারও আদর্শ। শোকসন্তপ্ত হৃদয়ে শান্তির কাঙ্গাল হইয়া, জলধর বাবু বিদেশ ভ্রমণ করিয়াছেন, কিন্তু তিনি ভাষার কাঙ্গাল নহেন, তাঁহার লিপি-নৈপুণ্য বিশেষ প্রশংসার যোগ্য। আমরা এইস্থলে লেখকের লিপিশক্তির আর ছুই একটি দৃষ্টান্ত উদ্ধৃত করিব।—চন্দ্রভাগা নদীতীরস্থ একটি দৃশ্য বর্ণন করিতে করিতে গ্রন্থকার বলিতেছেন—

“জীর্ণ মন্দিরটির একদিকের দেওয়াল ফাটিয়া গিয়াছে, এবং তাঁহারই ভিতর হইতে একটি নিঝর বাহির হইয়া চন্দ্রভাগায় মিশিয়াছে। এই নিঝরের জল কেমন নিম্নল; যেন বীরের শরাঘাতে বিদীর্ণবক্ষা বসুন্ধরার মর্ম্মস্থান হইতে প্রসন্নসলিলা ভোগবতী সমুদ্ভূত হইয়া তৃষাতুরের অতীষ্ট সিদ্ধ করিতে-ছেন। ভগ্নমন্দিরের সোপানে বসিয়া, এই ক্ষুদ্রকায়া তরঙ্গিণীর অনাবিল পুণ্যপ্রবাহের দিকে চাহিয়া, কত কথাই ভাবিতে লাগিলাম; এই শুভ্র দিবা-লোকে বায়ুহিল্লোলিত উন্নত বৃক্ষরাজির ঘন পল্লবের সঘন মর্ম্মর শব্দ, নদীর অক্ষুট কলধ্বনির সহিত মিশ্রিত হইয়া যুগান্ত-প্রবাহিত রহস্যভাসের তীর শ্রুত হইতে লাগিল, বুঝি ইহা বিশ্বপিতার অনাগত যশোগীতির ক্ষীণ প্রতিধ্বনি।”

উত্তর-কাশী বর্ণন করিতে গিয়া গ্রন্থকার লিখিতেছেন—

“একটি সুন্দর, অপাপবিদ্ধ পুণ্যতীর্থ স্নিগ্ধতা ও প্রসন্নতায় পরিপূর্ণ হইয়া নয়নসমক্ষে উদ্ভাসিত হয়। চতুর্দিকে সমুন্নত গিরিশৃঙ্গ, মধ্যে অনতি-বিস্তীর্ণ সমতলক্ষেত্রে উত্তর-কাশী প্রতিষ্ঠিত। সেই পবিত্র পীঠতল প্রফালন—

পূর্বক প্রসন্নলিলা কলনাদিনী ভাগীরথীর পুণ্যপ্রবাহ অসংখ্য উপলক্ষে প্রতিফলিত হইয়া দ্রুত প্রবাহিত হইতেছে। চির-তুষার-মণ্ডিত শুভ্র গিরিশৃঙ্গ-গুলি যেন মস্তকে শ্বেত শিরস্ত্রাণ পরিধান-পূর্বক শ্রামল তরুরাজিতে মধ্যদেশ আবৃত করিয়া কোন মহাপুরুষের অলঙ্ঘ্য ইঙ্গিত অনুসারে এক স্বর্ণাভীত যুগ হইতে বিশ্বস্ত প্রহরীর স্থায় এই দেবভূমিকে রক্ষা করিতেছে। নিদাঘের খর-রৌদ্রোদ্ভাসিত উজ্জল মধ্যাহ্ন এবং শীতের তুষার-সমাচ্ছন্ন-কুঞ্জটিকাময়ী হিমযামিনী—সর্বকালেই এক মধুর প্রশান্তিতে এই পুণ্যভূমি পরিব্যাপ্ত থাকে।”

আর একটি স্থল উদ্ধৃত করিয়া আমরা সমালোচনার এই অংশ শেষ করিব। তাহা কেবল লেখকের ভাষা-কৌশলের দৃষ্টান্ত নহে, তাহাতে তাঁহার চিন্তাশীলতারও পরিচয় আছে।—তাঁহার সঙ্গী বন্ধু মুগ্ধনেত্রে কোন সুন্দর প্রাকৃতিক দৃশ্য দেখিতে দেখিতে বলিতেছেন, “এমন সুন্দর দৃশ্যের মধ্যে ডুবিয়া থাকিলে জীবনের পূর্ণ উপভোগ হইতে পারে। এই সমস্ত সৌন্দর্যের অনুভূতি জ্ঞানানুভূতি অপেক্ষা কত মহত্তর; এই সৌন্দর্য্যানুভূতি তখনই সার্থক হয়, যখন তাহা সেই পরমসুন্দর পুরুষকে বা মহিমান্বিতা অনন্ত প্রকৃতির অখণ্ড মাধুরীকে ধারণা করিতে পারে। আমরা বৃথা জ্ঞানের উদ্বোধনে রত রহিয়াছি, ইহাতে না আছে তৃপ্তি, না আছে শান্তি; ইহাতে কেবল অহঙ্কার বৃদ্ধি করে, এবং সন্দেহের ভিতর হইতে আমরা গভীরতর সন্দেহে ডুবিয়া যাই।” তিনি বলিলেন, “জগতের অভিব্যক্তিই সৌন্দর্য্যমূলক; এমন কি, জ্ঞানের মধ্যেও যদি সৌন্দর্য্যের বিকাশ না থাকিত, তাহা হইলে জ্ঞানের এত আঁদর থাকিত না। জ্ঞান অপেক্ষা বিধাতার সৌন্দর্য্যেই অধিক প্রীতি, এবং এই কথা যুনানীরা অন্ধকবি মির্টন অতি সুন্দর বুঝিয়াছিলেন, তাই আদমকে জ্ঞানের পরিবর্তে চির-সৌন্দর্য্যের লীলা-নিকেতন ত্রিদিবের প্রমোদকানন পরিত্যাগ করিতে হইল।”

তাঁহার পর কয়েকটা ক্ষুদ্র কথা। কলুঙ্গার বুদ্ধে গুর্খাজাতীর বীরত্বের কথা ইতিহাসে সবিশেষ উল্লিখিত হয় নাই। তাহাদের বল ও সাহসের সম্মুখে সুশিক্ষিত ইংরেজ সৈনিকগণকেও বিমুখ হইতে হইয়াছিল, একথা ইংরেজ ইতিহাস প্রণেতৃগণ, জাতীয় গৌরব রক্ষার জন্ত, লিপিবদ্ধ করেন নাই। গ্রন্থকার ইংরেজ ইতিহাস-লেখকদিগের প্রতি কটাক্ষ করিয়া বলিতে

ছেন, “মানুষ চিত্রকর, তাই সিংহ মানবহস্তে পরাভূতরূপে চিত্রিত হয়, ইহা কোন বিখ্যাত গ্রন্থের লেখকের উক্তি,—কিন্তু চিরকালই কি এই নিয়ম থাকিবে? ইহাতে মনুষ্যের বল এবং কৌশল প্রমাণিত হউক, কিন্তু মহত্ত্ব প্রমাণিত হয় কি না সন্দেহ।” কথাটা ক্ষুদ্র, কিন্তু যে নীচ নীতির প্রতি ইহার কটাক্ষ, তাহার ফলাফলের বিষয় চিন্তা করিতে গেলে, এক্ষুদ্র কথা অতি বৃহদাকার ধারণ করে।

কোন এক ঝরণার জলে লতাপাতা যাহা কিছু পড়ে, পাথর হইয়া যায়। এই কথাটির আলোচনা করিতে করিতে, লেখক বলিতেছেন, “কোমল লতা পাষণের সংসারে নিজেও পাষণ হইয়াছে! কত দেবচরিত্র যে নরপিশাচদের সহবাসে মূর্খ হইতে বঞ্চিত হইয়া পশুত্ব প্রাপ্ত হয়, তাহার সংখ্যা নাই!” এ আর এক ক্ষুদ্র কথা; কথাটা ক্ষুদ্র এবং সাধারণ, কিন্তু উহাতে লেখকের প্রকৃতির কবর শ্রুতিবিধিত হইতেছে। যাহা কিছু দেখিতে প্রস্তুতবৎ, তাহাই তিনি, প্রস্তুতরথও বলিয়া, তুচ্ছ বা ঘৃণা করিতে প্রস্তুত নহেন। মানবচরিত্র-বিচারে তিনি উদারপ্রকৃতি।

আর একটি ক্ষুদ্র কথায় আমরা প্রবাস-চিত্র-প্রণেতার স্বদেশ-প্রেম দেখিতে পাই। কোন গুর্খা সৈনিকের বীরত্ব ও স্বদেশাত্মবোধের কথা শুনিয়া তিনি গাহিয়াছিলেন:—

“তোমারই তরে মা সঁপিছু বীণা, তোমারই তরে মা

সঁপিছু প্রাণ,

তোমারই তরে এ আঁখি বরধিবে, তোমারই তরে মা

গাহিব গান।”

আমরা প্রবাসচিত্রের কোন কোন স্থান বুঝিতে পারি নাই, গ্রন্থকার একস্থলে বলিতেছেন, “অতৃপ্তি অশান্তি লইয়া আমি হিমালয়ের মহানহিমাশ্রম সৌন্দর্য্য-সাগরে ডুবিতে পারিতাম না। স্বর্গের সুন্দর মনোমোহন দৃশ্যপট আমার নয়নসমক্ষে নূতন শোভায় উদ্ভাসিত হইয়া আবির্ভূত হইত, আমার অশান্ত প্রেমহীন নীরবদৃষ্টির তাচ্ছল্য তাহাদিগকে দূরে অপসারিত করিয়া দিত; নন্দনকাননের অপূর্ব শোভা আমার তাগিত বক্ষে প্রেমের সঞ্চারণ করিত না। এত বিড়ম্বনা, এত নিরাশাকে সঙ্গী করিয়া পথ চলিবার কষ্ট

বুঝাইবার নহে—ভগবানের নিকট প্রার্থনা করি, কাহাকেও যেন বুঝিতে না হয়।” সুন্দর লেখা। কিন্তু বুঝিলাম না, স্ত্রীপুত্রবিয়োগহুঃখ সংসারে বৈরাগ্য উৎপাদন করিয়া যাহাকে সন্ন্যাস অবলম্বন করাইল, তাঁহার হৃদয়ে তৃপ্তি অতৃপ্তির কথা আসে কোথা হইতে। বৈরাগ্য এবং আকাঙ্ক্ষার অতৃপ্তি-জনিত হুঃখ, এ উভয়ের সামঞ্জস্য হয় কিরূপে জানি না। অত্যাশ্রয় স্থলে লেখক প্রকৃতির সৌন্দর্য্যে বিশেষ অনুরাগই প্রকাশ করিয়াছেন, সে মাধুর্য্য চিন্তা করিয়া অনেক সময়ে তাঁহার হৃদয় ভাবে ভোর হইয়াছে। এখানে অশ্রুপূর্ণ কথা কেন? প্রবাসচিত্র পড়িয়া আমরা জলধর বাবুকে প্রেমিক বলিয়াই বুঝিয়াছি; স্ত্রীপুত্রের প্রতি প্রেমাধিক্য <sup>কোশলের</sup> হাদের বিয়োগে বৈরাগ্য জন্মে না; মনুষ্যে প্রেম না থাকিলে <sup>—তাঁহ</sup> <sup>সী</sup> পকারে প্রবৃত্তি হয় না; ইহার পর স্বদেশপ্রেম, স্বজাতিপ্রেম, সর্কে <sup>তে</sup> <sup>দে</sup> দ্বন্দ্বপ্রেম তাঁহাতে দেখিতে পাইয়াছি। তবে কেন তিনি বলেন তিনি <sup>পূর্ণ</sup> প্রেমহীন, প্রীতির দৃশ্য তাঁহার বক্ষে প্রেম সঞ্চার করিতে পারিত না? আবার বলিতেছেন, তিনি নিরাশাকে সঙ্গী করিয়া পথ চলিতে যে কষ্টবোধ করিয়াছিলেন, তাহা বুঝাইবার নহে। আমরা জানি, তাঁহার গ্রন্থের সূচনায় যাহা দেখিতে পাই, তাহা হইতে আমাদের এই উপলব্ধি, তিনি শোকসন্তপ্ত হৃদয়ে শান্তির অন্বেষণে দেশভ্রমণে বহির্গত হন, প্রকৃতির মাধুরীময় মূর্তি তাঁহার সন্তাপ অনেক পরিমাণে প্রশমিতও করে। তবে “নিরাশা” কিসের? নিরাশা বলিলেই ত অতৃপ্তির কথা আসে। বিয়োগকাতরতা যাহাকে সকল সংসার-সুখের আশায় জলাঞ্জলি দেওয়াইয়া গৃহের বাহির করিল, তাঁহার আবার আশা নিরাশার কথা কেন? আর এক স্থলেও কতকটা ঐরূপ সুরের, আমাদের নিকট কতকটা দুর্কৌণ্ড্য রকমের কথা দেখিলাম। গ্রন্থকার তাঁহার ভ্রমণের ইতিহাস বলিতেছেন:—  
এমনও ছুই একজন হতভাগ্য লোকের অভাব নাই, যাহারা শ্মশানক্ষেত্রে জীবনের যথাসর্বস্ব বিসর্জন দিয়া, উদাস হৃদয়ে, ব্যাকুল অন্তরে, লক্ষ্যহারা ধুমকেতুর আয়, এক “অনির্দিষ্ট” পথে অগ্রসর হইয়াছে। সেই রমণীয় নেপথ্য তরুচ্ছায়সমাচ্ছন্ন, কুসুম-সুরভি-পরিব্যাপ্ত, সুমধুর সমীরণহিল্লোলিত এবং বিহঙ্গ-কল-কাকলী-মুখরিত বাহ্যপ্রকৃতির স্নিগ্ধ সৌন্দর্য্যে সজ্জিত থাকিতে পারে, কিন্তু তাহার হৃদয় সে সৌন্দর্য্য-গ্রহণের অধিকারী নহে, সমগ্র পৃথিবীর

বিচিত্র শোভা সন্দর্শন করিয়া আসিলেও তাহার মুখ হইতে তৎসম্বন্ধে কোনও বিশেষ কথা বাহির হইবার সম্ভাবনা নাই। উত্তর-ভারতের বিভিন্ন প্রদেশে ভ্রমণ করিয়া যাহা দেখিয়াছি, অনেকেই তাহা দেখিবার সুযোগ পান নাই, কিন্তু সেই সমস্ত মহান সুন্দর দৃশ্য, প্রকৃতির সেই বৈচিত্র্যপূর্ণ ব্যক্ত সৌন্দর্য্য প্রাণ দিয়া উপভোগ করিতে পাই নাই; কিন্তু তথাপি দেশে দেশে ঘুরিয়াছি। জীবনে কখনও কবিতার সেবা করি নাই, প্রভাত-বায়ুর মৃদুমন্দ সঞ্চালন, প্রক্ষুটিত কুসুমের স্নিগ্ধ শোভা কখনও আমাকে ব্যাকুল করে নাই; বজ্র-কঠোর হৃদয় লইয়া সংসারের সহিত সংগ্রাম করিতে করিতে জীবনপথে অগ্রসর হইতেছিলাম, হঠাৎ একদিন কেন্দ্রভ্রষ্ট হইয়া পড়ায় যদিকে ছুই চক্ষু গেল, সেই দিকে চলিলাম। ইহাই আমার ভ্রমণের ইতিহাস।” অতি সুন্দর ভাষা, কিন্তু বলিয়াছি, আমরা সর্বত্র ভাবের সামঞ্জস্য করিতে সমর্থ হই নাই। জানি না জলধর বাবু তাঁহার কোন্ সময়ের মানসিক অবস্থা এইখানে বর্ণিত করিতেছেন। হয়ত, প্রথম শোকের পর তাঁহার মনের যেরূপ উদ্ভ্রান্ত অবস্থা হইয়াছিল, এ তাহারই চিত্র। যদি তাহাই হয়, তবে এ চিত্র গ্রন্থশেষে সন্নিবেশিত হইয়াছে কেন? হয়ত, বিভিন্ন সময়ে সাময়িকপত্রে প্রকাশিত প্রবন্ধগুলি, গ্রন্থাকারে প্রকাশ করিবার জন্ত, একত্রীকরণ সময়ে, আশ্লেষণ শক্তির সম্যক ব্যবহার করা হয় নাই; গ্রন্থের ভবিষ্যৎ সংস্করণে এ দোষের নিরাকরণ হইতে পারিবে। তথাপি আমাদের সকল প্রশ্নের শেষ হয় নাই। গ্রন্থকার পূর্বে অতৃপ্তির কথা বলিয়াছেন, এস্থলে সংসার সংগ্রামের কঠোরতার উল্লেখ করিতেছেন। ইহা পড়িয়া, তাঁহার পাঠকগণ, মনে করিতে পারে, তাঁহার ভ্রমণের ইতিহাস বা মূল কারণ শোকজনিত উদাস নহে, সংসার সংগ্রামে জয়লাভে নিরাশা, জীবনে অপূর্ণ মনোরথই তাঁহার, উদাসীনভাবে দেশ ভ্রমণের মূল। অথচ তিনি গ্রন্থসূচনায় যাহা বলিয়াছেন, তাহা পড়িয়া বুঝিতে হয়— শোকসন্তপ্ত হইয়া তিনি শান্তির অন্বেষণে গৃহের বাহির হইয়াছিলেন। পৃথক আর এক স্থলে তিনি লিখিতেছেন, “সেই বাল্যকাল হইতে আমার মনে কিন্তু উত্তর পশ্চিম প্রদেশে ভ্রমণের একটা হৃদমনীয় আকাঙ্ক্ষা জাগিয়া উঠিয়াছিল; আমার নবজাগরিত কল্পনায় দেখিতে পাইতাম, ধূসর পর্বতশ্রেণী উন্নত মস্তকে, দণ্ডায়মান রহিয়াছে, কটিতে মেখলার আয় শ্রামল তরুরাজি উর্ধ্বে তুষার-



মণ্ডিত শুভ্র কিরীট, উপত্যকায় ক্ষুদ্র ক্ষুদ্র কুটীর, এবং সেই সকল কুটীর-প্রান্তে ও বনান্তরালে দণ্ডায়মান পার্শ্বত; অধিবাসিবৃন্দ।” ইহা হইতে তাঁহার ভ্রমণের অত্র কারণও অনুমিত হইতে পারিত, কিন্তু তিনি নিজেই আভাস দিয়াছেন, পরজীবনে কোন বিষাদময় ঘটনা তাঁহার এই দুর্দমনীয় ভ্রমণাকাঙ্ক্ষা কার্যে পরিণত করিয়াছিল। সম্ভবতঃ এ ত্রিবিধ কারণের সমবায়েই তাঁহার ভ্রমণ-কার্য ঘটয়াছিল; বাল্যে ভ্রমণের দুর্দমনীয় আকাঙ্ক্ষা, পরজীবনে সংসার-সংগ্রামে ক্লান্তি ও নিরাশা হইতে সে আকাঙ্ক্ষার তীব্রতা বৃদ্ধি, তৎপর জীবনের সেই বিষাদময় ঘটনায় তাহার কার্যে পরিণতি। যাহা হউক, জলধর বাবুর ভ্রমণকাহিনীগুলি গ্রন্থাকারে প্রকাশিত হওয়ায়, এখন এগুলি তাঁহার জীবনের একাংশের ধারাবাহিক বিবরণ বলিয়া পরিগণিত হইবে। যাহাতে সে ধারাবাহিকতার, আত্মস্তের সংলগ্নতার অভাব বোধ না হয়, বোধ হয়, তহুদ্দেশে, স্থানে স্থানে কিছু কিছু পরিবর্তনের প্রয়োজন। গ্রন্থের অভ্যন্তর ভাগ পড়িয়া পাঠকের মনে হইতে পারে, জলধর বাবু বিষয়কর্ম উপলক্ষে দেরাডুনে জীবনের কতকাংশ কাটাইয়াছিলেন, তৎকালে দেরাডুনের নিকটবর্তী হিমালয়-দৃশ্যগুলি অবসর সময়ে পরিদর্শন করিয়া বাল্যের ভ্রমণপ্রবৃত্তির পরিতোষ করিতেন, সম্ভবতঃ শোকপীড়িত হৃদয়ে ভ্রমণে বহির্গত হইয়া তিনি দেরাডুনে গিয়া, তাহার প্রাকৃতিক শোভায় মোহিত হইয়া, সেইখানে অবস্থান করেন এবং অনেক সময় আলস্তে কাটাইতে কষ্ট হইবে ভাবিয়া, উপস্থিতমত কার্য স্বীকার করেন। কিন্তু লিখার কোন কোন অংশ কথঞ্চিৎ পরিবর্তন না করিলে পাঠকের সহসা এইরূপ ধারণা হওয়া কঠিন। বিশেষতঃ গ্রন্থসূচনায়, তিনি তাঁহার সে ঔদাসীন্য তাঁহার দেশভ্রমণের কারণ বলিয়া নির্দেশ করিয়াছেন, গ্রন্থপাঠে অগ্রসর হইয়া, গ্রন্থের শেষভাগে “উপনীত হইবার পূর্বে, আমরা সে ঔদাসীন্যতার কারণের আর বিন্দুমাত্রও উল্লেখ দেখিতে পাই নাই। শোকপীড়িত হৃদয়ে দেশভ্রমণে বহির্গত হইয়া, প্রথমে যে সকল দৃশ্য দেখিবেন, তন্মধ্যে যাহা কিছু চিন্তা তাঁহার হৃদয়ের বিষণ্ণতার সহিত মিশ খাইবে, তাহারই দিকে তাঁহার মন অধিকতর আকৃষ্ট হইবে এবং তাঁহার বিবাদের কারণ পুনঃপুনঃ স্মৃতিপথে উদিত হইবে, ইহাই স্বাভাবিক। কিন্তু গ্রন্থের প্রায় তিন চতুর্থাংশের মধ্যে আমরা সেরূপ কিছু অনুস্মৃতি দেখিতে পাই

নাই। এমন কি, দেরাডুনের শশান-ক্ষেত্রে দাঁড়াইয়া, তাহার ভ্রমণশির মধ্যে তিনি তাঁহার দেরাডুনস্থ বন্ধুবান্ধবের স্নেহসামগ্রীর অবসান চিন্তা করিয়া বিধাদে মগ্ন হইয়াছেন, কিন্তু আপনার স্নেহসর্বস্ব যে বঙ্গের শশানভূমিতে ভস্মে লীন করিয়া রাখিয়া গিয়াছেন, সে কথা তাঁহার স্মরণপথে একবারও উপস্থিত হয় নাই। আরও একটি জিজ্ঞাস্য। জলধর বাবু বলিয়াছেন, তিনি জীবনে কখনও কবিতার সেবা করেন নাই, প্রভাত বায়ুর মুহমন্দ সঞ্চালন, প্রস্ফুটিত কুমুমের স্নিগ্ধ শোভা কখনও তাঁহাকে ব্যাকুল করে নাই, তিনি বজ্রকঠিন হৃদয় লইয়া সংসারের সহিত সংগ্রাম করিয়াছেন। আমরা কিন্তু তাঁহার গ্রন্থ পড়িয়া তাঁহাকে যতদূর বুঝিয়াছি, তাহাতে তাঁহার হৃদয় কবিত্ব-বিহীন মনে করি নাই। তাঁহার শোকের অবস্থাও কবিত্বের অনুপযোগী বলিয়া স্বীকার করি না। প্রভাত বায়ুর মুহমন্দ সঞ্চালন, প্রস্ফুটিত কুমুমের স্নিগ্ধ শোভা বা ইত্যাকার তবন্ধের চান প্রফুল্লতার দৃশ্য তাঁহার শোক-গন্তীর হৃদয়ে স্থানাধিকার করিয়া বর্তমান হইতে পারে, কিন্তু গান্ধীর্ষ্যে কি কবিত্ব নাই? কবিত্ব কি বিষাদজর্জিত হয় না? জানি না, গ্রন্থকার তাঁহার উদ্ভাস্ত চিত্তে প্রকৃতির মাধুর্যের প্রতি তাচ্ছীল্যকে বা কবিত্ব-বিলোপী তাঁহার সাংসারিক জীবনের কঠোরতাকে তিরস্কার করিতেছেন কি না। এ সকল কথার আলোচনা করিয়া হয়ত আমরা জলধর বাবুর শোকস্মৃতি পুনরুদ্দীপিত করিতেছি, আমাদের বিশেষ অপরাধের কার্যই হইতেছে; তবে আমরা জলধর বাবুর অপরিচিত হইলেও তাঁহার বন্ধু তাঁহার সহিত সমবেদনায় আমাদের হৃদয় পীড়িত হইতেছে। গ্রন্থের উন্নতিকল্পে কোন কোন কথার আলোচনায় প্রবৃত্ত হইয়া তাঁহাকে স্মৃতিপীড়িত করিতে হইল, ইহাতে আমরা বিশেষ দুঃখবোধ করিতেছি।

কয়েকটি ক্ষুদ্র ক্ষুদ্র দোষের কথা। টপকেশ্বরের গান্ধীর্ষ্যের মধ্যে গ্রন্থকার একটি নির্ঝরিণীর বর্ণনা করিতেছেন, বলিতেছেন, “একটি ক্ষুদ্রকাঁয়া নির্ঝরিণী অবিরাম, কুল কুল শব্দে নাচিয়া নাচিয়া আঁকিয়া বাঁকিয়া দ্রুতগতিতে নিম্নদিকে চলিয়া যাইতেছে; সে যেন একটি দ্রবক্ষুটিকের প্রবাহ।” “নাচিয়া নাচিয়া আঁকিয়া বাঁকিয়া” কয়েকটি শব্দ বাদ দিলে, বর্ণনার মাধুর্যের কোথ হানি হইত, আমরা একরূপ মনে করি না। বরং এ শব্দ কয়টি বাদ দিলেই

সে গান্ধীর্ষ্যের দৃশ্যের সহিত সঙ্গতি রক্ষা হইত। তবে এস্থলে, প্রকৃতির অবিকল ছবি ভাষায় অঙ্কিত হইয়া থাকিলে, অবশ্য মনে করিতে হইবে, প্রকৃতিই তাঁহার স্বভাব-বৈচিত্র্য-সংস্থাপন জন্ত তাঁহার স্থিরগন্তীর প্রতিমূর্তির নিস্তব্ধতা ভঙ্গ করিয়া এইরূপ চাঞ্চল্য বিকাশ করিয়াছেন। একস্থলে একটী পার্কত্বপথের বর্ণনা করিতে গিয়া লেখক বলিতেছেন, “লোক যাতায়াতের অন্নতা হেতু অনেক অনিমন্ত্রিত কণ্টকলতা রাস্তায় অনধিকার প্রবেশ করিয়া স্থানে স্থানে পুঞ্জীভূতভাবে অবস্থান করিতেছে, এবং পরিব্রাজকবর্গের কঠিন পাদচর্মের সহিত কোমল সস্ক স্থাপনের জন্ত উদ্গ্রীব রহিয়াছে।” সুন্দর ব্যঙ্গের ভাষা, কিন্তু শোকভার হৃদয়ে বহন করিয়া, সন্ন্যাসীর বেশে, যিনি দেশে দেশে ফিরিতেছেন, তাহার পক্ষে এরূপ ভাষা উপযোগী কি না বলিতে পারি না, পরিহাসে প্রবৃত্তি চরিত্র-গান্ধীর্ষ্যের হানিক বলিয়া আমাদের বিশ্বাস। ইহাপেক্ষাও লঘুতর ভাষা আমরা স্থানে স্থানে পাইয়াছি, সেই সকল স্থান আমাদের নিকট ভাল বোধ হয় নাই। এ বাবুর আর একটী বন্ধুর লেখা বর্তমান সমালোচককে এক সময়ে দেখিতে হইয়াছিল, তাহাতেও এরূপ দোষ লক্ষিত হইয়াছিল। জানি না, বার্কক্যের সময়ে উপনীত শোকদুঃখ-জর্জরিত সমালোচকের সহিত নব্য লেখকদিগের এ সম্বন্ধে একমত হইবে কি না?

মুশোরীর চিত্রে, একস্থলে লেখক বলিতেছেন, “কোন নির্জন নিকুঞ্জে প্রেমিকযুগল কাষ্ঠাসনে বসিয়া আপনাদের হৃদয়দ্বার উদ্ঘাটন করিয়াছেন।” অবশ্য এ ইংরেজ যুবক-যুবতীর চিত্র, কিন্তু নির্জন নিকুঞ্জে গুপ্তালাপন জন্ত প্রেমিক যুগলের এরূপভাবে মিলন, যখন হিন্দুর ব্যবহারানুমোদিত নহে, তখন ইংরেজ কবির লেখা পড়িয়া ভিন্ন এরূপ ভাবের উপলব্ধি করিতে আমরা সমর্থ নহি। ইহা অনুকরণমাত্র, ব্যবহার-জ্ঞানজনিত হৃদয়ের স্বাভাবিক ভাব হইতে উৎপন্ন নহে।

চন্দ্রভাগা-তীরে গ্রহকার একদিন একজন বনুসহ এক কৃষকের গৃহে আতিথ্য স্বীকার করিয়াছিলেন। সরল সুন্দর কৃষক-পরিবারের চিত্রটি সুন্দর। কিন্তু কৃষকের জাতিবিচার না করিয়া, লেখক এবং তাঁহার বন্ধু যে কৃষক-গন্তীর রক্ষন করা জিনিস আহার করিয়াছিলেন, হিন্দুর দেশে, হিন্দুর সাহিত্যে, সে কথার উল্লেখে অগ্ররূপ প্রশ্নের উদয় হইতে পারে। আমরা অবশ্য জাতি-

ভেদের, পক্ষপাতী নহি, কিন্তু বলিয়াছি হিন্দুর দেশ এবং জলধর বাবু যাহা লিখিয়াছেন, তাহা হিন্দুর সাহিত্য, হিন্দুপাঠক কি এ প্রশ্ন করিবে না—জলধর বাবুর ধর্ম কি? তিনি কি হিন্দু? না জাতিবিচার-বিবর্জিত ব্রাহ্ম, না অন্যরূপ ধর্মাবলম্বী? জলধর বাবুর গ্রন্থ পড়িয়া তিনি হিন্দু বলিয়াই ধারণা হয়; কারণ, তিনি “পুত নির্ঝরীসলিলে আজন্মসঞ্চিত পাপরাশি ধৌত” করিয়াছেন, এবং একদিন এক হিন্দু-সন্ন্যাসীর আশ্রমে মধ্যাহ্নের নিস্তব্ধতা ভঙ্গ করিয়া গাহিয়াছিলেন,—

“কবে সমাধি হ'বে শ্রামাচরণে।”

হইতে পারে, জলধর বাবু হিন্দু হইয়াও উদারনীতি; হইতে পারে, উত্তর-পশ্চিমাঞ্চলের ব্যবহার এরূপ কার্যের বিরোধী নহে। অথবা উদারনীতি লেখক ইচ্ছা করেন, জাতিভেদ উঠিয়া যাউক, সর্বত্র সমভাবে প্রীতির সস্ক স্থাপনের এ প্রতিবন্ধকের নিরাকরণ হউক, যে রূপ ভাব তিনি সুন্দর বলিয়া মনে করেন, তাহা বর্তমান না থাকিলেও, তিনি তাহারই চিত্র করিয়াছেন।

জলধর বাবুর গ্রন্থ পড়িয়া আমরা প্রীত হইয়াছি। সমালোচনার শেষ-ভাগে যে সকল দোষের আমরা উল্লেখ করিলাম, তাহা গ্রন্থের নিন্দা করিবার উদ্দেশ্যে নহে। সুন্দর জিনিস দেখিলে, সে সৌন্দর্যের পূর্ণতা দেখিবার ইচ্ছাও স্বাভাবিক হইয়া উঠে। আমাদের নিকট সে পূর্ণতার যাহা যাহা অভাব বোধ হইয়াছে, তাহাই প্রদর্শন করিবার চেষ্টা করিয়াছি।

শ্রীলোকনাথ চক্রবর্তী।

## সমাজের ছবি।

(১)

ফাল্গুন মাসের দোল পূর্ণিমার দিন দুইটা বর্ষীয়সী রমণী গঙ্গাস্নান করিয়া আসিতেছিলেন; পথিমধ্যে তাঁহাদের কথোপকথনও চলিতেছিল, আমরা তাঁহাদের কথোপকথনের উপসংহার ভাগ পাঠকগণকে উপহার দিলাম।

প্রথম। অত বড় মেয়ে আইবুড়ো রেখেছে কেমন করে? একটুকি গজ্জা ভয়ও নাই? হাঁ গা—সতের বছরের মেয়ে?—

দ্বিতীয়া । সাধ ক'রে কি রেখেছে, কুলীনের ঘবে ঐত বিপদ ।  
জাত ঘুচায় যাকে তাকে দিতে পারছে কৈ ।

প্রথমা । মরুক তোমার জাত, একটা সোমত্ত মেয়েকে তুষের আগুনে  
পুড়িয়ে পুড়িয়ে মেরে জাত রক্ষা ? এতদিন যে পাঁচটা ছেলে হ'ত ।

দ্বিতীয়া । তা হ'ত বৈকি, জ্ঞানদাও আমার গরবিণীরই বয়সী, সেও  
এই ষেটের সতের বছরে প'ড়েছে । যাই হ'ক জ্ঞানদা বড় গুণের মেয়ে,  
যেমন দেখতে শুনতে, কথাবার্তাগুলিও তেমনি মিষ্টি ।

প্রথমা । তাতেই তো আরও ছুঃখ হয় ; কুলরক্ষা করতে গিয়ে অমন  
সোণার ডালি মেয়ের চ'থের জল পানে চেয়ে দেখ'ছনা, ধন্তি মা বাপ !

দ্বিতীয়া । মা বাপের দোষ নাই । তারা খুঁজতে আর বাকী রাখে  
নাই, কোনখানেই আর ওদের মেলের বর পাচ্ছেনা ।

প্রথমা । মেলের বর যদি আর দশ বছর না পায়, তখন যে মেয়ে  
বুড়িয়ে যাবে ।

দ্বিতীয়া । আমাদের কুলীনের ঘরে তাত যায় দিদি ; আমার ননদের  
যে একুশ বছরে বিয়ে হ'য়েছিল । জাত চাইতে ত' আর কিছু বড় নয় ।

প্রথমা । ঐ কথাতেই তো আমার সঙ্গে কারও বনে না, কুলীন কি  
আবার একটা জাত ? পুলিশ মুখুজ্যে যে কুলভঙ্গ ক'রে বংশজের ঘরে ভাল  
পাত্র দেখে মেয়ের বিয়ে দিয়েছে, তাতে কি জাত গিয়েছে—না বামুণ থেকে  
খারিজ হ'য়েছে ?

দ্বিতীয়া । তা না হ'ক, আর সে মানটা ত নাই, এখন যদি একটা  
বেটা থাকতো তাহ'লে তার বিয়ে দিতে একটা কাণাকড়িও পেতেন না ।

প্রথমা । তাই বল জাতটাতু মিছে, কেবল টাকার লোভে কুলীন-  
গিল্লি । এমন টাকার কপালেও ছাই, কুলীনের কপালেও ছাই । আহা !  
সেই যতীনের সঙ্গে যদি জ্ঞানদার বিয়ে দিত, তাহ'লে রাজঘোটক হ'ত ।  
মা বাপের আদরের ছেলে, তিনটে পাশ করা, ঘরে টাকাই বা কত ?

দ্বিতীয়া । সত্যি দিদি, যতীনের সঙ্গে জ্ঞানদার বিয়ে হ'লনা কেন ?  
যতীনেরাও ত ঘরে কম নয় ; শুনতে পাই ছোট বেলা হ'তে জ্ঞানদা আর  
যতীনে বড় ভাব ! এ সম্বন্ধ ভাঙ্গলে কেন ?

প্রথমা । জানিনে, পোড়ামুখো বাপ মিসের আঁক্কেল, ঐভেদ, ত'নি  
ক'রে, শেষে ব'লে কিনা ওরা পাল্টা ঘর নয় । আহা ! সেই কোন  
যদি হ'ত, তাহ'লে যতীনও নিরুদ্দেশ হ'তনা, জ্ঞানদাও অমন ক'রে কেঁদে  
কেঁদে ম'রত'না ।

একটা পথ দুইটা পথে বিভক্ত হইয়াছে, দুইপথে দুইজন রমণী গমন  
করিলেন, তাহাদের কথাবার্তাও বন্ধ হইল ।

( ২ )

“এই মিতৃত নিকুঞ্জ নিকেতনে এই চম্পক তরুতলে আসিয়া দাঁড়াইতাম ।  
এমনি মন্থর মলয়হিল্লোলে শ্রথ-বৃন্ত চম্পকদাম বৃন্তচ্যুত হইয়া খসিয়া খসিয়া  
পড়িত । আমরা দুইজনে কুড়াইয়া কুড়াইয়া লইতাম । পৃথিবীর আর কেহ  
জানিত না, কিন্তু আমি জানিতাম, তিনি আমাকে ভাল বাসিতেন । আমি যে  
ভাল বাসিতাম—হতভাগিনী আমি নারীজন্ম লইয়া জন্মিয়াছি—সেকথা  
কেমন করিয়া বলিব ? ভালবাসাও কি পাপ ? রমণীজন্মে এ অভিশাপ কে  
দিল ? এ রমণীজীবন কি কেবল আত্মগোপন করিবার জন্ত ? যাহাকে  
দেখিলে হৃদয় গলিয়া যায়, নয়ন মুগ্ধ হয়, মনোবৃত্তি বিবশা হয়, তাহাকে  
ভাল না বাসিয়া থাকিব কেমন করিয়া ? ভাল বাসিব, কাছে থাকিব, নয়নে  
দেখিব, ইহাতেই যা পরিতৃপ্তি ; আর তো কিছু চাহিনা ? তাহাতেই কি  
কুলমান ভাসিয়া যায় ? অবিশ্বাসিনীতো হই নাই, শুনিতে পাই নারীধর্ম চরণে  
দলিত করা মহাপাপ, তাহাও তো করি নাই ? প্রথম—শৈশবের সাথী ছিলাম—  
ধিক্ আমি, আমার মরণ হয়না কেন—আমি তখন হইতে ভাল বাসি, কৈ  
সে ভাল বাসায় তো পাপের ছায়া, কলঙ্কের রেখা ছিল না ; এখনও তো  
তেমনি ভালবাসি । কাছে রাখিতে চাই, তেমনি করিয়া অঞ্চলের বাতাস  
দিতে ইচ্ছা হয়, তেমনি করিয়া এই চম্পকতরুতলে দাঁড়াইয়া বলিতে চাই,  
“—! তুমি আমার হৃদয়সর্ব্বস্ব, দেবতা ! তুমি ঐ উঁচু ডালের ফুলটা পাড়িয়া  
দাও, ঐ খঞ্জন পাখীটা ধরিয়া দাও, আর ঐ ধূলার উপর তেমনি করিয়া  
একসঙ্গে লিখ তোমার আর আমার নাম !” বয়স বাড়িলে কি এসব বলিতে  
নাই ? একজন ভিন্ন আর কাহাকেও শুধু ভাল বাসিলেই কি সতীধর্ম নষ্ট  
হয় ? তাহা হয় হউক—একজন ভিন্ন যখন আর কাহাকে ভাল বাসিতে

জাত ঘুচায় যখন আত্মহত্যা করিব। ছি ছি নারীজন্ম রাখিয়া কি সুখ? কুলানের ঘরে না জন্মাইতাম, তাহা হইলে আমার ভাগ্যে কি হইত? এতদিন হয়ত আর একজনের সঙ্গে বিবাহ হইত। তখন আমার নারীধর্ম কোথায় থাকিত? আমার মত অবস্থা হয়ত আরও কতজনের হইয়াছে— তাহাদের কি নারীধর্ম রক্ষা হইতেছে? অকূলের কাণ্ডারী হরি আছেন— তিনি আমার পাত্র জুটাইবেন না। আমার এই কুমারীরতনই থাকুক, কিন্তু তিনি কেন দেশত্যাগী হইলেন? সেই শেষ বিদায়ের দিন যখন অশ্রুপূর্ণ নয়নে আমার পানে শেষ দৃষ্টিনিষ্ক্ষেপ করিলেন, তখন কেন তাঁহার মুখপানে চাহিতে পারিলাম না? মরিলেও তো আমার এ দুঃখ ঘাইবে না।”

কাম্যাবনের গঙ্গাপুলিনস্থ আত্মকাননের মধ্যবর্তী একটি চম্পকমূলে দাঁড়াইয়া কুমারী জ্ঞানদা এই সকল চিন্তা করিতেছিল। প্রণয়ের সাথী পক্ষী-গুলি কলরব করিতেছিল। তরুণমূলে জ্ঞানদার প্রথম যৌবনের ললিত লাভণ্যোচ্ছ্বাস দেখিয়া চম্পক-পরাগ-দল পরিম্লান হইয়া তাহার পাদমূলে দুই একটি কুরিয়া খসিয়া খসিয়া পড়িতেছিল।

( ৩ )

হরিদ্বারের অনতিদূরে দুর্বাদল-শ্যামল উপত্যকা ভূমিতে একটি সন্ন্যাসীর আশ্রমকুটীর! চারিদিকে পর্বতমালা, চারি ধারে নির্ঝরির অশ্রান্ত কল কল নাদ! স্থানটী বড়ই মনোরম, গম্ভীর এবং শান্ত রসাম্পদ! আশ্রমবাসী সন্ন্যাসী অজিনাসনে উপবিষ্ট, সন্মুখে নিরাসনে আগন্তুক একটি তরুণবয়স্ক সন্ন্যাসী যুক্তকরে প্রবীণ সন্ন্যাসীকে সম্বোধন করিয়া বলিতেছেন “প্রভো! আমাকে সন্ন্যাসধর্মে দীক্ষিত করুন।”

প্রবীণ সন্ন্যাসী ঈষদ্বাক্ত করিয়া বলিলেন “এখনও অনেক বিলম্ব আছে। তোমার আশা, আকাঙ্ক্ষা, সুখাভিলাষ একটীও পরিত্যক্ত হয় নাই; এখন সন্ন্যাস গ্রহণ করিলে তোমার কিছুই ফললাভ হইবে না, লাভের মধ্যে এই সন্ন্যাসাশ্রমের প্রতি লোকের ঘৃণা ও বিদ্বেষ বাড়াইবে।”

নবীন সন্ন্যাসী। কেন প্রভো! তরুণবয়সে কি সন্ন্যাসী হইতে নাই? চৈতন্য তো তরুণ বয়সেই সন্ন্যাস গ্রহণ করেন।

“চৈতন্যের সন্ন্যাসে আর তোমার সন্ন্যাসে অনেক প্রভেদ, তিনি ভগবৎপ্রেমে আত্মহারা হইয়া সন্ন্যাস গ্রহণ করেন, তুমি হয়তো সংসারে কোন মনঃপীড়া পাইয়া সন্ন্যাসী হইতে ইচ্ছুক হইয়াছ।”

“প্রভো! এই যে দলে দলে সন্ন্যাসী দেখিতে পাই—ইহারা কি সকলেই প্রেমে আত্মহারা?”

“না—সে রূপ ব্যক্তি কচিৎ দুই একজন দেখিতে পাওয়া যায়। অধিকাংশ সন্ন্যাসীই আশাভঙ্গ বিরোগবিরহ, না হয় দারুণ দারিদ্র্য, কিম্বা রোগশোকের যন্ত্রণায় সন্ন্যাসী, কেহ বা নরহত্যা, দস্যুতা প্রভৃতি করিয়া আত্ম-গোপন জন্ত সন্ন্যাসী।”

“উহাদিগের সন্ন্যাসাবলম্বন কি বিফল হইতেছে?”

“সকলেরই যে হইতেছে তা নয়; অভ্যাস, অনুষ্ঠান ও সংসর্গ দ্বারাও অনেকের চিত্তশুদ্ধি হইতেছে।”

“আমারও তাহাই হইবে, আমিও তাহাদিগের গ্রায় কর্মযোগ অভ্যাস করিব।”

“সন্ন্যাসাশ্রম কর্মযোগ অভ্যাসের স্থান নহে; ত্যাগী না হইলে সন্ন্যাসী হয় না। তুমি তোমার যে সমাজকে পশ্চাতে ফেলিয়া আসিয়াছ, সেই সমাজই প্রকৃত কর্মক্ষেত্র। শাস্ত্রমতে গার্হস্থ্য ও বাণপ্রস্থ আশ্রমেই কর্মযোগ অভ্যাস করিতে হয়; সে সব পারিবে না, সমাজরূপ কর্মক্ষেত্রে প্রবেশ কর, কর্মানুষ্ঠান কর, চিত্তশুদ্ধি হইবে, ক্রমে ধর্মে অনুরাগ হইবে; তখন আর দীক্ষিত হইতে হইবে কেন, সর্ব কর্মের ফলাশা ত্যাগ করিতে পারিলেই তুমি সমাজ মধ্যে থাকিয়াও সন্ন্যাসী!”

“মানবসমাজ বড়ই স্বার্থপর, সেখানে সুখের লেশমাত্র নাই।”

“নানাকারণে সাময়িক বৈরাগ্য জন্মিলে কি ব্যক্তিবিশেষের আচরণে হৃদয়ভগ্ন হইলে কিছু দিন সেইরূপ মনে হয়, কিন্তু সেটা তোমার ভ্রম! যদি সুখই না থাকিবে, তবে এখনও তুমি শতবার তোমার সাধের নন্দন পানে ফিরিয়া চাহিতেছ কেন? এখন তুমি ফিরিয়া যাও, কিছুদিন সমাজের হিত সাধন করিয়া অথবা শিক্ষা, য়ানাপমানে সমতাজ্ঞান, শীতোষ্ণ হৃদয়সহিষ্ণুতা, সুখে দুঃখে সন্তোষ অভ্যাস করিয়া বিশুদ্ধ চিত্ত লইয়া ফিরিয়া আসিও, তখন দীক্ষিত হইবে।”

তরুণ সন্ন্যাসী আর দ্বিরুক্তি করিলেন না, সাষ্টাঙ্গে প্রণিপাত করিয়া প্রবীণ সন্ন্যাসীর নিকট হইতে বিদায় হইলেন।

( ৪ )

চণ্ডীপুরের রামরত্ন গঙ্গোপাধ্যায় মহারথী কুলীন-স্বভাব! বিবাহ সাতাশটি, বয়স পঞ্চান্ন, পঞ্চম শ্বশুরালয়ে অবস্থান, গৃহে ভাগ্যবতী গৃহিণী আর একটি বালবিধবা কন্যা বর্তমান! কুলভঙ্গ ভয়ে অশীতিপর একটি বৃদ্ধের সহিত অষ্টমবর্ষীয়া কন্যার বিবাহ দিয়াছিলেন, সে আজ হুই বৎসরের কথা, আজ তিন মাস হইল, কন্যাটি বিধবা হইয়াছে।

চৈত্র মাসের শেষ, প্রচণ্ড মার্ভণ্ড কিরণে পৃথিবী সমস্তপ্তা! আজ একাদশী তিথি, গাঙ্গুলী মহাশয়ের দশমবর্ষীয়া কন্যার একাদশী ব্রত! মুহূর্হঃ পিপাসা!! সমাজের শাসন—বালিকা সেই দারুণ তৃষ্ণায় জলবিন্দুমাত্র পাইবে না। অঙ্গনের মধ্যস্থ একটি পুষ্পবৃক্ষের ছায়ায় পড়িয়া বালিকা গড়াগড়ি দিতেছে। তাহার কণ্ঠ শুষ্ক, ওষ্ঠাধর শুষ্ক, নয়ন অশ্রুপূর্ণ! গাঙ্গুলী মহাশয় রন্ধনগৃহের বারান্দায় বসিয়া মধ্যাহ্ন আহার সমাপন করিতেছেন। এমন সময় বহির্দ্বারে একজন সন্ন্যাসী আসিয়া দাঁড়াইলেন, বলিলেন “তৃষ্ণার্থ অতিথি, জল প্রার্থনা করি।”

গাঙ্গুলী মহাশয়ের সর্বাঙ্গ যেন জ্বলিয়া উঠিল, বিরক্তির সহিত বলিলেন “যাও—যাও—ঠাকুর, ছুপর বেলায় কে তোমার জল যুগিয়ে রেখেছে, ( জনান্তিকে ) যত সব হাধরে!

সন্ন্যাসী হাসিয়া বলিলেন “তথাস্তু, কিন্তু মহাশয়! এ বালিকাটি এ প্রকার ছটফট করিতেছে কেন? ইহার কি কোন গুরুতর পীড়া হইয়াছে?”

উত্তর দিবার জন্ত গাঙ্গুলী মহাশয়ের অবশিষ্ট দন্তগুলি প্রায় বহির্গত হইয়াছিল, এমন সময় ব্রাহ্মণী বাহির হইয়া বলিলেন “না গো না, আজ একাদশী তাই—তৃষ্ণায় অমন করিতেছে।”

সন্ন্যাসী ‘নায়ায়ণ’ ‘নারায়ণ’ বুলিয়া কর্ণে অঙ্গুলি দিলেন, বলিলেন—  
এ গৃহে জলগ্রহণ করিতে নাই।”

গাঙ্গুলী মহাশয়ের মুখকান্তি বীভৎস ভাব ধারণ করিল, সক্রোধে বলিলেন “বে’র বেটা ভণ্ড আমার বাড়ী হ’তে, রামরত্ন গাঙ্গুলীর বাড়ী

জলগ্রহণ করিতে নাই, একথা বলে, এমন বৃকের পাঠা কার? বিটলে সন্ন্যাসী লোকের জাত মার্তে এসেছেন।”

সন্ন্যাসী বাটীর বাহিরে আসিয়া সম্মুখস্থ একটি বটবৃক্ষের ছায়ায় দাঁড়াইলেন।

( ৫ )

গাঙ্গুলী মহাশয় আহার সমাপনান্তে তাম্বুল চর্ষণ করিতে করিতে হুঁকা হস্তে বাহিরে আসিলেন। দেখিলেন—বটবৃক্ষমূলে সেই সন্ন্যাসী! মুখভঙ্গী করিয়া বলিলেন “কি ঠাকুর! বয়স তো দেখছি অল্প, এ ভণ্ডামি শিখেছ কতদিন?”

“অল্পদিন।”

“বেশ ক’রেছ, কিন্তু গৃহস্থ বাড়ীতে কেন? বনে যাও, ফল মূল খাও।”

“গৃহস্থ বাড়ী ত দেখিতেছি না, সকলই ত বন বলিয়া বোধ হইতেছে।”

“কেন—চখে কি কম দেখিতে পাও? বাঘ ভালুকও দেখিতেছ না কি?”

“শত শত, আপনাকেই তো একটি হিংস্র রাক্ষস বলিয়া বোধ হইতেছে।”

“ঠাকুর! মুখ সামলে কথা বল, জান আমি কে? রামরত্ন গঙ্গোপাধ্যায়—  
স্বভাব—মহা মহারথী কুলীন আমার দ্বারস্থ!”

“সকলেই সমান, আপনি রাক্ষস, তাঁহারা ব্যাত্ত ভল্লুক!”

“কিসে রে বিটলে বামুণ!”

“হিংস্র জীব অশ্রু জীবের শোণিত পান করে, মাংস ভক্ষণ করে, আর আপনাদের ছায় নররাক্ষস আপন আপন সন্তান সন্ততির রক্ত মাংস ভোজন করেন।”

“যত বড় মুখ নয় তত বড় কথা, বড় বাড়ীবাড়ি আরম্ভ করলি যে?”

“আপনাকে ভয় থাকিলে করিতাম না, রাগ করিবেন না, একটা কথা শুনুন, ঐ যে বালিকাটি, বোধ হয় আপনার কন্যাই হইবে—একবিন্দু তৃষ্ণার জল অভাবে ছটফট করিতেছে, তথা দেখিয়াও আপনি সম্মুখে বসিয়া গোষ্ঠাসে ভোজন করিতেছিলেন কেমন করিয়া?”

“কি করতে হবে, স্তূতপত্না ক’রে কুলীন ব্রাহ্মণের ঘরে জন্মেছে, একাদশী ত ওর সঙ্গের সাথী! তা বলে কি একাদশীর দিন জল দিতে হবে নাকি?”

“ক্ষতি কি ? একাদশী তো স্ত্রী পুরুষ সকলেরই জন্ত । আপনি ত্রিসন্ধ্যা আহার করিবেন, তাহাতে ধর্ম্মনষ্ট হইবে না, আর বালিকাটি দারুণ তৃষ্ণায় একবিন্দু জলপান করিলেই তাহার ধর্ম্মনষ্ট হইবে ?”

“ও ঠাকুর ! বুঝেছি তুমি ব্রহ্মদৈত্য ! শাস্ত্র দেখে তারপর এস ।”

“শাস্ত্র কিছু কিছু দেখা আছে, বলপূর্ব্বক একজনকে একাদশী ব্রত করাইতে হইবে, ইহা শাস্ত্রের ব্যবস্থা নহে । ব্রহ্মচর্য্য কি অনিচ্ছায় হয় ? এই সকল সমাজের ভণ্ডামি ।”

“দূর, দূর, নরাধম ! তুই শাস্ত্র মানিস্ না, নাস্তিক ! তোর মুখাবলোকন করিতে নাই ।”

এই বলিয়া গাঙ্গুলী মহাশয় বাটীর ভিতর প্রবেশ করিয়া দ্বাররুদ্ধ করিলেন, সন্ন্যাসী বটবৃক্ষনূলে আসন গাড়িলেন ।

( ৬ )

এই ঘটনার তিন দিন পরে দুইজন আগন্তুক গাঙ্গুলী মহাশয়ের দ্বারদেশে দর্শন দিলেন । তাঁহাদের পদযুগল ধূলি ধূসরিত, চিত্ত উদ্ভিন্ন, যেন ভারি ব্যস্ত, যেন কোন বিপদমাগরে নিমজ্জিত ! গাঙ্গুলী মহাশয় তাঁহাদের আগমন সংবাদ পাইয়া বাহিরে আসিলেন । এই আগন্তুকদ্বয়ের একজন আমাদের পরিচিতা জ্ঞানদার পিতা, অপরটি প্রজাপতির দূত—ঘটক !

গাঙ্গুলী মহাশয় বাহিরে আসিবামাত্র জ্ঞানদার পিতা নমস্কার করিয়া করষোড়ে তাঁহার সম্মুখে দণ্ডায়মান হইলেন ।

ঘটক বলিলেন “গাঙ্গুলী মহাশয় ! কুললক্ষ্মী আপনার গৃহে অচলা ! অনেকেরই তো জাত রক্ষা ক’রেছেন, এইবার আমাদের এই মুখ্যে মহাশয়কে উদ্ধার করিতে হবে ।”

গাঙ্গুলী । কে ইনি ?

ঘটক । কাম্যবনের চণ্ডীদাস মুখ্যে, ফুলের মুকুটি, বিষ্ণু ঠাকুরের সন্তান !

গাঙ্গুলী । ম’শায়, ম’শায়, নমস্কার, নমস্কার, কি জন্ত আগমন ?

জ্ঞানদার পিতা । কথাদায়, সতের বৎসরের কণ্ঠা যোগ্য বরের অভাবে এ পর্য্যন্ত অবিবাহিতা ! ঘটক মহাশয়ের মুখে আপনার নাম শুনে শরণাপন্ন হ’লাম, উদ্ধার করুন ।

গাঙ্গুলী । অবশ্য অবশ্য কর্তব্য বটে, এ বিষয়ে অম্মার আপত্তি নাই, কেন না “রাজদ্বারে শ্মশানেচ যতিষ্ঠতি সবাঙ্কব ।” তবে একটা কথা, ম’শায় ও স্বভাব, পণগণের ব্যবস্থাটা কিরূপ হবে ?

জ্ঞানদার পিতা । সে সব ত ঘটক মহাশয় অবগত আছেন ।

গাঙ্গুলী । না ম’শায়, কথার ভাঙ্গচুর ভাল, এখন আর সেকাল নাই ; ইংরেজের আমলে ক্রমে আমাদের ব্যবসায় মন্দা হ’য়ে আসছে, এখন আর সেকালে পণগণে হবেনা !

জ্ঞানদার পিতা । আমি দরিদ্র ! বিশেষ ম’শায় তো আর ভঙ্গ হচ্ছেন না ।

গাঙ্গুলী । রাম ! রাম ! ও কথাটা আর উচ্চারণ করবেন না । তা না হই জাতি রক্ষা ত করছি, এইরূপ জাতি রক্ষা ক’রে সাতাশটি হ’য়েছে, এইবার আটাশটি হবে ।

ঘটক । সে সমস্ত আমার জানা আছে, মহাশয় ব্যক্তি, সাতাশটির স্থানী—সাক্ষাৎ চন্দ্রদেব !!

গাঙ্গুলী মহাশয় হাস্য করিয়া বলিলেন, “সে নিঃশব্দে যাই বলুন, ইংরেজদের আমলে আর সব উঠে গেল—এখন আমরা দুই একজন বা আছি ।”

জ্ঞানদার পিতা । তা নইলে আর আস্বো কেন ? একগুণে ষেরূপ অনুমতি হয় ।

ঘটক । মুখ্যে ম’শায়, গাঙ্গুলী মহাশয়ের সহিত ওরূপ সম্বোধন করবেন না, উনি হচ্ছেন জামাতা, ওতে লজ্জা বোধ করছেন, আপনি জানেন না তো উনি কত বড় ব্যক্তি !

গাঙ্গুলী মহাশয় বড়ই প্রীত হইলেন, এবং শীঘ্রই বাটীর ভিতর প্রবেশ করিয়া, হুঁকা কালিকা (সাগ্নিক) ও একখানি কঞ্চল লইয়া আসিলেন; পরিশ্রান্ত পথিকদ্বয় কঞ্চল পাতিয়া তাহাতে উপবেশন করিলেন । ঘটক মহাশয় সহাস্যে বলিলেন, “গাঙ্গুলী মহাশয় ! মহৎ ব্যক্তি আপনি, এখন আসল কথাটা হ’ক !”

গাঙ্গুলী । আসল কথা আর কি ? এক বেটা পোদার আমার উপরে ডিক্রী জারী ক’রেছে, চারদিনের মধ্যে আমাকে সেই টাকাটা দিতে হবে, যদি আপনারা তা দিতে স্বীকার হন, তাহলে আমি রাজী হ’তে পারি ।

জ্ঞানদার পিতা। সে কত টাকা?

গাঙ্গুলী। অধিক নয়, মায় খরচা পঁচাশি টাকা।

জ্ঞানদার পিতা। যে আজ্ঞা, তাহাতেই আমি রাজী হ'লাম।

গাঙ্গুলী। টাকা দিচ্ছেন কবে?

জ্ঞানদার পিতা। বিবাহ রাত্রিতেই,—

গাঙ্গুলী। দিন স্থির ক'রেছেন কবে?

জ্ঞানদার পিতা। উপস্থিত চৈত্রমাস—এই মাসটার পরে যে দিন হয়।

গাঙ্গুলী। তা হ'বে না। আপনি বাটী যান, তৃতীয় দিনের মধ্যে বিবাহ দিন স্থির করুন, নতুবা আমাকে পাবেন না।

জ্ঞানদার পিতা ঘটকের মুখপানে চাহিলেন, ঘটক মহাশয় ইঙ্গিতে স্বীকার করিতে বলিলেন; মুখস্থ্য মহাশয় অগত্যা স্বীকৃত হইলেন।

ঘটক বলিলেন, “তবে আপনি কল্যই বাটী রওনা হউন, যেতেও আপনার তিনদিন লাগবে, আমি থাকলাম, কাল সন্ধ্যার পর একখানা গো গাড়ী ক'রে গাঙ্গুলী মহাশয়কে নিয়ে রওনা হব। আজ হচ্ছে সোমবার, বৃহস্পতিবারে লগ্নস্থির থাকলো, সেদিনে যে-কোন সময়েই হক, আমরা পঁছিবই পঁছিব।”

গাঙ্গুলী মহাশয়ের গালভরা হাস্য, আর কোন আপত্তি নাই, সন্ধ্য স্থির হইয়া গেল।

যখন এই সকল আলাপ হইতেছিল, তখন অদূরে সেই নবীন সন্ন্যাসীটী নিমীলিত নেত্রে তাঁহাদের এই আলাপ শুনিতেছিলেন, তাঁহার মুদ্রিত নয়নপ্রাপ্ত দিয়া অশ্রু-বিন্দু ঝরিতেছিল।

( ৭ )

এতদিনের পর জ্ঞানদার বিবাহের ফুল ফুটিল। বহুকষ্টে যোগ্যবর জুটিয়াছে, চৈত্রমাসের শেষ, হিন্দুতে বিবাহ নাই, কিন্তু কুলীনের ঘরে শাস্ত্র মানিতে গেলে কি চলে, বৃহস্পতিবার সন্ধ্যাবেলায় জ্ঞানদার পিতা গৃহে উপস্থিত হইয়া প্রচার করিলেন, “আজই বিবাহ, ঘটক পাত্র লইয়া আসিতেছে।”

জ্ঞানদার গায়ে হলুদের ধূম পড়িয়া গেল, প্রতিবেশিনীরা হলুধ্বনি শুনিতে লাগিলেন! জ্ঞানদা বড় লজ্জাশীলা—সে মুখখানি নামাইয়া হলুদ মাখিতে

বসিল। তাহার অন্তরের ভিতর হইতে একটা অব্যক্ত ধ্বনি উখিত হইতেছিল, যিনি সর্বান্তর্ধ্যামী—তিনি তাহা শুনিতে পাইতেছিলেন।

রাত্রি প্রহরেকের সময় ঘাঁক সঙ্গে গাঙ্গুলী মহাশয় বরবেশে দেখা দিলেন—আর পশ্চাৎ পশ্চাৎ সেই সন্ন্যাসী! বর বরাসনে বসিলেন, ঘটক বিদায় ব্যবস্থা হেতু অন্তঃপুরে প্রবেশ করিলেন, এখনও হিন্দুসমাজে সন্ন্যাসীর সম্মান আছে, তিনিও আদৃত হইয়া একখানি ধূনির কাষ্ঠ প্রাপ্ত হইলেন।

হঠাৎ এই বিবাহ ব্যাপার উপস্থিত; জ্ঞানদা মনে মনে যে পথ খুঁজিয়া রাখিয়াছিল, সে পথে যাইতে আর সময় পাইল না। পিঞ্জরের বিহগী যেমন পথ অন্বেষণ করে, জ্ঞানদাও তেমনি নানা পথ অনুসন্ধান করিল, পাইল না। তাহার নয়নকজ্জল অতি সংগোপনে অশ্রু-নিষেকে ধৌত হইতে লাগিল।

বিবাহ-লগ্নের কিছু পূর্বে পুরোহিত মহাশয় বলিলেন, “পাত্র-কন্যা আশীর্বাদে একটা ব্যবস্থা আছে, হইলে ভাল হয়।” সকলেই সায় দিলেন, পাত্র আশীর্বাদ হইয়া গেল। পাত্রী আশীর্বাদে সময় উপস্থিত, ধানদূর্কা দিয়া সকলেই আশীর্বাদ করিলেন; সন্ন্যাসীটী তখন ধূনি ছাড়িয়া এই আশীর্বাদ ব্যাপার দেখিতে আদিয়াছিলেন; তাঁহাকে সন্মুখে দেখিয়া পুরোহিত মহাশয় বলিলেন, “সন্ন্যাসী ঠাকুর! আপনারা সাধু মহান্ত পাত্রীটীকে আশীর্বাদ করুন।”

কি জানি কেন সন্ন্যাসীর চরণযুগল তখন খর খর কাঁপিতেছে, তাঁহার নয়ন দিয়া যেন এক দিব্য জ্যোতিঃ বাহির হইতেছে। কম্পিতপদে জ্ঞানদার নিকট গিয়া ধান দূর্কা তুলিয়া লইলেন, ভগ্নস্বরে ডাকিলেন “জ্ঞানদা!”

সকলেই যেন চমকিত! জ্ঞানদা যেন কোন অপরিচিত প্রিয়-কণ্ঠস্বর শুনিতে পাইল, বিস্ফারিত নেত্রে সন্ন্যাসীর মুখপানে চাহিল, নোখিল যেন জ্যোতিস্মান্ দেবমূর্তি!

সন্ন্যাসী বলিলেন “জ্ঞানদা! এই শেষ আশীর্বাদ, শেষ সস্তাষণ, এতদিনে শেষ বিদায়!!”

জ্ঞানদার স্তূথের শৈশবস্বপ্ন মনে পড়িয়াছে; দৃষ্টি স্থির, শরীর অবশ, হৃদয় জ্বলন্ত অগ্নিশিখাময়; ক্ষুদ্র অবলার প্রাণ আর কত সহিবে বল, সে সহিতে পারিল না,—মুচ্ছিত হইয়া পড়িয়া গেল।

তখন চারিধারে 'ধর ধর, মার মার' একটা শব্দ উথিত হইল, কেহ জ্ঞানদার গুশ্রমা করিতে লাগিল, সন্ন্যাসী তখন অদৃশ, কেহই আর তাঁহাকে দেখিতে পাইল না।

বহু চেষ্টা হইল, কিন্তু জ্ঞানদার সে মুচ্ছা আর তঙ্গ হইল না। সে বিবাহ বাসরে হতভাগিনী কুলীনকুমারী স্মৃথের স্বপ্ন দেখিতে দেখিতে শেষ নিশ্বাস ত্যাগ করিল, তাহার অন্তিম শয্যা কুম্ভমাবৃত হইল।

পরদিন প্রাতঃকালে কাম্যবনের অনেক লোক দেখিতে পাইল, গ্রামের পূর্বদিকস্থ বৃহৎ দীর্ঘিকার শৈবাল রাশির মধ্যে জটাজুটধারী একটা সন্ন্যাসীর মৃতদেহ ভাসিতেছে। গ্রামের লোকে কাণাকাণি করিতে লাগিল। 'আহা! হতভাগা যতীন্ এতদিন পর্য্যন্ত জ্ঞানদাকে ভুলিতে পারে নাই।'

গাঙ্গুলী মহাশয় শিশুপাল সাজিয়া গৃহে ফিরিলেন, আসিয়া গুনিলেন, দ্বাদশীর দিন রাত্রিতে অভাগিনী ইহসংসার হইতে বিদায় হইয়াছে।

হায়! সমাজের কঠোর অত্যাচারে কত গৃহে এই পৈশাচিক অভিন হইতেছে, তাহা কি কেহ দেখিতেছে? হা বাল্যাপ্রেম! তুমি কত কুম্ভম কোমল হৃদয় মথিত করিয়া কত হলাহল উদ্দীর্ণ করিতেছ, তাহা কে বলিতে পারে!

শ্রীশ্রীশচন্দ্র চট্টোপাধ্যায়।



## মাসিকপত্র ও সমালোচন।

( ফাল্গুন, চৈত্র ১৩০৬ )

### সূচীপত্র।

বিষয়।	লেখক।	পৃষ্ঠা।
অর্জুনোর্বশী	শ্রীযুক্ত প্রমথনাথ রায় চৌধুরী	১৮৫
আমার কাপুরুষতার ফল	শ্রীযুক্ত কুমার মনমথকৃষ্ণ দেব বি-এ, আই-সি-এন্	১৮৭
নোগন সাম্রাজ্যের রাজস্ব	শ্রীযুক্ত রামপ্রাণ গুপ্ত	১৯১
পরিত্যক্তা	শ্রীযুক্ত কুমার মনমথকৃষ্ণ দেব বি-এ, আই-সি-এন্	১৯৫
নকর-সংক্রান্তি	শ্রীযুক্ত যদুনাথ চক্রবর্তী বি-এ	১৯৬
আবাহন	...	২০২
বর্তমান সাহিত্য ও মানসিক ব্যাধি	শ্রীযুক্তা নগেন্দ্রবালা মুস্তোফী	২০৫
প্রেম-বৈচিত্র্য	শ্রীযুক্ত শৈলেশচন্দ্র মজুমদার	২১১
কণিকা ( সমালোচনা )	...	২৩৪
দ্রীকবিকুঞ্জ	শ্রীযুক্তা রাইকিশোরী দেবী প্রভৃতি	২৪৬

( বোড়ামারা, রাজসাহী, উৎসাহ-কার্যালয়, হুইতে সম্পাদক কর্তৃক প্রকাশিত। )

হিন্দু প্রেস,

৩১ নং আহীরীটোলা স্ট্রীট, কলিকাতা।

শ্রীপ্রিয়নাথ ঘোষ দ্বারা মুদ্রিত।

অগ্রিম বার্ষিক মূল্য ১।।০ টাকা।

এই দুই সংখ্যার নগদ মূল্য ১০ আনা।



## উৎসাহ ৪র্থ বর্ষ ।

১৩০৬ সালের শেষসংখ্যক উৎসাহ প্রকাশিত হইল। ১৩০৭ সালের বাকী কয়েক মাসের উৎসাহ একত্র প্রকাশিত হইবে। ইহার পর হইতে গ্রাহকদিগকে আমরা রীতিমতভাবে “উৎসাহ” দিতে সক্ষম হইব, আশা করি। আগামী সংখ্যার উৎসাহে “বঙ্গভাষা ও সাহিত্য”-প্রণেতা দীনেশ বাবু, “বঙ্গিম-সমালোচক” লোকনাথ বাবু, ঐতিহাসিক অক্ষয় বাবু, পণ্ডিত রজনীকান্ত, সুপ্রসিদ্ধ লেখক প্রভাত বাবু, শৈলেশ বাবু, রাধেশ বাবু, জগদানন্দ বাবু, রাজেন্দ্র বাবু, হাস্যরসিক রজনী বাবু, রামপ্রাণ বাবু, শোভাবাজার রাজবাটীর কুমার মন্থকৃষ্ণ, সুলেখিকা নগেন্দ্রবালা, সরলাবালা, এবং শ্রীযুক্ত প্রবোধচন্দ্র নজুমদার প্রভৃতির লেখা থাকিবে।

### ভ্রম-সংশোধন ।

আমাদের অসাবধানতা বশতঃ বর্তমান বর্ষের “উৎসাহে” নিম্নলিখিত ভুলগুলি রহিয়া গিয়াছে ;—

অশুদ্ধ ।	শুদ্ধ ।
২ পৃষ্ঠা ১০ ছত্র মাঠের	... গোঠের
” ” ১৩ ” সরলা	... সবলা
১৬৩ ” ১৫ ” এমন নিস্তরু যে,	... এখন নিস্তরু, যে
১৮৭ ” ৬ ” দেবা	... দেখা

### শোক-সংবাদ ।

সুখবি নিত্যকৃষ্ণ বসু মহাশয় ইহজগতে আর নাই। ত্বরন্ত বিস্মৃতিকা ব্যাধি তাঁহাকে হরণ করিয়াছে। গীতিকবিতা-রাজ্যে বসু মহাশয়ের সিংহাসন অতি উচ্চে স্থাপিত ছিল। “উৎসাহ” এই প্রতিভার সহায়তা লাভ করিয়া ধ্বংস হইয়াছিল! হায়! মধুর বীণা চিরদিনের জন্ত নীরব হইয়াছে। আগামী সংখ্যায় আমরা কবির সংক্ষিপ্ত জীবনী ও প্রতিকৃতি প্রকাশ করিব।

## অর্জুনোৎসব ।

চিত্রসেন-মুখে শুনি' আপনার বাঞ্ছিত বারতা,  
মদভরে তরঙ্গিয়া সুকুমার ক্ষীণ তনুলতা  
প্রসাধনে রত, স্বর্গে, স্বর্গপুরে অতুল্যা রূপসী।  
ঝলকিত পুলকিত পূর্ণিমার পরিপূর্ণ শশী  
অলক্ষ্যে করিতেছিল কক্ষমাঝে কটাক্ষ ক্ষেপণ,  
অসম্বৃতা, উর্ধ্বশী যখন!

মাণিক্য কিঙ্কণী রঙ্গে কটিতট নিল আলিঙ্গিয়া ;  
মুক্তিকার কর্ণমালা স্তনমূলে পড়িল মূর্ছিয়া।  
অদৃশ্য অম্বরপথে একাকিনী পার্থের সদনে  
উন্নতা উর্ধ্বশী চলে অভিসারে, আকুল গমনে।  
ফুলশরে বিমোহিল আচম্বিতে ত্রিলোক অজ্ঞাতে  
সেইদিন পূর্ণিমার রাতে।

‘সভয়ে বিস্ময়ে দ্বারী দ্বার ছাড়ি’ গেল দূরে সরি’ ;  
পার্থের শয়নকক্ষে উভরিল হৃন্দরী অঙ্গরী ;  
সৌরভে মোদিল কক্ষ, উজলিল লাবণ্যকিরণে!  
শিজিনী-শিজিত রবে জাগি’ ভদ্র, বিমুগ্ধ নয়নে,  
মুহূর্ত্তে হৈরিলা, যেন মায়াদীপ্ত স্বপন-আগারে,  
পরিচিতা মোহিনী বামারে।

সমালোচনা শেষ হইল, একবার পড়িলাম, আপনি হাসিলাম। একবার মনে হইল, এত নির্দয় হইব না—শেষে কি জানি কি মনে করিয়া, তাহাই পাঠাইয়া দিলাম।

\* \* \* \* \*

এক সপ্তাহ অতীত হইয়াছে—আহারান্তে দেখিলাম, সুন্দর চাঁদিনী রজনী—ধুমময় লগুন নগরীতে এরূপ রজনী অতি বিরল; সাধ হইল, লিলির বাড়ী গল্প করিতে যাই।

লিলি রবিনসন আমার ভাবী পত্নী—তিনমাস পরে আমাদের বিবাহ হইবে। এখন আমরা Engaged.

পথে যাইতে যাইতে লিলির সহিত কিরূপে আমার প্রথম আলাপ হইয়াছিল, তাহা ভাবিতেছিলাম। মনে পড়িল, এক বৎসর পূর্বে এই রকম চাঁদিনী রজনীতে অস্তেদ নগরীর সমুদ্র-সৈকতে বেড়াইতেছিলাম। লিলি তাহার ভগিনীসহ উপকূলে বসিয়াছিল, চন্দ্রকিরণে তাহাকে দেবীর মত দেখাইতেছিল। তাহাদের দেখিয়া, আমিও অদূরে সমুদ্রহিল্লোল দেখিতেছি ভাগ করিয়া দাঁড়াইয়াছিলাম। কিয়ৎক্ষণ পরে তাহারা যখন গাত্রোখান করিল, লিলির রুমাল সেইখানে পড়িয়া রহিল—সে তাহা দেখিতে পায় নাই। আমি স্নযোগ বুঝিয়া তাহা তুলিয়া লইয়া, তাহাদের পশ্চাদ্গমন করিয়াছিলাম। “আপনি রুমাল ফেলিয়া যাইতেছেন” বলিয়া তাহার রুমাল ফিরাইয়া দিয়াছিলাম। লিলির সেই হাসিমাখা ধৃত্বাদ মনে করিলে এখনও কত আনন্দ হয়!

তারপর মনে পড়িল, পরদিন “Kursal”এ তাহাদের সহিত আবার সাক্ষাৎ হয়; আমি টুপি তুলিলাম, তাহারা আমায় চিনিতে পারিয়াছে দেখিয়া আমার কত আনন্দ হইল। তারপর কত কথা হইল, থিয়েটার, দেশভ্রমণ প্রভৃতি কত কি যে বিষয় লইয়া অনর্গল কথা কহিতে লাগিলাম! শেষে আমরা Roulette জুয়াখেলা দেখিতে গেলাম, তাহাদের সন্তুষ্ট করিবার জন্ত আমি সেই প্রথম জুয়াখেলায় যোগ দিলাম, বিস্তর হারিলাম; কিন্তু তাহাতে আমার আনন্দই হইল, কারণ তার জন্ত লিলি কত সহানুভূতি দেখাইল।

সেই অবধি প্রত্যহই আমাদের সাক্ষাৎ হইত। “শুনিলাম, তাহাদের ঘৃণী আমার বাটীর নিকটে; সুতরাং লগুনে কিরিয়া আমাদের আলাপ

ঘনীভূত হইল। কতদিন আমরা বাইসিকেল চড়িয়া, একত্রে বেড়াইতে গিয়াছি, সেই সব মনে পড়িতে লাগিল।

শেষে আমাদের বন্ধুত্ব প্রেমে পরিণত হইল। একদিন Kew Gardensএ বেড়াইতে গিয়া লিলির কাছে আমার হৃদয় ব্যক্ত করিলাম। লিলি আমার স্ত্রী হইতে স্বীকৃত জানিয়া আমার কত আনন্দ হইল।

এইরূপ ভাবিতে ভাবিতে লিলির বাড়ী পহুছিলাম। গৃহে প্রবেশ করিবামাত্র লিলি আমার কাছে আসিয়া বলিল, “জ্যাক, তুমি “জিমিজেম্‌স্” নামে কোন লোককে চেন—আমার বড় সাধ, সেই নিষ্ঠুর লোকটিকে একবার দেখি, সে আমার সাধের আশালতা কঠিন চরণে দলিয়া ফেলিয়াছে।” লিলির হাতে “সাপ্তাহিক সংবাদ” পত্র।

বলিতে ভুলিয়া গিয়াছি যে, সাপ্তাহিক সংবাদে আমার সমালোচনার নিজ নাম প্রকাশ করি না—“জিমিজেম্‌স্” নামে সমালোচনা লিখি।

প্রথমে লিলির কথা আমি বুঝিতে পারিলাম না; কিন্তু যখন কাগজখানি আমার হস্তে দিয়া লিলি বলিল, “দেখ, আমার পুস্তকের জিমিজেম্‌স্ কিরূপ নিষ্ঠুর সমালোচনা করিয়াছে”, তখন আমার সমস্ত মনে হইল।

স্তুভিত হইয়া জিজ্ঞাসা করিলাম, “তোমার পুস্তক লিলি? তুমি পুস্তক লিখিয়াছ, কই, আমায় ত’ বল নাই?” আমার তখন যে কি রকম মনে হইতেছিল, লিখিয়া প্রকাশ করা অসম্ভব।

লিলি বলিল, “না জ্যাক, তোমায় বলি নাই; মনে করিয়াছিলাম, সমালোচনা বাহির হইবার পর তোমায় দেখাইব, তোমায় আশ্চর্যান্বিত করিব, আমার প্রশংসা কাগজে দেখিয়া তোমার কত আনন্দ হইবে, কিন্তু জিমিজেম্‌স্ যে এরূপ অশনি সন্ধ্যাত করিবে, তা আমি স্বপ্নেও ভাবি নাই।”

লিলির সেই বিবাদমাখা মুখ দেখিয়া আমার বড় কষ্ট হইল; একবার মনে করিলাম; সব কথা বলি, কিন্তু সাহস হইল না। ভাবিলাম, ছুদিনেই লিলি সব ভুলিয়া যাইবে, আপাততঃ উহাকে সন্তুষ্ট করিবার চেষ্টা দেখি।

বলিলাম, “লিলি! এস, ভোদুভিল থিয়েটারে যাই, মিথ্যা মন খারাপ করিও না।”

লিলি আমার ভাবী পত্নী, সুতরাং আমার সহিত থিয়েটারে যাইতে কেহ আপত্তি করিল না।

\* \* \* \* \*

ভেদভিল্ থিয়েটারে “এক রাত্রির বহির্বাঁস” অভিনীত হইতেছিল। আমার বোধ হয়, পৃথিবীতে এমন গভীর পুরুষ কেহ নাই, যিনি ইহা দেখিয়া হাশু সম্বরণ করিতে পারেন। আমি প্রথমবার যখন দেখি, তখন হাসিতে হাসিতে আমার শ্বাসরোধ হইবার উপক্রম হইয়াছিল, অধিকাংশ দর্শকেরই আমার দশা।

যাহা হউক, লিলি প্রাণ খুলিয়া হাসিতেছে দেখিয়া, আমার আমোদ হইল, হাসির ধূমে লিলির চক্ষে জল আসিল, অতীত কথা বোধ হয় আর ব্যথা দেয় নাই।

অভিনয় শেষ হইলে, আমরা “কফে রয়েলে” কিছু আহার করিবার মানসে গমন করিলাম। আহারান্তে বাহিরে আসিতেছি, এমন সময় দেখি, অদূরে আমার এক বন্ধু দাঁড়াইয়া। আমার মহা আতঙ্ক উপস্থিত হইল; কারণ, আমার এই বন্ধু কখন আমার নাম ধরিয়া ডাকেন না; আমার সমালোচনায় ব্যবহৃত জিমিজেম্‌স্ নামে ডাকেন।

একবার ক্ষণেকের তরে আশা হইয়াছিল, সে আমায় দেখিতে পাইবে না। কিন্তু সে আশা বৃথা হইল। সে “আরে জিমিজেম্‌স্ যে?” বলিয়া ছুটিয়া আসিয়া পশ্চাতে লিলিকে দেখিয়া সরিয়া দাঁড়াইল। শুধু বলিল, “আমায় ক্ষমা কর, জানিতাম না, তোমার সহিত সাথী আছে।” কিন্তু তখন য! অনিষ্ট হইবার হইয়া গিয়াছে।

জিমিজেম্‌স্ নাম শুনিয়াই লিলি চারিদিকে চাহিয়া দেখিল, কিন্তু ছুঁখের বিষয়, আর কেহ সেখানে ছিল না। লিলি একবার আমার বন্ধুর মুখপানে আর একবার আমার পানে চাহিল। আমি চক্ষু বৃত করিলাম। নিঃশব্দে বাহিরে আসিয়া দু’জনে গাড়ীতে উঠিলাম।

পথে কোন কথাই হইল না। আমার সাহস হইল না, লিলির বোধ হয় ইচ্ছা হইল না।

গাড়ী যখন লিলির বাড়ী পহঁছিল, লিলি আপনি নামিল, আমি অশ্রমনস্ক ছিলাম, সাহায্য করিতে ভুলিয়া গেলাম। একবার আমার দিকে চাহিয়া ধীরে ধীরে লিলি বলিল :—

“মিষ্টার রো, আজ এই আমাদের শেষ দেখা, কাল আপনার উপহার-গুলি ফেরৎ পাইবেন। আমি কাপুরুষ মিথ্যাবাদীকে বিবাহ করিতে পারিব না!” আমি কিছু বলিবার পূর্বেই লিলি অদৃশ্য হইল।

শ্রীমন্নথকৃষ্ণ দেব।

## মোগল সাম্রাজ্যের রাজস্ব।\*

যে মোগল সাম্রাজ্য বিশালতা, ধনগৌরব ও সামরিক বলে এশিয়া-খণ্ডের অপরাপর সাম্রাজ্য অপেক্ষা শ্রেষ্ঠতা লাভ করিয়াছিল, এবং যাহার ঐশ্বর্যের স্বপ্নকাহিনীতে প্রলুব্ধ হইয়া বৈদেশিকগণ দলে দলে ভারতবর্ষে আগমন করিয়াছিল, তাহার রাজস্বের পরিমাণ অবগত হইবার জন্য স্বভাবতঃই কৌতূহল জন্মিয়া থাকে। সুদৃশ্য রাজদরবার, বিপুল সৈন্য, অসংখ্য রাজ-কর্মচারী, সাম্রাজ্যের মেরুদণ্ডস্বরূপ আভিজাত সম্প্রদায় এবং রাজ-পরিবার-বর্গের ভোগবিলাসের জন্য বাদসাহগণ প্রভূত ধনরাশি ব্যয় করিতেন। তাঁহারা এই প্রভূত ধনরাশি কি ভাবে সংগ্রহ করিতেন, তাহা আলোচনার যোগ্য। ভূমির রাজস্বই রাজস্বের প্রধান অংশ। আমরা এখানে তাহার একটা তালিকা প্রদান করিলাম।

আকবর	১৫২৪	...	১৬৫৬	৮৮০০০
ঐ	১৬০৬	...	১১৭	৪৪ ৮৮০০০
জাহাঙ্গীর	১৬২৭	...	১৭	৪৯ ৩৩০০০

\* Aurangzeb by Stanley Lane-Poole. (Rulers of India Series.)

শাহজাহান	১৬২৮	...	১৬ ৬৬ ৬৬০০০
ঐ	১৬৪৮	...	২২ ০০ ০০০০০
ঐ	১৬৫৫	...	২৬ ৭৩ ৭৭০০০
আওরঙ্গজীব	১৬৬০	...	২২ ৫৮ ৬৬০০০
ঐ	১৬৬৬	...	২৩ ৭৩ ৩৩০০০
ঐ	১৬৬৭	...	২৭ ৪২ ২২০০০
ঐ	১৬৯৭	...	৩৮ ৭১ ১১০০০
ঐ	১৭০৭	...	৩০ ১৭ ৭৭০০০

মোগল শাসনাধীনে ভূমির রাজস্ব ক্রমশঃ বৃদ্ধিলাভ করিয়াছে। আকবর বাদশাহের রাজত্বের শেষভাগে ভূমির রাজস্ব ১৬,৫৬,৮৮,০০০ নির্ধারিত ছিল। কিন্তু আওরঙ্গজীব বাদশাহের চরমোন্নতির সময় উহা ক্রমশঃ বৃদ্ধিত হইয়া ৩৮,৭১,১১,০০০ টাকায় পরিণত হইয়াছিল। করদরাজ্য সমূহ হইতে বাদশাহগণ যে রাজকর প্রাপ্ত হইতেন, তাহাও এই তালিকাতে গ্রহণ করা হইয়াছে। দক্ষিণাপথের স্বাধীন মুসলমান রাজ্য সকল করদরাজ্যে পরিণত হওয়াতেই ১৬৫৫ খ্রীষ্টাব্দে ভূমির রাজস্ব বৃদ্ধিপ্রাপ্ত হইয়াছিল।

উল্লিখিত তালিকা হইতে দেখা যাইতেছে যে, ১৬৬০ ও ১৭০৭ খ্রীষ্টাব্দে ভূমির রাজস্ব হ্রাস হইয়াছিল। আওরঙ্গজীবের সিংহাসনারোহণকালে অন্তর্বিপ্লবে সমস্ত ভারতবর্ষ আলোড়িত হইয়াছিল এবং তৎপর ভারতব্যাপী ছুর্ভিক্ষ উপস্থিত হইয়াছিল; ইহাই ১৬৬০ খ্রীষ্টাব্দে ভূমির রাজস্ব হ্রাস হইবার কারণ। দীর্ঘকালব্যাপী যুদ্ধবিগ্রহ ও দক্ষিণাপথের অরাজকতানিবন্ধন ১৭০৭ খ্রীষ্টাব্দে ভূমির রাজস্ব হ্রাস প্রাপ্ত হইয়াছিল। শাসনকার্য্য-সংক্রান্ত ব্যয় নির্বাহ করিয়া রাজকোষে বাদশাহগণের নিজ ব্যয় জন্ত কি পরিমাণ অর্থ উদ্ধৃত থাকিত, আমরা তাহা নির্ণয় করিতেছি। মির আত-ই আলম নামক ঐতিহাসিক গ্রন্থকারী বলেন যে, মোগল সাম্রাজ্যের রাজস্ব ২৩,১১,৪২,৯০০ টাকা নির্ধারিত ছিল, তন্মধ্যে বাদশাহগণ নিজ ব্যয় নির্বাহার্থ (খালেসা) ৪,৩১,৯২,৫০০ মুদ্রা গ্রহণ করিতেন; সৈনিক ও আভিজাত সম্প্রদায়ের জন্ত (জায়গীর) ১৮,৭৯,৪৩,৩০০ মুদ্রা নির্দিষ্ট ছিল। রাজ্যশাসন-সংক্রান্ত আবর্তীয় ব্যয় নির্বাহ করিয়া রাজকোষে সমগ্র রাজস্বের ষষ্ঠাংশ হইতে পঞ্চমাংশ পর্য্যন্ত সঞ্চিত হইত।

আমরা এ পর্য্যন্ত কেবল ভূমির রাজস্ব সম্বন্ধেই আলোচনা করিয়াছি। অগ্ৰাণ্ড উপায়ে কত মুদ্রা মোগল-রাজকোষে সঞ্চিত হইত, তাহা অবধারণ করার সুষ্ঠু উপায় নাই। আইন-ই-আকবরি গ্রন্থে লিখিত আছে যে, আকবর বাদশাহ আটত্রিশ প্রকার কর রহিত বা হ্রাস করিয়াছিলেন। আওরঙ্গজীব বাদশাহের রাজত্বের প্রারম্ভে অন্তর্বিপ্লবে সমগ্র ভারতবর্ষ আলোড়িত ও ভারতব্যাপী ছুর্ভিক্ষ উপস্থিত হওয়াতে, তিনি আশি প্রকার কর রহিত করিয়াছিলেন। ইতিহাসবেত্তা কাফিখাঁ বলেন যে, ভূমির রাজস্ব ব্যতীত অগ্র উপায়েও কোটা কোটা মুদ্রা রাজকোষে আনীত হইত। বাদশাহগণ কর রহিত করিবার আদেশ করিলে, রাজপুরুষগণ তৎসম্বন্ধে কোন মনোযোগ করিতেন না। আকবর বাদশাহ যে সকল রাজকর রহিত বা হ্রাস করিয়াছিলেন, আওরঙ্গজীব তাহার কতকগুলি পুনঃ স্থাপিত বা বৃদ্ধিত করিয়াছিলেন। আওরঙ্গজীব মুসলমান পণ্যজীবীদিগকে শুল্ক হইতে অব্যাহতি দিয়াছিলেন। কিন্তু পরে এই নিয়ম পরিবর্তন করিয়া হিন্দুরা যে পরিমাণ শুল্ক দিত, তাহার অর্ধেক মুসলমানদের নিকট হইতে গ্রহণ করিতে আদেশ করিয়াছিলেন। ভূমির রাজস্ব ব্যতীত নানা প্রকার হাঙ্গুল, (Tolls) কর (Tax) ও অতিরিক্ত কর (Cess) হইতে মোগলরাজকোষে প্রচুর অর্থাগম হইত; কিন্তু সাময়িক মুসলমান ইতিহাস-বেত্তাগণ তাহার কোন তালিকা রক্ষা করেন নাই। আওরঙ্গজীব জিজিয়া কর পুনঃ স্থাপিত করিলে রাজস্ব বৃদ্ধি প্রাপ্ত হইয়াছিল। তার পর বাদশাহ সর্বদা যে সকল মহার্ঘ্য দ্রব্য উপহার পাইতেন, তাহা হইতেও প্রচুর অর্থ লাভ হইত। যদিও তাহার অগ্ৰাণ্ড বিষয়ক রাজস্ব সম্বন্ধে লেখনী চালনা করেন নাই, তথাপি আমরা বৈদেশিক পরিব্রাজকগণের নিকট হইতে কিছু তত্ত্ব পাইতে পারি। উইলিয়ম হাকিন্স সাহেব জাহাঙ্গীর বাদশাহের সুপরিচিত ছিলেন। তিনি বলেন যে, জাহাঙ্গীর বাদশাহের রাজত্বকালে ১৬০৯ হইতে ১৬২৯ খ্রীষ্টাব্দ পর্য্যন্ত বার্ষিক পঞ্চাশ কোটা টাকা রাজস্ব নির্ধারিত ছিল। ভূমির রাজস্ব ও অগ্ৰাণ্ড উপায়ে সংগৃহীত অর্থ এই হিসাবে ধৃত হইয়া থাকিলে তাহার উক্তি অত্যধিক অতিরঞ্জিত বলিয়া বোধ হয় না। বৈদেশিক চিকিৎসক কাক্র বলেন যে, আওরঙ্গজীব বাদশাহ অগ্ৰাণ্ড উপায়ে যে পরিমাণ রাজস্ব সংগ্রহ করিতেন, তাহা

ভূমির রাজস্ব হইতে ন্যূন ছিল না। কেবল মাত্র এক স্মার্ট হইতেই আওরঙ্গজীব প্রায় ৫১ লক্ষ টাকা লাভ করিতেন। ডাক্তার জিমিলি কেরারি দক্ষিণাপথে আওরঙ্গজীবের দর্শন লাভ করিয়াছিলেন। তিনি বলেন যে, মোগলরাজ সমস্ত রাজস্ব বাবদ আশি কোটি টাকা পাইতেন। আমরা পূর্বো-ল্লিখিত তালিকায় দেখিয়াছি যে, ১৬৯৭ খ্রীষ্টাব্দে ৩৮,৭১,১১,০০০ টাকা ভূমির রাজস্ব নির্দিষ্ট ছিল। আমরা এই তিনজন বৈদেশিক পরিব্রাজকের বিবরণে একত্র দেখিতেছি। তাঁহাদের প্রত্যেকের মতানুসারে ভূমির রাজস্ব যে পরিমাণ নির্দিষ্ট ছিল, মোগল বাদশাহগণ সর্বসাকুল্যে তাহার দ্বিগুণ রাজস্ব প্রাপ্ত হইতেন। মোগল-রাজত্বকালে ১৫৯৪ খ্রীষ্টাব্দে সর্বসাকুল্যে ৩৩,১৩,৭৭,০০০ টাকা রাজস্ব স্বরূপ নির্দিষ্ট ছিল; তৎপর ক্রমশঃ বৃদ্ধি প্রাপ্ত হইয়া এক শতাব্দী পরে উহা ৭৭,৪২,২২,০০০ টাকাতো পরিণত হইয়াছিল। কাক্র বলেন, “ঐদৃশ বিপুল রাজস্ব বিশ্বয়জনক সন্দেহ নাই। কিন্তু এই অর্থরাশি চির-কাল রাজকোষে আবদ্ধ থাকিত না; প্রত্যেক বৎসর অন্ততঃ উহার অধিকাংশ বাহির হইয়া পড়িত ও পুনর্ব্বার সাম্রাজ্যের সর্বত্র শত মুখে বিস্তৃত হইত। বিশাল মোগল-সাম্রাজ্যের অর্ধাংশ রাজকীয় বদান্ততার উপর নির্ভর করিত। অসংখ্য রাজকর্মচারী ও সৈন্য রাজকোষ হইতে প্রাপ্তবেতন দ্বারা তাহাদের জীবিকা নির্ব্বাহ করিত এবং যে সকল শ্রমজীবী কেবল মাত্র সম্রাটের জন্ত পরিশ্রম করিত, তাহারাও রাজকোষ হইতে জীবন-যাত্রা নির্ব্বাহ জন্ত অর্থ প্রাপ্ত হইত। নগরবাসী অধিকাংশ শিল্পী মোগল কর্তৃক আদিষ্ট হইয়া কার্যে নিরত থাকিত, তাহারাও রাজকোষ হইতে অর্থ শোষণ করিত।” মোগল বাদশাহগণ শত মুখে এত প্রচুর ব্যয় করিতেন যে, তাদৃশ বিপুল আয় স্বত্বেও তাঁহারা অতি সামান্য সঞ্চয় করিতে পারিতেন। শাহজাহান বাদশাহের সুদীর্ঘ রাজত্বকাল শান্তিপূর্ণ ছিল, এবং বাদশাহ স্বয়ং রাজকোষে অর্থ-সঞ্চয় করিবার জন্ত প্রয়াসী ছিলেন; তথাপি তিনি রাজকোষে নগদ ছয়কোটি মুদ্রাও সঞ্চিত করিতে পারেন নাই। আওরঙ্গজীবের মৃত্যুকালে কেবল তের লক্ষ টাকা রাজকোষে সঞ্চিত ছিল।

শ্রীরামপ্রাণ গুপ্ত ।

## পরিত্যক্তা ।

সখা গো !

ফেলে দিবে ছিল যদি মনে,  
কেন তবে লইলে তুলিয়া ?  
সাধ যদি দলিবে চরণে,  
কেন শিরে রাখিলে ধরিয়া ?  
বাড়াইতে শুধু কি যাতনা  
নাথ, হেন করিলে ছলনা ?

বারিহীন ধূলিময় পথে

একপাশে ছিলাম পড়িয়া,  
কেহ কভু পথে যেতে যেতে  
চাহিত না সে দিকে ফিরিয়া,  
জলভরা আঁখি ছুটি ল'য়ে  
আকাশের পানে ছিন্তু চেয়ে ;

হৃদয়ের ব্যথা সমুদায়

জানাইতে ছিন্তু পরমেশে,  
হেনকালে দীন ললনায়  
তুলিয়া লইলে তুমি এসে,  
সেই মেহ অসীম যতন  
মনে হয় নিশার স্বপন !

নিশার স্বপন সম হায়,

ফুরায়ে গিয়াছে নম্র সখি ;  
হৃদিনেই গেছে সমুদায়  
মিলায়ে সে স্বরণের ছবি,  
নয়কের মাঝারে আবার  
দেখ স্থান হয়েছে আমার ।

দুখ পাই ক্ষতি নাই নাথ,  
 দুখেতে গঠিত অভাগিনী ;  
 নিশিদিন দুখ আছে সাথ,  
 সে আমার জীবন-সঙ্গিনী,  
 অন্ধকার ঘোর না ডরাই  
 কিন্তু, চপলা-খেলায় কাজ নাই ।

নাথ গো ! শুধাই আবার, যদি মনে  
 ফেলে দিবে ছিল এ বাসনা,  
 তবে কেন বল সযতনে  
 তুলে নিলে দরিদ্র-ললনা ?  
 ভেঙ্গে দিলে হৃদয়-বাধন,  
 শুষ্ক প্রাণ করিলে দহন ?

শ্রীমন্নথকৃষ্ণ দেব ।

## মকর সংক্রান্তি ।

মকর সংক্রান্তিটা বঙ্গদেশে পৌষপার্বণ বলিয়াই বিশেষ পরিচিত । কেন, তা কি বলিতে হইবে? পৌষ-পার্বণের সঙ্গে যে রাসনিক সম্বন্ধ আছে! সে পৌষ সংক্রান্তির চন্দ্রপুলি, রসবড়া, ভাজাপুলি হইতে গরীবের আস্কে পর্য্যন্ত কি ভুলিবার জিনিস? তাই আমরা পৌষ-পার্বণই ভাল বুঝি! নামটা শুনিলেই যেন প্রাণটা চম্কে ওঠে, আর টোথের সামনে ৫০ রক্ষম পিঠে পুলির স্তূপ দেখি!

যিনি এই পৌষের মকর সংক্রান্তিতে পৌষ-পার্বণের প্রথাটা চালাইয়া দিয়াছিলেন, সেই অজ্ঞাতনামা মহাত্মাকে প্রণাম করি! তিনি ঠিক সময়টা নির্বাচন করিয়াছিলেন সন্দেহ নাই। পৌষে শীত বেশ জাঁকিয়া বসিয়াছে, বেশ 'উপভোগক্ষম' কাল বটে; আবার সংক্রান্তিতেই মকর, "মকরে প্রথরো

রবি!" স্তরাতঃ সূর্য্যতাপ ক্রমে পরে বাড়িয়া যাইবে; এই সংক্রান্তিটা হচ্ছে উভয়ের সন্ধিস্থল! এদিকেও হৈমন্তিক ধাত্তের মরসুম শেষ হইয়া গিয়াছে, সকলেই নূতন ধাত্ত :গোলাজাত করিয়া বেশ স্ফূর্ত্তিবুক্ত আছে, এ সময় একটা পরানুষ্ঠান না করিলে কি স্ফূর্ত্তি থাকে? শীতকাল, বৃহৎ ব্যক্তি, খেয়ে বেশ আরাম করা যায়—উদরে গরম, বাহিরে গরম করিয়া বেশ ঘুম হয়—স্তরাতঃ আহারের পার্কণই এ সময়ে বেশ প্রশস্ত; সকলেই যাতে আমোদটা পেতে পারে, স্তরাতঃ নূতন চালের পিঠে পুলি—সামান্য কৃষকও বেশ পার্কণটা ভোগ করিতে পাইবে, কারণ সম্প্রতি সে হৈমন্তিক ধাত্ত গোলাজাত করিয়াছে, বড় মানুষ ঝাঁরা—তাঁরাও ত বেশ পারিবেনই। অতএব পাঠক, দেখুন, যিনি পৌষ-পার্কণটা প্রচলন করেছিলেন, তিনি বেশ বুদ্ধিপূর্ব্বক ভাবিয়া চিন্তিয়াই করিয়াছিলেন। এ সময়টা ব্যারাম যদিও বড় হয় না, স্তরাতঃ গুরুপাক জিনিসে আপত্তি হইবার বা ভয় হইবার কথা নাই, তবে তাঁর ভবিষ্যৎ দৃষ্টি খুব প্রথর ছিল না, বোধ হয় তাই তিনি আজকালকার অজীর্ণ ও অনুরোগদ্বয়ের কথা ভাবেন নাই।

সকল পার্কণেরই একটা পূজা-অর্চনা হয়, পৌষ-পার্কণের পূজা বোধ হয় উদরপূজা—টেকি আর চাল! গুপ্তপ্রেশ পঞ্জিকার ছবিতেই তার প্রমাণ দেখুন। দুর্গা পূজায় দুর্গার ছবি, কালী পূজায় কালীর ছবি, আর পৌষ-পার্কণে টেকিতে চাল গুঁড়া করার ছবি।

বঙ্গে যে এই পৌষ-পার্কণে কেবল পিঠা পুলিই হয়, তাহা নহে, কলা ঝিটার চর্চাও খুব হইয়া থাকে। সংক্রান্তির পূর্ব্ব দিবস চাউলের গুঁড়া জলে গুলিয়া গোলা প্রস্তুত করা হয়। প্রাতঃকালেই প্রত্যেক গৃহস্থের বাটীর প্রাঙ্গণ বেশ পরিষ্কার করিয়া গেঁড়বরজল দ্বারা লেপিয়া রাখা হয়। তার পর বৈকালে বাটীর রমণীগণ এক একবাটা চাউলের গোলা আর একখণ্ড ছোট ছাকড়া লইয়া নিজ নিজ শিল্প-চাতুর্য্যের পরিচয় দিতে আরম্ভ করেন। ছাকড়াটা গোলায় ভিজাইয়া হাতে লইয়া আবশ্যক মত টিপিয়া যথাস্থানে অঙ্গুলির ধারে দিতে থাকেন। কত প্রকার চিত্র বিচিত্র শিল্প-কৌশলই যে প্রদর্শিত হয়, তাহার ইয়ত্তা নাই! নানা প্রকার লতা, পাতা, পদ্ম, চতুষ্কোণ, মণ্ডল, বৃত্তমণ্ডল, পূর্ণকুম্ভ ঝাড়, উত্থান, হাতি, ঘোড়া, কুকুর,

বিড়াল, বাঘ, মহিষ, পালোয়ান, দ্বারবান, পাকীবেহারা, ডুলিবেহারা, চৈকি-শালা, গোশালা ইত্যাদি অসংখ্য চিত্র প্রাক্ষণের শোভা বৃদ্ধি করে। বঙ্গের সর্বস্থলে ইহার প্রচলন আছে কি না, জানি না, তবে পূর্ব বাঙ্গালার অনেক অনেকস্থলে ইহার বিশেষ প্রচলন আছে, এবং রমণীগণ বিশেষ আগ্রহের সঙ্গে এই সব আলেপনা দিয়া থাকেন। পূর্ববঙ্গের অনেক স্থলে ঐ পর্বকে 'গোবর আলেপন' পর্ব বলে। প্রথমে গোবরদ্বারা লেপিয়া, তার পর আলেপনা দেওয়াতেই ঐ নাম হইয়াছে। গোবররঞ্জিত শুষ্ক প্রাক্ষণে ঐ সমস্ত সুধা-ধবলিত আলেপনাগুলি বাস্তবিকই দেখিতে বড় সুন্দর হয়, প্রাণ মন মুগ্ধ করে। জ্যোৎস্নারাত্রি ঐ সব আলেপনার উপর চন্দ্রকিরণ-সম্পাতে সে শোভা শতগুণ বৃদ্ধি হয়, এবং গুণগ্রাহী সৌন্দর্য্যপ্রিয় ব্যক্তিগণ তাহা দেখিয়া মোহিত হইয়া যান। কৃষ্ণপক্ষের তারামণ্ডিত রজনীতেও ঐ সব আলেপনা শ্বেত ছায়ার মত বোধ হয়।

ঐ দিনে ঐ সব স্থানে গরীবের দ্বারেও দ্বারবান দাঁড়ায়, স্বোদর পুরণে অক্ষম ব্যক্তির দ্বারেও "হস্ত্যশ্ব রথ পাদাত চতুরঙ্গবলের" আবির্ভাব হয়, নির্ধনের প্রাক্ষণেও মুদ্রাপূর্ণ আয়স-সিন্দুক পড়িয়া থাকে! সে বড় আমোদেব দিন! বালক-বালিকাগণতো আনন্দে ছুটিয়া ছুটিয়া এখানে ওখানে নিজ নিজ বিদ্যাহারী মানুষ গরু প্রভৃতির অত্মায়রূপ মানহানিকর আদর্শ অঙ্কিত করিতে থাকে; আর 'মা একটা হাতী দাও,' 'একটা দরয়ান দেওয়া হোলো না' ইত্যাদি রূপ বায়না করিতে থাকে! ২১২ সের চাউলের গুঁড়ার কমে কিছুতেই এ প্রকাণ্ড চিত্রকর্মের অবসান হয় না, কোন কোন সময় রাত্রি হইয়া গেলেও আহালাদিকর কার্য ভুলিয়া প্রদীপ জালিয়া রমণীগণ এই আলেপনা দিতে থাকেন। পরদিন প্রাতে গ্রামের পাঁচজন বাড়ীর উপর আসিয়া যে সব আলেপনা দেখিয়া প্রশংসা করেন, তাহাদের চিত্র-কারিণীগণের মন তখন আনন্দে পূর্ণ হইয়া যায়, অবরোধের অন্ধকার তাহাদের আনন্দ হাশ্বে উদ্ভাসিত হইয়া উঠে। আজকাল এই আলেপনার চর্চা অনেক কমিয়া গিয়াছে। কারণ আজকাল ঊনবিংশ শতাব্দীর নূতন সভ্যতার নিকট ওগুলি হয় বলিয়া পরিত্যাজ্য হইয়াছে, সভ্য স্বামীর দেখা দেখি সভ্য স্ত্রী, সভ্য ভ্রাতার দেখা দেখি সভ্য ভগ্নী প্রভৃতি আর ও সব চিত্র-কর্ম মন দেন না—অপমানই

বোধ করেন—কিন্তু পাঠক মহাশয়! বড় ছুখে জিজ্ঞাসা করি, এটা কি হয়—এটা কি পরিত্যাজ্য? এইরূপ আলেপনায় রমণীগণের চিত্রকলাবিদ্যায় কতদূর ক্ষমতা জন্মিত, কতদূর উৎকর্ষতা-বিধান হইত—খোলা প্রাক্ষণে নিজ সাধ্যাহারী চিত্র করিয়া সেটা সাধারণের নিকট প্রদর্শনীর মত উন্মুক্ত রাখা হইত, আর দশজনে স্বতঃপ্রবৃত্ত হইয়া—দেখিয়া অযাচিত প্রশংসা দ্বারা অজ্ঞাতনামী চিত্র-কারিণীর কত উৎসাহ বৃদ্ধি করিয়া দিতেন! বলুন দেখি, এটা কি নিকুৎসাহ দিবার উপযুক্ত, কি উৎসাহ দিবার উপযুক্ত কলা? এই চিত্র-কার্যে বৃত্ত, সরলরেখা, বক্ররেখা, ডিম্বাকার ক্ষেত্র প্রভৃতির অঙ্কনে বেশ পরিপক্বতা লাভ হইত; এবং এই সব লতা পদ্মাদির অধিকাংশই সমদ্ব্যংশ-বিশিষ্ট (Symmetrical) চিত্র হওয়ায়, সে গুলির বিষয়েও বেশ অভিজ্ঞতা এবং চিত্রের অনুপাত সম্বন্ধে বেশ জ্ঞান জন্মিত। চাউলের আলেপনায় মোটা রেখার চিত্রই ভাল হয়, স্থল্লকাজের চিত্র ভাল দেখায় না, কিন্তু সেই মোটা কাজের মধ্যেও স্থল্লকাজ থাকায় চিত্রগুলি বেশ নয়নরঞ্জক হয়—কিন্তু এটা প্রাচীন প্রথা বলিয়া—অসভ্যবোধে আমরা দূর করিয়া বিলাতী Drawing শিখাইতেছি—আমাদের এ Drawing টা যে কিসে এত হয় হইল, বুঝি না। কুসংস্কারভীতি নামক এক ছুরন্ত সংক্রামক ব্যাধি আমাদের মধ্যে আসিয়াই এ সব ঘটাইতেছে। যা কিছু প্রাচীন আমরা দেখি, তাই কুসংস্কার বলিয়া দূর করি—ভিতরে আর ডুবিয়া দেখি না! আমাদের দেশে শুভকার্যে পীঠে আলেপনা দেওয়াই প্রথা ছিল; তাতেও চিত্র-বিদ্যার উৎসাহ দেওয়া হইত, এখন তাহা কোন কোন স্থানে উঠিয়াই গিয়াছে, কোথাও কুল-ললনাদের হাত থেকে মালাকর বা চিত্র-ব্যবসায়ীর হস্তে সে পীঠ-চিত্রের ভার পড়িয়াছে, কুল-রমণীগণ না কি উহাতে অপমান বোধ করেন! হা অদৃষ্ট!

পিঠে পুলির কথায় কথায় কোথায় আসিয়া পড়িয়াছি; পাঠক মাপ করিবেন—আলেপনার ক্রমশঃ লোপ দেখিয়া বড় ছুখে কথাগুলি বলিলাম। যাহা হউক, বঙ্গের পৌষ-পার্বণ ঐরূপ আলেপনায় আর নানাপ্রকার পিষ্টক পায়সে উদ্ঘাপন হইয়া থাকে। এ ব্রতেরও ব্রতী থাকেন; তাহারা সেদিন অনাহার করেন না, মুঠা পিঠে ও স্বত্ৰাণ্ড পিঠে খাইয়া থাকেন! এটাও বেশ একটা ফন্দি! যে স্থানটা ভাত ডালে পূর্ণ হইত, তা শুদ্ধ পিঠেতেই

পূর্ণ হয়! তবে মুঠা-পিঠাটা বড় সুখাণ্ড নহে। চালের আটা প্রস্তুত করিয়া হাতের গুটোর চাপিয়া একটা একটা ছোট তাল পাকান হয়, তাই হুখে আর মিষ্টিতে পাক করিয়া লওয়া হয়। উপরের হুখ আর মিষ্টি রসটুকু খেতে ভাল বটে, কিন্তু আঁটিটা আর খেতে ভাল লাগবে না!, ফেলে দিতে ইচ্ছা হয়, না মিষ্টি—না কিছু, কেবল পিটুলির আটা! আস্কেপিঠে গরম গরম হুখ-রস-মিশ্রিত প্রস্তুত রসে ফেলিয়া রাখিয়া শেষে অনেকক্ষণ পর রস বেশ হাড়ে হাড়ে বিঁধিলে খাওয়ার সময় একটু গরম করিয়া লইলে মন্দ নয়,—বেশ হয়। সরচুকলি, চন্দ্রপুলি, ভাজাপুলি, এদের কথাতো ছাড়িয়াই দিন! তারাতো অমৃত!

বন্ধে পার্কণ একরূপ শেষ হইল। এখন এই উড়িয়া দেশ সম্বন্ধে একটু আলোচনা করা খাউক। এখানেও পৌষ-পার্কণ প্রচলিত আছে, তবে এখানে ইহাকে মাকরী সংক্রান্তিই বলে! পিঠে, পুলি এখানেও গৃহস্থগণ করিয়া থাকেন। উড়িয়াগণ চাউলের গুঁড়ার পিঠেতে কেমন মজবুত, তাহা কলিকাতার পাঠকের অবদিত নাই—চাউলের গুঁড়া করা তো কলিকাতায় উড়িয়া প্রভুদেরই একচটিয়া! আর তাহাদের প্রস্তুত পিঠেও কলিকাতায় দেখিয়াছেন। সুতরাং এখানেও যে পিঠের বেশ আদর আছে, তাহাতে সন্দেহ মাত্র নাই, তবে সে সব পিঠের অধিকাংশই অধম অজীর্ণ রোগগ্রস্ত বাঙ্গালীর পক্ষে জারণ অসম্ভব! সে সব “পিঠে খেলে পেটে সয় না!” ভাল পিঠেও না আছে তা নয়, তবে আমাদের দেশের মত যেন বোধ হয় না।

এখানে ময়ূরভঞ্জে জগন্নাথমন্দিরে পিঠে প্রস্তুত হয়। শ্রীজগন্নাথজীকে এ সময় পায়স পিষ্টক ভোগে পরিতৃপ্ত করা হয়, রামকৃষ্ণাদিও যাহারা আছেন, ফাঁক যান না! অধম আমরাই ফাঁকে পড়িয়া থাকি।

ময়ূরভঞ্জে পিষ্টকের প্রধান উপকরণ নারিকেলের ধড় অভাব! পাওয়াই যায় না! যদি বা পাওয়া যায়, তবে সে অগ্নিমূল্য—১০, ১০ এক একটা! ভাল হুখও স্থানের তুলনায় দুগুন মূল্য, সুতরাং পিষ্টকের সুখ কেমন করিয়া হইবে? এখানে চিত্রকর্ণের প্রচলন এখনও যথেষ্ট আছে; কারণ বোধ হয়, এখনও ততটা সভ্য হয় নাই! এইবার এ রাজ্যের সাঁওতাল প্রভৃতির কথা বলিব। মকর সংক্রান্তি তাহাদের একটা বড় প্রধান পর্ব!

এ সময় তাহাদের আমোদের সীমা নাই। এই সংক্রান্তিতে তাহারা বিশেষ স্কৃতি ও আমোদ করিয়া বেড়ায়। এ যেন বাঙ্গালার ছুর্গোৎসবের মত। সহরে তত বেশী দেখা যায় না; কারণ, তাহারা সহরে বড় আসে না, কিন্তু তাহাদের গ্রামে গ্রামে এ সময় আনন্দের ঢেউ খেলিতেছে। সকলেই সুখুবা যথাসাধ্য অধিকাংশই এ সময় নূতন কাপড় কিনিয়া নানারঙ্গে রঞ্জিত করিয়া লয়। হরিদ্রাবর্ণে, বাসন্তীরঙ্গে, সবুজরঙ্গে, লালরঙ্গে—নানারঙ্গে কাপড় রঞ্জিত করিয়া পরিধান করে, বা উষ্ণীষরূপে মাথায় বাঁধে; রমণীগণ পরিধানই করে। রমণীগণ নব নব কিশলয় দ্বারা শিরোভূষণ ও কর্ণভূষণ করিয়া পরিধান করে। আর গীত-বাগের ও নৃত্যের ফোয়ারা ছুটিতে থাকে। প্রাণ ভরিয়া হাণ্ডিয়া মত্ত পান করিয়া, মাদল লইয়া দলে দলে স্ত্রী-পুরুষ নৃত্য-গীত করিয়া পথে পথে এবং গ্রাম হইতে গ্রামান্তরে বিচরণ করে। বালক বৃদ্ধের সহিত, যুবক বৃদ্ধার সহিত, তরুণী কিশোরের সহিত অবাধে মিশিয়া, প্রাণ খুলিয়া আমোদ করে। আর এই সময় তাহাদের “দেও” অর্থাৎ দেবতার পূজা করে। ইহাদের পুরোহিত একজন থাকে; সেই দেবতাকে আহ্বান করিয়া পূজা করে। আর অত্য়েরা মহা স্কৃতিতে তথায় নৃত্য-গীত করে। সাঁওতালদিগের দেবতার একটা নির্ণয় নাই বোধ হয়। বড় বড় গাছ তাহাদের এক দেবতা, বড় বড় পাথর—দেবতা। গাছের মূলের কাছে নানারূপ জন্তুর মৃগ্যমূর্তিও থাকে, পাথরে সিন্দূর লেপিয়াও তথায় রাখিয়া দেয়। ইহা ব্যতীত সূর্য্যও নাকি তাহাদের এক দেবতা। সূর্য্যকে তাহারা আবাহন ও পূজা করে, আর তাহার এবং অন্যান্য দেবতার উদ্দেশে অনেক মুরগী, ছাগল, শূকর উৎসর্গ করিয়া বলিদান দেয়। এই মকর-সংক্রান্তি দেবপূজার এক প্রধান সময়। এই সময় কত গণ্ড-পক্ষীরই যে কন্ম্ববন্ধন ছিন্ন হয়, তাহার ইয়ত্তা নাই।

এইরূপ বলিদানের পর দেবপ্রসাদ-জন্তুগুলি লইয়া ঝলসাইয়া, পোড়াইয়া, হাণ্ডিয়া সহযোগে উদরধেবের সেবায় লাগাইয়া দেয়, আর তার-পর দ্বিগুণ উৎসাহে ও স্কৃতিতে গীত বাগ নৃত্য চলিতে থাকে। চাউলের দ্বারা ইহারাও একরূপ পিষ্টক প্রস্তুত করিয়া থাকে, তবে তাহার আশ্বাদ বা আকৃতি-দর্শনসম্বন্ধে এ ক্ষুদ্র লেখক অপরাধী হয়েন নাই। এই মকর-সংক্রান্তির



সময় এ রাজ্যে স্থানে স্থানে মেলা বসিয়া থাকে এবং ধাতু, চাউল, কলাই ইত্যাদি বেশ সুবিধাদরে যথেষ্ট বিক্রীত হয়। সাঁওতালগণ এই সব মেলায় ধাতুাদি বিক্রয় করিয়া তল্লক অর্থে এইরূপ স্ফূর্তি করিয়া বেড়ায়। ইহাদের এই মকরের আমোদ প্রায় সপ্তাহকাল স্থায়ী হয়;—কেবল হাণ্ডিয়া পান আর নৃত্য-গীত-বাণী! সরল সাঁওতাল জাতি এইরূপে স্ত্রী-পুরুষে মিলিয়া মকর-সংক্রান্তির উৎসব উদ্‌যাপন করে। আমাদের মকর-সংক্রান্তিরও এই-খানেই উদ্‌যাপন হউক।

শ্রীযত্ননাথ চক্রবর্তী।

## আবাহন।

শুভ্রবেশে স্মিতনেত্রে হস্তে করি বর্গ বীণাখানি  
আজি তুমি এসো বীণাপানি!

তোমার কমল-করে সুকোমল-চম্পক পরশে  
জননি, ঝঙ্কার' তার হৃদয়ের বাসন্তী হরষে,—  
ফাল্গুন উঠুক জাগি' ধরণীর কেন্দ্রে কেন্দ্রে আজি,  
প্রকৃতি ধরুক অর্ঘ্য পুষ্পরচা কাব্যগ্রন্থরাজি

চরণে তোমার—

চক্ষে কণ্ঠে হৃদিতলে এস আজি মাতঃ  
চির-সাধনার!

উৎসবে নাচুক আজি নিখিলের চিত্ত-রাজধানী—  
ওগো সুধা-সৌন্দর্যের রাণি!

তোমার নয়নজ্যোতিঃ হ'ক ব্যাপ্ত নভঃনীলিমায়,  
তোমার স্মরভিখাস ব্যাপ্ত হ'ক চরাচরময়,

• তোমার বিশদ বাস হ'ক ব্যাপ্ত প্রভাত-আলোকে,  
তোমার অধর-হাস্য লিপ্ত হ'ক অ-শোক অশোকে—  
অনিন্দ্য-সুন্দরি।—

• স্বর্ণ-শীর্ষ-শশু হৃদি সঙ্গীত-হিল্লোলে  
উঠুক শিহরি'।

• সৃষ্টির আদিম সাক্ষী অনাঘস্ত সঙ্গীতরূপিণী  
ওগো তুমি বেদারাধ্যা বাণি!

অথগু আঁধারে যবে সারাবিশ্ব আছিল মগন—  
ভীষণ জীবন-যুদ্ধে কুজ্জাটির ভীম-আফালন,  
তোমারি তরল তানে এল শান্তি, এল স্নে একতা,  
রবি শশী তারা পৃথ্বী জন্মি তবে বহিল বারতা

• দূর—দূরান্তরে—

তোমারি মহিমা মাতঃ দিশি দিশি দিশি  
অনন্ত অধরে!

• বিশ্বের বিরাট দেহে ওগো তুমি চিন্ময়ী প্রকৃতি—  
বিশ্বময় তোমারি আরতি;

• বিকট জীমূতমন্ড্রে উঠে তব ভীষণ বিষাগ,  
গম্ভীর জলধি-কণ্ঠে উঠে তব সঙ্গীত মহান,  
নির্ঝর ঝর্ঝর গীতে, বিহগের স্তভার নিঃশ্বনে,  
তটিনীর কল-কলে, মৃদল মর্দার সমীরণে—

তোমার রাগিণী;

• সর্বব্যাপী তুমি মাতঃ প্রমীদ সন্তানে  
নিত্য, স্তম্ভাধিনি!

• নিখিল সৌন্দর্য-রাজ্য তোমারি ত বীণার ঝঙ্কার—  
বাগেশ্বর, তুমি বিশ্বাধার।

সুদূর অতীতে কবে নিঃস্বপনে আপন মনে বসি'  
গেয়েছিলে কোন্ গান, ভিন্ন ভিন্ন তারি তানরাশি'  
তুষারে সলিলে শৈলে রূপান্তরে রয়েছে জীবিত,  
আজো সে সঙ্গীতসুধা প্রাণে প্রাণে হইতেছে পীত  
অসীম বিশ্বয়ে ;

চক্ষে কণ্ঠে বেঁধে দাও—সৌন্দর্য্য সঙ্গীত  
ওগো, পরিচয়ে।

অনন্তব্রহ্মাণ্ডে দেবি দাও আজি 'আমার' করিয়া—

কণ্ঠ দাও ভাষায় ভরিয়া—

সেই কণ্ঠ ল'য়ে মাগো রত্নাকর রচে রামায়ণ,  
যেই কণ্ঠে কালিদাস শকুন্তলা করিল সৃজন,  
যেই কণ্ঠে দত্ত কবি মেঘ-নাদে নাদিল ছন্দুভি,  
যেই কণ্ঠে বীরগাথা আজিকার বুদ্ধ অন্ধ কবি  
গাহিল অতীতে,—

তারি ক্ষুদ্র ভগ্ন অংশ আজি কর দান  
ক্ষুদ্র ক্ষুদ্র চিতে।

আজিকার উণ্ড বীজ সুপ্তি ছাড়ি' উঠিবে জাগিয়া  
কালি' তব প্রসাদ লাগিয়া ;  
শাখায় পল্লবে পত্রে ফুলে ফলে বিকাশি' আপনা  
সাগ্রহমাধনে তব দিবানিশি করিবে ষাপনা  
তোমারি নিকুঞ্জে, বাণি, ছায়াদানে সুরভিত ধ্বাসে  
রচিবে নূতন রাজ্য—তাহাদের ষতটুকু আসে—  
হে বিশ্বরঞ্জিনি !

পরানের ভাষা দাও বাহিরের করি'  
কোকিল-গঞ্জিনি !

আশাময়ী ভাষাময়ী স্বপ্নময়ী স্বর্ণময়ী বাণি—  
অন্তরের বসন্তের রাণি !

বীণায় ঝঙ্কার আজি একবার—শুধু একবার,—  
দেখি গো পাষণ টুটি' বহে কি না ফল্লফীরধার,  
দেখি গো সলিল বিনা আছে কি না মঞ্জরী শুকায়ে,  
দেখি এ বায়সকূলে আছে কি না কোকিল লুকায়ে,  
মৃতসঞ্জীবনি !

আশীর্বাদে আশীর্বাদে শুভ কর শির  
পতিতপাবনি !

## বর্তমান সাহিত্য ও মানসিক ব্যাধি।

“বর্তমান সাহিত্য ও মানসিক ব্যাধি” কথাটা শুনিতে অনেকের নিকট অপ্ৰীতিকর হইতে পারে; কারণ, সাহিত্য-সেবার চিন্তের মলিনতা ধোত হয়, হৃদয় নিৰ্ম্মল হইয়া পবিত্র জ্ঞানের আবাসরূপে গঠিত হয়; সাহিত্য-সেবাতেই জাতীয় উন্নতি ও মনুষ্যত্ব স্ফূর্তি হয়,—এ হেন পবিত্র সাহিত্য হইতে মানসিক ব্যাধির সৃষ্টি হওয়া অসম্ভব! অসম্ভব সত্য, কিন্তু আমরা অনেক সময় দেখিতে পাই, জগৎ অসম্ভবও সম্ভব হয়, সম্ভবও অসম্ভাবুনায় পরিণত হয়।

সাহিত্যকে আমরা তিনটা স্তরে বিভক্ত করিতে পারি, যথা—ধর্ম্ম, ঐতিহাসিক, কাল্পনিক। এই ত্রিবিধ সাহিত্যেরই মুখ্য উদ্দেশ্য মানুষকে মনুষ্যের মত করিয়া গঠিত করা। কিন্তু অধুনা আমরা সাহিত্যের মুখ্য উদ্দেশ্য ভুলিয়া গিয়াছি—অধুনা ছই চারি ছত্র মিলাইয়া লিখিতে পারিলেই কবি হইতে পারা যায়, নিজ মনপড়া ছই চারিটা কথা সাজাইয়া লিখিতে পারিলেই “সাহিত্য-সেবী” নামে পরিচিত হইয়া, দশজনের নিকট হইতে বাহবা পাওয়া যায়। সাহিত্যের মুখ্য উদ্দেশ্যের ধার বড় একটা কেহ ধারেন না! অত্বে যশঃ গোরব বিধ্বস্ত করিয়া, নিজ নিজ জয়পতাকা-

উজ্জীর্ণমান করিবার জন্ত আমাদের মধ্যে অনেকেই লালায়িত; সাহিত্য-সেবার জন্ত সবাই উদ্গ্রীব;—বেশ, নূতন অমৃত দ্বারা সাহিত্যের ভাণ্ডার পূর্ণ করিতে পার, কর—ক্ষতি নাই, পরন্তু সুখের কথা;—জাতীয় গৌরবের বিষয়। কিন্তু তাহা পারিবে কি? সে মৌলিকতা কোথায়? বর্তমান সাহিত্যে আসল হইতে নকল বেশী, খাঁটি স্বর্ণ কচিৎ মিলিলেও—কেমিকেলই অধিক। ‘মেঘনাদ বধ’-প্রণেতা অমর মধুসূদন দত্তের অমর লেখনী যখন অমৃতময় ছন্দোবন্দে সাহিত্য-জগৎ তাহার মধুর ঝঙ্কারে মাতাইয়া তুলিল, অমনই অমৃতাক্ষরের ছড়াছড়ি পড়িল, ক্রমে বালকের স্কুলের খাতায়, ঘোড়শীর প্রণয়-লিপিতেও তাহা স্থান পাইল; সকলেই মধুসূদনের অনুকরণে প্রবৃত্ত হইলেন, চর্কিত চর্কণে অনেকেই উদরপূর্তি করিতে লাগিলেন, কিন্তু তাহাতে তৃপ্তি কোথায়? তাহার আর মূল্য কি? মৌলিকতা রাখিয়া গেলেন অমর মধুসূদন দত্ত।

কবির হেমচন্দ্রের নিকট আমরা বহু পরিমাণে ঋণী, সাহিত্য-ভাণ্ডারে তিনি বহু অমূল্য রত্ন দান করিয়া আমাদের কৃতজ্ঞতাভাজন হইয়াছেন। তাঁহার মৌলিকতা কাব্য-জগতে অতুল সুধা দান করিয়াছে, ইহা মুক্ত-কণ্ঠে স্বীকার করিতে হয়। এ সম্বন্ধে কবির রবীন্দ্রনাথের নিকটও আমরা যথেষ্ট ঋণী, তাঁহার মৌলিকতা অনেকেরই চিত্তাকর্ষক; সেই জন্তই আধুনিক স্ত্রী-পুরুষ উভয় শ্রেণীর কবিগণের কাব্যাবলীতে রবীন্দ্রনাথের ছায়াই দেখিতে পাওয়া যায়। এই জন্তই বর্তমান কাব্যযুগকে কেহ কেহ “রবীন্দ্রীয় যুগ” বলিতে কুণ্ঠিত হন না, কিন্তু এত অনুকরণে নূতন রত্ন কিছু আবিষ্কৃত হইতেছে কি? যদি তাহাই না হইল, তবে একের মৌলিকতা লইয়া শত শত জনের টানাটানি করিয়া ফল কি?

কাব্য-জগতে মহাত্মা বঙ্কিমবাবু অমর, তাঁহার অনুকরণ পূর্বক সাহিত্যসমাজে বংশভের জন্ত অনেকেই লালায়িত, কিন্তু বঙ্কিমবাবুর শায়িত-সাহিত্যে নব যুগ আনয়ন করিতে আমাদের মধ্যে এ পর্যন্ত কয়জনের সামর্থ্য হইয়াছে?

এরূপ অনুকরণপ্রিয়তায় কোন ফল নাই, অধিকন্তু এই অনুকরণ-প্রিয়তা হইতেই আমরা মৌলিকতা হারাইয়া ফেলিতেছি। আমাদের মৌলি-

কতা হারাইবার আর একটা কারণ, সম্পাদক ও পাঠকগণের পক্ষপাতিত্ব। আমাদের দেশে “পরের মুখে ঝাল খাওয়া”-ব্যক্তিরই সংখ্যা অধিক। নূতন লেখক-লেখিকাগণ কোনও খ্যাতিনামা সাহিত্যসেবীর নিকট হইতে কোন গতিকে একখানি প্রশংসাপত্র সংগ্রহ পূর্বক স্বীয় রচনার সহিত তাহা সংযোজিত করিয়া সম্পাদক মহাশয়ের নিকট পাঠাইলেন; সম্পাদক মহাশয়ও তাহার ভাল মন্দ বিচার না করিয়া অবাধে স্বীয় পত্রিকায় স্থানদান করিলেন, তাহার লেখনীর কোন সারবত্তা না থাকিলেও ক্রমে তিনি উক্ত পত্রিকার প্রসিদ্ধ লেখক বা লেখিকারূপে পরিণত হইলেন, ও কালে কতকগুলি পুস্তক প্রণয়ন করিয়া সাহিত্য-ভাণ্ডারের আবর্জনার মাত্রা বৃদ্ধি করিতে লাগিলেন; এবং সেই সকল সারহীন প্রবন্ধ ও পুস্তকাদির প্রশংসাপত্র দৃষ্টে পাঠকগণও এত মুগ্ধ হইলেন যে, লেখক বা লেখিকার সম্বন্ধে কোনরূপ স্বাধীন মত প্রকাশ করিতে তাঁহাদের সামর্থ্য রহিল না, তাঁহারাও অবাধে প্রশংসাপত্রদাতার সহিত একমত হইলেন, সুতরাং লেখক বা লেখিকার পক্ষে তাঁহাদের মুখ্য উদ্দেশ্য সাধনে (প্রশংসালভে) কোনরূপ অন্তরায় ঘটিতে ধায় না; অধিকন্তু, তাঁহারা ‘প্রশংসা পাইয়া মৌলিকতার দিকে দৃষ্টিপাত না করিয়া, যাহা তাহা লিখিয়া যাইতে লাগিলেন। আবার এমনও দেখা যায়, কোন কোন প্রতিভাবান পুরুষ বা প্রতিভাময়ী রমণী প্রকৃতরূপে মৌলিকতা-রাজ্যে প্রবেশ করিয়াও তাঁহারা সাহিত্য-জগতে উচ্চাঙ্গন প্রাপ্তির প্রকৃত অধিকারী ও অধিকারিণী হইলেও উপযুক্ত সার্টিফিকেট অভাবে সাহিত্যক্ষেত্র হইতে পশ্চাদ্ভ্রম প্রাপ্ত হওয়া দূরের কথা, অবজ্ঞা প্রাপ্ত হইয়া থাকেন, সুতরাং উক্ত লেখক লেখিকাদিগের বিমল প্রতিভা ভগ্নমনোরথ হইয়া অনন্তে বিলীন হয়, উত্তম—উৎসাহ নিবিয়া যায়, ‘মৌলিকতা নষ্ট হয়।’ এই জন্তই বলিতে হয়, ‘আমাদের মৌলিকতা নষ্টের জন্ত লেখক-লেখিকাগণ অপেক্ষা সম্পাদক ও পাঠকগণ অধিক দায়ী। বন্ধুত্ব বা অর্থের খাতিরে কাহারও তোষামোদ না করিয়া প্রকৃত বিচারপূর্বক সাহিত্যসেবীদিগের যথাযোগ্য আসন দেওয়া কর্তব্য; নচেৎ, “বাহবা” পূর্বক উৎসাহ দিলেও সে উৎসাহ কার্যকর না হইয়া ‘সাহিত্য-ভাণ্ডারে’ আবর্জনা সৃষ্টির কারণ হইয়া উঠে। আমি যখন প্রথম পুস্তক প্রণয়ন করি, আধুনিক নিয়মানুসারে প্রশংসাপত্র

লাভাশায় কয়েকজন "খ্যাতনামা সাহিত্যসেবীর নিকট পুস্তক প্রেরণ" করি; যখন আধুনিক নিয়মই এই, তখন আমিই বা তাহার ব্যতিক্রম করিব কেন? বলা বাহুল্য; একবাক্যে সকলেই পুস্তকের প্রশংসা করিয়াছিলেন, তন্মধ্যে কোন মহাত্মা লিখিয়াছিলেন,—“প্রশংসাপত্র দিয়া আপনাকে উৎসাহিতা করিতে চাহি না, প্রশংসাপত্রের আবার মূল্য কি?—আপনি প্রতিভার অহুবর্তিনী হউন, প্রতিভাই একদিন আপনাকে সাহিত্য-রাজ্যের উচ্চাসন প্রদান করিবে।” সে আজ চারি বৎসরের কথা, কিন্তু সেই অমূল্য কথা কয়টি এখনও আমার হৃদয় জুড়িয়া আছে, এখনও মধুর বীণার স্বরে হৃদয়ে ঝঙ্কার দিতেছে, ইহা না হইলে কি উৎসাহ? উৎসাহদাতাগণ এরূপ উৎসাহ না দিয়া কেবল “কেয়াবাৎ কেয়াবাৎ” বলিয়া গেলে, লেখক বা লেখিকাদিগের লেখনীতে অমৃত বর্ষণ হইবে কিরূপে?—সাহিত্যরাজ্যে নবাগন্তক ব্যক্তিদিগকে উৎসাহ দেওয়া বিশেষ প্রয়োজন, নতুবা তাঁহাদের প্রতিভা নিস্তেজ হইয়া পড়ে, কিন্তু সে উৎসাহ যেন প্রকৃত উৎসাহের কাজ করে; অসার রচনাকারী ও রচনাকারিণীদিগের প্রশয়স্বরূপ না হয়।

আর একটা কথা, স্ত্রীলোক হইলেও তাঁহাদিগকেও উপযুক্ত সমালোচনা বা আসন হইতে বিচ্যুত করাও সম্পাদক বা পাঠকগণের কর্তব্য নহে। কেন না, তাঁহারা স্ত্রীলোক হইলেও সাহিত্যসেবিনী, প্রকৃত বিচার-পূর্বক যদি তাঁহারা উচ্চ আসনের যোগ্য হন, তবে তাঁহাদিগকে না দিলে সাহিত্যের অবমাননা করা হয়, “এবং সাহিত্য-ভাণ্ডারে কতকগুলি অমূল্য রত্নলাভের বিপ্ল” ঘটে। পক্ষান্তরে তাঁহাদের রচনা সকল যদি সারহীন হয়, তবে উপযুক্ত সমালোচনা অভাবে সাহিত্য-ভাণ্ডার আবর্জনা ময় হইয়া উঠে। অতএব সাহিত্যসম্বন্ধে কি ভাল, কি মন্দ, স্ত্রী-পুরুষের উভয় পক্ষেরই বিচারে শিথিলতা থাকা কর্তব্য নহে। তাহা থাকিলে ভবিষ্যতে সাহিত্য-ভাণ্ডারের আবর্জনা বিদূরিত করা হুঁকু হইয়া উঠিবে।

আমরা কথায় কথায় প্রস্তাবিত বিষয় ছাড়িয়া অনেক দূরে আসিয়া পড়িয়াছি। এখন প্রকৃত পথানুসরণ করা যাউক। সাহিত্য হইতে মানসিক ব্যাধির সৃষ্টি কিরূপ? সাহিত্য হইতে আত্মগোরব বার্মনা বড়ই প্রবল হইয়া উঠিয়াছে। এমন কি, অনেক সময় ইহা ব্যাধির আয় প্রকাশ পাইয়া

আমাদিগকে বিধ্বস্ত করিয়া তুলে। আত্মগোরব মন্দ জিনিষ, তাহা বলি না, বরং আত্মগোরবহীন হইয়া পড়িলে জীবন বিষময় হইয়া উঠে, সকল সময় “তৃণাদপি সূনীচেন” এ নীতি সংসারী জীবের পক্ষে খাটে না। কিন্তু যখন আমরা মহা, মহা সাহিত্য-রথিগণকে তাঁহাদের প্রাপ্য আসন হইতে বিচ্যুত করিয়া সেই আসনে স্বয়ং উপবেশন করিবার বাসনা, সেই মহাত্মার নিন্দা-রটনা ও বহুবিধ উপায় অবলম্বন করিয়া আত্মগোরব বন্ধিত করিবার চেষ্টা করি, তখনই “আত্মগোরব” আমাদের মানসিক ব্যাধিরূপে পরিণত হয়।

মহাত্মা বঙ্কিম বাবুর নিকট বঙ্গসাহিত্য যে সমধিক উপকৃত, তাহা অস্বীকার করিলে কৃতঘ্নতা হয়; কিন্তু আমরা তাহা ভুলিয়া গিয়া তাঁহার রচনার, তাঁহার চরিত্রের ক্রটি অন্বেষণ করিবার জন্তই ব্যস্ত, তাঁহার অসামান্য যশোরাশি বিধ্বস্ত করিয়া নিজ নিজ পাণ্ডিত্য প্রচার করিবার জন্ত আমরা লালায়িত।

কবির নবীনচন্দ্রের রৈবতক, কুরুক্ষেত্র, প্রভাস, এই তিনখানি গ্রন্থ হইতে আমরা একখানি “মহাকাব্য” লাভ করিয়াছি, আমাদের বঙ্গ-সাহিত্য নূতন ভূষণে ভূষিত হইয়াছে; কিন্তু উক্ত কবিরের নিকট আমাদের খণী বা কৃতজ্ঞ হওয়া দূরে থাক, কোথায় তাঁহার কোন ক্রটি হইয়াছে, তাহাই প্রতিপন্ন করিয়া নিজের উন্নত মস্তক স্ফীত করিতে চাই—নীচ ত্যাগ করিয়া ক্ষীর গ্রহণ করিতে আমরা জানি না—পারি না। আত্ম-গোরব-লাভের জন্ত আমরা কৃতজ্ঞতা ও জাতীয় মর্যাদা বিসর্জন দিতে পশ্চাত্তাপদ হই না, এরূপ আত্ম-গোরব-বাসনাকে “মানসিক ব্যাধি” ব্যতীত আর কি বলা যাইতে পারে? আমাদের সাহিত্যে আর একটা সংক্রামক ব্যাধির সমধিক বিকাশ দেখিতে পাওয়া যায়, তাহা প্রণয়। প্রণয়ের ছড়াছড়ি ব্যতীত কাব্য, উপন্যাস পূর্ণত্ব প্রাপ্ত হয় না, ইহাই আধুনিক ধ্বংসধারণা। সুতরাং গল্প, পট্ট, গল্প, প্রহসন সমস্তই প্রণয়ে পরিপূর্ণ—যেন এটা প্রণয়যুগ। প্রকৃতরূপে প্রণয়যুগ হইলে ক্ষতি ছিল না; প্রণয় পবিত্র পদার্থ, প্রণয় মানুষকে দেবতা করে, প্রণয় যদি প্রত্যেক মানবচিত্তে এরূপ বিকাশ প্রাপ্ত হয়, তবে আমরা এই জগতেই স্বর্গের প্রতিচ্ছায়া দেখিতে পাইতে পারি, কিন্তু এ প্রণয় সে প্রণয়

নহে;—যে প্রণয়বলে সাবিদ্রী মৃত-পতি ফিরিয়া পাইয়াছিলেন, সীতা অগ্নি-পরীক্ষায় উত্তীর্ণ হইয়াছিলেন, মহাদেব উন্নত হইয়াছিলেন, এ প্রণয় অপেক্ষা সে প্রণয় বহু উর্ধ্বে অবস্থিত। আধুনিক ক্লাব্যোপন্যাসে সেরূপ আদর্শপ্রেম নাই, সে মহাপ্রেমের শিক্ষা নাই, অধিকন্তু সাহিত্যসমূহে আমরা যে প্রেমের চিত্র দেখিতে পাই, তাহা অতীব জঘন্য।

“Greater love hath no man than this,

That a man lay down his life for his friends.” (John)

ইহাই আদর্শপ্রেমিক-চরিত্র। প্রেমিক কবি চণ্ডীদাসের মতে যিনি—“আপনা ভুলিয়া পরেতে মিশাতে পারে”, তিনিই প্রকৃত প্রেমিক। কিন্তু অধুনা সে আদর্শ প্রেম কোথায়? অধুনা দেখিতে পাই, অমুক নায়িকা অমুককে দোষিয়া ভালবাসিয়া ফেলিলেন, তাঁহাকে একদণ্ড না দেখিলে থাকিতে পারেন না—কিছুতেই তাঁহার শাস্তি নাই—অবশেষে স্বয়ং চিত্তচোরের অন্বেষণে বহির্গত হইলেন, অথবা সেই চিত্তচোর ব্যতীত আর কাহাকেও বিবাহ করিবেন না, এইরূপ একটা ধলুভঙ্গ পণ করিয়া বসিলেন, পিতা মাতা বা অভিভাবকদিগের বংশমর্যাদা বা তাঁহাদের শাস্তি-প্রীতির দিকে চাহিলেন না, কিংবা যিনি তাঁহার চিত্তচোর, তিনি তাঁহার যোগ্য কি না, এ মিলন স্থখের হইবে কি না, তাহা কিছুই ভাবিয়া দেখেন না; পক্ষান্তরে নায়কদিগেরও সেই অবস্থা। ফলকথা, আধুনিক সাহিত্যে যাহাকে প্রণয় নামে অভিহিত করা হয়, তাহা প্রণয় নহে, প্রকৃত-পক্ষে উহা যৌবনমূলভ প্রবৃত্তির মাদকতামাত্র। প্রকৃত প্রেমে উচ্ছ্বলতা নাই। আত্মত্যাগ আছে,—কর্তব্যের শিথিলতা নাই। মহাত্মা বঙ্কিম খাবুর বর্ণিত “প্রতাপ” প্রেমিকের উজ্জ্বল আদর্শ, কিন্তু আধুনিক সাহিত্যে কয়জন প্রতাপ দেখিতে পাই? শৈবলিনীর সংখ্যাই অধিক, আর সেই সকল সাহিত্যানুশীলন করিয়া সমাজে যে, শৈবলিনীর সৃষ্টি অধিক হইতেছে, তাহা অকপটচিত্তে বলা যাইতে পারে। আধুনিক নরনারীগণ আপনাদের বাস্তব জীবনকে উপন্যাসবর্ণিত কাল্পনিক জীবন করিতে চাহেন। তাঁহাদের জীবনটা যে স্বপ্ন নহে, কল্পনারাজ্যে যাহা সহজলভ্য, বাস্তব জগতে তাহা দুর্লভ; মানবজীবন কাল্পনিক নহে—বাস্তব, সংসারের সহিত যে কঠোর সংগ্রামই

মানবজীবনের অনিবার্য লক্ষ্য, তাহা তাঁহারা ভুলিয়া গিয়া নিজ নিজ মনো-মধ্যে প্রণয়ব্যাদির সৃষ্টি করিয়া আজীবনকাল যন্ত্রণায় জর্জরিত হন, এবং সংসার, নিরপরাধ সহযোগী ও সহযোগিনীর জীবনকে অশান্তিময় করিয়া তুলেন। আধুনিক সাহিত্যই এই মানসিক ব্যাদির স্রষ্টা, এই জঘন্য কর্তারা অনেকস্থলে রমণীদিগকে নাটক নভেল পড়িতে দিতে ভালবাসেন না। সাহিত্য হইতে এই প্রণয়শ্রোতের গতি না ফিরাইলে মানবের মানসিক ব্যাদি ও সংসারের অশান্তি বৃদ্ধিবে না।

শ্রীনগেন্দ্রবালা মুস্তোফী।

## প্রেম-বৈচিত্র্য।

দশম পরিচ্ছেদ।

কথায় বলে, “বয়স যায় না জল যায়” সেটাদি কিন্তু নিতান্ত মিথ্যা নহে। যখন সিন্ধুর বিবাহ হইল, তখন ত তার ছেঁড়াচরা চাকুর বয়স সবে-মাত্র, আট। সিন্ধুর পিতা, সিন্ধুকে পাত্রস্থ করিয়া ভাবিয়াছিলেন, ‘আঃ, কয় বৎসরের মত ত ভাবনা চিন্তা হইতে বাঁচা গেল!’ কিন্তু তিনটা বৎসর যে দেখিতে দেখিতে অতীত হইল! সেই সে দিনকার মেয়ে চাকু ইহকরই মধ্য বিবাহের যোগ্য হইয়া উঠিয়াছে, কিন্তু সুপাত্রের সকল পাওয়া যাইতেছে না, পিতা ধীরে স্থস্থে চেষ্টা করিতেছেন, আর ‘মা, তাঁর উদ্বেগের কথায় আর কাজ কি—চক্ষে নিদ্রা নাই, আহারে রুচি নাই, গৃহকর্ম—তন্নয়তা নাই, মুখেরও কামাই, নাই! কেমন করিয়া জাতি-কুল রক্ষা হইবে, ধর্ম থাকিবে, তিনি এই ভাবনাতেই অধীর! বার বছরের মেয়ে বার গলায়,

সে কেমন করিয়া স্থির থাকে, গৃহিণী ত তাহা বুঝিতেই পারেন না, কাজেই বাক্যবাণে কর্তা সর্বদাই জর্জরিত! কর্তা ত আজকাল অন্দরমহলে দিবা-ভাগে বিশেষ প্রয়োজন তিন্ন প্রায়ই প্রবেশ করেন না, আহা রাস্তে নখনাড়ার ভয়ে অধিকক্ষণ অন্দরে তিষ্ঠেন না। রাত্রিতে গৃহিণী শয়নগৃহে প্রবেশের পূর্বেই নিদ্রায় অভিভূত হন! সহজে নিদ্রা না আসিলে কপটনিদ্রার আশ্রয় লন! কিন্তু এত করিয়াও গৃহিণীর হাত হইতে রক্ষা পাইবার উপায় নাই। মরার উপর খাঁড়ার ঘা চলে না, কিন্তু কথাদায়গ্রস্তা জননী সে বিধি-নিষেধের ধার ধারেন না। ঘুমাইয়াও কর্তার নিস্তার নাই। গৃহিণী তাঁহার বচনভাণ্ডের অক্ষয় তুণ হইতে বাছিয়া বাছিয়া এমন এমন বিষাক্তবাণ প্রয়োগ করেন যে, কপটনিদ্রাভিভূত কর্তাটিকে মাঝে মাঝে অন্ততঃ পাশ-মোড়াও দিতে হয়! গৃহিণীর অত্যাচার ও অর্থশূন্য কথার প্রতিবাদ করিবার লোভটাও, সময় সময় কর্তার অসংবরণীয় হইয়া উঠে, কিন্তু পাছে, তাঁর এই কপট বিছাটা ধরা পড়ে, তাই কিল খাইয়া কিল চুরি করেন, আর মনে মনে ভাবেন—“কাশী মিত্র বা নিমতলার ঘাট কোনটাই শর্ম্মার অবিদিত নাই, তবে মরে যে আছি, এই হুঃখ!” কিন্তু সব সময়েই যে কর্তার কোশল খাটে, তা নয়; এক সময় না এক সময় তাঁকে গৃহিণীর হাতে পড়িতেই হয়। তখন গৃহিণীর বচনে জোয়ার বহে, মুখে থৈ ফোটে, চোখে আগুন ছুটে! তখন কোথায় লাগে স্মরেন্ বাঁড়ুঘ্যের “ইলোকোয়েন্স”, আর কোথায় বা লাগে কালীবাবুর “গানিং”? তা স্মরেন্ বাঁড়ুঘ্যের বক্তৃতাতেও দেশ জাগিল না—আর গৃহিণীর বচনেও কর্তাকে টলাইতে পারিল না। কর্তার কঠিন চক্ষু গৃহিণী কিছুতেই ভেদ করিতে পারিলেন না, কারণ কর্তা একটু একেলে লোক, “মেয়ের বার বছর বয়স হলোত কি হলো?—ঐ তোমাদের পুরাকালের ‘সাবিত্রীর’ বিবাহ কত বয়সে হইয়াছিল?” কিন্তু কর্তার এ সকল যুক্তিকে শুনে! গৃহিণী যখন কিছুতেই আর কর্তাকে আঁটিয়া উঠিতে পারিলেন না, তখন রমণীর যে অমোদ্য ব্রহ্মাস্ত্র—অশ্রুক্ষণা তাহাই প্রয়োগ করিলেন!—গিন্নি কাঁদিয়া কেবল যে মাটি ভিজাইলেন, তাহা নহে; কর্তার মনও ভিজাইয়া দিলেন। অবলার বল—চক্ষের জল,—গৃহিণী বুঝি এতদিন তাহা ভুলিয়াছিলেন। তা গৃহিণীরই বা দোষ দিব কি? আমাদের দেশের

বড় বড় রাজনৈতিকেরাও এ কথা ভুলিয়া আছেন। যে, দুর্বল, তাহার বচন-বীরশ্বে কি লাভ? মুণ্ডমালার দাঁত-খামুটিতে কি কর্তাদের মন টলে? আমাদের সম্বল যে চক্ষের জল! “বালানাং রোদনং বলং।” তা সে কথা যাক, কথা হইতেছিল, চাকুর বিবাহ সম্বন্ধে; কর্তা এক্ষণে বিশেষ করিয়া আত্মীয়-বন্ধুকে স্মৃপাত্রে সন্ধান জ্ঞাত লিখিলেন, গৃহিণীর কিন্তু ইচ্ছা, কর্তা স্বয়ং কিছুদিন পাত্রে অহুসন্ধানে ফিরেন। তা কর্তা সে দিক দিয়া যান না, তাঁর কথা, বৃন্দাবনং পরিত্যজ্য পাদমেকং ন গচ্ছামি! কিন্তু এতদিনে বুঝি চাকুর বিবাহের ফুল ফুটিল! প্রভাত একটা স্মৃপাত্র স্থির করিয়াছেন। পাত্রটি এককালে প্রভাতেরই সতীর্থ ছিলেন, চারি বৎসর পূর্বে, সিন্ধুর সহিত এই পাত্রের সম্বন্ধের কথাবার্তা হয়, কিন্তু তখন, এ পাত্রের বিবাহে মত ছিল না,—তিনি লেখা পড়া শেষ না করিয়া, বিশেষতঃ এগার বার বৎসরের মেয়ে বিবাহ করিতে সম্মত ছিলেন না। ‘ল’ পাস করিয়া প্রাকৃটিস্ করিতে করিতে এক্ষণে কিন্তু তাঁহার মতের পরিবর্তন ঘটয়াছে। কিঞ্চিৎ নগদ অর্থ পাইলে এখন তিনি পাত্রীর পিতাকে গৌরীদানের ফলভোগী করিতেও কুণ্ঠিত নহেন!

পাঁচটা পাশ করা উকিল জামাই পাওয়া গিয়াছে, জানিয়া গৃহিণী আফ্লাদে আটখানা হইলেন—প্রভাতকে রাজ-রাজ্যেশ্বর হইবার বর দিয়া স্বহস্তে পত্র দিলেন—“বাপাজী, সেই পাত্রই স্থির করো, টাকার জ্ঞাত আটকাইবে না—কিন্তু এই আষাঢ় মাসেই বিবাহ দিতে হইবে।”

নগদ টাকার পরিমাণ শুনিয়া কর্তা কিছু ইতস্ততে পড়িয়াছিলেন, সভয়ে গৃহিণীকে আপত্তির একটু আভাসও দিয়াছিলেন—কিন্তু তাহাতেই গৃহিণী দলিত ফণিনীর মত গর্জিয়া উঠিলেন। দারুণ ক্রোধের সহিত বলিলেন, “সেইখানেই মেয়ে দেব, দেব, দেব, ওখানে যদি বিয়ে না হয়, তা’ কোন বেটী না গলার দড়ি দেয়।”

সর্বনাশ! ইহার উপর আর কথা চলেনা!

\* \* \* \* \*

সব ঠিকঠাক। আষাঢ় মাসেই বিবাহ।

## একাদশ পরিচ্ছেদ।

আষাঢ় মাস। সন্ধ্যা অতীত। যেমন মেঘ, তেমনি বৃষ্টি, বাতাসেরও বড় জোর। সিন্ধু ভগিনী-চারুকে “কনে” সাজাইতে সাজাইতে মাঝে মাঝে যেন অশ্রুমনস্ক হইতেছে। সিন্ধুর এ ভাবান্তর আর কেহ বুঝিতে না পারিলেও চারু বুঝিয়াছিল; সে তার দিদির মনের ভাব লুফিয়া লইয়া বলিল, “দিদি! কই প্রভাত বাবুত এলেন না?” সে সময় সেখানে আর কেহ ছিল না,—সিন্ধু নিশ্বাসটা একটু জোরে ফেলিয়া বলিল, “তাইত ভাই, আমিও ভাবছি, পথে না জানি কত কষ্টই পাচ্ছেন।” সিন্ধু তবু মনের সকল আশঙ্কা খুলিয়া বলিল না। আজ ভগিনীর বিবাহের এ উৎসব, এ আমোদ যেন তার নিকট কেমন ফাঁক ফাঁক মনে হইতেছে, সে যেন প্রাণ ঢালিয়া ইহাতে যোগ দিতে পারিতেছে না! সিন্ধুর মাও ছুই একবার প্রভাতের কথা তুলিলেন। চারুর বিয়ে, জামাই এলেন না, এ অভিমানও করিলেন, সিন্ধু কিন্তু জানিত, বিশেষ কোন বিয় না ঘটিলে স্বামী আসিবেনই, সেই জন্তই তার অধিক চিন্তা।

ক্রমে বিবাহের লগ্ন উপস্থিত হইল, ‘কনেকে’ বিবাহ সভায় লইয়া যাইতে হইবে। তিন চারিজন আত্মীয় যুবক পীড়ি ধরিতে আসিলেন,—তাহার মধ্যে অতিমাত্র স্নেহের স্বরে, স্নিতমুখে কে বলিল, ‘কি চারু!’ চারু প্রশ্ন-কর্তার দিকে চাহিয়া একমুখ “হাসিয়া যেন লজ্জায় মুখ নামাইল। এমন মিঠে আওয়াজে, চেনা গলায় কে ডাকে ওই? সিন্ধু চাহিয়া দেখিল,—তাইত, এ যে তারই প্রভাত! চারি চক্ষে মিলিল, নয়নে নয়নে হাসি উথলিয়া উঠিল! সিন্ধুর মনের মেঘ কাটিয়া গেল। এতকণে সিন্ধুর হৃদয়ে অশ্রু-স্রবের হিল্লোল দেখা দিল।

এইবার ‘কনে’ ধরিবার পালা। চারিজন বাহকের মধ্যে প্রভাতেরই কিছু বিপদ! প্রভাত পীড়ি ধরিতে না ধরিতে তাহার পৃষ্ঠদেশে কিল পড়িতে আরম্ভ হইল,—কোমলাঙ্গীদের হস্তের কিলে কোমলত্ব থাকিবে, রসিকেরাই এইরূপ আশা করেন, কিন্তু প্রভাত কিছু অরসিক, তিনি অবলা-বৃন্দের মুষ্টিযোগে তেমন রস উপভোগ করিতে পারিলেন না। প্রভাত

শ্রালাজের সুকোমল কর-পল্লবের মুষ্টি-ফল ভাদ্রমাসের তালের পৃষ্ঠে অনুভব করিয়া সহযোগী সম্বন্ধীকে উল্লেখ করিয়া বলিলেন, “ভাই, সুমুখ যাহার কোমল সংস্পর্শে সুখ কি ছুঃখ, অনুভব করিতে পার না—একেবারে বিভোর হইয়া পড়,—

স এবায়ং তস্মাস্তহিনকর কোপম্যসুভগো

ময়া লক্ষঃ পাণির্ললিত লবলীকন্দলনিভঃ ॥

কিন্তু আমার ভাগ্যে বিপরীত ফল। তোমার নিকট যাহা “মুছনি কুসুমাদপি”, আমার কপালগুণে তাহাই ‘বজ্রাদপি কঠোরানি।’

প্রভাত শ্রালাজকেও এই মর্মে বিদ্রপ করিতে ছাড়িলেন না! তারপর সাত পাক আরম্ভ হইল। প্রভাত চারুর কাণে কাণে বলিলেন, “চারু, আমি আছি, তোমার দাদা আছেন, পাত্রও আছেন, এর মধ্যে সাত পাকের বাঁধাবাঁধিটা কার সঙ্গে হ’লে ভাল হয় বলত?” চারু অনেক কষ্টে হাসি চাপিয়া অত্নের অলক্ষ্যে প্রভাত বাবুর হাতে একটা সোহাগের চিমটা কাটিলেন। এটা কিন্তু কুসুমের মত মুছই বটে!

শুভদৃষ্টির সময় আসিল, চারিদিকে লাল আলো জলিয়া উঠিল—পুরাঙ্গনাগণ হ্রলুধনি দিয়া উঠিলেন—পাত্র মন্থ বাবু সেই সময় একবার প্রাঙ্গণ হইতে হ্রলুধনির উদ্দেশে উপরে দৃষ্টি-নিষ্ক্ষেপ করিলেন। দেখিলেন, এক অলোকসামান্য যুবতী, সুন্দর বসন-ভূষণে বিভূষিত হইয়া রমণীমণ্ডলীর অগ্রে দাঁড়াইয়া তাঁহাকে দেখিতেছেন!

সেই হরিণাক্ষীর স্নিগ্ধ চঞ্চল আঁখির সহিত মন্থের আঁখি মিলিল! কি মনোমোহিনী মূর্তি! মন্থ আর একবার সে প্রতিমা দর্শনের লোভ সংবরণ করিতে পারিলেন না, সতৃষ্ণ-নয়নে লোলুপদৃষ্টিতে উপরে চাহিলেন! নয়নে নয়নে মিলিতে না মিলিতে, সে স্থির সৌদামিনী-মূর্তি নয়ন নীত করিয়া ত্র্যস্তে পশ্চাতে রমণীমণ্ডলে লুকাইল, চপলা যেন মেঘে মিশিয়া গেল! চপলারই মত সেই বিদ্যুৎ-বর্ণণী বামা চঞ্চল প্রভায় দর্শকের আঁখি মন ঝলসিয়া দিল! মন্থ বড় অশ্রুমনস্ক হইয়া পড়িলেন। চারুর সহিত শুভদৃষ্টিটাও তেমন সুবিধামত হইল না।

## দ্বাদশ পরিচ্ছেদ।

“নাত জামাই, জল খাও”—বাসর ঘরে ঠাকুরাণী দিদির কথার উত্তরে মন্থথ ‘খাই’ বলিয়া চঞ্চলদৃষ্টিতে একবার বাসর ঘরে সমাগত বাসর-সুন্দরীদের শোভা দেখিয়া লইলেন, দেখিলেন যেন, শরতের সুনীল আকাশে, তারকারাজি উঠিয়াছে, অথবা সরসীর স্বচ্ছসলিলে যেন শত শত কমলিনী ফুটিয়াছে! মন্থথের জল খাইতে বিলম্ব দেখিয়া কোন সুন্দরী বলিয়া উঠিলেন, “কনের মুখ দেখে কি নাতজামাই ক্ষিধে তেষ্টা সব ভুলে গেলে নাকি?” উত্তরে মন্থথ কিছু বলিতে না বলিতে, আর এক সুন্দরী বলিলেন, “ক্ষিধে তেষ্টা ভুলতে যাবে কেন লো, নাতজামাই ভাবচে—ভোগের আগে প্রসাদ পাই কেমন করে? চারু তুই একটু প্রসাদ করে দে, নইলে নাতজামায়ের মুখে রুচবে না।” কথাটা শেষ হইতে না হইতে আর একটা কণ্ঠস্বর শুনা গেল,—“নাতজামাই আর জল খাবে কিলো—চারুর চাঁদপানা মুখ দেখে সে নিজেই জল হয়ে গেছে।” পশ্চাৎ হইতে কোন ভামিনী যেন একটু বিরক্তির সহিত বলিয়া উঠিলেন,—“বুড়ামাগীদের বাতিক দেখে বাঁচিনে, নাতজামাই জল হয়েছে, সেত ভালই, তোদের বায়ু বৃদ্ধি হয়েছে, তোরা গোটা কত ডুব দিয়ে ঠাণ্ডা হ’য়ে নে।” এই প্রকার বাক্য-বিতণ্ডায় বাসরের আসর খুব জমিয়া উঠিল! কিন্তু মন্থথ তখনও মৌন-অবলম্বনে। পাত্রের এই তুষাণ্ডাব অবলোকনে, বাসরের চির-প্রথামত, জামাইয়ের মুখ ফুটাইবার জন্ত সুন্দরীদের মধ্যে কেহ কেহ ষষ্ঠীদেবীর নিকট ফুটকড়াই মানিলেন। আর মন্থথকে ইতস্ততঃ দৃষ্টি বিক্ষিপ করিতে দেখিয়া ডাক্তার-গিন্নি, হাশুমুখে জিজ্ঞাসা করিলেন, “নাতজামাই, গো-চোরের মত অমন ফ্যাল্ ফ্যাল্ করে এদিক ওদিক দেখচ্ কি?” মন্থথের চক্ষু সত্যই একজনের সন্ধানে ফিরিতেছিল, সেটা অবশ্য “কনে” নহে, কেন না, কনে চারু আপাদমস্তক নীল চেলিতে আবৃত হইয়া শুধু মুখখানি বাহির করিয়া পাত্রের বামদেশে কলাবোটার মত বসিয়াছিল, তাহার সমবয়সীরা মাঝে মাঝে ফিস্ ফিস্ করিয়া তাহার কাণে কাণে কি বলিতেছিল, আর হাসিয়া কুটি কুটি হইতেছিল, চারুও অবশ্য তাহাতে যোগ দিতেছিল।

বিবাহের রাতে বালিকা ‘কনে’ লজ্জার বড় ধার ধারে না। মন্থথের চক্ষু যখন অভিসারে ধরা পড়িয়া গেল, তখন মন্থথ যেন একটু অপ্রস্তুত হইয়া পড়িলেন, কিন্তু এই অবলা-সমিতির নিকট প্রবল প্রতাপাশ্রিত পুরুষ-বংশাবতংস মন্থথ একেবারে বোঁকা বনিয়া যাইতে প্রস্তুত ছিলেন না, কাজেই ডাক্তারগিন্নির পাল্টা গাহিলেন; বলিলেন, “এখানে ব্যবসায়ের কোন সুযোগ হই কি না, তাই দেখিতেছিলাম।” ডাক্তারগিন্নি বিক্রপটা গায়ে মাখিলেন না, কথাটা ফিরাইয়া দিলেন; বলিলেন, “ভাই, তোমার মুখ পোড়ানই সার হ’লো, সীতা উদ্ধার হ’লো না, মিছে তোমার কষ্ট ক’রে আসা, এখানে সে ব্যবসায়ের কেউ নেই, তুমি এখন পথ দেখা।” এইরূপে কথা কাটাকাটি বাধিয়া গেল। বাসরের খোলা বড় তপ্ত হইয়া উঠিল, মন্থথের মুখে খই ফুটিতে লাগিল, ছ’টা একটা তপ্ত ছিটে সুন্দরীগণের গায়েও পড়িল। সুন্দরীগণ এতক্ষণে বুঝিলেন, ফুটকলাই মানাটা বাজে খরচ হইয়াছে। এইখানে বলিয়া রাখি, বাসরের এই ঠাকুরাণী দিদিরা সকলেই কিছু আসল ‘ঠান্দি’ নন। ইহার মধ্যে নকলও আছেন; আছেন কেন, নকলই অধিক। অনেক স্বশ্রাসম্পর্কীয়া ঠাকুরাণী ও কেহ বা বৈষ্ণব-বৌ, কেহ বামুণ দিদি, কেহ সরকার-গিন্নি নামে ছদ্মবেশে ঠাকুরাণী দিদির দলে মিশিয়াছেন। বিস্তারিত পরিচয় দিব কি? পাঠিকা মহাশয়েরা কি বলেন? না—আর অপ্রতিভ করিয়া কাজ নাই। তবে ভবিষ্যতের জন্ত সাবধান হইলেই হইল।

সিন্ধু এতক্ষণ পশ্চাতে ডাক্তারগিন্ধি-প্রভৃতি মহারথিবৃন্দের অন্তরালে বসিয়া, ঠাকুরাণী দিদিদের “কন্নির লড়াই” শুনিতেছিল। ডাক্তারগিন্ধি কিন্তু এতক্ষণের পর তাহাকে আসরে নামিবার জন্ত “ছটে পটে” ধরিয়া বসিলেন। সিন্ধু কিন্তু ঠাকুরাণী দিদির কথা রাখিতে পারিল না। এত শ্লোকের সম্মুখে বাচালতা প্রকাশ করা সিন্ধুর কাজ নয়। বিশেষ ছদ্মবেশী অনেক গুরুজন সেখানে বসিয়া আছেন! ডাক্তারগিন্ধি তবু ছাড়েন না— “সিন্ধু, তোর হ’লো ভগিনীপতি—বোনাই। তা, অধবার যে সে বোনাই নয় লো, সোদর বোনাই, তুই কি না আছিস চূপ্ চাপ্!” তা হ’লে আমাদের কি গরজ, আমরা কেন বাসর জেগে, মুখ ব্যথা করে মরি। “একেই বলে, যার রিয়ে তার মনে নেই, পাড়া পড়নির ঘুম নেই।” সিন্ধু বুঝি ডাক্তারগিন্ধির কাণে



এক পাশে জড়ের মত পড়ে থাকে! মন্থ কত ডাকে, কত সাধে, কত অভিমান করে, কখনও রাগও করে, কিন্তু চারু ফিরে চায় না! কত হাহতাশ, কত দীর্ঘশ্বাস, নিষ্ঠুর চারু তবু কথা কয় না! চারুর মা ও খুড়ি, দুই একদিন 'আড়ি' পাতিয়া, জামাই বেচারার এই দুর্দশা দেখিলেন। চারুর এই ব্যবহারে জামাই পাছে সূতাই বিরক্ত হন, মা ও খুড়ির এই এক আশঙ্কা জন্মিল; তাই চারুকে কোনরূপে 'জ্ঞান' দিয়া, 'রাতারাতি' যুবতীভাবাপন্ন করিবার জন্ত তাঁহাদের বিশেষ চেষ্টা পড়িয়া গেল। চারুকে তাঁরা কখনও বকিতেন, কখনও ভয়, কখনও বা লোভ দেখাইতেন, কিন্তু কেমন 'একগুয়ে' মেয়ে চারু, সে সব কথা সে কাণেই তুলিত না! এজন্ত চারুকে এক আধ দিন মার কাছে একটু বেশী রকম লাঞ্চিতও হইতে হয়; কিন্তু তবু চারু বাগ মানিল না। কিছুতেই কিছু হইল না দেখিয়া, মা ও খুড়ি, হারি মানিলেন। ইতিমধ্যে চারুর দিদি সিন্ধু ঋগুরবাটী হইতে আসিল। সিন্ধু আসিলে তার মা ও খুড়ি হাঁক ছাড়িয়া বাঁচিলেন; সিন্ধুকে বলিলেন, "আমরা ত চারুকে 'এঁটে উঠ'তে পার্লাম না, এখন বাছা, তুই যা পারিস কর। চারু ত তোর কথা শোনে, তুই কেন রাত্রে তাকে সঙ্গে করে মন্থের ঘরে নিয়ে যাস্নে?" ইত্যাদি।

পিতা মানসিংহ কর্তৃক সেনাপতি-পদে অভিষিক্ত জগৎসিংহ যেমন উল্লাসে, গর্বে, স্বীয় রণপাণ্ডিত্য দেখাইবার জন্ত প্রাণপণে সচেষ্ট হইয়াছিলেন, সিন্ধুও তেমনই এই ব্যাপারে কৃতিত্ব দেখাইতে, আপনার সমস্ত কৌশল, সমস্ত প্রয়াস নিয়োজিত করিল।

সিন্ধু এখন প্রতিরাত্রে চারুকে মন্থের ঘরে দিয়া আসে, নানারূপ কথাবার্তাধি চারুর মুখ ফুটাইতে ও লজ্জা ভাঙ্গিতে চেষ্টা করে। মন্থ এক দিন তাপ খেলিবার কথা তুলিল; সিন্ধু দেখিল, পরামর্শটা মন্দ নয়, এই উপায়ে, মন্থের সহিত চারুর ভার্টা সহজে হইতে পারিবে; কেন না, সে জানিত, চারু খেলা ভেমন জানুক না জানুক, খেলিতে কিন্তু তার ভারি উৎসাহ। তা হ'লে কি হয়, চারু ত সহজে মন্থের সঙ্গে খেলিতে 'রাজি' হয় না। "বরের সঙ্গে আবার খেলা, ছি! দিদির যেমন কাজ!" কিন্তু দিদি যে কিছুতেই ছাড়ে না, একে দিদির বকুনি, তাতে মায়ের অপমানের ভয়,

চারু কি মুস্থিলেই পড়েছে গা! চারু মনে মনে মা দুর্গা, কালী, কত দেবতাকেই 'মানে, "কবে ও তাদের বাড়ী থেকে যাবে"; কিন্তু কেমন নিষ্ঠুর দেবতা, তার মিনতি কেহ শুনে না। শেষ আর কি করে, দুই একদিন দেখিয়া, চারু অগত্যা খেলিতে স্বীকৃত হইল, কিন্তু ঘোমটা কিছুতেই কুমাইল না। দিদি চলিয়া গেলে, চারুর আর খেলা হইত না, কাজেই সিন্ধুকে বসিয়া থাকিতে হইত। বাজী শেষ হওয়া পর্য্যন্ত সব দিন চারুর ধৈর্য থাকিত না! সে খেলিতে খেলিতে প্রায়ই ঘুমাইয়া পড়িত। মন্থের অনুরোধে সিন্ধু সে বাজীটা শেষ না করিয়া যাইতে পারিত না। রাত্রির এই বন্দোবস্তে কিন্তু সিন্ধুর উদ্দেশ্য সফল হইল না, চারুর মুখ ফুটিল না। দিদি চলিয়া গেলেই আবার যে চারু সেই চারু! বিশেষতঃ চারু মধ্যে মধ্যে প্রায়ই সন্ধ্যা হইতে না হইতে ঘুমাইয়া পড়িত। কাজেই দিনমানেও চারুকে মন্থের ঘরে আনিবার বন্দোবস্ত করিতে হইল। চারু অনেক কান্নাকাটি আপত্তি করিল, কিন্তু কে তার কথা শুনে বল? শেষ ছ'পুর বেলাতেও চারুকে দিদির সঙ্গে ঘরে আসিতে হইত, কিন্তু সে দিদির আঁচল ছাড়িত না! দিদিকে মাঝে রাখিয়াই কোন দিন 'দেখা বিস্তি', কোন দিন বা 'গোলাম-চোর' খেলা হইত। বিস্তিখেলায়, মন্থ ইচ্ছা করিয়া মাঝে মাঝে খেলার নিয়ম ভাঙ্গিত; চারুর সেটা অসহ্য হইত, সে নিজে মুখ ফুটিয়া মন্থকে কিছু বলিতে পারিত না বটে, কিন্তু দিদিকে তখনই কাণে কাণে বলিত—“ও কি! অমন কেন?” আবার, 'গোলাম-চোরে, মন্থ প্রায়ই সাধ করিয়া "গোলাম-চোর" হইত। চারুর তাতে ভারি আনন্দ, ভারি উৎসাহ। সে সময়, চারুর অজ্ঞাতে, তার ঘোমটা একটু সরিয়া যাইত, কোন দিন হয় ত সেই মুহূর্তে মন্থের সহিত, তার "চোকোচোকি" হইয়া যাইত, মন্থের চক্ষে হাসি ফুটিয়া উঠিত। সে হাসি যেন "হেরে গিয়ে হেসে চাওয়া।" চারু কিন্তু তাহাতে বড় অপ্রতিভ হইত। লজ্জায় মুখ নামাইত! অগ্নুলিম্পর্শে লজ্জাবতী লতা যেমন "গুটিসুটি" হইয়া যায়, চারু তেমনই জড়সড় হইয়া পড়িত, কোন দিন বা পলাইয়া যাইত। বেশী পীড়াপীড়ি ভাল নয় বলিয়া, সিন্ধুও তাহাতে আর আপত্তি করিত না। চারু চলিয়া আসিলেও সিন্ধু মন্থের সহিত গল্প করিত। তবে প্রায়ই সিন্ধুর দুই একজন 'সমবয়সী' বা

ছই একজন ঠাকুর দিদি, সে সময়ে আসিয়া জুটতেন; নানা রকমের কথাবার্তা, হাসি তামাসা চলিত। মন্থ বেশ মিষ্টি মিষ্টি মজার মজার গল্প করিতে পারিত; সে গল্প শুনিতে সিন্ধুর বড় ভাল লাগিত। ক্রমে মন্থের সহিত তাসখেলা ও গল্প করা সিন্ধুর একটা নেশা হইয়া দাঁড়াইল। মন্থ যদি আহারান্তে দৈবাৎ বাহিরে যাইত, সিন্ধু অমনি মন্থকে ডাকাইতে পাঠাইত। আসিতে বিলম্ব হইলে, অভিমান করিত। মন্থ শীঘ্রই ইহা বুঝিল; বুঝিয়া কি জানি কেন, ইচ্ছা করিয়া মাঝে মাঝে আসিতে বিলম্ব করিত। শেষ আবার সাধিয়া ঠাকুরঝির অভিমান ভাঙাইত! কে জানে, এ খেলা খেলিয়া কি লাভ? সরলা সিন্ধু অত শত বুঝিত না, সে অকপটে মন্থকে বিশ্বাস করিত; মন্থ যেন তার 'সমবয়সী'। এইরূপে আমোদে আক্লাদে, হাসি গল্পে দিন কাটিতে লাগিল। এইরূপে মন্থের প্রতি সিন্ধুর স্নেহ ও বন্ধুত্ব গাঢ় হইতে গাঢ়তর হইল। সিন্ধু চাকুরি ধরিয়া দিবার জন্ত জাল বিস্তার করিয়াছিল, এখন উর্নাতের মত, সে জালে আপনিই জড়িত হইতে লাগিল।

### চতুর্দশ পরিচ্ছেদ।

“কলিকাতা”; \* \* \* \* \* নং বেচু চাটুর্ঘ্যের লেন।  
২৯ জ্যৈষ্ঠ, ১৩০১।

“সিন্ধু!

“কয় দিন তোমার চিঠিপত্র পাইতেছি না কেন? ভাল আছ তু? বাড়ী হইতে প্রসন্নপুর যাইবার পূর্বে লিখিয়াছিলে, ‘সেখানে গিয়া খুব ঘন ঘন পত্র দিব।’ কিন্তু এ ছই সপ্তাহ মধ্যে, কেবলমাত্র একখানি চিঠি দিয়াছ, এরই নাম, ‘যেবা রোগী ছিল বসে, বৈজ্ঞে শোয়ালে এসে।’

“তোমার পত্র পাইতে বিলম্ব হইলে যে কত অধীর হই, তা ত তুমি জান? জানিয়াও যে ইচ্ছা করিয়া বিলম্ব করিবে, এ বিশ্বাস ত হয় না! তাই এত ভাবনা।

“শুনলাম, জামাইঘড়ীতে মন্থ ভায়া তোমাদের ওখানে আসিয়াছেন। চাকুরি ত কত দিন দেখি নাই। সে কত বড়টি হয়েছে?, মন্থের সঙ্গে বেশ কথাবার্তা কর ত?”

“সিন্ধু, চার বছর আগে, তুমিও তখন তোমার বোনটির মত ছিলে, সে দিন মনে পড়ে কি? সে সব কথা মনে হ'লে বোধ হয় এখন তুমি খুব লজ্জিত হও, কিন্তু আমার পক্ষে এখন সে স্মৃতি বড় মধুর! তাই ব'লে আবার তোমাকে পাকাগুটি কাঁচিয়ে বসতে বলিনে, কেন না, সে দিন আর ফিরবে না বলেই সে সব স্মৃতি এত মধুর মনে হয়। আবার তেমনি ক'রে, তোমায় ভালবাসার পাঠশালে হাতে খড়ি দিয়ে, অক্ষরপরিচয় করাতে হ'বে, সে আশঙ্কাটা যদি থাকত, তবে হয় ত, তার নামেও চমকে উঠতাম। কিন্তু সে ভয় আর নেই, এখন ত তোমার ‘গুরুমারা বিছা!’

“তা সে কথা থাক। আজকাল বোধ হয় তোমরা খুব আমোদে আছ? তা বেশ। কিন্তু দেখো, যেন নূতন আমোদ পেয়ে, পুরানোদের একেবারে ভুলো না। শাস্ত্রের বিধিটা যেন মনে থাকে,—‘সেবকান্ন পুরাতনঃ।’

“এখন, তামাসা থাক। সত্যই তোমার পত্রের জন্ত পথ চেয়ে আছি। কেমন আছ? আমি অমনই বেঁচে আছি! এখন বিদায়। ইতি—

“তোমারই প্রভাত।”

চিঠিখানি যে সিন্ধুর স্বামীর, তা আর আমাদের পাঠক-পাঠিকাদের বলিতে হইবে না।

সিন্ধু পত্রখানি পড়িয়া কি ভাবিতে ভাবিতে উপরের ঘরে যাইতেছিল। চিঠিখানি তখনও হাতে। সেই সময় মন্থও নীচে নামিতেছিল, সিঁড়ির ঘরে উভয়ের দেখা হইল। মন্থ হাসিতে হাসিতে জিজ্ঞাসা করিল, “ও কার চিঠি ঠাকুরঝি?” “কই, কার নয়” বলিয়া, একটু হাসিয়া সিন্ধু চিঠিখানি হাতের মুঠায় লুকাইল। মন্থের প্রথমে যে সন্দেহটুকু ছিল, এখন তাহা দূর হইল। সে আবার হাসিতে হাসিতে বলিল, “চিঠি দেখাও বলেছিলে যে, দেখাও।” সিন্ধু, “না না, সে চিঠি নয়,” বলিয়া পাশ কাটাতেছিল, মন্থ পণ আটকাইল, বলিল, “চিঠি দেখাও, নইলে কিন্তু ছাড়ব না।” সিন্ধু চিঠির খানিকটা বাহির করিয়া হাত, দূরে রাখিয়া বলিল, “এই দেখা।” মন্থ ক্ষিপ্ৰহস্তে চিঠিখানি

লহিতে গেল, সিন্ধু সেই অবকাশে পলাইবার চেষ্টা করিতেছিল, কিন্তু পারিল না, মন্থ তার হাত ধরিল! সহসা সিন্ধুর হাসি তামাসা সব বন্ধ হইয়া গেল। সে প্রফুল্ল মুখখানি গম্ভীর হইয়া উঠিল, খুব বিরক্তি ও দৃঢ়তার সহিত সিন্ধু বলিয়া ফেলিল, “ও কি মন্থ, হাত ছাড়।” মন্থ অপ্রতিভ হইয়া, তাড়াতাড়ি হাত ছাড়িয়া বাহিরে চলিয়া গেল।

মন্থ সিন্ধুকে হাশ্বময়ী চপলপ্রকৃতিই জানিত, বুঝি তাই এতটা সাহস করিয়াছিল; আজ, সেই চপলার ক্ষণিক প্রভাবে, সে একেবারে স্তম্ভিত হইল।

### পঞ্চদশ পরিচ্ছেদ।

মন্থ যখন বাহিরের ঘরে একাকী থাকিত, তখন ছোট ছোট বালক-বালিকার দল বড় মজা পাইয়া যাইত। কেহ একটা বটের পাতায় কতকগুলি ধূলা, ছ'খানা খোলামুঁচি, হ'লো বা গোটাকত তেলাকুচা আনিয়া বলিত, “মন্থ বাবু, খাও।” কেহ বলিত, ‘টুমি নাকি চারু ডিডির নাম কয়েছ? ওহো! বৌএর নাম করেছ, সকাইকে বলে ডেব।’ কেহ বা মন্থের হাত ধরিয়া টানিতে টানিতে বলিত, “টোমায় চারু ডিডি ডাক্চে।” মন্থ ইহাদিগকে এক আধবার যে তাড়া তুড়ি না দিত, তা নয়; কিন্তু আসলে সে বিরক্ত হইত না; বরং মাঝে মাঝে সেই ছেলেখেলায় যোগ দিত। মধুর রসের সুষ্ক না হইলে বুঝি এতটা মধুর ভাবের প্রবাহ বয় না।

এই সব বালক-বালিকার পশ্চাতে আর এক দল বালিকা থাকিত। তাহারা বাহিরে আসিবার পথে, সদর দরজা ভেজাইয়া, তাহার ফাঁকে দাঁড়াইয়া দাঁড়াইয়া উকি দিয়া সব দেখিত। আর মাঝে মাঝে হাতছানি দিয়া, সেই ছোটদলকে ডাকিয়া, নূতন নূতন তামাসা শিখাইয়া দিত। মন্থের সহিত চোকোচোকি হইলেই “ওলো দেখেছে লো” বলিয়া ঝম্ ঝম্ রবে সেই বালিকার-দল অন্তরের দিকে ছুটিয়া যাইত। আবার টিপি টিপি আসিত, হাসিত, পলাইত। ইহারা চারুর অনেকটা সমবয়সী। মন্থ অল্প দিন এ সব

বেশ উপভোগ করিত। আজ ইহারা অনেকক্ষণ ছুটাছুটি, লাফালাফি করিল, কিন্তু মন্থ সে দিকে বড় মনোযোগ দিল না। তখন সেই “গৃহ-হারা আনন্দের দল” যেন একটু ক্ষুধা হইয়া চলিয়া গেল। মন্থ অন্তমনস্কভাবে একখানি ইজি-চেয়ারে শুইয়া ঘুমাইবার চেষ্টা করিতেছিল, কিন্তু ঘুম আসিল না। মনটা বড় চঞ্চল। মুদ্রিতচক্ষুঃ মন্থ, কি একটা ভাবিতেছিল, এমন সময় শুনিল,—

“ঘুমুলে ঘুমুলে পাণ খেলে না,  
পাণ সেজেছি এলাচ-দানা;  
ছোট ব'লে কি মনে ধরে না,  
ছোট কি কখন বড় হবে না!”

মন্থ হাসিয়া চক্ষুঃ মেলিল। দেখিল, সম্মুখে একটি কৃত্রিম পাণ হাতে দাঁড়াইয়া তাহার অষ্টমবর্ষীয়া শ্রালিকা হেম। মন্থ তাহাকে সেই হাত বাড়াইয়া ধরিতে গেল, সে অমনি পাণটি মন্থের গায়ে ছুড়িয়া হাসিতে হাসিতে একদৌড়ে পলাইয়া গেল। এমন সময় কে ডাকিল, “জামাই বাবু! ‘দিদিমণি’ আপনাকে ডাক্চে।” সে ডাক বীণাধ্বনির মত মন্থের কাণে বাজিল। মন্থ তখন কাঁচপোকায় আকৃষ্ট আরম্ভলার মত ঝির অনুসরণ করিল।

### ষোড়শ পরিচ্ছেদ।

মধ্যাহ্নের সেই ঘটনার পর মন্থ বাহিরে চলিয়া গেল, সিন্ধু মনে মনে বড় অপ্রতিভ হইল। আজ সহসা কোথা হইতে তার এতটা দৃঢ়তা আসিল। ‘সে’ নিজেই একটু বিস্মিত হইল। ভাবিল, কাজটা ভাল হয় নাই। ভগিনীপতি হাত ধরেছিল, তা সেটা জ্ঞান এমন দৌষের কি হয়েছে? যদ্যপি ভগিনীপতি এমন ধরে! তখন আর কোন কথা সিন্ধুর হৃদয়ে ঠাই পাইল না, শুধু মনে হইল, তার এই ব্যবহার না জানি মন্থ কত কষ্টই পেয়েছে! ছি! সিন্ধু অপ্রতিভ হইয়া আপন মনে জিভ কাটিল।

সে দিন, বৈকালে অশ্রুদিনের চেয়ে ‘সকাল, সকাল’ মন্থের জল-খাবারের ডাক পড়িল। অশ্রুদিন মন্থের শাওড়ী তাকে জলখাবার দেন,

আজ সিন্ধু জলখাবার দিতেছে। সিন্ধু জলখাবার দিল বটে, কিন্তু মুখ তুলিয়া মন্থের দিকে চাহিতে পারিল না। নতমুখে বলিল, “মন্থ, জল খাও।” মন্থ প্রথম ভাবিয়াছিল, বুঝি আজ জলখাবারে কিছু ভেল আছে, কিন্তু মধ্যাহ্নের ঘটনায় সে সন্দেহ তার মনে স্থান পাইল না। সে সিন্ধুর মুখের দিকে চাহিল, দেখিল, তখনও সিন্ধু অবনতমুখী। মন্থ মুগ্ধনেত্রে দেখিল, সেই অপ্রতিভ অপ্রতিভ মুখে আজ এক অপূর্ণ শ্রী ফুটিয়া উঠিয়াছে। মন্থ ব্যাপার বুঝিল, মনে মনে হাসিয়া ডাকিল, “ঠাকুর-ঝি!” সিন্ধু মুখ তুলিল, চারিচক্ষুে মিলিবামাত্র উভয়েই হাসিয়া ফেলিল। লজ্জার বাঁধ ভাঙ্গিয়া গেল। সেখানে আর কেহ নাই দেখিয়া, মন্থ সপ্রতিভভাবে বলিল, “কই—চিঠি!” চিঠি সিন্ধুর আঁচলে বাঁধা ছিল, একটু হাসিয়া চিঠিখানি খুলিয়া সিন্ধু মন্থের হাতে দিল। মন্থ পত্রখানা আগা গোড়া পড়িল, পড়িয়া ফিরাইয়া দিল। কিন্তু একটা তামাসার লোভ সংবরণ করিতে পারিল না,—তামাসার মাত্রাটা কিছু বেশী চড়িল—“যাও ছি! অমন কল্পে কিন্তু আর আ’সব না”, বলিয়া গমনোচ্ছতা সিন্ধু যেন ঈষৎ কোপকুটিল-কটাক্ষে মন্থের দিকে চাহিল। সে অপাঙ্গে বুঝি একটু হাসিও খেলিয়াছিল।—তখন ‘যাই’ বলিয়া হাসিতে হাসিতে মন্থও বাহিরে গেল।

মন্থ কাল বাড়ী যাইবে, আজ রাত্রে তাই খেলার ধুমটা একটু বেশী। “অনেক রাত হয়েছে, এখন যাই” বলিয়া সিন্ধু একবার উঠিতে চাহিতেছিল, কিন্তু মন্থ বাধা দিল; বলিল, “রাত আর কই হয়েছে, আর আজকের রাত বই ত নয়।” সিন্ধু ভাবিল, তা বটে। সরলা বালিকা আবার খেলিতে বসিল। চারু তখন অন্ধক রাত্রি।

ঝম্ ঝম্ ঝম্, বাহিরে মুষলধারে বৃষ্টি পড়িতেছে। গুরু গুরু ছরু ছরু গভীর গর্জনে মেঘ গর্জিতেছে। সেই “ঘন ঘোরা বাদল” নিশীথে, সিন্ধু আর মন্থ খেলিতেছিল, গল্প করিতেছিল, হাসিতেছিল, আর সিন্ধু মনে মনে মন্থের রসিকতার প্রশংসা করিতেছিল। রাত্রি গভীর, সংসার সুষুপ্ত, কেবল মন্থ আর সিন্ধু খেলায়, গল্পে, হাসিতে বিভোর! সেই বিভোর অবস্থায় খেলিতে খেলিতে কি একটা কারণে তাস লইয়া উভয়ের মতদৈব ঘটিল। ক্রমে তাস লইয়া টানাটানি, কাড়াকাড়ি, হাসাহাসি আরম্ভ হইল। মহসা

গৃহমধ্যে প্রচণ্ডবেগে একটি ‘দমকা’ বাতাস প্রবেশ করিল। প্রদীপ নিবিয়া গেল! গৃহে সঙ্গ সঙ্গ একটি জীবনও অন্ধকার হইয়া গেল!

ধীরে, অতি ধীরে, সিন্ধু সে গৃহ ত্যাগ করিল। উদেলিতকণ্ঠে মন্থ ডাকিল, “ঠাকুর-ঝি!” সিন্ধু ফিরিল না। বুঝি সে কথা তার কাণে গেল না।

মন্থ পরদিন অতি প্রত্যুষে বাড়ী চলিয়া গেল। চারু আবার হাসিয়া খেলিয়া ছুটিয়া বেড়াইতে লাগিল। কয়েদী যেমন জেলখানা হইতে নিষ্কৃতি পাইয়া মুক্ত বাতাসে আপনাকে স্বচ্ছন্দ মনে করে, সে তেমনি হাঁফ ছাড়িয়া বাঁচিল। সিন্ধু কিন্তু বড় বিমর্ষ। এই বিষন্ন ভাব দেখিয়া লেখাপড়া-জান এক নবীনা ঠাকুরগ দিদি, সিন্ধুর মুখের কাছে হাত নাড়িয়া সুর করিয়া বলিলেন,—

“সোণার নাতিনী, এমন যে কেনি

হইলি বাউরি পারা,

সদাই রোদন,

বিরস বদন,

না বুঝি কেমন ধারা।

যমুনা যাইতে,

কদম্ব-তলাতে,

দেখিলি যে কোন জনে?

যুবতী-জনের

ধরম-নাশক

বসি থাকে সেইখানে।”

সিন্ধুর সমবয়স্কারাও বিদ্রূপ করিতে ছাড়িল না। কেহ বলিত, “নে ভাই সিন্ধু, তোর আর বাড়াবাড়ি দেখে বাঁচিনে। ভগিনীপতি তো সবারই আছে লো!” কেহ বা সুর আর একটু চড়াইল, “কি লো, মন্থ গিয়ে তুই যে একেবারে ব’য়ে গেলি। লোকের বর বিদেশে গেলেও ত এমন হয় না।”

সিন্ধুর মাও ক্রমে সিন্ধুর এ পরিবর্তন লক্ষ্য করিলেন; বলিলেন, “সিন্ধু! তোর হলো কি? দিন রাত অমন করে গকি ভাবিস বলতো, দিনকের দিন যে শুকিয়ে উঠলি।”

সিন্ধু কোন উত্তর দিত না। শুধু নতমুখে, কাঁদ কাঁদ হইয়া থাকিত। কোন দিন বা অত্নের অলক্ষ্যে কাঁদিয়া ফেলিত।

সপ্তদশ পরিচ্ছেদ।

আজ অনেক দিনের পর প্রভাত সিন্ধুর হস্তাক্ষর পাইলেন, সাগ্রহে তাড়াতাড়ি পত্র খুলিলেন—  
“প্রিয়তম!

“সত্যই এ পোড়ারমুখী তোমায় ভুলিয়াছিল, নহিলে এমন গুরুতর পাপ করিবে কেন! আমার এ অপরাধের ক্ষমা নাই! তোমাকে অনেক কথা লিখিব বলিয়া এ পত্র লিখিতে বসিয়াছিলাম কিন্তু আজ আর তা পারিলাম না। সকল কথা পরে লিখিব। কেমন আছ? ইতি—

“পাপিষ্ঠা

“সিন্ধুবালা”

“একি এ! একি আমার সিন্ধুর পত্র! হাঁ, সিন্ধুর হস্তাক্ষরই ত বটে।”  
প্রভাত একবার ছইবার তিনবার কতবার পত্র পড়িলেন, কিছুই ঠিক করিতে পারিলেন না। প্রভাতের মনে কত রকমের অনুমান উঠিতে লাগিল, শেষ পত্র বন্ধ করিয়া প্রভাত ভাবিলেন, ছি! আমি কি পাগল! কিন্তু—কিন্তু সিন্ধু এমন করিয়া পত্র লিখিল কেন? আবার ঐ কথা! শেষ প্রভাত সিদ্ধান্ত করিলেন, আমোদে মত্ত হইয়া আমার পত্র দিতে বিলম্ব করিয়াছে বলিয়া সিন্ধু নিজেই বড় অপ্ৰতিভ হইয়াছে। তাই অনুতাপ করিয়া এমন-তর লিখিয়াছে। এ সামান্য কথাটাও এতক্ষণ বুঝিতে পারি নাই। আমি কি নিকোঁধ! প্রভাত ফেরত ডাকে উত্তর দিলেন—

“আমার সিন্ধু!

“পত্র দিতে বিলম্ব হইয়াছে, তা এত লজ্জা কি? আর এই সামান্য কারণে এমন অপরাধীর মত পত্র দিয়াছ কেন? এ ত অতি তুচ্ছ কথা, যদি প্রকৃতই তুমি না বুঝিয়া কোন গুরুতর অপরাধ করিয়া, এমনই করিয়া অনুতপ্ত হইয়া, আমায় জানাও, আমি তোমার সেই প্রথম অপরাধও মার্জনা করিতে প্রস্তুত। যা হোক, এর জন্ত এত অপ্ৰতিভ হবার কারণ নাই। তুমি যে আমায় ভুলিতে পার না, তা আমি বেশ জানি। কিন্তু এমন করে পত্র দিতে আর দেৱী করোনা! লক্ষ্মী আমার!

• “অন্ত অন্ত কথার উত্তর দাও নাই কেন?”

“চাকরদের কেমন ভাব হলো জানিতে উৎসুক আছি। মন্থ এখন কোথায়?”

“কেমন আছ। আমি ছুটীর চেষ্টায় আছি। ছুটী পেলেই তোমায় আনিতে যাইব। আর যদি এর মধ্যে অন্ত সুযোগ পাই, তবে ততদিনও অপেক্ষা করিতে হবে না। এ সুখবরের জন্ত কি খেতে দেবে দাও। ইতি।”

• সিন্ধু যথাসময়ে এ পত্রের উত্তর দিল—

“তুমি আমার অপরাধ যত সামান্য মনে করিতেছ, আসলে তা নয়। পাপিষ্ঠা আমি, তোমার নিকট অবিশ্বাসিনী হইয়াছি, আমায় লইয়া তুমি কি আর সুখী হইতে পারিবে? একদিন বিস্তারিত জানাইব। আজ থাক।”

পত্র পড়িয়া প্রভাতের মাথা ঘুরিয়া গেল। মিছে কথা এ, সিন্ধু পাপিষ্ঠা, সিন্ধু অবিশ্বাসিনী, অসম্ভব এ।—ঘন ঘন পত্র দিব বলিয়া এত বিলম্ব করিয়াছে, তাই এ কথা! সিন্ধুর কি ছেলেমানুষি! কি সরলতা! “আমায় লইয়া আর কি সুখী হইতে পারিবে?”—ছেরেপ পাগলামি! কিন্তু তবু প্রভাতের মনের ঘেঘ কাটিল না। কি এক অজ্ঞাত অমঙ্গলের আশঙ্কায় তাঁর প্রাণ “আকুলি ব্যাকুলি” করিতেছিল। “সিন্ধু! সিন্ধু! আমার সিন্ধু! সিন্ধু কি পাগল হইল!”

অষ্টাদশ পরিচ্ছেদ।

প্রভাত ছুটী লইয়া সিন্ধুর কাছে যাওয়ারই স্থির করিয়াছিলেন, কিন্তু পরদিন তাঁর শ্বশুরের পত্রে জানিলেন, মন্থ শ্বশুরবাটী হইয়া শীঘ্র কলিকাতায় পড়িতে আসিতেছে। এই সুযোগে সিন্ধুকে আনা সহজে হইবে মনে করিয়া, প্রভাত তখনই শ্বশুরকে পত্র লিখিলেন। উত্তরে শ্বশুরও দিন স্থির করিয়া জানাইলেন। স্থিরীকৃত দিনে যথাসময়ে প্রভাত ষ্টেশনে উপস্থিত হইলেন। মন্থও গাড়ী হইতে নামিল। সিন্ধু কই? প্রভাত অতিমাত্র সাগ্রহে, মন্থকে শুধাইলেন, “তোমার ঠাকুর-বি!” মন্থ সংক্ষেপে বলিল,

“তঁার আসা হইল না।” “কেন?”—“ঠিক বলিতে পারি না।” “সখ ভাল ত।”—“হাঁ।”

এই সংক্ষিপ্ত উত্তরে প্রভাতের উদ্বেগ বাড়িল মাত্র। উদ্ভ্রান্ত চিত্তে বাসায় ফিরিলেন। বাসায় ফিরিয়া দেখেন, সিন্ধুর একখানি চিঠি। সিন্ধু শুধু লিখিয়াছে, “প্রিয়তম! একবার এস।” প্রভাতের আসন টলিল, সাহেবকে বলিয়া কহিয়া কোনরূপে পাঁচদিনের ছুটি লইয়া সেইদিনই সন্ধ্যার ট্রেনে, “নদী যথা ধায় সিন্ধুপানে”, প্রভাত সিন্ধুর উদ্দেশে ছুটিলেন। পরদিন বেলা দশটার পর প্রভাত প্রসন্নপূরে পৌঁছিলেন। যাহাকে দেখিবার জন্ম প্রভাত এত ব্যাকুল, সম্মুখে ওই যে সৌধ, ওই সৌধে প্রভাতের সেই প্রেমপ্রতিমা প্রতিষ্ঠিত। তবে আজ সেই সুখের মন্দিরে প্রবেশ করিতে প্রভাতের মন সহসা এত কাঁদিয়া কাঁদিয়া উঠিতেছে কেন? দূর হইতে চারু কিরূপে প্রভাতকে দেখিতে পাইয়াছিল। সে অমনি “প্রভাতবাবু এসেছে গো!” বলিতে বলিতে ছুটিয়া বাড়ীর মধ্যে গেল। সিন্ধুর সহিত চোখাচোখি হইয়া চারু একমুখ হাসিয়া মাথা নাড়িতে নাড়িতে শাসাইল, “দিদি আজ!” বোধ হয় চারুর তখন মনে হইতেছিল, “দিদি আমায় এবার বড় জ্বালানই জ্বালিয়েছে, এখন আমিও তেমনি দাদ তুলবো,” তাই সংক্ষেপে এই শাসন-বাক্য প্রয়োগ করিল। চারুর এই বালিকা-সুলভ কল্পনা বুঝিয়া সকলেই হাসিয়া উঠিল, প্রভাতের আগমন-সংবাদে সিন্ধুর মুখও প্রফুল্ল হইয়াছিল, কিন্তু “দিদি আজ!” এই কথায় কি জানি সহসা কেন সে প্রফুল্ল মুখকমল নিমেষে শুকাইয়া উঠিল।

### উনবিংশ পরিচ্ছেদ।

আজ বহু দিনের বিচ্ছেদের পূর্ণদম্পতির মিলন হইল। সিন্ধুর সেই বিষাদ-মলিন মূর্তি দেখিয়া প্রভাত ব্যগ্রভাবে জিজ্ঞাসা করিলেন, “সিন্ধু, এমন দেখি কেন?” সিন্ধু কিছু বলিল না, স্বামীর মুখের দিকে চাহিয়া একটু বিষাদের হাসি হাসিল। ছিন্ন মেঘের কোলে সৌদামিনী যেমন হাসে, অনেক

দিনের পর সিন্ধু আজ তেমনই হাসিল। কিন্তু তখনই আবার জলভরা মেঘের মত গম্ভীর হইয়া উঠিল। প্রভাত আগ্রহভরে সিন্ধুকে আলিঙ্গন করিতে যাইতেছিলেন, সিন্ধু সরিয়া গেল; বলিল, “আমায় ছুঁওনা,” প্রভাত একটু হাসিয়া সিন্ধুকে কোলে টানিয়া লইলেন। তখন সিন্ধুর হৃদয়ে তুমুল ঝটিকা বহিতেছিল। প্রভাত আবার স্নেহ-কম্পিত কণ্ঠে জিজ্ঞাসা করিলেন, “বল সিন্ধু, এমন দেখি কেন? অমন করে, অপরাধীর মত চিঠি পত্রই বা লিখতে কেন? আর মন্থনের সঙ্গে যেতেই বা আপত্তি কল্পে কেন?” প্রভাত দারুণ আগ্রহে, একবারেই তিনটি প্রশ্ন জিজ্ঞাসা করিলেন। তখন সিন্ধু আত্মহারা হইয়া, স্বামীর বুকে মুখ লুকাইয়া, কাঁদিল। পদস্থলিত ভক্ত যেমন ইষ্টদেবের সম্মুখে লুঠাইয়া লুঠাইয়া কাঁদে, পথহারা শিশু যেমন জননীর কোল পাইয়া মুখ লুকাইয়া কাঁদে, সিন্ধু তেমনি করিয়া কাঁদিল।

তার পর প্রকৃতিস্থ হইয়া, স্বামীর বাহুপাশ হইতে আপনাকে মুক্ত করিয়া সিন্ধু সরিয়া দাঁড়াইল। দৃঢ়কণ্ঠে বলিল,—“তবে শোন।”

সিন্ধুর সেই উন্মাদিনী মূর্তি দেখিয়া প্রভাত মহাভীত হইয়াছিলেন, সমস্ত আলোচনা করিয়া, ইহাও তিনি বুঝিয়াছিলেন যে, নিশ্চয় কি এক অঘটন ঘটিয়াছে। “আর বলতে হবে না—সিন্ধু আমি বুঝেছি”, বলিয়া প্রভাত তাড়াতাড়ি আবার সিন্ধুকে বুকে ধরিলেন।

“না—বুঝ নাই। বুঝিলে এ কালসাপিনীকে এমন আদর করিয়া বুকে লইতে না।” বলিয়া সিন্ধু আবার কাঁদিয়া ফেলিল;—“যা বুঝি নাই, তা আর বুঝে কাজ নাই। সিন্ধু! তুমি যে অপরাধই করে থাক, আমি তোমায় ক্ষমা করিলাম।” সিন্ধু প্রভাতের নিষেধ শুনিল না। তবু বলিল,—“না, শোন!” “না, সিন্ধু, না, শুনে আর কাজ নাই! এস, অণু কথা কই” বলিয়া প্রভাত সিন্ধুর সেই রোদন-লৌহিত, অশ্রুসিক্ত, অনিন্দ্যহৃদয় মুখখানি ধরিয়া বার বার চুম্বন করিলেন; তার পর, অতি যত্নে চোখের জল মুছাইয়া, সিন্ধুকে আপনার পাশে বসাইলেন। অতি দ্রাবধানে অণু প্রসঙ্গ পাড়িলেন, ক্রমে সিন্ধুও সে সকল প্রসঙ্গে যোগ দিতে আরম্ভ করিল, তাহার সেই মলিন মুখ আবার যেন প্রফুল্ল হইল, নিরীকোণমুখ দীপ আবার জ্বলিয়া উঠিল! প্রভাত বুঝিলেন, তবে বুঝি বা এখনকার মেঘ কাটিয়া গেল!

এমন সময় কে ডাকিল, “সিন্ধু, চুল বাঁধবে এস!” “তবে যাই” বলিয়া সিন্ধু উঠিল, প্রভাতও উঠিয়া বিদায়-চুম্বন দিলেন; এবং সিন্ধুও প্রতিচুম্বন করিল; সে চুম্বন বড় তপ্ত, বড় গাঢ়! কিন্তু সহসা কি মনে করিয়া সরিয়া দাঁড়াইল, তার পর স্বামীর পানে চাহিয়া, চাহিয়া, সিন্ধু চলিয়া গেল।

প্রভাত বাহিরে যাইতেছিলেন, সিঁড়ির ঘরে একটু দাঁড়াইয়া শুনিলেন, পাশের ঘরে চেনা গলায় কে বলিতেছে, “সিন্ধু, আয় লো, তোরা মাথা বেঁধে দি”; ইহার পরের চরণ প্রভাতের জানা ছিল, প্রভাত একটু হাসিয়া বাহিরে চলিয়া গেলেন। যাইতে যাইতে পথে, তাঁহার অঙ্গুলিহিত হীরকাসুরীয়ে প্রতী দৃষ্টি পড়িল—এই যে হীরক, ইহা খাটি না নকল? ভাঙ্গিয়া দেখিলে হয় না? নকল হয় হোক, ভাঙ্গিয়া কি লাভ? আমি ত জানি, ইহা খাটি। তবু সে ভুল ভাঙ্গিয়া কাজ কি? প্রভাত এই ভাবিয়া আবার আপনার মন দৃঢ় করিলেন।

আর সিন্ধু! সিন্ধু চুল বাঁধিতে বাঁধিতে বড় অগ্রমনস্ক হইতেছে। সেই নবীনা ঠাকুরগদিদি, চুল বাঁধিয়া দিতে দিতে অনেক রঙ্গ করিতে ছিলেন—কিন্তু সিন্ধু আজ সে হাসি তামাসায় যোগ দিতে পারিতেছে না! সিন্ধু যেন কি এক গভীর চিন্তায় মগ্ন! চুল বাঁধা শেষ হইলে, ঠাকুরগদিদি,—

“সাদা মনে কালো ফিতেয় বেঁধে দিলাম চুল,

স্বামীর পায়ে মনটি রেখো হয় না যেন ভুল!”

বলিয়া বেশ করিয়া মুখখানি মুছাইয়া দিয়া, একটি ‘টিপ’ পরাইয়া, সিন্ধুর মুখে চুমো খাইলেন। সিন্ধু বিষাদের হাসি হাসিল। ঠাকুরগদিদি বুঝিয়া গেলেন,—

“মুখের হাসি চাপলে কি হয়—

প্রাণের হাসি চোখে খেলে!”

বিংখ পরিচ্ছেদ।

সেই দিন সন্ধ্যার পর চারু তার ঘরে গিয়া দেখে—সর্বনাশ! দেখিয়াই সে চীৎকার করিয়া উঠিল, “ওগো! তোমরা শীগুদির এসো গো, দিদি কেমন কছে!” চীৎকার শুনিয়া সকলে ছুটিয়া আসিলেন, দেখিলেন,

ছিন্নকণ্ঠ পক্ষিণীর মত সিন্ধু ভূমিশব্যায় পড়িয়া যন্ত্রণায় ছটফট করিতেছে। সিন্ধু কখন যে তার ঠাকুরমার কোটা হইতে আফিং চুরি করিয়া খাইয়াছে, তাহা কেহ জানে না। “ওমা আমার কি হলো গো!” বলিয়া কাঁদিতে, কাঁদিতে মা সিন্ধুর মাথা কোলে তুলিয়া লইলেন। তখন ডাক্তার ডাকিতে লোক ছুটিল। সিন্ধু একবার কাতরদৃষ্টিতে মার দিকে চাহিয়া চোখের জল ফেলিল। তার পর চারুকে লক্ষ্য করিয়া ক্ষীণকণ্ঠে বলিল, “একবার ডাক চারু, একবার ডাক!”

\* \* \* \* \*

ধীরে ধীরে প্রভাত গৃহে প্রবেশ করিলেন। সকলে উঠিয়া গেল। উচ্ছ্বসিতকণ্ঠে প্রভাত বলিলেন, “সিন্ধু! সিন্ধু! এ কি?” “বলি” বলিয়া সিন্ধু একখানি চিঠি প্রভাতের হাতে দিল, তার পর প্রভাতের পায়ে মাথা রাখিয়া, কাতরকণ্ঠে বলিল, “আমার বুকে দিন, রাত নরকের আগুন জ্বলছে, এ পাপের বোঝা আমি আর বহিতে পারি নে,—তুমি আমার ক্ষমা করে চরণে ঠাই দিলে, কিন্তু আমার আলা নিভিল কই? আর বলিতে পারি না, চিঠিতে সব রইলো, আমার দশা যেন সবাই শোনে।”

মনের আবেগে, বহু কণ্ঠে, সিন্ধু এই কয়টা কথা বলিল; তাহার কণ্ঠরোধ হইয়া আসিতেছিল, বলি বলি করিয়াও আর কিছু বলিতে পারিল না। সিন্ধু তখন নিরীক হইয়া অশ্রুপূর্ণলোচনে স্বামীর মুখের পানে চাহিয়া রহিল। বৃন্তলষ্ট ফুল কুমুম যেমন কর্দমস্পৃষ্ট হইয়া আকাশের পানে চাহিয়া চাহিয়া শুকাইয়া যায়, ধরণীলুপ্তিতা সিন্ধুও তেমনি কাতরদৃষ্টিতে স্বামীর পানে চাহিয়া প্রতিমুহূর্ত্তে শুকাইয়া উঠিতেছিল।

ক্রমে মৃত্যুযন্ত্রণায় সিন্ধুর চক্ষুঃ মুদ্রিয়া আসিল। উদামহৃদয়ে আকুল-কণ্ঠে প্রভাত ডাকিল, “সিন্ধু!” বাণবিদ্ধ হরিণী যেমন জীবনের শেষ মুহূর্ত্তেও বংশীরবে শিহরিয়া উঠে, স্বামীর কণ্ঠস্বরে সিন্ধু তেমনি শিহরিয়া উঠিল! তার পর ধীরে ধীরে সেই বিবেকবিহীন, অনুতপ্ত প্রাণ দেহবিমুক্ত হইল।

(সম্পূর্ণ।)\*৩.

শ্রীশৈলেশচন্দ্র মজুমদার।

\* শেষের কয়েকটা পরিচ্ছেদ বহুদিন পূর্বে “সাহিত্যে” “সিন্ধু” নামে প্রকাশিত হইয়াছিল।  
লেখক।

## কণিকা ।\*

অনেক দিনের পরে, এবার রবীন্দ্রবাবুর একখানি কবিতা গ্রন্থ প্রকাশিত হইয়াছে। কবির ভক্তেরা তাঁহার প্রসাদলাভে বঞ্চিত হইয়া বড়ই ক্ষুণ্ণ ছিলেন, সম্প্রতি, কবি তাঁহাদের সে আক্ষেপ দূর করিয়াছেন। তবে সে প্রসাদ “কণিকামাত্র”! কিন্তু ভক্তের যৈ ইহাই যথেষ্ট!

প্রবন্ধ আরম্ভের প্রথমেই বলিয়া রাখি, সমালোচক বলিয়া খ্যাতি লইবার অথবা “কণিকার” প্রকৃত সমালোচনা করিবার স্পর্ধা আমার নাই। কেবল পাঠক মহাশয়ের সহিত একাসনে বসিয়া “কণিকা”র অনেকগুলি কবিতা উপভোগ করিব, এইমাত্র সাধ! আর কেবল এই আশাতেই এ প্রবন্ধের অবতারণা!

গ্রন্থখানির আকার ক্ষুদ্র, কবিতাগুলিও ছোট ছোট। সে হিসাবে গ্রন্থের “কণিকা” নামকরণ সার্থক হইয়াছে। কিন্তু বঙ্গ-সাহিত্যের এই দুর্ভিক্ষের দিনে কণিকার মূল্য নিতান্ত অল্প নহে। তা ছাড়া, আশা করি, সাহিত্যের সুদিনেও,—যদি ইহা অপেক্ষা কখন হয়,—কণিকার গৌরব কমিবে না। আর সাহিত্যের হিসাব ছাড়িয়া পয়সার হিসাবে দেখিতে গেলেও সত্যের অনুরোধে একথা বলিতে হইবে যে, এ দুর্কালে চারি টাকা মণ চাউলের দিনেও কণিকার আট আনা মূল্য কিছু বেশী! কিন্তু যাক্ সে সকল কথা। কণিকাসম্বন্ধে অষ্টাষ্ট্র কথা বলিবার পূর্বে, পাঠক মহাশয়-দিগকে একটী সংক্ষিপ্ত সমালোচনা উপহার দিব, মনে করিতেছি। আমার কোন বন্ধু, নামটী তাঁর পাঁচফড়ি গুপ্ত, অতিরিক্ত গম্ভীর বলিয়া সমবয়স্ক-মহলে তাঁর অগ্র একটী নাম মিঃ আউল। আর এক দিক দিয়াও এ নামটার সার্থকতা আছে, পাঁচফড়ির পরিবর্তে পেঁচো, পেঁচো স্থানে পেঁচা, তথা মিঃ আউল। বন্ধুটির পেঁচা নামে অভিহিত হইলে বড় চটয়া যান, অজ্ঞাতে হয়ত তাঁর আস্তেনটীও গুটাইয়া আসে, কিন্তু মিঃ আউল বলিলে

\* কবিতা গ্রন্থ। শ্রীযুক্ত রবীন্দ্রনাথ ঠাকুর প্রণীত। এই প্রবন্ধ “কণিকা” প্রকাশের অব্যবহিত পরেই লিখিত, তখন কথা প্রভৃতি প্রকাশিত হয় নাই।

বন্ধু আমার ততটা অপমান জ্ঞান করেন না, নামটায় একটু সাহেবি গন্ধ আছে কি না! কথাটা নিতান্ত অভিনব বা অসম্ভব মনে করিবেন না। এমন বাঙ্গালী আজকাল দেখিতে পান না কি, যাহারা পিতৃ সম্বোধনে ইতস্ততঃ করেন, কিন্তু Fatherএ তাঁহাদের আপত্তি নাই! বাঙ্গালীর ছেলের একরূপ ইংরাজী রুচি, আজকাল একটা ফ্যাসানের মধ্যে! বাঙ্গালীর সমস্তই নিন্দনীয়, বাঙ্গালীর সমস্তই দোষের, একরূপ কথা আজকাল এক শ্রেণীর বাঙ্গালীর মুখে প্রায়ই শুনিতে পাই! ইহাদিগকে আর কি বলিব, কণিকার কবির ভাষায় বলিতে হইলে,—

“কেঁচো কয় নীচ মাটী, কালো তার রূপ,  
কবি তারে রাগ করে বলে চুপ চুপ!  
তুমি যে মাটীর কীট, খাও তারি রস,  
মাটীর নিন্দায় বাড়ে তোমার কি যশ।”

এই সব বঙ্গসন্তান মনে করেন, তাঁহারা বঙ্গভূমির ফল হইলেও আঁটির গাছের টক ফল নহেন! অথবা সে ভূমির সহিত ইহাদের আর কোন সম্বন্ধ নাই। এই সকল অকাল “কুস্মাণ্ডে”র দুর্গতির কথা ভাবিয়াই বোধ হয় কণিকার কবি বলিয়াছেন,—

“কুস্মাণ্ডের মনে মনে বড় অভিমান,  
বাঁশের মাচাগী তার পুষ্পক বিমান!  
ভুলেও মাটীর পানে তাকায় না তাই,  
চন্দ্র, সূর্য্য, তারকারে করে ভাই ভাই,  
নভশ্চর বলে তার মনের বিশ্বাস,  
শূত্রপানে চেয়ে তাই ছাড়ে সে নিশ্বাস!  
ভাবে শুধু মোটা এই বোঁটাখানা মোরে,  
বেঁধেছে ধরার সাথে কুটুস্থিতা ডোরে!  
বোঁটা যদি কাটা পড়ে, তখনি পলকে,  
উড়ে যাবে আপনার জ্যোতির্ময় লোকে!  
বোঁটা যবে কাটা গেল, বুঝিল সে খাঁটি,  
সূর্য্য তার কেহ নহে, সবি তার মাটী!”



কিন্তু আমরা কথা-প্রসঙ্গে অনেক দূর আসিয়া পড়িয়াছি। কথা হইতেছিল, আমার সেই বন্ধুর। বন্ধুটি আমার, রবিবাবুর অনুকরণে কবিতা লেখেন, কিন্তু তিনি আপনাকে কাহারও অনুচিকীষু বলিয়া স্বীকার করিতে প্রস্তুত নহেন। তাঁহার বিশ্বাস, তাঁহার প্রতিভা-ভগীরথ কল্পনাবলে বাঙ্গালায় নূতন কাব্যশ্রোত প্রবাহিত করিয়াছেন। তাঁহার সেই অপ্রকাশিত কাব্য-গ্রন্থ “প্রতিধ্বনি” বাহা কেবল এতদিন অসহায় বন্ধুবান্ধবদের সহিষ্ণু শ্রবণ-বিবরের পীড়া জন্মাইতেছে, মুদ্রিত হইলেই সাধারণে তাঁহার পরিচয় পাইবেন। আমার এই বন্ধু কণিকা পাঠে সমালোচনা স্বরূপ যে পত্রখানি আমায় লিখিয়াছেন, তাহার কতকাংশ পাঠকবর্গকে উপহার দিবার নিমিত্তই ভূমিকা ফাঁদিয়া এত অপ্রাসঙ্গিক কথা বলিলাম। পত্রের কিয়দংশ এইরূপ;—

“তুমি বোধ হয় এতদিন তোমাদের প্রিয়-কবি, শেলির শিষ্যানুশিষ্য, রবি বাবুর ‘কণিকা’ পড়িয়া থাকিবে! কি বুঝিলে? তুমি অবশ্য জান, আমি শান্তি-পুরের প্রসিদ্ধ ‘বিবসনা পত্রিকা’র ‘রবি বাবুর রচনী ও রচি’ প্রবন্ধে রবি বাবুকে কিঞ্চিৎ শিক্ষা দিয়াছিলাম, প্রবন্ধের নিম্নে অবশ্য আমার নাম স্বাক্ষর ছিল, রবি বাবু এতদিনে, এই অবকাশে মনের সেই ঝাল ঝাড়িয়াছেন,—

“কাণা কড়ি পিঠ তুলি, কহে টাকাটিকে,

তুমি ষোল আনা মাত্র নহ পাঁচ সিকে,

টাকা কয় আমি তাই মূল্য মোর যথা,

তোমার যা মূল্য তার চের বেশী কথা।”

দেখদেখি একবার তোমাদের উদার কবির কাণ্ডখানা? পাঁচকড়ির “কড়ি” লইয়াও টানাটানি! আবার সে কড়িগুলোও হলো কাণা! আর রবি বাবু নিজে কিনা পুরোপুরি ষোল আনা। কিন্তু এইখানেই কি শেষ? তোমরা আমায় মিঃ আউল” বল, বন্ধুত্বের খাতিরে সেটা না হয় সহ্য করিলাম, কিন্তু রবিবাবুর ব্যবহারটা একবার দেখ দেখি!

“পেঁচা রাষ্ট্র করি দেয় পেলে কোন ছুতা,

জাননা আমার সাথে সূর্যের শক্রতা।”

আমি পাঁচকড়ি গুপ্ত হ’লাম কিনা পেঁচা, আর সূর্য, তাহার অর্থ ত পড়িয়াই আছে, পাঁচ বৎসরের শিশুও সহজে অনুমান করিতে পারে, রবি

বাবু স্বয়ং! এই বুঝি তোমাদের উদার কবির মহত্ব, আর ইহারই নাম বুঝি কবিত্ব!—মহত্বটা ভাল করিয়া দেখিবে?—

“সূর্য্য ছুঃখ করি কহে, নিন্দা শুনি স্বীয়,

কি করিলে হ’ব আমি সকলের প্রিয়?

বিধি কহে, ছাড় তবে এ মোর-সমাজ,

ছু-চারি জনেরে লয়ে কর ক্ষুদ্র কাজ!”

সূর্য্যনামধারী ভানুদিংহ ওরফে রবিবাবুর কথাটা শুনিলে ত! এ গ্রন্থের নাম, কণিকার পরিবর্তে “অহমিকা” রাখিলেই ঠিক হইত না? কি? আমার অপ্রকাশিত গ্রন্থ “প্রতিধ্বনি”কেও তিনি ছাড়েন নাই—আমাকে তাঁহার অনুকরণকারী মনে করিয়া লিখিতেছেন,—

“ধ্বনিটীরে প্রতিধ্বনি সদা ব্যঙ্গ কয়ে,

ধ্বনি কাছে ধনী সে যে পাছে ধরা পড়ে।”

কিন্তু ইহাই শেষ নহে, তোমাকে বোধ হয় বুঝাইতে হইবে না, পাঁচ ও পাক, শুনিতে প্রায় একই রকম, স্তত্রাং;—

“তুমি নীচে পাক পড়ি ছড়াইছ পাক,

যে জন উপরে আছে তারই ত বিপাক!”

উপরে কিনা আকাশে, আকাশে থাকেন সূর্য্য অর্থাৎ রবি। আচ্ছা, ইহাতে মানহানি চলে না? আবার দেখিবে? এবার কিন্তু একেবারে চরম,—

“কে লইবে মোর কার্য্য, কহে সন্ধ্যা রবি,

শুনিয়া জগৎ রহে নিরুত্তর ছবি।

মাটির প্রদীপ ছিল সে কহিল স্বামী,

আমার যেটুকু সাধ্য করিখ তা আমি!”

ইহার অর্থটা একটু তলাইয়া বুলিতে হইবে—এই কয় ছত্র “কবি-তার ব্যপদেশে রবিবাবু বলিতেছেন, আমি বঙ্গসাহিত্যে যা করিলাম, তা আর কেহ পারিবে না, আমার মত এত রুড় করি, হয় নাই, কখনও হইবে না,—এক “প্রদীপ”-প্রণেতা শ্রীমান্ অক্ষয়কুমার বড়াল, তা তার ক্ষমতা আর কতটুকু। আর তাঁর “প্রদীপ”ও ত মাটির, কত দিনই বা টিকিবে? স্তত্রাং আমার অন্তের সঙ্গে সঙ্গেই বঙ্গ-সাহিত্যের কাব্য-ক্ষেত্র অন্ধকার।

সাধ করিয়া কি বলিয়াছি, “কণিকা”ত “অহমিকা”। এই প্রকারে কণিকার অধিকাংশ কবিতাই যে বন্ধু পাঁচকড়িকে উপলক্ষ করিয়া লিখিত, এবং কতক কবিতায় রবিবাবু যে, নিজের জয়ডঙ্কা বাজাইয়াছেন, তাহা তিনি এই পত্রে, মায় নজির ও টীকা সহ প্রমাণ করিয়াছেন। বাহুল্য ভয়ে আর অধিক উদ্ধৃত করিলাম না। আমরা কিন্তু জানি, আমার এই বন্ধুটিকে রবিবাবু জানেন না, এবং ইহার প্রকাশিত অপ্রকাশিত কোন রচনা পাঠ করার সৌভাগ্যই রবিবাবুর হয় নাই, তথাপি বন্ধুবরের এই ধারণা, কিন্তু কেবলই যে আমার বন্ধুবর একাই সহদয় কবি রবীন্দ্র বাবুর অসামান্য প্রতিভার স্ফুলিঙ্গ স্বরূপ এই কণিকার কবিতাগুলির মর্ম এই ভাবে গ্রহণ করিয়াছেন, তাহা নহে, আর তাহা নহে বলিয়াই অগ্র ছুই চারি জন লেখক ও সমালোচক কণিকার কবিতার মর্ম অগ্র প্রকারে গ্রহণ করিয়াছেন দেখিয়াই, আমরা বর্তমান প্রবন্ধের এই মুখবন্ধে এতটা সময় অতিবাহিত করিলাম।

কণিকার এক একটা কবিতা-মুক্তা, যেন নিদাঘের দেবতার বারিবিन्दু,—

“শ্রাবণের মোটা ফোঁটা বাজিল যুথীরে,  
কহিল, মরিবু হায়, কার মৃত্যু-তীরে,  
বৃষ্টি কহে শুভ আমি নামি মর্ত্যমাঝে,  
কারে স্মরণে লীগে কারে ছুঃখ বাজে।”

কিন্তু যেখান হইতে এ স্মৃতি-বৃষ্টি, সে মেঘের উক্তি শুনিবেন,—

“মরু কহে অধমেরে এত দাও জল,  
ফিরে কিছু দিব হেন, কি আছে সম্বল?  
মেঘ কহে কিছু ন্লাহি চাই মরুভূমি,  
আমারে দানের স্মৃতি দান কর তুমি।”

মেঘের স্বভাবের কিঞ্চিৎ পরিচয় পাইলেন,—এখন কুয়াশার কথা শুনুন;—

“কুয়াশা নিকটে থাকি তাই হেলা মেরে,  
মেঘ ভায়া দূরে রন থাকেন গুমরে,

কবি কুয়াশাকে কয়, শুধু তাই নাকি,  
মেঘ দেয় বৃষ্টিধারা, তুমি দাও ফাঁকি।”

হায়! আমরা আপন আপন ক্ষমতা বুঝি না, যাহার খতোত্তের আলোক সম্বল নাই, সেও চন্দ্রমার সমকক্ষ হইতে চায়! মহতের সম্মান, প্রতিভার পূজা আমরা জানি না, সকলেই স্ব স্ব প্রধান, Every one to command, but none to obey. সেই জন্তই প্রধানতঃ আমাদের এতটা অধোগতি, তাই কণিকার কবি বলিয়াছেন,—

“ছাতা বলে ধিক্ ধিক্ মাথা মহাশয়,  
এ অগ্রায় অবিচার আমারে না সয়,  
তুমি যাবে হাতে বাটে দিব্য অকাতরে,  
রৌদ্র বৃষ্টি যত কিছু সব আমা'গরে।  
তুমি যদি ছাতা হ'তে কি করিতে দাদা,  
মাথা কয়, বুঝিতাম মাথার মর্যাদা;  
বুঝিতাম তার গুণে পরিপূর্ণ ধরা,  
মোর একমাত্র গুণ তারে রক্ষা করা।”

এদিকে আমাদের প্রতিভা পূজার প্রবৃত্তি নাই, অগ্রদিকে ঘরে ঘরে পরস্পরে চুলাচুলি, কিসে অগ্রকে খাট করিয়া নিজে বড় হইব, এই চিন্তাতেই বস্তু। আত্মশক্রতায় দেশ উচ্ছন্ন যাইতেছে, তাই কবি ইঙ্গিতে বলিতেছেন,—

“খোঁপা আর এলোচুলে বাধিল বচসা,  
জুটিল পড়ার লোক দেখিতে তামাসা।  
খোঁপা কয়, এলোচুল কি তোমার ছিরি!  
এলোঁ কয়, খোঁপা তুমি রাখ বাবুগিরি।  
খোঁপা কহে, টাক ধরে হই তখে খুসি,  
তুমি যেন কাটা পড়, এলোঁ কয় কুসি!  
কবি মাঝে পড়ি বধে, মনে ভেবে দেখে,  
হুজনেই এক তোরা হুজনেই এক।  
খোঁপা এগেলে চুল যায়, চুলে যদি টাক,  
খোঁপা তবে কোথা রবে, তব জয়টাক!”

কণিকার ছত্রে ছত্রে এই প্রকার সহজ সরল ভাষায় স্মৃতি ও স্মৃশিক্ষার সমাবেশ। কবি কিন্তু “বেত হাতে গুরুমহাশয়ের” মত শিক্ষা দিতে বসেন নাই। যে সকল দোষ আমাদের মজ্জাগত হইয়া পড়িয়াছে, সেগুলি— পরনিন্দা, অনধিকার চর্চা, অকৃতজ্ঞতা, অবিনয়, গর্ভ, নীচতা প্রভৃতির প্রবৃত্তি, বাহাতে নিবৃত্তি হয়, বাহাতে হৃদয়নিহিত নষ্টপ্রায় সংবৃত্তির অক্ষুরগুলি আবার সঞ্জীবিত হইয়া উঠে, কবি তাহার জন্ত প্রকৃতির কেমন সুন্দর সুন্দর ছবি আমাদের চক্ষে ধরিয়াছেন! সে সৌন্দর্য্যে মনঃ মুগ্ধ হয়, হৃদয় উচ্চতা লাভ করে। নীচতা, অন্ততঃ ক্ষণেকের জন্তও যুচিয়া যায়। এই দেখুন না,—

“নারদ কহিল আসি, হে ধরণী দেবি,  
তব নিন্দা করে নর, তব অন্ন সেবি” ?  
বলে মাটি, বলে ধূলি, বলে জড় স্থল,  
তোমাতে মলিন বলে, অকৃতজ্ঞকুল!  
বন্ধ কর অন্ন জল, মুখ হোক চূণ,  
ধূলা মাটি কি জিনিষ বাছারা বুঝুন।  
ধরণী কহিল হাসি, বালাই বালাই,  
ওরা কি আমার তুল্য শোধ লব তাই ?  
ওদের নিন্দায় মোরে লাগিবে না দাগ,  
ওরা যে মরিবে যদি আমি করি রাগ।”

মহতের মহত্ত্ব ত এইখানে, কিন্তু সে কথা কয়জনে বুঝি! কয়জনের মনেই বা এ আদর্শ উদয় হয়? আবার,—

“বাবলা শাখার বলে আশ্রয়শাখা ভাই,  
উনানে পুড়িয়া তুমি কেন হও ছাই ?  
হায় হায় সখি তব ভাগ্য কি কঠোর।  
বাবলার শাখা বলে, ছুঃখ নাহি মোর,  
বাঁচিয়া সফল তুমি পুণী চ্যুতলতা,  
নিজেরে করিয়া ভস্ম মোর সফলতা!”

আত্মত্যাগের কি সহজ আদর্শ! কথাটা যেন হৃদয়ের সঙ্গে গাঁথিয়া যায়।

অন্ত—

“চন্দ্র কহে বিশ্ব আলা দিয়েছি ছড়ায়ে,  
কলঙ্ক যা আছে, তাহা আছে মোর গায়ে!”

মহতের এ উক্তির উদারতা কয়জনে উপলব্ধি করেন? তাহা হইলে কি আর নটনকে লইয়া এত গোলযোগ হয়? না বড় লোকের চরিত্রের ছিদ্রাঘেষণে লোকের প্রবৃত্তি জন্মে?

নম্রতার আদর্শ দেখিবেন?—

“কহিল কঞ্চির বেড়া, ও গো পিতামহ,  
বাঁশ-বন হয়ে কেন পড় অহরহ ?  
আমরা তোমারি বংশে ছোট ছোট ডাল,  
তবু মাথা উচু করে থাকি চিরকাল !  
বাঁশ কহে, ভেদ তাই ছোটতে বড়তে,  
নত হই, ছোট নাহি হই কোনমতে!”

ভরসা করি, কঞ্চি-প্রকৃতি উদ্ধত মানব ইহা হইতে কিছু শিক্ষা-লাভ করিতে পারিবেন। প্রকৃত গুণী ও গুণজ্ঞের ব্যবহার শুধুন,—

“তপন-উদয়ে হবে মহিমার ক্ষয়,  
তবু প্রভাতের চাঁদ শান্তমুখে কয়,  
অপেক্ষা করিয়া আছি অন্তসিক্তীরে,  
প্রণাম করিয়া যাব, উদিত রবিরে।”

এই স্বয়ংপ্রধান দিনে, কবে আমরা কবির উক্তির মহিমা হৃদয়ঙ্গম করিব? কবে গুণীর নিকট নত হইতে শিখিব! কবির সহৃদয়তার দৃষ্টান্ত দেখিতে চান?—

“প্রাচীরের ছিদ্রে এক নাম গোত্রহীন,  
ফুটিয়াছে ছোটফুল, অতিশয় দীন,  
ধিক্ ধিক্ করে তারে, কার্ণনে সবাই,  
সূর্য্য উঠি বলে তাবে ভাল লাগে ভাই?”

এইরূপ মহত্ত্বের আদর্শে কণিকা পূর্ণ, কোন্টী রাখিয়া কোন্টী উদ্ধৃত করিব? মহত্ত্বের উক্তি আরও ছই একটা উদ্ধৃত করিবার লোভ সংকল্প করিতেছি না।

## ভিক্ষা ও উপার্জন ।

“বসুমতী! কেন তুমি এতই ক্লপণা,  
কত খোঁড়াখুঁড়ি করি পাই শশুকণা,  
দিতে যদি হয় দে মা প্রসন্ন সহাস,  
কেন মা মাথার ঘাম পায়েতে বহাস?  
বিনা চাষে শস্ত দিলে কি তাহাতে ক্ষতি?  
শুনিয়া ঈষৎ হাসি, কন বসুমতী,  
আমার গৌরব তাহে সামান্যই বাড়ে,  
তোমার গৌরব তাহে একেবারে ছাড়ে!”

এ সকল কবিতার টীকা অনাবশ্যক! আমরা সময়ে সময়ে মহতের মহত্ত্ব  
অনুভব করিতে পারি না! মহতের আত্মত্যাগে, অনেক সময় বিজ্ঞতার হাসি  
হাসিয়া সেটা বেকুবিরই নামাস্তর মনে করি, কবি তাহাও লক্ষ্য করিয়াছেন,—

“বীর কহে, হে সংসার, হায়রে পৃথিবী,  
ভাবিস্নে মোরে কিছু ভুলাইয়া নিবি!  
আমি যাহা দিই, তাহা দিই জেনে শুনে,  
ফাকি দিয়া বা পেতিস্ তার শতগুণে।”

ক্রমে আমাদের প্রবন্ধ বড় দীর্ঘ হইয়া পড়িতেছে, কণিকার কবিতাও  
আর উদ্ধৃত করিতে সাহস হয় না, তাই অনিচ্ছা-সত্ত্বেও আমাদেরকে  
হাত গুটাইয়া আনিতে হইতেছে! সংক্ষেপে কণিকার সহিত হীরক-খণ্ডের  
তুলনা করা যাইতে পারে। গ্রন্থখানি অতি ক্ষুদ্র, কিন্তু হীরকের মত উজ্জ্বল,  
আবার হীরকেরই মত বহুমূল্য, ধূরেও হীরকের তুল্য, স্পর্শমাত্রে কাচের  
পৃষ্ঠে দাগ বসে, কোথাও বা কাটিয়াও যায়।

“ধূলা কয়, কলঙ্কিত সবার গুহ্রতা,  
সেটা কি তোর নয় কলঙ্কের কথা!”

আবার—

“কত বড় আমি! কহে নকল হীরটি,  
তাইত সন্দেহ করি, নহ ঠিক খাঁটি!”

অন্ত—

“শক্তি যার নাই নিজে বড় হইবারে,  
বড়কে করিতে ছোট তাই কি সে পারে?”

কণিকার কবিতার সৌন্দর্যের ছায়ায় যে কেবল এই প্রকারের  
নীতিই প্রচ্ছন্ন আছে, তাহা নহে, যিনি সৌন্দর্যের সার, সেই সারাৎসারের  
তত্ত্বও ইহাতে পাওয়া যায়!—

“রজনী গোপনে বনে ডালপালা ভরে,  
কুঁড়িগুলি ফুটাইয়া নিজে যায় সরে!  
ফুল জাগি বলে, মোরা প্রভাতের ফুল,  
মুখর প্রভাত বলে, নাহি তাহে ভুল!”

আর এক ভাবুকও গাহিয়াছেন,—

“তোমার কার্য্য তুমি কর মা,  
লোকে বলে করি আমি?”

কে যে আমাদের চালাইতেছেন, তাহা আমরা জানি না! কাহার  
বাংশীরবে আমরা আকৃষ্ট, মুগ্ধ, কে সে বাঁশী বাজায়? কবিও বলিতেছেন,—

“বাঁশী বলে, মোর কিছু নাহিক গৌরব!  
কেবল ফুঁয়ের জোরে মোর কলরব।  
ফুঁ কহিল, আমি ফাঁকি শুধু হাওয়া খানি।  
যে জন বাজায় তারে কেহ নাহি জানি।”

‘ভুক্তিভাজন’ কবিতায় বলিতেছেন,—

“রথযাত্রা লোকারণ্য মহাধূমধাম,  
ভক্তেরা লুটায় পথে করিছে প্রণাম।  
পথ ভাবে, আমি দেব, রথ ভাবে, আমি,  
মূর্ত্তি ভাবে, আমি দেব, হৃদয় অন্তর্যামী।”

এই চারি ছন্দে কবি বক্তব্য বিষয়টীকে এমন স্পন্দরূপে ব্যক্ত করিয়া-  
ছেন! কিন্তু এইখানে একটা সন্দেহ থাকিয়া যায়, ভক্ত ত সেই আদি  
রহস্যজ্ঞানেই প্রণাম করিতেছে, আর তাহা ত, অন্তর্যামী বুঝিতেছেন!  
তাহা হইলেই যে ভক্তের বাঞ্ছা সফল হইল! অন্তর্যামী যদি আমার বাসনা

কামনা, বুদ্ধিগা হাসিলেন, তবে আমি সাকারবাদীই হই, আর শালগ্রাম শিলাকেই ভগবানজ্ঞানে ভক্তি করি, আমার মুক্তির জন্ত ত আমার অথবা নিরাকারবাদীর চিন্তার কারণ নাই !

শিশুর 'খেলানা' হইতে কবি কত উচ্চ ভাব সংগ্রহ করিয়া দিয়াছেন দেখুন,—

"ভাবে শিশু বড় হলো শুধু যাবে কেনা,  
বাজার উজাড় করি সমস্ত খেলনা,  
বড় হ'লে খেলা যত ঢেলা বলি মানে,  
ছই হাত তুলে চায় ধনজন-পানে !  
আরো বড় হবে নাকি যবে অবহেলে,  
ধরার খেলার হাট হেসে যাবে ফেলে।"

কবির আশা কি সফল হইবে না! এমন সোজা ভাষায় অল্প কথায়, এমন বড় কথা বঙ্গ-সাহিত্যে আর শুনিয়াছি, মনে হয় না।

তার পর মৃত্যুর কথা। "মৃত্যু" কথাটা শুনিলেই বুকটা যেন কেমন করিয়া উঠে! "মনে কর, শেষের সে দিন ভয়ঙ্কর" এবং "কত আর স্মৃথে মুখ দেখিবে দর্পণে" ইত্যাদি সঙ্গীতে মৃত্যুর মূর্তি আরও বিভীষিকাময় করিয়া তুলিয়াছে, মৃত্যু-নামেও প্রাণটা যেন চমকিয়া যায়, মৃত্যুর কিন্তু রূপ কি প্রকার ফুটিয়াছে দেখুন,—

### ১—মৃত্যু ।

"ওগো মৃত্যু, তুমি যদি হ'তে শূন্যময়,  
মুহূর্ত্তে নিখিল তবে, হয়ে যেত লয় !  
তুমি পরিপূর্ণ রূপ, তব বক্ষঃ কোলে  
জগৎ শিশুর মত নিত্য কাল দোলে!"

লন্যত্র—

### ২—চির নবীনতা ।

"দিনান্তের মুখ চুম্বি রাত্রি ধীরে কয়,  
আমি মৃত্যু তোর মাতা, নাহি মোরে ভয় !

নব নব জন্ম-দানে, পুরাতন দিন,  
আমি তোরে করে দিই প্রত্যহ নবীন।  
জন্ম মৃত্যু দৌহে মিলি জীবনের খেলা,  
যেমন চলার অঙ্গ পা তোলা পা ফেলা !"

কেবল কণিকাতেই যে রবীন্দ্র বাবু মৃত্যুর এরূপ বর্ণনা করিয়াছেন, তাহা নহে, যেখানে তিনি মৃত্যুর কথা বলিয়াছেন, সেখানেই যেন তাঁহার হস্তে মৃত্যু প্রিয়জনের মত মনোহর হইয়া উঠিয়াছে, অতিমাত্র তরুণ বয়সেও কবি গাহিয়াছেন,—

"মরণ রে !

তুহ মম শ্রাম সমান,  
মেঘ বরণ তুঝ মেঘজটাজুট  
রক্ত কমল কর, রক্ত অধর-পুট,  
তাপ-নিমোচন, করুণ কোর তব,  
মৃত্যু অমৃত করে দান,  
তুহ মম শ্রাম সমান !"

মৃত্যুকে এভাবে কোন কবি দেখিয়াছেন কি?—

"মরণ রে! তুহ মম শ্রাম সমান",

এমন মহাবাক্য আর কোন সাহিত্যে আছে কি না, জানি না!

"সানুরাগাং স্ত্রিয়ং দৃষ্ট্বা মৃত্যুং বা সমুপস্থিতম্।

অবিহ্বলমনাঃ স্বাস্থো মুক্ত এব মহাশয়ঃ ॥"

অষ্টাবক্র সংহিতার এ কথা যদি প্রকৃত হয়, তবে নিশ্চয় বলা যাইতে পারে, কণিকার কবি প্রকৃতই অসাধারণ ব্যক্তি!

ভগবানের নিকট এই প্রার্থনা, যেন এই মহাত্মা দীর্ঘকাল বঙ্গ-সাহিত্যের সেবা করিতে পারেন, রবির আলোকে যেন বঙ্গসাহিত্য দিন দিন অধিকতর উজ্জ্বল হইতে পারে।"

## স্ত্রী-কবি-কুঞ্জ ।

### ভিখারী ।

কান্দাল ভিখারী আমি  
এসেছি তোমার দ্বারে,  
দেবে কি কল্পনা করি  
মুষ্টিভিক্ষা অভাগারে ?  
যোগ্য কি অযোগ্য তুমি  
ভিখারী কেমনে জানে ?  
এসেছি তোমার পাশে  
কত আশা লয়ে প্রাণে !  
শুনি, দয়াময় নাম  
আশ্বাস পেয়েছে হৃদি,  
তবুও জানি না ভাল  
কি লেখা লিখেছে বিধি !  
অদৃষ্ট ভাগ্যের লিপি  
আবরিত তমোজালে,  
জানে না মানব তাই  
কি লেখা কাহার ভাল  
তাই ভ্রান্ত অন্ধ নর  
বিচার নাহিক করে,  
কুসুমের মালাভ্রমে  
অশিবিষে হৃদে ধরে !  
দেবেস্ত্র যোগেস্ত্র জন  
ভাগ্য কাছে পরাজয়,  
বিষম নিয়তিজাল  
জড়িত জগৎময় ।

নাভালাভ সব(ই) হায়,  
অদৃষ্ট সাপেক্ষ করে,  
হয়ে যায় ছাই মুঠা  
কাঞ্চন ধরিলে পরে !  
যোগ্যযোগ্য সে বিচারে  
তাই মোর কাপ্ত নাই,  
আমি যদি সোণা ধরি  
সে যে হ'য়ে যাবে ছাই ।  
যা মেলে এ ভাগ্যে মোর,  
ভুজঙ্গ বা ফুলমালা,  
দিবে যদি দাও সুধা,  
অথবা বিষের জালা,—  
না ডরি তাহার আর  
যা ভাল লিখেছে বিধি,  
ধনীরা অসহ সব(ই)  
এ যে কান্দালের হৃদি !  
যদিও ভিখারী আমি  
ধনরত্নে নাই আশা,  
আমার দরিদ্র হৃদি  
চায় বিন্দু ভালবাসা !  
তুমি ধনী, কত জনে  
বিলাও রতনরাশি !  
শুধু মোর মুখ চাহি  
হাসিও মধুর হাসি !  
তাতেই জুড়াবে মোর  
এ চির তাপিত প্রাণ,  
এ জীবন ধন মানি,  
গাব তব যশোগান !  
ত্রীরাইকিশোরী দেবী ।

## স্ত্রী-কবি-কুঞ্জ ।

২৪৭

### খুকুমণি ।

কি যেন তিমিরজালে	কান্দালের কহিমুর
বাধা ছিল হু'নয়ন,	তুই মা মুকের ভাষা,
কোথা হতে হেন জ্যোতিঃ	কি দিয়ে জানাব মাগো
কে করিল বিতরণ ?	দরিদ্রের ভালবাসা ?
কি যেন পরাণে এক	কত তপস্যার ফলে
আছিল আঁধার ঘোর,	আজ মা পেয়েছি তোরে,
জীবনের অমানিশা	গলাটি জড়িয়ে ধরে
কে আসি করিল ভোর ?	হাস মা পরাণ ভোরে !
	মাসিনা ।

### কি জানি কি আছে চাঁদে ।

কি জানি কি আছে চাঁদে	পরাণ চকোরী মোর
মধুর মধুরী ভরা,	তাই তার পানে ধার,
কি জানি কি আছে চাঁদে	আকাশে হেরিয়া চাঁদ
পরাণ পাগল করা,	মানস-কুমুদ কেন
কি জানি কি আছে ওই,	কি জানি কি মোহবলে
মোহিনী চাঁদের গায়,	হয় বিকশিত হেন ?
	চন্দ্রাবতী ।

### পাথিক ।

বসন্তের রৌদ্র তপ্ত দিবা-অবসানে—  
কর্মশ্রান্ত দেহ লয়ে, দূর গৃহ পানে—  
চলিয়াছে ধীর পদে ; অনিমেষ আঁখি,  
শ্রুতার মহান স্রষ্টি দেখিতেছে সে কি ?

অনন্ত বসন্ত-শোভা মনোমুগ্ধকর  
 প্রকৃতির চারুচিত্র অপূর্ব সুন্দর ।  
 কি হেতু মলিন তবে ? মলিনা যেমনি  
 হেমন্তে শিশিরসিক্ত স্থল-কমলিনী ।  
 বহিয়া শিথিল দেহ বিশ্বস্ত চরণ  
 চিরাভ্যস্ত পথে যেন করিছে গমন ।  
 বুঝি কোন বিষাদের তীব্র হলাহল  
 দহিছে হৃদয় তার, তরুণ কোমল ।  
 ছিঁড়িছে বীণার তন্ত্রী সুন্দর শোভন  
 ভেঙ্গে গেছে কল্পনার নন্দন-কানন ।  
 আশাময় সুখ-স্বপ্ন, জীবন উষায়  
 গেছে ভাঙ্গি, জ্বলে প্রাণ তাহারি ব্যথায় ।  
 শুধু সেই সুখময় গত জীবনের  
 প্রিয়স্মৃতি-বিজড়িত কাহিনী মধুর  
 লেখা যাহা পাতে পাতে মরমের মাঝে ।  
 আছে সেই 'স্মৃতি' আর হাহারব আছে !  
 মিশে গেছে বর্তমান অতীতের সনে  
 পরাণ মগন তার সেই মহাধ্যানে ।  
 করুণ বেদনাময় গীতীর হতাশে  
 টুটল স্বপন তার, দাঁড়াইল এসে ;  
 সেই চিরপরিচিত শূন্যময় গেহে,  
 বহিছে বসন্তবায়ু প্রবল প্রবাহে ।  
 মুক্ত গৃহাঙ্গন তলে, কহিছে যেন সে—  
 আকুল স্বনে তার, কোথা সে কোথা সে ।

শ্রীকুলবালা দেবী